

مؤلفات

عَلَى سَائِلِهِم

- ♦ عفاريت مصر الجديدة
- ♦ أنت اللي قُلت الوحش
- ♦ عمليّة نوح
- ♦ بكالوريوس في حكم الشعوب



سالم، على.

مؤلفات على سالم، - القاهرة: الهيئة المصرية
العامة للكتاب، ٢٠١٠.

٢٤٤ ص : ٢٤ سم .

المحتويات: عفاريت مصر الجديدة - إنت اللي
قتلت الوحش - عملية نوح - بكالوريوس فى حكم
الشعب .

تدعك ٠ ٤٢٠ ٤٢١ ٩٧٧ ٩٧٨

١ - القصص العربية.

أ - العنوان.

رقم الإيداع بدار الكتب ١٣١١٧ / ٢٠١٠

I. S. B. N 978 - 977 - 421 - 420 - 0

ديوى ٨١٣

مؤلفات

عَلَى سَائِلِهِ

- عفايت مصر الجديدة
- إنت اللي فقلت الوحش
- عمليّة نوح
- بكالوريوس في حكم الشعوب



الشيخ محمد صالح المنجد

الإخراج الفنى: مادلين أيوب فرج

تصميم الغلاف: صبرى عبد الواحد

عفاريت مصر الجديدة

كوميديا ساخرة

فى ثلاثة فصول

* عندما ظهرت العفاريت فى النصف الثانى من القرن العشرين. فى قسم ثانى بوليس مصر الجديدة.... ليلا...

الشخصيات

- الرائد حسن عبدالسلام : مأمور قسم ثانى مصر الجديدة
مصطفى صالح : صحفى
العريف حسين : من قوة القسم
الدكتورة سهير الخليلي : أستاذة المنطق بكلية الآداب
عبدالله الفلكي : محرر باب البخت فى جريدة الجمهورية
الدكتور أحمد أبو الفضل : أستاذ القانون فى جامعة القاهرة
د. مـنـنـسـى :
د. أبو العينين :
المهندس الانبائى : أعضاء اللجنة
الخبير أس أويتك :

إن القانون الصحيح، هو العقل الحق المتفق مع الطبيعة، والذي يدخل في نطاقه العالم بآثره: والسرمدى الذى لا يتبدل... وليس من حقنا أن نقاوم ذلك القانون أو أن نبذله، وليس فى مقدورنا أن نلغيه: ولا نستطيع أن نتحرر مما يفرضه علينا من التزامات بالتشريع أيا كان، ولسنا فى حاجة إلى أن ننظر فى خارج أنفسنا لنبحث عن شرح له أو توضيح. وهذا القانون لا يختلف فى روما عنه فى أثينا، ولا فى الحاضر عنه فى المستقبل... وهو قانون صحيح، ثابت عند جميع الأمم وفى جميع الأحقاب... ومن عصاه فقد أنكر نفسه وأنكر طبيعته.

«شيشرون»

الجزء الثانى من المجلد الثالث من قصة الحضارة

تأليف ول ديورانت

• الفصل الأول •

المكان : قسم ثانى بوليس مصر الجديدة
الزمان : ليس مهما أن نعرف الوقت الذى تدور فيه أحداث هذه المسرحية .. الأكثر أهمية أن نعرف أنها تحدث.

«المكان أنيق جدا كما لو كان جزءا من شقة خاصة أبدع صاحبها فى تأثيثها بالمقاعد المريحة والسجاد الفخم، فى الركن مكتب بسيط عليه تليفون وأنية بها زهور بالإضافة للزهور الموزعة فى الأركان .. الإضاءة هادئة ومريحة للأعصاب، اللوحات تزين الحائط، عدد من القيود الحديدية معلق على الحائط بتشكيل جميل، انها ليست «الكليشات» التى نعرفها فهى مصنوعة من البلاستيك الملون ومستخدمة كوحدات زخرفية، بابان صغيران على اليمين فوقهما لافتتان صغيرتان، إنهما حجرتا السويتش والحجز، اللافتتان مكتوبتان بخط أنيق .. المكان جميل وأنيق للدرجة التى لانصدق معها أنه قسم للبوليس إلا عندما نقرأ اللافتة المضئئة الكبيرة المعلقة على الحائط مكتوب عليها «الشرطة فى خدمة الشعب»، موسيقى هادئة تنبعث من مكان ما، الرائد حسن عبدالسلام يجلس إلى المكتب يكتب باهتمام وهو شاب وسيم فى حوالى الخامسة والثلاثين من عمره يرتدى بدلة عادية من غرفة الحجز يخرج مصطفى ممسكا بيده نوتة صغيرة وقد علق على كتفه كاميرا، يتأمل الجدران فى إعجاب شديد ..

مصطفى : مش ممكن..

المأمور : هو إيه اللي مش ممكن؟

مصطفى : مش ممكن ده يكون قسم بوليس.. آمال المتحف يبقى إيه..

المأمور : يا راجل... دى حاجات عادية قوى..

مصطفى : مش ممكن تكون عادية.. إيه اللي أنا سامعه.. دى مزيكه؟

المأمور : حاجة غريبة انك تسمع مزيكه هنا..؟

مصطفى : طبعاً غريبة.. آخر حاجة الواحد يسمعا فى قسم البوليس المزيكه..

المأمور : آمال متصور تسمع إيه؟

مصطفى : أسمع واحد بيتفقع علقه.. مثلاً...

المأمور : ياه.... ده انت آخذ فكرة غلط قوى عننا.. الكلام ده كان زمان..

مصطفى : عارف يافتدم.. بس أصل النكتة حبكت..

المأمور : أرجوك ماتجاملنيش... عجيب القسم..؟

مصطفى : عجبنى.. أوضة الحجز اللي عندك أحسن ألف مرة من البنسيون اللي أنا قاعد فيه.. أرجوك أقبض على وسيبني أنام فى الحجز ده.. أو أجر هولى مفروش، آه والله.. مش حاتعمل تعديل فى أى حاجة.. كل ماهناك انك حاتحط يافطة صغيره، الخدمة عشرة فى المية.. ينظر لحجرة الحجز مرة أخرى..

أكيد ده حلم.. سرير وحوض وراديو.. ومجلات..

المأمور : وجهاز التكييف حايركب قريب.

مصطفى : ياعينى.. عندك حق.. أصل القسم هنا قبلى.. وماعندكش مشروع كمان انك تجوزوا المجرم اللي بييجى عندهم.

المأمور : هو فى المجرم ده..؟ ماهى دى المشكلة.. مفيش مجرمين..

مصطفى : مشكلة.. ربنا يكون فى عونك...

المأمور : انت بتقول فيها..؟ أنا اللي عملت تصميم القسم ده بنفسى.. وأنا اللي أثثته.. وادى انت شايف.. أنا لوحدى اللي باتمتع بده كله.. أنا وحسين..

مصطفى : حسين مين يافتندم؟
المأمور : العريف اللى معايا .. إحنا كل قوة القسم، حسين استفاد كويس
قوى من الجو الظريف اللى هنا .. على الأقل بيعرف يذاكر
كويس..

مصطفى : يذاكر إيه يافتندم؟
المأمور : عنده الماجستير السنة دى.. ومختار موضوع صعب شوية..
الأمن والطمأنينة والحرية بالمفهوم البوليسى..

مصطفى : أنا لازم أعمل عنه موضوع لوحده..
المأمور : ضرورى.. الناس لازم تعرف النماذج الجديدة دى من الشبان
اللى ببishtغلوا فى الشرطة.. أنا لما لقيت استعداد كويس،
فضلت وراء لحد ماخد الليسانس وقدم الماجستير.. ومش
حاسبيه الا لما ياخذ الدكتوراه..

مصطفى : بصراحة يافتندم.. انت حاجة خرافية.. (المأمور يضحك بخجل).
لكن القسم ده، اتكلف كثير..

المأمور : لا والله، نفس التكاليف اللى بيتكلفها أى قسم من الأقسام
العادية، كل ما هنالك أن البند المخصص للإصلاحات والصيانة
كل سنة باستخدامه فى توضيب القسم على مزاجى، وكلها
حاجات رخيصة، المسألة مسألة ذوق..

مصطفى : بصراحة يافتندم.. انت عملت حاجات عظيمة فعلا.. ثلاث سنين
ودفاترك ماتسجلش حادثة واحدة فى مصر الجديدة..

المأمور : امسك الخشب يامصطفى.. لسه ماكملوش ثلاث سنين، لسه
ساعة.. الساعة اتناشر بالضبط يبقى مر ثلاث سنين على آخر
حادثة..

مصطفى : معجزة.

المأمور : أبدا، لا معجزة ولا حاجة، مفيش معجزات فى النصف الثانى
من القرن العشرين المسألة مسألة ايمان وعمل.. شغل.. تعب..

مصطفى : تعبت انت قوى يا قندم..

المأمور : مش قوى، أنا حظى كان كويس.. التلات سنين اللى فاتوا كانوا آخر راحة، لكن قبل كده، تعبت.. تعبت قوى.. كنت لسه جاى من بره..

مصطفى : (يفتح النوتة).. يبقى نكتب بقى..

المأمور : باختصار.. أنا كنت أول دفعتى.. سافرت بعد كده، قعدت سنة فى أمريكا وسنة فى سكوتلاند يارد فى لندن وسنة فى باريس وسنة فى موسكو.

مصطفى : كنت بتدرس إيه بالضبط..؟

المأمور : والله هو نوع جديد من الدراسة.. تقدر تسميه.. الأمن الوقائى.. حاجة كده زى الطب الوقائى.. أنا مؤمن ان جسم المجتمع زى جسم الانسان.. وما دام جسم المجتمع قوى مش ممكن يهاجمه ميكروب الجريمة، فلما جيت من البعثة أقنعت المسؤولين انهم يسمحولى أعمل التجربة دى فى مصر الجديدة..

مصطفى : اשמعنى مصر الجديدة..

المأمور : أسباب كتير.. مستوى المعيشة هنا مرتفع.. نسبة الأمية قليلة.. وفيه أسباب شخصية.. أنا اتربيت فى مصر الجديدة.. عارفها شارع شارع وحارة حارة.. لعبت الكورة الشراب فى كل حوارها.. وعاكست البنات على كل نواصيها..

مصطفى : الله.. ده انت شاعر كمان.. انشاء الله بكره فى التلفزيون، ابقى كتر من الكلام الظريف ده.. الناس بتحب الحاجات دى قوى.. حايبقى برنامج هائل..

المأمور : مابلاش حكاية التلفزيون دى..

مصطفى : إزاي.. واحد حاياخد جايزة الدولة ودرع الأمن والطمأنينة المطلقة ومش عاوزنى أعمل برنامج عنه..

المأمور : هو أنا خدت حاجة.. مش لما تفوت التلات سنين، لسه الساعة
ماجاش اتناشر..

مصطفى : مسألة دقائق.. اطمئن.. بكرة انشاء لله حانصورك فى الحفلة
وانت بتأخذ الجائزة والدرع والوسام.. وبعد بكرة.. حناخد كام
لقطة هنا.. وكام لقطة عندك فى البيت.. وعاوزك تدورلى على
كام صورة وانت لسه صغير بتلعب الكورة أو بتعاكس.. حايطلع
برنامج هایل، ده غير الريبوتاج اللى حاكتبه فى الجريدة.
(الصحنى يلم أوراقه ويستعد للانصراف)

المأمور : شكرا ياسيد مصطفى..
مصطفى : على إيه.. أنا اللى متشكر.. على الأقل حاخد عشرين جنيه فى البرنامج.
(تدخل الدكتورة سهير وهى سيدة فى حوالى الثلاثين من عمرها يبدو
عليها من مشيتها ومن مظهرها أنها تحتل مركزا مهما)

د. سهير : سعيدة..

المأمور : أهلا وسهلا..

د. سهير : قسم ثانى بوليس مصر الجديدة؟

المأمور : أيوه يافتندم.. الرائد حسن عبدالسلام مأمور القسم.. الأستاذ
مصطفى صالح الصحفى ومعد البرامج فى التلفزيون.

د. سهير : الدكتورة سهير الخليلى.

المأمور : أهلا وسهلا.. اتفضللى أقعدى يافتندم.. أى خدمة..

د. سهير : أنا جاية أبلغ عن جريمة..

المأمور : (يستوضحها وقد فوجئ) .. أفندم؟

د. سهير : جريمة.. جاية أعمل مذكرة عن جريمة..

المأمور : حضرتك من سكان مصر الجديدة؟

د. سهير : أيوه..

المأمور : (غير مصدق) .. وجاية تكتبى مذكرة عن جريمة حصلت فى
منطقتى..؟ هنا فى مصر الجديدة..

- د. سهير : أيوه..
- المأمور : (بقلق) .. قتل؟
- د. سهير : لا...
- المأمور : سرقة؟
- د. سهير : لا...
- المأمور : حادثة عربية؟
- د. سهير : لا...
- المأمور : خضيتني.. افكرت حاجة كبيرة حصلت.. الحمد &.. خلاص..
- أنا تحت أمرك.. بكرة الصبح تيجى تقدمى المذكرة..
- د. سهير : أنا باتكلم عن جريمة..
- المأمور : الست اللي ساكنه جنبك خدت الشغالة بتاعتك.. ولا كلب سيادتك الغالى ضاع..
- د. سهير : (بهدهوء) .. تفتكر الأفضل تعرف أنا جاية ليه.. والا تبدأ بالتريقة.
- المأمور : أنا آسف ياست هانم.. اتفضللى.. أنا تحت أمرك.. إيه اللي حصل؟
- د. سهير : جوزى اختفى...
- المأمور : (يمنع نفسه من الانفجار فى الضحك) .. ماهو أى جوز كده.. لازم يختفى شوية ويعدين يرجع.. ياما يرجعش..
- د. سهير : (ببرود) .. يعنى إيه؟
- المأمور : يعنى جوز حضرتك جايز يكون فى مشوار كده ولا كده.. فيه مشاوير بيقوم بيها الجماعة المتجوزين بتحتم عليهم انهم يختفوا..
- د. سهير : برضه مش فاهمة..
- مصطفى : يعنى يبقى دلوقت مع واحدة ست تانية..
- د. سهير : (تلثفت له) .. أنا مش بأسأل حضرتك..

المأمور : أرجوك يا مصطفى..

مصطفى : أنا آسف..

المأمور : أنا قصدي أقول يامدام.. جازب يكون جوز حضرتك قاعد قعده ظريفه دلوقت مع واحدة ست تانية.. الموضوع ما يحتاجش انك تبغى البوليس.

د. سهير : لأ.. أنا عارفه جوزى كويس..

المأمور : أى واحدة فى الدنيا بتوهم انها عارفه جوزها كويس..

د. سهير : أنا مش أى واحدة.. أنا مش ممكن أتوهم حاجة.. وعارفة اللى باقوله كويس أنا شغلتنى أنى أعرف اللى بأقوله.. أنا استاذة فى كلية الآداب والدكتوراه بتاعتنى فى المنطق..

المأمور : (تستولى عليه الجدية).. أنا آسف يا دكتورة.. اعذرينى.. من ثلاث سنين ما حصلش حاجة فى منطقتنى.. وده اللى مخلينى مش مصدق..

د. سهير : لأ.. صدق.. المرة دى فيه جريمة بحق وحقيقى..

المأمور : هو جوز حضرتك بيشغل إيه..؟

د. سهير : الدكتور أحمد أبو الفضل أستاذ القانون فى كلية الحقوق جامعة القاهرة..

مصطفى : (يخرج أوراقه).. الموضوع إحلو.. نطلع الورق..

المأمور : ليه أعداء..؟

د. سهير : لأ..

المأمور : متأكدة..؟

د. سهير : متأكدة..

المأمور : فيه حد يستفيد من خطفه.. أو بمعنى أصح من اختفائه..؟

د. سهير : ما أعتقدش..

المأمور : مش مسألة اعتقاد.. أنا عاوز أعرف على وجه التحديد..

د. سهير : (فى حيرة)... لأ..

المأمور : غنى..؟

د. سهير : رصيدنا فى البنك اتناشر جنيهه..

المأمور : طيب.. اتفضللى انتى يادكتورة.. وأنا حاعمل اللازم.. روحى انت

نامى واستريحى وماتفكريش فى الموضوع ده خالص.. وبكرة

الصبح انشاء الله الساعة تمانية تعالى وأنا حاعمل كل اللازم،

وأوعدك انى حاجيب لك الدكتور أحمد بنفسى..

د. سهير : شكرا.. بس لو سمحت أكتب مذكرة بالموضوع ده.. عشان عاوزة

نمرة المذكرة.

المأمور : بإذن الله.. حانعمل كل حاجة..

د. سهير : أنا عاوزة سيادتك تكتب المذكرة دلوقت..

المأمور : ليه...؟

د. سهير : وليه ماتكتيهاش..؟

المأمور : طب بلاش الصبح.. خليها الساعة واحدة..

د. سهير : وإيه اللى حايقعدنى للساعة واحدة..

مصطفى : لامؤاخذة ياحضرة الرائد.. اسمح لى أشرح لها بصراحة..

المسألة ان دفاتر القسم لازم تفضل نضيقة لحد الساعة اتناشر

وخمسة.. وبكده يبقى فات ثلاث سنين من غير حوادث ويعدين

الدفاتر دى حاتروح الوزارة وبكرة بالليل الرائد حسن عبدالسلام

ياخد جائزة الدولة ودرع الأمن والطمأنينة المطلقة.. مطلوب من

حضرتك انك تيجى تعملى المذكرة الساعة واحدة.

المأمور : أو اتناشر ونصف.. أو اتناشر وربع..

د. سهير : أنا آسفة قوى.. جيت فى وقت غير مناسب.. بس كل الحاجات

دى.. ماتقنعنيش انى أستنى للصبح، اتفضل لو سمحت خد

أقوالى وأكتب المذكرة وادينى نمرتها..

مصطفى : أرجوكى يا مدام.. دى مسألة مستقبل.. ده وسام وجائزة الدولة

ودرع الأمن والطمأنينة المطلقة.

د. سهير : أمن وطمأنينة مين..؟

مصطفى : الناس طبعاً...

د. سهير : وأنا مش ناس.. أنا الليلة دى مش حانام مطمئنة ولا آمنة..

إلا بعد ما ياخذ اجراء فى الحادثة دى.. وعموما.. إذا كان حضرة المأمور حايفضل مصلحته الشخصية على الأمن والطمأنينة.. يبقى أنا حاخرج من هنا واخذ اجراء تانى.

المأمور : خلاص يا مصطفى.. الدكتورة عندما حق.. انا اللي كنت حارتكب

أكبر خطأ فى حياتى.. اتفضلى يادكتورة أنا آسف جدا..

(يجلس إلى المكتب وتعلو وجهه صرامة)

مصطفى : يا جماعة.. أرجوكم الدنيا ما طارتش.. أرجوكم يادكتورة.. فكرى

شوية حرام عليكى ده شقا سبع سنين، أربع سنين شغل ليل ونهار

لحد ما وصلنا للتلات سنين دول.. مش حايجصل حاجة لما

تستنى للصبح.. النهار له عنين..

المأمور : ماتسمعيش كلامه.. اتفضلى يادكتورة..

مصطفى : أرجوكم يا حضرة الرائد..

المأمور : (بحزم).. أستاذ مصطفى، انت بتعطلى كده، مش المهم آخذ

الجايزة ويتعمل لى زفة.. المهم ما انساش انى ضابط بوليس..

(يكتب).. بمعرفتى أنا.. فتح المحضر فى تمام الساعة الحادية

عشرة والنصف حيث حضرت لنا الدكتورة سهير الخليلي

وقدمت البلاغ التالى.. الاسم السكن ٦٧ شارع السلام بمصر

الجديدة.. السن ثلاثين سنة طبعاً.

د. سهير : وعرفت منين..؟

المأمور : مفيش واحدة عندها أكثر من ثلاثين سنة.. دى قاعدة.. جوز

حضرتك اختفى بقى له قد إيه..؟

د. سهير : من ساعة تقريبا..

المأمور : (يقفز صارخا كاللأسع) .. ساعة؟ حضرتك قلتى ساعة؟ ..
الكلمة اللى أنا سمعتها دلوقت.. ساعة؟ أستاذ مصطفى.. الكلمة
اللى انت سمعتها دلوقت.. ساعة؟ بتقولى ساعة يا ست هانم؟ ..
د. سهير : أيوة ..

المأمور : (منفجرا) أيوة .. أيوة يعنى إيه ..؟
د. سهير : أرجوك ماتفقدش اعصابك عشان تعرف تقدر الموقف مظبوط
وتشوف الحادثة بوضوح.

المأمور : الموقف واضح يا ست هانم.. حضرتك أستاذة فى المنطق وجاية
تتفلسفى علينا وتقدمى بلاغ ان جوزك اختفى بقاله ساعة .. لا
يا ست هانم.... الحكاية مش كدة.. الحكاية انها مؤامرة سيادتك
مشتركة فيها عشان تضيعوا على الجائزة والوسام.. ياريتنى
ماكنت كتبت حاجة .. شايف ياسيد مصطفى.

مصطفى : ماهو أنا اترجيتك انك ماتكتبش حاجة .. انت اللى أصريت.
المأمور : بس أنا مش حاسيب حقى .. أنا حاروح الوزارة وأبهدل الدنيا ..
قطعا عصام هو اللى باعتك.

د. سهير : عصام مين؟ أنا محدش بعتنى...
المأمور : مفيش غيره عصام.. مأمور الدرب الاحمر.. هو اللى بيعقد
على وياما عاكسنى وكنت أنا باسكت. لكن المرة دى مش
حاسكت.

د. سهير : ماتسكتش.. ابقى اعمل اللى انت عاوزه.. بس بعد ماتكتب
المذكرة..

المأمور : شوف ياخويا الست بتتكلم ببرود إزاي..
د. سهير : (صارخة بأعلى صوتها) .. كمل المذكرة وبلاش اهانة ياأستاذ،
احترم نفسك واشتغل..

المأمور : (بصوت هادئ يقترب من الهمس) .. اختفى بقى له ساعة؟ ..
د. سهير : (تعود إلى برودها التقليدى) .. أيوة..

المأمور : (يأدب شديد جدا) .. سؤال لسيادتك بصفتك أستاذة فى المنطق
إذا واحد اختفى من ساعة .. نقدم بلاغ للبوليس، والا نسيبه لما
يرجع ونبقى نسأله هو كان فين..؟

د. سهير : مش مهم اختفى بقى له قد إيه..؟

المأمور : (منفجرا) .. آمال إيه هو اللى مهم .. المهم يبقى إيه..؟
(الدكتورة تصمت)

المأمور : ردى على أرجوكى..

د. سهير : لما تتكلم بطريقة متحضرة..

المأمور : (يكنم ثورته) .. لو سمحت .. المهم يبقى إيه..؟

د. سهير : الطريقة اللى اختفى بيها .. المهم، هو اختفى إزاي..

المأمور : الطريقة .. احكى لى بقى ياستى .. اختفى إزاي..؟

د. سهير : إحكى بالتفصيل..؟

المأمور : إحكى بالطريقة اللى تريحك..

د. سهير : إحنا كنا فى السينما بنتفرج على فيلم صوت الموسيقى .. خرجنا
من السينما ركبنا تاكسى وروحنا البيت .. الأسانسير كان
عطلان..

المأمور : مهمة قوى التفاصيل دى؟

د. سهير : خاتعرف بعدين انها مهمة ...

المأمور : اتفضللى كملى..

د. سهير : طلعنا على السلم .. إحنا ساكنين فى الدور السادس .. دخلنا
الشقة وقفلنا الباب بالترباس من جوه .. وبعدين دخلنا أوضة
النوم .. (كأنها تحاول التذكر) .. قفلت الباب وانا .. لا أعتقد
أحمد هو اللى قفل الباب.

المأمور : أرجوكى يامدام .. أدخلى فى الموضوع وخلي التفاصيل لبعدين ..

د. سهير : أنا كنت واقفه جنب الدولاى وهو كان واقف جنب الشماعة وبدأ
يقلع الجاكete .. وفى نفس اللحظة دى...

المأمور : أيوه..

د. سهير : النور انسحب.. الكهرباء انقطعت لمدة ثانية واحدة.. ولما رجع النور تانى.. مالمقيتش جوزى.. اختفى..

(يحدق فيها برهة ثم يعتدل فى جلسته ويخرج سيجارة يشعلها وينفض دخانها فى هدوء شديد)

مصطفى : (منشغلا بالكتابة).. أهو الموضوع كده ينفع فى الصفحة الأولى..
المأمور : حضرتك متأكدة انك..؟

د. سهير : أيوه.. أستاذة فى الجامعة.. وأدى بطاقتى الشخصية (تخرج البطاقة من حقيبته يدها).. وتقدر تتصل بعميد كلية الآداب فى بيته وتسأله..

المأمور : بتشوفى أفلام بوليسية كتير..؟

د. سهير : ماعنديش وقت...

المأمور : حصل قيل كده أن الدكتور أحمد اختفى بالطريقة دى.. أو بطريقة ثانية.

د. سهير : قصدك إيه..؟

مصطفى : سيادة المأمور قصده يعرف، الحكاية دى بتحصلك كتير..؟

د. سهير : حضرتك صحفى وبشتغل فى التلفزيون كمان..؟

مصطفى : أيوه.. وباكتب للاذاعة..

د. سهير : يبقى شئ طبيعى.

مصطفى : إيه هو اللى طبيعى..؟

د. سهير : انك تبقى قليل الأدب..

مصطفى : دكتور..

د. سهير : أرجوك يا أستاذ.. لم لسانك.. أنا مش مجنونة، ومش باتخيل حاجة ولا باخترع حاجة.. الحكاية حصلت زى أنا مباحكى بالضبط.. النور انطفى لمدة ثانية واحدة ولما رجع كان جوزى اختفى..

المأمور : دورتي تحت السرير..

د. سهير : ليك حق تتريق.. لكن أنا حاجاب.. أيوة دورت تحت السرير.. وفي الحمام.. وفي الدولا.. دورت في كل حته في الشقة.

المأمور : مش جايز خرج من الشقة..

د. سهير : مش ممكن، الترياس كان مقفول من جوه.. النور انطفى ثانية واحدة ثانية واحدة ماتكفيش انه يخرج من الشقة.. أرجوك صدقتني.. اللي أنا باقوله حصل..

المأمور : أنا مصدق يادكتورة، وحاصل كل الاجراءات.. ويرضه حاحد الجايزة والوسام.. ماتفكرش انتي واللي باعتك انكم حاتحرموني من الجايزة.

د. سهير : ياسيدي ماتاخذ الجايزة والا ماتاخذهاش دي تهمني في ايه.. أنا يهمني انكم تصدقوني، وترجعولي جوزي..

المأمور : اطمنى.. حاتكوني مبسوطه.. حارجعولك.. ومش حاكثي بكدة حاعمل لك محضر بلاغ كاذب وازعاج للسلطات.. وماتفكرش أنك عشان أستاذة في الجامعة حاتهزيني.. أنا لا يمكن أسمع بعث من النوع ده يحصل في مصر الجديدة.

د. سهير : أرجوك.. صدقتني.. الكارثة مش أن جوزي يختفي.. الكارثة انك مش مصدقتني.. وبالتالي مش حاتعمل حاجة عشان يرجع..

المأمور : لأ.. ولا كارثة ولا حاجة.. خلاص مصدق.. والصبح انشاء الله حاجيبهولك من تحت طقاطيق الأرض وأخذ عليه تعهد إنه مايعملش معاكى الحركات دي ثاني.. مبسوطه ياستي..

د. سهير : (في يأس شديد).. أرجوك.. حاول تصدقتني.. أنا ماليش مصلحة أبدا اني أكذب أو أخترع حاجة.. أرجوك (في هذه اللحظة يخرج العريف حسين من غرفة التليفون وهو شاب في حوالى الثالثة والعشرين يرتدى الزي العسكري).

المأمور : أيوه يا حسين.. تعالى.. فيه حاجة..

العريف : اشارات تليفونية يافتندم ..

المأمور : ورينى ..

(يقرأ الاشارات التليفونية وقد جحظت عيناه.. يتحسس جبهته وهو

يترنح كأنما يتعرض للحظة إغماء)

مصطفى : خير يافتندم .. حصل حاجة ..

المأمور : إشارات من بوليس النجدة ..

مصطفى : مالك يافتندم .. وشك أصفر ..

المأمور : لا أبدا .. خير .. الاشارة بتقول ان النور انطفى فى عدة أماكن

لمدة ثانية .. ولما النور رجع تانى .. اختفى واحد ..

(مصطفى تستولى عليه دهشة شديدة ويهم بالكلام ثم يتوقف ويخرج

مسرعا).

مصطفى : (منفعا للخارج) .. عن اذنكم .. ألحق الجورنال قبل مايطبع ..

المأمور : مصطفى .. مصطفى .. مصطفى ..

(جرس التليفون يدق فيرفع السماعة ويصل لنا صوت المتكلم واضحا

ونقيا ..)

المأمور : ألو ..

الصوت : الرائد حسن عبدالسلام مأمور قسم ثانى مصر الجديدة ..

المأمور : أيوه أنا حسن ..

الصوت : سيب القضية اللى فى ايدك .. مش حاتعرف تعمل فيها حاجة ..

انت مش قدنا ..

المأمور : مين اللى بيتكلم .. ألو .. علق النمرة دى يا حسين .. ألو .. مين اللى

بيتكلم .. مين اللى بيتكلم ..

(اختفاء تدريجى للإضاءة)

المشهد الثانى

- فى قسم البوليس

- بعد مرور سبعة أيام

المأمور يرقد باسترخاء على أحد المقاعد يتصفح أحد المراجع

الضخمة وقد بدا عليه الإرهاق الشديد

(تدخل الدكتورة سهير)

د. سهير : يا سيادة المأمور...

(يتنبه بصعوبة)

المأمور : دكتورة سهير..بقى لك هنا كثير..

الدكتورة : لا أبدا.. أنا لسة داخله..

المأمور : الظاهر أنا نمت وأنا قاعد.. مفيش أخبار عن الدكتور أحمد..

الدكتورة : أنا جاية أسألك..

المأمور : اشمعنى أنا.. (بحزن).. ليه الناس بتفترض انى عارف كل حاجة

كل شوية واحدة ست تسألنى عن ابنها أو جوزها.. بصى..

(ياخذها للنافذة) شوفى كام واحدة قاعدة على الأرض..

د. سهير : كل دول من مصر الجديدة..؟

المأمور : أبدا.. أغلبهم من الأقاليم، ومن الأقسام الثانية.. مابيروحوش

يسألوا فى أقسامهم ليه..؟

د. سهير : عارفين انك أول واحد حايعرف الحقيقة..

المأمور : غريبة..

د. سهير : أو جاييز عارفين انك الوحيد اللي حتساعدهم..
المأمور : هو ده اللي بيعذبني.. خايف لماوصلش لحاجة.. والستات دى
عدها بيكثر.. بالليل بأحلم بيهم.. بيكتروا.. وبملوا الشوارع
قدام القسم يحاوطوا القسم.. ويكتروا.. وملوا كل شوارع مصر
الجديدة.. ستات كتير قوى آلاف.. قاعدين على الأرض
ساكتين.. بيستنوا.. عينيهم حزينة.. آلاف العينين بتبص لى..
وأنا أخرج لهم قدام باب القسم وأصرخ فيهم.. أقول لهم أرجوكم
روحوا.. روحوا بيوتكم.. اطمئنوا ناموا فى سرايركم وسيبوني
أشتغل.. محدش يبص لى.. سيبوني أشتغل وأنا أرجع لكم
رجالكم تانى.. وأزعق قوى.. لكن صوتى مابيطلعش خالص
ومحدش منهم سامعنى.. وأصيحى من النوم.. ألاقى أمة قاعدة
جنبى وتبص لى بصة غريبة.. نفس النظرة.. نفس نظرة الستات
الى بيستنوا.. خايف قوى.. أول مرة أمسك قضية أحس انى
مش قدها.

د. سهير : أستاذ حسن.. اسمح لى أنه لك أستاذ حسن.. أصلى مابفهمش
كويس فى الألقاب البوليسية.. مفيش حد يعرف يمك القضية
دى فى مصر كلها الا انت.. صحيح هى قضية صعبة.. بس تأكد
أن موهبتك ودراسك وإيمانك العميق حاتخليك تعرفها وتحلها..
وتأكد أن العقل البشرى عنده قدرة أنه يعرف أى حقيقة.. دى
حاجة أنا عارفها ودارساها كويس ماتسمحش للمكالمات
التليفونية انها تأثر عليك وتحطم أعصابك.. تأكد مفيش حد
يعرف يمك القضية دى غيرك..

المأمور : للأسف.. الوزارة كمان بتقول كده..

د. سهير : حاول تمام كفاية.

المأمور : أنا مانمتش من تلت أيام.. بافكر فى عشرات الاحتمالات..
واكتشفت انى ما عرفش أشتغل لوحدى..

د. سهير : دى حقيقة مهمة .. حتى الأنبيا مايعرفوش يشتغلوا لوحديهم..
المأمور : ولذلك شكلت لجنة على أعلى مستوى عشان ندرس الظاهرة دى
سوا .. وسيادتك عضوة فيها عن الجامعة .. المنطق مهم قوى فى
قضيتنا عشان مانشطش بس برضه أنا مش عارف أبدا منين ..
د. سهير : المكالة التليفونية .. حاول تقبض على صاحب المكالة التليفونية ..
فعلا .. هو ده أول الخيط .. المكالة اتضح انها من مكتب تليفون
المأمور : عدلى.

شئ منطقى .. مش معقول حايتكلم من شقة أو دكان ..
د. سهير : كل مكاتب التلغراف والتليفون فى القاهرة دلوقت عليها رقابة
المأمور : شديدة جدا فيه متين عربية بوليس جاهزين باللاسلكى فى
جميع أنحاء القاهرة وأربع طيارات هليوكبتر .. أى مكالة من أى
تليفون معمول حساب أن صاحبها يتمسك فى خمستاشر ثانية ..
بس تفكرى حايتكلموا تانى ..

د. سهير : أيوة ..
المأمور : ليه ؟
د. سهير : الغرض من المكالمات دى انهم يهدوا أعصابك وتسبب القضية ..
وده معناه انهم خايفين منك انت بالذات .. وده اللى مخلىنى
مطمئنة انك انت بالذات اللى تعرف تحل القضية ..

المأمور : دكتورة .. أرجو ماتكونيش بتجاملىنى ..
د. سهير : أبدا .. مش مجاملة .. أنا مطمئنة انك انت اللى حاترجعلى
جوزى ..

المأمور : انشاء الله .. أنا حادخل أغسل وشى بسرعة .. اللجنة زمانها
جاية وعاوز أكون فايق ..

(يدخل غرفة الحجز بينما تقف الدكتورة تتأمل خريطة مصر الجديدة)
(يدخل مصطفى ومعه أربعة أشخاص هم أعضاء اللجنة المشكلة لبحث
ظاهرة الاختفاء .. يخرج المأمور وهو يجفف وجهه .. بمنشفة صغيرة).

المأمور : أهلا وسهلا .. اتفضلوا .. أقعدوا .. مش لازم على الترابيزة
زى الاجتماعات الرسمية .. أقعدوا على راحتكم .. أرجو كل
واحد يقدم نفسه .. الرائد حسن عبدالسلام مأمور
القسم .. دكتورة سهير الخليلي أستاذة المنطق ومندوبية
الجامعة.

د. أبو العنين : الدكتور أبو العنين محمد عن وزارة البحث العلمى ..
د. منسى : الدكتور محمد منسى .. عن كلية الطب.
المهندس الانباجى : المهندس عبده الانباجى عن ادارة الغاز والكهرباء ..
الخبير : (يتكلم العربية بلكنة اجنبية) .. أس أوبتك .. خبير اليكترونات
وكهرباء ..

الصحفى : مصطفى صالح .. صحفى وصديق للرائد حسن .. مش
عضو فى اللجنة بس يهمنى أسمع مناقشاتكم وأوعدكم
انى مش حانشر الا اللي توافقوا عليه.
(المأمور يقف امام الخريطة ويبدأ فى الكلام)

المأمور : فى الجرائم العادية بنعمل اجتماعات على أعلى المستويات
عندنا فى الوزارة .. لكن الحاجات اللي حصلت بتشكل
ظاهرة لايد فيها من الاستعانة بحضراتكم .. المسألة
ببساطة .. ان فى الأماكن دى .. هنا .. وهنا .. وهنا .. وهنا ..
النور انطفى فجأة ولما رجع تانى اتضح ان فيه شخص
اختفى.

المهندس الانباجى : لحظة واحدة من فضلك .. الأستاذ مصطفى نشر الموضوع
ده من غير ما يرجع لمؤسسة الغاز والكهرباء .. احنا كشفنا
على كل أكشاك الكهرباء فى كل الأماكن دى .. ومعانا
المستر أوبتك الخبير .. واتضح أن كل التوصيلات سليمة
وماحصلش عطل أبدا فى الأماكن اللي سيادتكم بتقول
عليها .

مصطفى : بس ده حصل..
الانبياءى : سيادتك شفقتها بنفسك.
مصطفى : لأ.. بس فيه ناس شافتها..
الانبياءى : كذب وتخريف والحكاية كلها كلام جرايد.. إلا إذا كان فيه
عقاريت بقى.
المأمور : ياباشمهندس.. لو سمحت سيبنى أخلص كلامى وبعدين
اتكلم..
الانبياءى : أنا بس باسجل اعتراضى على الكلام اللى اتكتب علينا..
الكهريا بتاعتنا سليمة مائة فى الماية.. أنا كشفت عليها
بنفسى ومعايا الخبير.. عاوزين تصدقوا كلام الجرايد
وتكذبوا الخبير.. راجل بياخد خمسمائة جنيه فى
الشهر..
الخبير : مش ممكن مفيش كهرياء.. مش ممكن فيه عقاريت..
د. سهير : نسمع الأول كلام الرائد حسن...
المأمور : (يقرف شديد).. هو ده بس اللى عندى.. اتفضلوا انتم
بقى اتكلموا.
د. أبو العينين : قبل ما ندخل فى الموضوع عاوزين نعدل مواعيد اللجنة..
بدال ماهى من ستة نخليها من أربعة.
د. منسى : ليه..
د. أبو العينين : عشان ناخذ أوفر تايم.. من ستة مش حناخذ أوفر تايم..
إيه بتيصوا لى ليه.. إحنا ناس وانا مصاريف المعيشة
غلبيت.. إحنا مايجبش ننكسف من الحق.. هو إحنا
بنسرق.. نخليها من الساعة أربعة..
د. سهير : واضح انك ببحث الموضوع ده كويس.. من البحث العلمى
حضرتك مش كده..
د. أبو العينين : أيوه..

المأمور : خلوها زى ماتخلوها .. بس أرجوكم ساعدوني .. اتفضللى يادكتورة سهير .

د. سهير : تبدأ المظاهرة بأن النور يطفى .
الانبىابى : (مقاطعا) .. مفيش حاجة إنطفت بلاش إفترا .. ماتودوناش فى داهية .

(يهجم عليه المأمور ويمسكه من رقبته)
المأمور : ماهو ياتصدق ان النور إنطفى يا إما حاحطك فى الحجز .. فاهم ..

الانبىابى : ده افترا من الجريدة .. عاوزين يشيلوا رئيس مجلس الادارة .

مصطفى : وإيه مصلحتنا فى كده .. ؟
الانبىابى : رئيس مجلس الادارة فهمنى على كل حاجة .. هو صديقى ودايما بيقتد معايا .. إمبارح متغدين سوا .. رئيس التحرير بتاعكم متفاظ عشان قطع عنه النور ولذلك اخترع الحدوته دى كلها .

المأمور : (صارخا) .. يا حسين ..
حسين : أفندم ..

المأمور : حط الأفندى ده فى الحجز (حسين يمسه ويجذبه بقوة داخل غرفة الحجز) .

المأمور : (صائحا فى اللجنة) .. فيه حد تانى مش مصدق أن النور إنطفى (يهدا) أنا أسف يا جماعة .. أنا اعصابى ماتستحملش الكلام الفارغ اللى بيقوله ومسئوليتى كبيرة .. قدروا موقفى وحجم المسؤولية .. اتفضللى يا دكتورة ..

د. سهير : فيه كذا احتمال .. هل هى عصابة تابعة لدولة اجنبية بتسلط أشعة معينة على الناس .. سلاح سرى مثلا ..

د. مــــنى : قصد سيادتك أشعة بتحول المادة لطاقة وترجع تحولها
لمادة تانى فى مكان تانى..

(صوت المهندس الانبأى يصيح من الداخل وصوت تحطيم بعض
الأشياء)

الانبأى : (من الداخل).. قصدكم يعنى أن رئيس مجلس الادارة اللى
فات أحسن من اللى موجود دلوقت.

المأمور : اتفضلوا واصلوا كلامكم..

د. سهير : ده احتمال.. فيه احتمال انها عصابة من كوكب آخر
بتستغل أشعة من نوع مانعرفوش.

الانبأى : (من الداخل).. ولما هى عصابة من كوكب تانى.. بتقولوا
مؤسسة الغاز والكهرباء ليه؟ ماتتشطروا عليها .. (صارخا
وهو مستمر فى تحطيم اثاثات غرفة الحجز) خرجونى من هنا
ياعالم يامفتريين.

د. منسى : مش حانعرف نشتغل كده..

المأمور : (يعتمد راسه بين كفيه فى ياس).. يا حسين.. طلع
الباشمهندس..

(حسين يدخل غرفة الحجز ويعود ومعه المهندس
الانبأى).

حسين : كسر كل حاجة فى الأوضة.. الحوض والبيك أب وقطع
المجلات والمرتبة.

الانبأى : وحارفع عليكم قضية كمان..

المأمور : (متمالكا اعصابه).. أنا آسف ياباشمهندس.. مؤسسة الغاز
والكهربا مالهاش دعوة باللى بيحصل.. انتم مش غلطانين
فى حاجة أبدا.. أنا جايك عشان تساعدنى.. تدينى
معلومات عن الكهرباء.. لكن اتضح إنك ماتعرفش تفكر إلا
فى رئيس مجلس الادارة القديم والجديد.. أرجوك

سيبنا.. احنا متشكرين قوى. وسيب لنا الخير
يساعدنا..

الانبيأى : عشان تهزأوه هو راخر.. ده راحل بياخد خمسمائه جنيه
فى الشهر.. اسيبه هنا عشان يتهزأ..

المأمور : أرجوك ياباشمهندس.. سيبنا ومالكش دعوة بالراجل..
اتفضل مع ألف سلامة وحقك على.. أنا آسف جدا
وأرجوك انك تقبل اعتذارى، وروح اعمل اللى عاوز تعمله.
الانبيأى : (يرت على كتف الخير وهو خارج).. يامستر أوبتك.. لو حد
كلمك كلمة واحدة تعال لى وأنا أدخلك على رئيس مجلس
الادارة على طول..

المأمور : (صارخا بأعلى صوته).. أخرج بره يااستاذ.. (معتذرا
للخير).. أنا آسف ياسيد أوبتك..

الخير : اتفضل حبيبى.. دى مسألة داخلية..

المأمور : كنا بنتكلم فى إيه..؟

د. سهير : احتمال أن فيه عصابة من كوكب تانى بتستعمل أشعة من
نوع مانعرفوش.

الخير : موش ممكن فيه أشعة وقف كهربا..

المأمور : شوف ياخواجا.. كل حاجة فى الدنيا ممكن.. أنا حاشرح
لك الحكاية تانى.. امبارح طيارة شركة مصر للطيران اللى
جاية من أثينا وهى نازلة المطار.. انطفى النور ولما نورت
تانى اختفى الطيار والمساعد.. عرف يلحق الطائرة قبل ما
ندخل فى برج المراقبة.. أول إمبارح.. أتوبيس سياحى كان
ماشى فى شارع العروبة.. فجأة انطفى النور جواه واختفى
السواق والعربية دخلت فى عمارة ومات خمسة.. من
ساعتين واحد جراح مشهور فى مستشفى هليوبوليس فاتح
بطن عيان وقاعد يشتغل.. انطفى النور واختفى الجراح..

دى حاجات حصلت.. فكر معانا بقى.. ايه اللى ممكن
يطفى النور ويرجعه تانى.. سلو بلدنا تقول عفاريت..
عندكم تقولوا ايه..؟

الخبير : مش ممكن فيه عفاريت.. فيه علم.. فيه كهريا..
مصطفى : اعتقد الدكتور أبو العينين مندوب البحث العلمى يقدر
يقول لنا رأيه.

د. أبو العينين : مش مسالة رأيي.. أنا ما أقدرش أقول رأيي ارتجالا.. لابد
من عمل أبحاث.. وإحنا مانقدرش نعمل أبحاث الا بعد
يوليو..

د. منسى : اشمعنى..
د. أبو العينين : عشان الميزانية الجديدة.. حاتبلغ لنا فى نصف يوليو
تقريبا.. ونقدر نشتغل من أول أغسطس..

د. سهير : مفيش عندكم فلوس خالص..؟
د. أبو العينين : فيه بس كلها مخصصة لأبحاث أخرى..

مصطفى : مش ممكن تخصيص جزء منها..؟
د. أبو العينين : ياريت..

المأمور : أنا ما أقدرش استنى لحد أغسطس والحوادث دى
بتحصل كل يوم والستات دول قاعدين لى بيستنوا
رجالتهنم.. كل الأبحاث اللى عندكم تتوقف وكل الباحثين
اللى فى الوزارة واللى فى المركز القومى للبحوث يتفرغوا
لدراسة الظاهرة دى..

د. أبو العينين : مش ممكن.. فى الحالة دى حانخسر مبالغ كثيرة بنصرف
منها بقى لنا اتناشر سنة على دودة القطن وعلى قشر
البصل والرجلة والخيار.

المأمور : الخيار يقدر يستنى هو وقشر البصل.. بس أنا ما أقدرش
استنى.

د. أبو العينين : ودودة القطن.. القضاء على دودة القطن.. عاوزنا نوقف الأبحاث بتاعته دى مسألة ثروة قومية..

المأمور : يعنى تفضل ان أحنا نأجل شغلنا للميزانية الجديدة؟
د. أبو العينين : لأ.. مش حاناأجل شغلنا.. حانجتماع برضه كل يوم الساعة أربعة لحد ماتيجى الميزانية نبتدى نعمل أبحاث...

د. منسى : نجتمع نعمل إيه..؟

د. أبو العينين : نتكلم..

المأمور : دكتور أبو العينين.. معاك عربية؟

أبو العينين : أيوة...

المأمور : (بهدهو شديد).. اتفضل قوم روح.. لأنك لو قعدت أكثر من كده حاقوم أعمل عليك أبحاث من نوع مش معترف بيه رسميا.. ولا كلمة.. ماتقولش ولا كلمة ابقى تعالى فى أغسطس.. اتفضل.. مع السلامة.

(يخرج بهدهو)

المأمور : لا مؤاخذة ياسيد أوبتك..

الخبير : خد راحتك حبيبي.. دى مسألة داخلية..

حسين : أسجل ده ياقتدم فى محضر الاجتماع..؟

المأمور : بالحرف الواحد.. يبقوا يرفدونى بعبدين.. أنا يهمنى أوصل للحقيقة فى أسرع وقت وبأى طريقة.. أكتب ده كمان وخط خطين تحت أى طريقة.. أما ناس أغبيا صحيح.. كل واحد مش هامه حاجة.. كل واحد فاكر ان اللى بيحصل للناس مش حايعصل له.. كل واحد حاطط ايده فى مايه باردة..

د. منسى : معلش.. وجودهم ماكانش حايفيد بحاجة.. أنا عاوز أسأل سؤال.. تحرياتكم عن الجماعة اللى اختفوا أثبتت إيه..؟

المأمور : ما أثبتتisch حاجة .. أنا عملت تحريات أنا والعريف
حسين .. مفيش حاجة غريبة لفتت نظرى .. كل اللي
اختفوا مايربطش بينهم حاجة .. أستاذ فى الجامعة ..
سواق .. طيار .. جراح .. فلاح .. حلاق.

حسين : أنا ليه ملحوظة يافتدم .. حاجة لفتت نظرى.

المأمور : هى إيه ..؟

حسين : ماعدا ان كل اللي اختفوا رجالة .. نلاحظ ان سبعة
وتسعين فى المائة من اللي اختفوا كانوا مرجين ..

د. سهير : فعلا الدكتور أحمد جوزى كان مرج جدا ..

د. ممنى : ودى حاتوصلنا لإيه ..؟

مصطفى : نقدر نقول ان عصابة من المريخ مثلا عاوزين يفتحوا
مسرح كوميدى وبينقوله جمهور ابن نكتة.

حسين : حاجة تانية لفتت نظرى .. كل اللي اختفوا مقاس رجلهم
أربعين .. (ينظرون له فى استغراب) .. أصل أنا عملت تحريات
شاملة عن الشخص المختفى .. كل واحد له ملف ..

فعلا .. الدكتور أحمد جوزى كان بيلبس مقاس أربعين ..

د. سهير : لا .. أرجوكم حانشط بعيد ..

ضلمة .. ضلمة .. الواحد ماشى فى ضلمة ..

المأمور : أنا باقول على الحاجات الغريبة اللي لفتت نظرى .. جاز

حسين : حاجة منهم توصلنا ..

(يدخل عبده الفلكى وهو شاب فى حوالى الثلاثين من عمره، يدخل

مندهما بنظرات زائغة)

الفلكى : السلام عليكم .. الرائد حسن فىن ..؟

المأمور : أنا الرائد حسن ..

الفلكى : أنا عبده الفلكى صحفى بجريدة الجمهورية وجاى أبلى عن

حادثة إختفاء ..

المأمور : اختفاء مين..؟
 الفلكى : اختفائي..
 المأمور : اختفاءك..؟.. انت اختفيت..؟
 الفلكى : لأ.. حاخنتى.. حاخنتى النهاردة..
 المأمور : (ينظر له بارثياب) .. إنت جاي مين..؟ انت بتشتغل إيه.. يا أستاذ..
 الفلكى : باشتغل محرر فى الجمهورية.. وحاخنتى يوم الخميس الى هو النهاردة.. أرجوكم.. احمونى والنبي.. أنا فى عرضكم..
 مصطفى : فعلا.. الأستاذ زميلى وأنا عارفه كويس ومشهور فى الوسط انه متزن وعاقل و.. (لحظة).. ومرح جدا..
 (جرس التليفون يدق)
 المأمور : لو كانت مكالة منهم.. يبقى حايقموا المرة دى.. كل تليفونات القاهرة متراقبة.
 (يرفع سماعة التليفون فنستمع لصوت انسة)
 صوت الأنسة : الرائد حسن عبدالسلام.. مكالة شخصية من أسيوط..
 صوت رجالى : .. إحنا حذرناك وقلنا لك سيب القضية.. مش عاوز تسمع الكلام ليه مفيش فائدة مهما تعمل.. الأفندى الى قدامك حاخنتى..
 المأمور : آلو.. مين الى بيتكلم.. آلو.. ياترنك.. يا أسيوط..
 يامدموازيل أقبضى على الأفندى الى بيتكلم..
 (يضع السماعة ثم يرفعها ويطلب رقما) .. آلو.. الوزارة..
 ادينى خمستاشر.. آلو.. يافندم.. كلمونى دلوقت من أسيوط.. أرجوكم اعملوا رقابة شديدة على مكاتب التلفزيون والتليفون فى كل الأقاليم.. أيوة على كل الأقاليم.. حالا.. دلوقت شكرنا يافندم.. المرة دى

حايتمسك.. والله لو اتكلم حتى من الواحات. (ملتفتا
لهم).. اسمعوا يا جماعة.. المرة دى إحنا قدام تحدى واضح
وصريح.. لازم تبذل كل جهدنا عشان النور ماينطفئش..
سيد أوبتك .. ورينى شطارتك.. اللعب لعبتك.. شوف لنا
أجهزة تمنع النور انه ينطفى يالله.. دكتور منسى.. ادينى
تقرير من الناحية الطبية.. أقعد ياأستاذ فلكى.. حسين
افتح محضر بأقواله..
(الخبير يخرج مسرعا والدكتور منسى يفتح حقيبته
ويخرج منها أدواته)

المأمور : اسمك..؟

الفلكى : (يتوجع).. عبده الفلكى.. (يلتفت لمصطفى) مصطفى،
المكوجى عنده قميص ابقى قولهم فى البيت..

المأمور : خليك معايا أنا واجمد كده وخليك راجل.. ماتخافش مش
حاختقى.. بتحرر باب إيه..؟

الفلكى : مابحررش حاجة والله يابيه.. ده أنا باكتب البخت
ومسابقة الكلمات المتقطعة (يلتفت لمصطفى) مصطفى
إبراهيم أحمد اللى بيحرر الاقتصاد السياسى عنده نص
جنية خليه يوديه لمراتى..

المأمور : يا جدد انت خليك معايا.. عرفت ازاي انك حاختقى..

الفلكى : احساس يابيه.. والله يابيه أنا عمرى ماعملت حاجة فى
حد.

(الطبيب يفك قميصه وحذائه ويقبس له الضغط ويكشف عليه
بالسماعة وكل هذه العمليات تتم اثناء الاستجواب).

المأمور : احساس يعنى إيه..؟ كلمنى منطقى..

الفلكى : والمنطق ماله ومال الموضوع ده.. أصل أنا راجل حساس
جدا.. حساس انى حاختقى الليلة دى.

د. سهير : احساس زى ايه .. اوصف لى احساسك بالضبط..
الفلكى : زى ما الواحد يحس انه جعان.. زى ما الواحد بيحس انه
بيحب .. بيكره .. احساس قوى جدا ولموس .. زى
مابتحس بعظمة المزيجة .. زى مابتحس بمرارة الهزيمة..
حاجة زى كده يا دكتورة.

د. سهير : برضه مش فاهمك..
الفلكى : هى دى حاجات تتفهم .. دى حاجات الواحد يحسها بس
أرجوك يادكتور .. لقيت ايه ؟..
الدكتور : كل حاجة عادية فيك .. نبيضك سريع شوية لأنك مضطرب
ودرجة حرارتك مرتفعة لأنك عندك مبادئ أنفلونزا..
ويبدو أن عندك الغليظ تاعبك وده اللي بيخليك تحس
أنك حاتختفى.

الفلكى : أرجوك يا حضرة المأمور .. إعمل حاجة .. إحمينى..
المأمور : عاوزنى أعمل لك ايه بالضبط..
الفلكى : أنا عارف .. ؟ مش شرطة .. ؟ أهو تحمينى وخلاص..
المأمور : ماتخافش..
الفلكى : إكشفوا على الأماجورات .. إكشفوا على الأسلاك .. إكشفوا
على البرايز .. إكشفوا على الأكباس .. إكشفوا على البلدية..
المأمور : اطمئن .. احنا معانا خبير .. بياخد خمسمائة جنيه فى
الشهر ..

(الخبير يدخل ومعه ثلاثة كشافات ضخمة يسلمها على عبه
الفلكى)

الخبير : ثلاث بروجكتور .. كل واحد متصل بجنيريتور .. مولد
كهرىا .. إليكترونى أتوماتيك .. (يشير للكشافات) .. دى
مفيش كهرىا ده فيه كهرىا .. ده مفيش كهرىا .. ده فيه
كهرىا .. مش ممكن الثلاثة مفيش كهرىا .. مش ممكن.

الفلكى : مش مطمئن أبدا..
مصطفى : أستاذ عبده اطمئن.. الخبير يقول أن الثلاثة بروجكتور
مش ممكن يطفوا سوا لأنهم متصلين بتلات مولدات
أتوماتيك.. لو اتعطل واحد مش ممكن الباقيين يتعطلوا..
الفلكى : دكتور سهير.. الواد ابن اخويا عندكم فى الكلية.. أنا اللي
باصرف عليه والنبي تاخدى بالك منه.. أرجوكم يا
جماعة.. إمسكونى..
الخبير : ماتخافش حبيبى.. مش ممكن كهربيا تنطفى.. ده مفيش
كهربا.. دول فيه كهربا.. مش ممكن الثلاثة مفيش كهربا..
المأمور : بتلبس جزمة مقاس كام؟
الفلكى : أربعين.. ليه؟
المأمور : (يفتصب ضحكة).. لا ولا حاجة، بانكت.. عاوز أخرجك من
الحالة اللي انت فيها..
الفلكى : آه يانى..
د. منسى : مالك؟
الفلكى : حاسس انى حاخنتى خالص..
د. منسى : حاسس فين؟ فى بطنك.. فى قلبك.. فى ضهرك..
حاسس فين؟
الفلكى : فى كلى.. فى عقلى..
د. منسى : يعنى إيه؟
الفلكى : أنا عارف يعنى إيه؟.. ماهو لو كنت عارف كنت قلت لكم
من الأول.
(جرس التليفون يدق فيتجه المأمور ناحيته ثم يتوقف)
المأمور : حسين.. رد أنت..
(حسين يرفع سماعة التليفون)
حسين : مكالمه شخصية..

المأمور : متين..؟

حسين : من باريس..

المأمور : باريس.. (متهللاً).. تبقى من محمد أخويا.. ألو
يا بوحמיד.. الإضرابات عاملة ايه عندكم (يقذف
بالسماعة فجأة).. مش ممكن.. ده لسه الجدع ده مكلمنى
من أسيوط من شوية.. عفاريت.. عفاريت فى القرن
العشرين.. مش معقول.. مش ممكن ده يحصل.

الخبير : مش ممكن عفاريت حبيبي.. مش ممكن مفيش كهريا..
مش ممكن..

الفلكى : آه.. امسكونى.. حاسس انى حاخطفى خالص..

الخبير : مش ممكن.. كله فيه كهريا...

(كل اضاءة المسرح تطفأ دفعة واحدة وعندما يضاء المسرح ثانية

يكون الصحفى والخبير قد اختفيا).

المأمور : (يقلد الخبير بهوء شديد).. مش ممكن كله مفيش كهريا..

ده مفيش كهريا.. ده فيه كهريا.. ده مفيش كهريا..

(يردد الجملة فى بلاهة بينما تنزل الستار)

• الفصل الثانى •

(القسم يفقد جزءا من مظهره الأنيق وتظهر فيه بعض المقاعد والدكك الخشبية، اللافتة الكبيرة تفقد بعض حروفها.. الكلبشات البلاستيك الملونة تختفى ويحل محلها كلبشات حديدية حقيقية.. لا توجد زهور.. إن القسم يتحول بالتدريج إلى قسم بوليس عادى).

(المأمور يقف فى مواجهة النافذة وظهره للجمهور يتكلم فى صوت مرتفع يتحول إلى صياح محاولا قدر استطاعته إخفاء العذاب والألم الذى يشيع فى نبراته)

المأمور : أنا وصلت لحاجات حاتوصلنى للحقيقة.. تأكدوا أنا مش باضحك عليكم مش باطمنكم.. أنا فى طريقى للحقيقة فعلا.. ولما أوصل للحقيقة حاعرف أرجع لكم رجالتكم.. قعدتكم دى غلط، بتعطلنى.. تأكدوا أنا مهتم بقضيتكم أكثر منكم.. بس أرجوكم انفضلوا روحوا بيوتكم.. إنتم مش واثقين فى كلامى ولا ايه.. أرجوكم صدقونى..

(يحرك ذراعيه فى ياس وهو يترك النافذة.. يدق جرس التليفون)

المأمور : (يتردد برهة ثم يرفع السماعه ويتكلم فى هدوء وتصميم).. اسمع أنا ما أعرفش انت مين.. ما أعرفش مين اللى معاك.. وما أعرفش انتم فين وما أعرفش قصدكم ايه باللى بتعملوه

فيينا .. لكن أنا عاوز أؤكد لك حاجة .. مكالماتكم دى مش حاتهنزنى .. مش حاتأثر على تفكيرى .. أنا تفكيرى هادى جدا وعقلى صافى وحاعرف أوصلكم .. والله لو كنتم من الجن الأزرق .. لو كنتم من المريخ .. مش حاسيبكم .. وراكم .. وحاقبض عليكم واحد واحد ده اللى عاوزكم تفهموه .. أنا بدأت أعرف انتم مين .. فاهم .. آلو مين اللى بيتكلم (تتغير لهجته ويتكلم باحترام) .. آسف يافندم .. آسف أصلى افكرتك منهم .. أيوه يافندم .. انا بدأت أعرف بعض حاجات أعتقد حاتوصلنى للحقيقة .. الخبير .. طب وأنا حاعمل إيه يافندم هو ذنبى أنه اختفى عندى .. ماهو كان ممكن يختفى فى أى حته تانية .. حاضر يافندم .. أنا حابعت لك شهادة مكتوب فيها أنه اختفى بمعرفتى .. شكرا يافندم .. مع السلامة يافندم .. (يضع السماعه) .. وده كلام إيه ده ..؟ وانا حاجيب لهم الخبير مين دلوقت ..

(صباح لشخص يتعرض للإيذاء ينبعث من غرفة الحجز).

المأمور : (بغضب) .. يا حسين .. حسين .. إيه اللى بتعمله ده ..
(حسين يخرج من غرفة الحجز، بعض أزرار السترة مفكوكة .. وشعره غير مرتب)

حسين : الواد الحرامى اللى جوه ..

المأمور : ماله ..؟

حسين : سرق الحوض والراديو وهريهم من الشباك لحد من زمايله وبينكر ان الحجز كان فيه الحاجات دى ..

المأمور : أنا علمتك تشتغل كده يا حسين ..

حسين : يافندم دى حاجة تجن .. الحوادث كترت بشكل مخيف .. سرقة شقق وعرييات .. نشل بالمطاوى ..

المأمور : مهما يحصل.. مش عاوزك تفقد هدوءك.
حسين : يافندم أنا مابذاكرش خالص.. بالطريقة دى حضيع
الماجستير..

المأمور : معلش يا حسين.. كل شىء بأوان.. لما نقضى على ظاهرة
'الاختفاء كل حاجة حاترجع زى الأول.. وحاتعرف تذاكر..

حسين : أنا آسف يافندم.. أنا ماتمالكتش نفسى..

المأمور : معلش.. سييهولى.. أنا حاستجوبه بعدين..

(حسين يدخل غرفة التليفون)

(يدخل مصطفى)

المأمور : (يتناول جريدة).. إيه اللي انت كاتبه ده يامصطفى..؟

مصطفى : إيه

المأمور : احنا مش اتفقنا.. انك تاخذ موافقتنا على أى حاجة عاوز
تتشرها.

مصطفى : أيوه.. بس بعدما روجت البيت، رجعت فى كلامى..

المأمور : يبقى مش كلام رجالة..

مصطفى : لا أبدا.. كلام رجالة وكل حاجة.. بس أنا شايف أن الناس
لازم تعرف الحقيقة..

المأمور : حقيقة إيه..؟ هو إحنا لسه عرفنا حاجة عشان نقولها
لهم..

مصطفى : اللي حصل على الأقل..

المأمور : حايفيدهم بإيه..؟

مصطفى : بيقوا معانا فى الصورة..

المأمور : احنا لسه فى مرحلة البحث والاستنتاج والاستدلال..
ويمكن اللى بنفكر فيه يطلع غلط..

مصطفى : يبقى نقولهم برضه، ان كل اللى فكرنا فيه طلع غلط..

المأمور : عشان مايثقوش فينا.. وتحصل بلبلة.

مصطفى : بالعكس.. حايثقوا فينا أكثر.. وأى حاجة حانقولها
حايصدقونا.

المأمور : اسمع يامصطفى.. دى مسألة تتناقش على مستوى ثانى..
أنا اللى يهمنى شغلى.. ومن حقى أستعمل السرية فى
شغلى لحد ما أوصل وبعد كده من حقك على تنشر كل
حاجة عاوز تنشرها..

مصطفى : أنا عاوز أعرف إيه الخطأ اللى ارتكبته.. وحايضرنا أو
يضر الناس فى إيه؟

المأمور : حكاية إن سبعة وتسعين فى المائة من اللى اختفوا ناس
مرحين..

مصطفى : ضررها ايه دى كمان؟

المأمور : انزل الشوارع شوف بنفسك.. كل واحد مكشروبوze
شبرين.. كل واحد مرج تحول لإنسان مكتب.. شفت بقى
خطورة الكلمة.. مجرد استنتاج ساذج.. تنشره، يسبب
إزعاج كبير قوى للناس.. أنا مش باحجر على حريتك فى
النشر.. أبدا.. أنا بس عاوزك تنشر الحقيقة كلها.. مش
نصها.. ولا ربعها..

مصطفى : حاضر.. بس أصل الواحد لما بيعرف حاجة جديدة بتبقى
بتأكله فى جسمه. زى الأرتكارية..

المأمور : كده.. كويس اللى قلت لى.. أنا كان عندى شوية حاجات
نفسى أقولهم لك.. لكن حيث الموضوع كده، مش حاقولك
حاجة.

مصطفى : يبقى أقولك أنا.. عبده الفلكى بتاع البخت اللى اختفى
هنا..

المأمور : ماله؟

مصطفى : رفقده..

المأمور : ليه..؟

مصطفى : انقطاع عن العمل أكثر من خمسة عشر يوم بدون إذن..
المستخدمين فى الجورنال مش معترفين بحكاية الاختفاء..
والمكوجى أنكر ان عنده قميص وإبراهيم أحمد بتاع
الاقتصاد السياسى أنكر ان عنده نص جنيه..

المأمور : شىء محزن.. اختفاء.. وخراب ديار..

مصطفى : جايب لك شوية أخبار متفرقة.. لو حطيناهم ورا بعض..
حائفهم حاجات كتير..

المأمور : قول ياسيدى..

مصطفى : (يفرد صفحات بعض الجرائد).. تنيسى وليامز الكاتب
المسرحى الأمريكى اختفى.. غواصة أمريكية اسمها
سكوريبيون.. وغواصة فرنساوى اسمها منيرفا.. اختفوا
فى البحر، بالرغم من كل محاولات البحث العلمية
الخرافية. ودى أخبار جابتها وكالات الأنباء من أساتذة
أبحاث بتربط بين انقطاع الكهرباء فى نيويورك وبين ظهور
الأطباق الطائرة إيه رأيك؟.. الخطر هجى على العالم
ياحضرة الرائد.. الحكاية مش عندنا ويس.. الأول
بياخدوا الرجالة.. بعد كده ياخدوا القواصات والطيارات..
وكل حاجة..

المأمور : كل حاجة..؟

مصطفى : ليه لأ.. حاياخدوا كل حاجة..

المأمور : والحل..؟

مصطفى : بصفتى باشتغل فى أشرف وأعظم حاجة فى الدنيا.. الى
هى الكلمة أقول لك.. ننشر كل حاجة بتحصل بكل دقة..
فى الحالة دى الناس حاتعتبر نفسها مسئولة وتتكاتف
وتواجه الخطر الجديد ده.. وتقضى عليه..

المأمور : لو واحد بس يرجع .. واحد بس .. ينقذنا من الضلمة اللي
احنا عايشين فيها ..

(تدخل الدكتورة سهير ومعها زوجها)

د. سهير : عرفتوا تحلوا الفزورة ولا لسة ..

المأمور : مش باين لها حل يادكتورة .. أهلا وسهلا ..

د. سهير : لأ .. ده حلها سهل قوى .. أحلها لكم أنا بقى .. (تقدم زوجها)
الدكتور أحمد أبو الفضل .. جوزى ..

مصطفى : (صانحا) .. اللي اختفى ..؟

د. سهير : أيوة .. اللي اختفى ورجع تانى ..

المأمور : أهلا وسهلا .. أهلا وسهلا .. اتفضلوا ..

(يهمون بالجلوس)

المأمور : لا .. قصدى تنفضلوا تخرجوا وتسببونا شوية .. أهلا
وسهلا .. ازيك يادكتور أحمد ..

(الدكتور أحمد يحنى رأسه ولا يجيب)

المأمور : يالله يامصطفى، قعدت ليه ..؟

مصطفى : أعرف والنبي ..

المأمور : مش وقته .. لما أبقي أعرف أنا .. حاقول لك على كل
حاجة .. أهلا وسهلا .. (يرفع سماعة التليفون) .. ادينى ١٥

يابنى .. أهلا وسهلا فرصة سعيدة يادكتور أحمد .. آلو ..
ياقتدم .. الدكتور أحمد أبو الفضل رجع تانى .. لأ ..

(مصطفى يهجم على الدكتور أحمد)

مصطفى : شعورك إيه لما رجعت لبيتك ومراتك ..؟

المأمور : بس يامصطفى .. (يواصل مكالمته) .. لأ .. لسه لسه
ماتكلمتش معاه .. كمان ساعة حابعت لحضرتك التقرير
(مكلما مصطفى) .. أبعد عن الدكتور يامصطفى .. (المأمور
انتابته حالة مرح شديدة .. يتحرك بنشاط فى اتجاه النافذة) ..

اتفضلى يا والدتى انتى وهى.. خلاص.. حانعرف كل حاجة.. الدكتور أحمد أبو الفضل اللى هو أول واحد اختفى.. رجع تانى بالسلامة حانعرف منه كل حاجة الليلة دى انشاء الله.. فيه احتمال كبير قوى ان كل رجالنكم ترجع.. لسه قاعدين ليه..؟ مش مصدقيني انتم حرين.. خليكوا قاعدين.. (للدكتور).. أهلا وسهلا..

د. سهير : أستاذن أنا.. حاستنى فى مكان كده لحد ماتخلص..

المأمور : احنا مش حانقعد كثير..

أبو الفضل : يستحسن تروحي تستنى فى البيت.. جايز أتأخر شوية.. بعد ما أخلص عندى شوية مشاوير..

د. سهير : (وهى خارجة).. أرجوك ترجعلى الدكتور أحمد بسرعة..
المأمور : أنا عارف هو واحشك قد إيه.. بس واحشنى أنا أكثر والله.. عارفه سيادتك، أول مرة أشوف الدكتور ومع ذلك حاسس انى أعرفه من سنين زى مايكون قريبى.. مع السلامة انتى يادكتورة.. أهلا وسهلا دكتور أحمد.. يا،
يامصطفى ماتقعدش..

مصطفى : سؤال واحد بس والنبى..

المأمور : بعدين.. (مصطفى يخرج).

(واضح ان المأمور يمر بحالة توتر شديدة يحاول إخفاءها بالمرح

واللامبالاة)

المأمور : سيجارة..

(الدكتور أحمد يتناول السيجارة بهدوء)

المأمور : إزيك يادكتور أحمد..

أبو الفضل : أهلا وسهلا..

المأمور : السيجارة اللى معاك فلتر أخضر.. من اللوكس.. أصل الفلتر الأبيض وحش خالص.. بس أنا أعرف واحد

باتعامل معاه.. بيجيب فلتر أخضر.. أبقي أوصيه يجيب لك..

أبو الفضل : متشكر.. أنا بادخن من غير فلتر..
المأمور : على رأيك.. الفلتر بيبوظ، طعم الدخان..
أبو الفضل : لا أبدا بالعكس.. ده بينقيه.. بس أنا مش متعود عليه..
المأمور : على رأيك.. كلامك مضبوط.. الفلتر من غير دخان
أحسن.. قصدى.. ماعلينا.. حر.. هه.. الجو كان عامل
ايه عندكم؟

أبو الفضل : عندنا فين؟
المأمور : فى الحتة اللي كنت فيها..
أبو الفضل : زى هنا بالضبط..
المأمور : ياسلام.. حاجة غريبة.. الجو ده غريب قوى يا أخى..
ساعة يبقى حر.. وساعة يبقى بارد.. إنت كنت فى
ياراجل؟

أبو الفضل : أبدا.. كنت مختفى شوية..
المأمور : هاها.. أما نكتة.. لا جديدة.. ماهى المدام فهمتنى انك
مرح جدا.. هاها ضحكتنى والله.. ماهى البلد كلها عارفة
انك كنت مختفى.. لكن تقول إيه بقى للمرح.. عارف
يادكتور أهم صفة فى شعبنا إيه؟
أبو الفضل : لأ.. ماعرفش..

المأمور : المرح.. نفوتك حاجة زى دى وانت سيد العارفين.. دى
حاجة من أيام الفراغة.. بعض الرسومات اللي فى المقابر
القديمة أثبتت أن المصريين أكثر شعب بيضحك.. فىن
يادكتور كنت مختفى فىن؟

أبو الفضل : ده تحقيق معايا؟
المأمور : هاها.. تحقيق إيه ياراجل.. ده انت حساس قوى.. بقى أنا

باكلمك عن الآثار والفلتر الأخضر وانت تقولى تحقيق..
أنا بتاع تحقيق برضه الحكاية إنى عاوز أعرف أخبارك
وأطمئن عليك..

أبو الفضل : كويس والحمد لله..

المأمور : رجعت امتى؟..

أبو الفضل : النهاردة الصبح..

المأمور : دكتور أحمد.. كنت فىن؟..

أبو الفضل : كنت مختفى..

المأمور : أنا مش بأسألك كنت إيه.. أنا بأسألك كنت فىن؟..

أبو الفضل : أنا متهم بحاجة؟..

المأمور : أبدا.. على الاطلاق.. انت مش متهم بحاجة أبدا.. هم
مجرد كلمتين عاوز أسمعه منك..

أبو الفضل : إتفضل..

المأمور : كنت فىن يادكتور أحمد..

أبو الفضل : مش فاكرك..

المأمور : شوف يا أخى شركات السجاير.. بتتحايل بكل الطرق
عشان تبيع سجايرها مرة تعمل فلتر أخضر ومرة فلتر
أبيض ومرة فلتر قطن.. حاول تفكر يادكتور أحمد..

أبو الفضل : مش فاكرك..

المأمور : الغريبة ان كل الدكاترة بيقولوا إن التدخين مضر.. ومع
ذلك بيدخنوا لازم تفكر يادكتور أحمد..

أبو الفضل : لازم ليه؟..

المأمور : أول ما اتعلمت أشرب السجاير.. كانت اللعبة الكبيرة
ببريزة.. وكانت مليانة عن كدة.. إنت بتشرب سجاير بقى

لك قد إيه؟..

أبو الفضل : مش فاكرك..

المأمور : بالتقريب..

أبو الفضل : حوالى خمستاشر سنة..

المأمور : كويس.. ذاكرتك بدأت تنشط.. افكر معايا بقى.. كنت
فين..

أبو الفضل : مش فاكرك..

المأمور : الغريبة يا أخى دخان السجائر اليومين دول...

أبو الفضل : أرجوك.. ماتكلمنيش على السجائر.. أرجوك بلاش نضيع
وقتنا.. حضرتك عاوز تعرف أنا كنت فين.. ومش حاتعرف
أنا كنت فين..؟

المأمور : بداية ظريفة.. وإن كانت غير متوقعة.. فيه محل فى
ميدان سليمان دايما عنده سجائر طازه فى عز أزمة
الكليوباتره.. كان عنده كليوباترة.. تفتكر ليه مش حاتعرف
انت كنت فين..؟

أبو الفضل : عشان أنا مش حاقولك..

المأمور : مش حاتقول لى ليه..؟

أبو الفضل : عشان أنا ماعرفش..

المأمور : ماتعرفش ولا مش فاكرك..؟

أبو الفضل : الاثنين..

المأمور : الاتنين..؟ ياسلام على الطمع.. الاتنين..؟ طب اختار
واحدة فيهم.. إنت خايف من إيه يادكتور..

أبو الفضل : (بسرعة).. لا أبدا.. أبدا.. أنا مش خايف من حاجة..

المأمور : عملوا فيك إيه..؟

أبو الفضل : لأ.. ماعملوش فى حاجة..

المأمور : مش معقول..

أبو الفضل : والله.. أحلف لك بأى حاجة.. ماعملوش فى حاجة..

المأمور : هم مين.. مين يادكتور أحمد...

أبو الفضل : (يتنبه).. أنت بتكلم عن مين؟
المأمور : أبدا.. أنا كتبت باتكلم على الدخان.. خد سيجارة.. استنى لما أقطع لك الفلتر.. (يقطع له فلتر السيجارة).. دكتور أحمد.. أنت بتحمى مين بسكاتك؟
أبو الفضل : أبدا.. ولا حد.. أنا مش فاكرك..
المأمور : لأ.. أنت فاكرك.. أقعد يادكتور أحمد.. وقتت ليه؟
(الدكتور أبو الفضل من أول المشهد يجلس جلسة غير مريحة ويغير مكانه فى قلق)

أبو الفضل : لا أبدا..
المأمور : ماتقعدش على الدكة.. تعالى هنا.. الكرسي ده مريح..
القسم كان غير كده خالص.. الحوادث كترت بعد اختفاء يادكتور أحمد.. كل شيء كان عظيم.. وكنت حاخذ درع الأمن والطمأنينة المطلقة.. الموضوع بدأ بيبك انت.. تفهم فى العينين يادكتور أحمد؟
أبو الفضل : لأ.. أنا أعرف فى القانون بس..
المأمور : ما دام بتعرف فى القانون.. كان لازم تعرف اننا حانعرف نجميك من أى حاجة.. من أى شيء.. أى قوة فى الكون ماتقدرش تعمل لك حاجة وانت فى حمايتنا.. عنيك مليانة خوف.. إتكلم يا دكتور أحمد وماتخافش.. كنت فين؟

ما أعرفش.. (يقف)..
أبو الفضل : مالك يادكتور أحمد؟
المأمور : مالى إيه؟
أبو الفضل : ملاحظ انك مش عارف تقعد..
المأمور : لا أبدا..
أبو الفضل : جرح؟

المأمور : أبدا أبدا .. أنا سليم .. مفيش جروح ..
أبو الفضل : دمل ..؟
المأمور : (بسرعة) .. أيوه .. أيوه دمل ..
أبو الفضل : بيبقى متعب قوى .. مرة كان عندى ما كنتش باعرف أقعد ..
المأمور : جالك بعد ما اختفيت ..؟
 أبدا .. أبدا ..
أبو الفضل : قبل ماتختفى ..؟
المأمور : أيوه ...
أبو الفضل : متأكد ..؟
المأمور : أيوة متأكد ..
أبو الفضل : تحلف ..؟
المأمور : أحلف ..
أبو الفضل : يا خسارة .. الدخان اليومين دول عامل زى الشياط .. دكتور
المأمور : أحمد .. كنت بتعرف تقعد قبل ما تختفى ..؟
 لأ .. أبدا ..
أبو الفضل : بتكذب ليه يادكتور أحمد ..؟
المأمور : أنا مش باكذب، أنا باقول الحقيقة ..
أبو الفضل : أى حقيقة .. الحقيقة انك قبل ماتختفى كنت فى السينما
المأمور : انت والمدام وشفتم فيلم صوت الموسيقى .. فيلم طويل قوى
 ثلاث ساعات ونص .. مش ممكن شفته وإنت واقف .. مش
 ممكن كان عندك دمل .. (يسرح ببصره عبر النافذة)
 العمارة اللى قدامنا بدأت تعلى .. حاطط خمستاشر دور ..
 كلها محجوزة .. الراجل بياخد خمسمائة جنيه مقدم فى
 الشقة (يوأجهه فجأة) .. بتكذب ليه يادكتور أحمد ..؟
أبو الفضل : ده مش كذب .. أنا من حقى بيبقى عندى دمل فى أى وقت
 من الأوقات وفى أى مكان فى جسمى .. إنت بتحقق معايا
 بتهمة وجود دمل فى جسمى ..؟

المأمور : أبدا.. أنا عارف أن حرية الدماكل مكفولة للجميع.. أنا بس باعرفك انك كذاب.. عارف كل حاجة وفاكر كل حاجة.. ومع ذلك بتكذب.

أبو الفضل : (يكاد ييكن) .. أرجوك.. ماتقولش الكلمة دي..

المأمور : (يردها في إصرار) .. عارف كل حاجة ويتكذب..

أبو الفضل : أرجوك.. أرجوك..

المأمور : (صارخا في كلمات سريعة متتالية) .. كنت فين يادكتور أحمد.. كنت فين.. كنت فين..

أبو الفضل : ما أعرفش.. ماعرفش.. ماعرفش..

المأمور : انت عارف كل حاجة.. انت عارف كل حاجة..

أبو الفضل : (مقاطعا) .. أنا درست القانون لنص القانونيين اللي في البلد أرجوك ماتقولهاش.. حتى لو كنت باكدب.. حتى لو أرغمتني ظروف أكبر من قدرة الانسان وإرادته اني أكذب.. أرجوك..

المأمور : مفيش ظروف أكبر من إرادة الانسان ومن قوته..

أبو الفضل : فيه يا ابني.. فيه..

المأمور : قولها.. اتكلم.. أرجوك تتكلم يادكتور أحمد.. أرجوك..

(يتكلم بلهجة حانية) .. فيه كتير من زمايلي كلموني عنك..

كنت بتدرس لهم أنا أعرف انك قانوني كبير وعظيم..

أرجوك ساعدني.. أرجوك ساعدني..

أبو الفضل : ماعرفش.. ماعرفش..

المأمور : (يجذبه من زراعه برفق) .. تعالى.. بص.. كل الستات دول..

بيستوا كلمة منك انت.. كلمة واحدة منك انت حاترجعهم

بيوتهم.. وترجع لهم رجالتهم..

أبو الفضل : مش ممكن..

المأمور : لأ.. ممكن.. عرفني وأنا أرجع لهم رجالتهم زى إنت مارجعت..

أبو الفضل : مش حاتعرف..
المأمور : لأ.. أعرف..
أبو الفضل : مفيش قدرة على الأرض تقدر ترجعهم..
المأمور : وانت.. رجعت إزاي؟
أبو الفضل : أنا مارجعتش..
المأمور : مارجعتش..
أبو الفضل : أيوة.. أنا مش أنا.. أنا سبت كل اللي جوايا هناك..
المأمور : هناك فين؟
أبو الفضل : ماعرفش.. صدقتى.. أنا ما أعرفش حاجة خالص..
المأمور : (بهده الموقف).. لأ.. إحنا اقتنعنا إنك مش فاكركم..
أبو الفضل : .. أيوه.. مش فاكركم..
المأمور : ومع ذلك فاكركم سبت كل اللي كان جواك هناك.. كان جواك إيه استنى ماتردش.. عارف جوابك.. حاتقولى مش عارف.. سيبنى استنتج.. كان جواك حاجات ثمينة.. غوايش مثلاً.. ساعات، مجوهرات أقلام باركر.. كان جواك إيه.. ثلاجة؟ عربية؟
أبو الفضل : أرجوك سيبنى أروح.. أنا ماعنديش حاجة أقولها..
المأمور : (بسخرية).. خدوا منك اللي كان جواك وسابولك دمل..
عصابة غريبة..
أبو الفضل : أرجوك.. أنا قلت كل اللي أعرفه..
المأمور : مش حاتخرج من هنا الا لما تقول كل اللي عندك..
(فى هذه اللحظة يخرج حسين من غرفة الحجز ويقف بالقرب منهما وهو ينظر للدكتور بغضب شديد).
المأمور : العريف حسين.. هو كمان دارس قانون..
أبو الفضل : شفته فى الكلية..
المأمور : يبقى لازم شفته وهو بيلعب ملاكمه.. حسين عضو فريق

الجامعة كنت فين يادكتور.. ماتخلنيش أحس إنى غلباوى
وباتكلم كثير..

أبو الفضل : تقدر تتكلم من هنا لبكرة.. أنا مش حاجاب..

المأمور : يبقى حاقبض عليك بتهمة البلاغ الكاذب..

أبو الفضل : أنا مابلغتش عن حاجة..

المأمور : الست بتاعتك بلغت..

أبو الفضل : الست بتاعتى مش كذابه.. أنا اختفيت فعلا..

المأمور : يافرحتى بيك.. اسمع يادكتور.. أنا حاكشف كل ورقى.. أنا

باكلمك دلوقت بصفتى مواطن باعيش على نفس الأرض

اللى بتعيش عليها. بصفتى إنسان وإحنا الاثنين بنحمل

نفس الصفة.. حوادث الاختفاء بدأت تشكل ظاهرة تهدد

حضارتنا.. كل واحد بيروح البيت بالليل يفضل صاحى

يستنى اللحظة اللى حايفتفى فيها.. واحد خبير أجنبى

اختفى هنا فى القسم.. قدام عنيه.. الراجل ده عقد

ينتهى آخر الشهر ولازم يرجع بلاده.. حانقول لهم إيه؟

مش مشكلتى..

أبو الفضل : عارف انها مش مشكلتك.. لكن تقدر تتصور حجم الأزمة

المأمور : الدبلوماسية اللى حاتتعرض لها البلد.. بلدك.. الأزمة اللى

حتعتبر انت مسئول عنها على الأقل قدام ضميرك..

عندك ضمير..؟ ولا سبته هناك هو راحر.

إدينى فرصة أفكر..

أبو الفضل : قصدك فرصة تهرب. دكتور أحمد.. الجماعة اللى كنت

المأمور : عندهم فى الـ.. المختفى.. أيوه المختفى.. إيه رأيك فى

الاسم ده.. ظريف ويدى المعنى بالظبط.. الجماعة دول

هدفهم واضح جدا.. حوادث الاختفاء بدأت تسود العالم

كله.. وده معناه إصابة الانسان فى كل مكان بالذعر..

وبالتالى تدمير حضارة الجنس البشرى.. تصور.. لو
اختفى كل المفكرين.. تصور لو اختفى كل العباقرة.. كل
الناس اللى يترسم لنا طريقنا.. طريق الحضارة.. ممكن
تتصور كل الحضارة اللى على الكرة الأرضية، حايحصل
إيه..

أبو الفضل : مش حايحصل لها حاجة.. الموضوع أبسط من كده بكثير..
انت اللى بتكبره.. حكاية الكرة الأرضية مالهاش الأهمية
دى كلها.. لازم تعرف ان الكرة الأرضية تعتبر واحد على
مليون من ذرة رمل بالنسبة لكل الرمال الموجودة فى كل
الصحراوات بالنسبة للكون..

المأمور : برافوا.. فلك.. قل لى.. إنت درست فلك ولا همه هناك
خدوا منك القانون وإدولك الفلك.. جبت إيه كمان وانت
راجع..

حسين : ياقتدم الطريقة دى تتكلم بيها مع واحد انسان..

أبو الفضل : (يصرخ).. أنا انسان..

المأمور : مش باين.. مانتقاطعش حسين من فضلك.. أبوه يا حسين..
عاوز تقول إيه..؟

حسين : سيبهولى ياقتدم ربع ساعة.. أنا حاعرف منه الحقيقة..

المأمور : غلط يا حسين.. غلط.. قطعاً لسه جواه بقايا إنسان لازم
نصحيها..

حسين : أنا متأكد أنه مفيش جواه بقايا انسانية من أى نوع.

المأمور : ودى حاجة تصعب قضيتنا.. دلوقت شغلتننا نعرف هى
راحت فين؟

حسين : مش حاتوصل معاه لحاجة بالطريقة دى.. سيبهولى
أرجوك.

المأمور : دى أساليب غلط يا حسين..

حسبين : بتستخدم فى العالم كله.. أنا قرئت كده..

المأمور : نص العالم وحوش.. مفيش داعى عددهم يزيد اتنين..

حسبين : حضرتك قلت، إنك حاتوصل للحقيقة بأى طريقة، وقلت لى حط خطين تحت أى طريقة..

المأمور : أيوه.. أى طريقة ماعدا إن احنا نفقد إنسانيتنا.. إحنا مانقدرش نكسب حاجة ونخسر إنسانيتنا فى الوقت نفسه (يتكلم ببأس شديد) دكتور أحمد أنا تعبت قوى فى المنطقة دى.. سبع سنين.. وأنا مانامش الا لما أظمن أن كل واحد نايم فى سريريه.. طهرت المنطقة من كل المجرمين.. ووجدت عمل لكل العاطلين.. اللى مابيعرفوش يقرؤا ويكتبوا خلّيت اللى بيعرفوا يعلموهم.. ثلاث سنين وماحصلش مخالفة واحدة.. الحوادث دلوقت بتكتر.. بيزداد عدد المجرمين.. تقدر تتصور الدنيا حايبقى شكلها إيه.. أرجوك ساعدنى اتكلم.. مهما كنت خايف، فى سبيل كل الناس، فى سبيل كل الدنيا، مهما كانت درجة خوفك.. مهما كنت مش ضامن الحماية.. لو كنت حاتتصلب فى ميدان عام والصقور تاكل لحملك.. لو كنت حاتتشق.. لو كنت حاتنفذ وإنى حتى.. أنا باقدم لك فرصة ماتقدمتش لإنسان قبل كده.. إنك تكون نبى.. انك تكون مسيح.. وتقول كلمتك ويحصل لك اللى يحصل لك.. من أجل كل الناس.. أنا باكلمك باسم الحضارة اللى الانسان تعب فيها آلاف السنين عشان يعملها.. باسم الطمأنينة.. باسم السلام اللى حايدخل كل بيت بعد ماتتكلم.. عشان الابتسامة ترجع لكل الناس.. أرجوك اتكلم.. (ابو الفضل يظل متمسكا بصرته بينما تتغير لهجة المأمور فيسأله فى توسل)

المخلوقات اللى كانت معاك من كوكب آخر..؟

أبو الفضل : (كانما قران يعترف اخيرا).. لأ..

المأمور : بنى آدمين زينا..؟

أبا الفضل : أيوة..

المأمور : شكلهم إيه..؟

أبو الفضل : يبلبسوا بنطلونات ويبخلقوا دقنهم.. وساعات بيحطوا

كلونيا.. مش ساعات.. دايمًا.. دايمًا ريجتهم يتبقى حلوة..

لكن فى الآخر ماتحسش انهم بنى آدمين زينا..

المأمور : (ينفجر فيه).. رجعنا للألغاز تانى.. انت بتستغل كرمى

أسوأ استفلال.. فيه ناس مش مؤمنين بالحاجات اللى أنا

مؤمن بيها.. الناس دول ممكن يتعبوك قوى..

أبو الفضل : أرجوك.. أنا عاوز أروح.. مفيش قوة فى الوجود حاتعرف

منى حاجة..

المأمور : طيب يادكتور.. روح دلوقت.. روح استريح.. نام.. اعمل

كمادات وفكر فى الموضوع تانى.. حانتقابل تانى.. يمكن

تغير رأيك.. أنا أملى فيك كبير.. مع ألف سلامة.. أنا

أسف لو كنت ضايقتك.. مع السلامة يادكتور..

(يخرج)

المأمور : حسين.. بلغ.. وخلوهم يحطوه تحت المراقبة..

حسين : سبته ليه يمشى يافتندم.

المأمور : واضح أنه مش حايقول حاجة.. سيبه.. أنا تقريبا فهمت

حاجات كثير بتلعب كونكان يا حسين..؟

حسين : مش قوى يافتندم.. بس بافهم فيه..

المأمور : الورق اللى معايا كويس قوى.. بس واقف على كارت..

حاجة واحدة أعرفها وابقى عرفت كل الحقيقة..

حسين : مش فاهم..

المأمور : حاتقهم بعيدين...

(يدخل مصطفى ومعه عبده الفلكى)

مصطفى : اتفضل ياسيدى.. جيت لك عبده الفلكى

المأمور : أهلا وسهلا سى عبده.. اتفضل أقعد..

(عبده الفلكى يجلس بحذر وقد استولى عليه ضيق شديد)

مصطفى : الدكتور أحمد أبو الفضل فى..؟

المأمور : روح..

مصطفى : على خيرة الله.. قل لى بقى ياعم كان فى..؟

المأمور : مش فاكّر والله..

مصطفى : مش فاكّر..؟ أوعى يكون مافالكش حاجة..

المأمور : لأ.. قال لى.. بس نسيت.. الواحد ذاكرته بقت وحشة

اليومين دول..

مصطفى : طب ادينى صورة المحضر لما أقرأه..

المأمور : محضر إيه..؟ (ملتفتا لعبده).. أزيك ياعم عبده..

عبده الفلكى : الله يخليك ياسعادة البية..

المأمور : سيب الدكة دى وتعالى أقعد هنا.. الكرسى ده مريح أكثر..

(عبده ينتقل إلى المقعد ولكنه يظل غير مستريح فى جلسته)

مصطفى : سيادتك وعدتتى إنك حاتعرفنى كل حاجة.. احنا مش

اتفقنا.. أنا لما شفت عبده الفلكى فى الجريدة.. (بحماس

مفتعل يبين انه يكذب) مارضيتش أسأله على أى حاجة..

مارضيتش أتعدى على اختصاصك.. وحطيته فى تاكسى

على حسابى وجيتيها لك..

المأمور : وتاعب نفسك ليه..؟ كنت أسأله انت وتعالى قل لى..

مصطفى : الحق عليه.. كان يجب أسأله أنا وأعمل الموضوع بتاعى..

بس أنا فضلتك على نفسى.. آه.. انت عارف الشعار

بتاعى.. الصحافة فى خدمة الشرطة.. اتفضل بقى

أسأله..

المأمور : (كانما يدعوه لتناول الطعام).. لا والله.. أسأله انت الأول..
مصطفى : مش ممكن.. لازم انت اللي تسأل..
المأمور : حمد الله على السلامة ياعزيزى عبده..
عبده : الله يخليك ياسعادة البيه..
المأمور : هـ .. ازى الحال؟
عبده : الحمد لله .. ماشية.. (بتاثر شديد).. ماهو انتم ماعرفتوش
تمسكونى ياسعادة البيه.
المأمور : معلش ياعبده.. اللى مكتوب على الجبين.. على فكرة
ماتعرفش الخبير راجع امتى..
عبده : لا والله ياسعادة البيه..
المأمور : اسمع ياعبده.. انت مش عارف تقعد كويس عشان عندك
دمل.. مش كده..
عبده : أيوه..
المأمور : وطبعاً لو سألتك الدمـل ده جالك امتى حاتقوللى قبل
ما تختفى.. مش كده..
عبده : أيوه يابيه..
المأمور : (بمرح).. أيوه فى عينك ياسى عبده.. قبل ماتختفى كنت
قاعد قدامنا زى الجن.. اسمع، طبعاً انت مش فاكـر انت
فين ولا عارف حاجة خالص.. ولا حاتجاوب على حاجة
خالص.. مش كده؟
عبده : أيوه يابيه..
المأمور : أنا أسف قوى عشان حكاية فصلك من الجريدة.. أنت
شهادتك إيه؟ يمكن نكلم حد من زميلنا يشغل..
عبده : ليسانس صحافة يابيه.. الحمد لله ربنا فرجها..
المأمور : اشتغلت؟

عبيده : أيوه...

مصطفى : زين...

عبيده : خدت مكافأتى وفتحت مكتب..

المأمور : مكتب إيه... انت كل خبرتك البخت اللي كنت بتكتبه

ومسابقة الكلمات المتقطعة..

عبيده : حاجة زى كده برضه.. أنا فتحت مكتب تنويم مغناطيسى..

تنويم مغناطيسى...

المأمور : أيوه.. تنويم مغناطيسى.. وقرابة المستقبل والطالع والكف

عبيده : والفنجان وحاجات زى كده.

المأمور : ودى حاجة حاتعيشك...

عبيده : الحمد لله اللي رقدونى ياسعادة البيه.. أنا فاتح بقالى

يومين جالى فيهم ٦٤ جنيه.. قسم الفنجان لوحده جايب

امبارح ١٥ جنيه.

المأمور : كرم من عند الله..

عبيده : الحمد لله.. (بحماس).. أنا زياينى ناس كويسين قوى

ياسعادة البيه أنا جالى إمبارح تلاته مسئولين كبار من

وزارة التخطيط.. وربنا قدرنى وعملت لهم اللازم وخرجوا

مبسوطين.

المأمور : على خيرة الله.. طيب ياعم عبده.. تقدر تتفضل انت.. مع

ألف سلامة..

(عبده يندفع من على كرسيه ويخرج من المسرح بسرعة البرق وكأنه

يفر من خطر داهم، مصطفى يقف كالصعوق)

مصطفى : أنا مش فاهم حاجة..

المأمور : إحنا بنحارب الشياطين يا مصطفى.. وقفت إمبارح قدام

كشك أشتري علبة سجائر.. فجت لى مكالة على الكشك

نفسه.. كما لو كانوا بيراقبونى بكاميرة تليفزيون.. ده

مايمنعش انى بدأت أعرفهم مين..

(يدق جرس التليفون)

المأمور : (يرفع السماعه).. أهلا.. (لحظة صمت).. أنا عاوز أهنيكم

على شغلكم انتم بتشتغلوا حلو قوى.. وكل حاجة مضبوطة خالص.. مفيش ثغرة واحدة الواحد يدخل لكم منها.. لكن انت عارف يا صديقى ان الجريمة الكاملة لسه ماتخلقتش.. انتم دارسين كل حاجة وعارفين كل حاجة ماعدا حاجة واحدة.. التاريخ.. لو كنتم قريتوا تاريخ كويس كنتم عرفتم ان مفيش حد بيسبب الرعب ده كله للناس ويبيعدى من غير حساب.. دى قاعدة تاريخية مهمة جدا.. فانتكم دى وهى دى الثغرة اللى حادخل لكم منها.. تأكد مش حاتعدوا من غير حساب.. تأكد حاقبض عليكم واحد واحد.

(يبتعد عن المكتب وما زال ممسكا بالسماعة المتصلة باذنه وهو منهك فى الكلام.. غير منتهى ان سلك - التليفون المتدلى من السماعه مقطوعة وغير متصل بألة التليفون بينما تنزل.....)

«الستار»

• الفصل الثالث •

(فى شقة الدكتور أحمد أبو الفضل. قبل رفع الستار نستمع لموسيقى تخت شرقى يعزف الحانا راقصة. صالة واسعة يظهر فيها باب الشقة، الأثاث بسيط وأنيق الدكتور أحمد يسك بقلم فحم يرسم اسكتش سريع لراقصة عارية على لوحة كبيرة.. اللوحات كثيرة ومتناثرة فى أنحاء الصالة وكلها لراقصات عاريات. الدكتورة سهير تجلس فى ركن تقرا وتختلس النظر لزوجها وهو منهمك فى عمله)..

أحمد : (ملتفتا لزوجته).. المطلوب دلوقت إن إحنا نصمم بدلة رقص جديدة مستوفية لكل الشروط الفنية.. وتمشية مع الآداب العامة.. مشكلة.. إيه رأيك؟
(سهير تنظر له فى غيظ ثم تعود للانهماك فى القراءة).

أحمد : (مواصلا).. بمعنى أصح.. إزاي الراقصة تتحرك بخفة وحيوية حركات ملبئية تظهر مايكفى من جسمها، لجعل الراقصة مطلوبة ومرغوبة وتغطى فى الوقت نفسه مساحات أخرى تكفى لإقناع الرقابة على المصنفات الفنية بأن هذا اللبس متمشيا مع الآداب العامة ولا يחדش الحياء.. مشكلة.. ماقلتيش رأيك.. تفتكرى لو عملنا الجزء ده ستان يعدى؟

سهير : يعدى فين؟

أحمد : الظاهر انك ماكنتيش معايا .. (يتوقف فجأة ويحدق فى اللوحة) لا بد من البحث عن خامة قماش جديدة .. مثل التل .. ومش النايلون .. ومن الدانتيل .. قماش تلبسه الرقاصة بحيث الرقيب يشوفها متغطية قوى والمتفرج يشوفها عريانة قوى .. أنا عاوز خامة قماش جديدة .. خامة تعمل انقلاب فى مفهوم الرقص الشرقى ..

سهير : (تضع الكتاب جانباً) .. أنا مستعدة أفكر معاك فى حل للموضوع ده .. بس على شرط ..

أحمد : إيه هو ؟

سهير : قبل ما تعمل انقلاب فى مفهوم الرقص الشرقى .. تقوللى إيه سر الانقلاب اللي حصل فى عقلك ؟

أحمد : عقلى أنا ..

سهير : آمال عقلى أنا ..

أحمد : ليه .. شايفانى اتجننت ؟ باهدف الناس بالطوب ؟

سهير : ايه الكلام الفاضل اللي بتعمله ده ؟ .. اقلل الريكورد ده عشان أعرف أتكلم معاك ..

أحمد : هو لما الواحد يمارس هوايته يبقى كلام فاضل .. أنا باعمل فن ..

سهير : من أمتى ؟

أحمد : طول عمرى وأنا غاوى فن .. بس ماكانش عندى وقت .. الحمد لله .. عندى وقت دلوقت أمارس هوايتى ..

سهير : أنا ملاحظه انك من خمس أيام مارحتش الكلية ..

أحمد : هو أنا ماقتلكيش ؟

(يرد عليها وهو منشغل بدراسة لوحاته)

سهير : ماقتلكيش إيه ؟ .. خدت اجازة ؟

أحمد : أيوه .. اجازة طويلة .. استقلت ..

سهير : استقلت..؟..امتى..؟
 أحمد : بعد مارجعت برېع ساعة..
 سهير : أحمد.. إيه اللي بتقوله ده.. تستقيل من غير ما تاخذ رأيى.. انت ناسى انى أبقي مراتك..
 أحمد : ده موضوع خاص بى أنا..
 سهير : لا.. ده موضوع خاص بينا إحنا الاتنين.. انت حصل لك إيه يا أحمد؟ مخبى عنى كل حاجة ليه..؟.. أرجوك قوللى.. انت مخبى عنى كل حاجة ليه..؟.. أرجوك قوللى.. انت مخبى عليه إيه؟ بالليل بتام جسمك بينتنقض جنبى.. وفى عز النوم تصحى مفزوع تصرخ..
 أحمد : كابوس.. بيچيلى كابوس.. غريبة دى..
 سهير : أنا سايباك لحد ما تتكلم لوحداك.. لكن الظاهر عليك مش ناوى تتكلم..
 أحمد : انتى حاترجعى تحققى معايا تانى..؟.. كنت فىن وبتعمل إيه.. دى أسرارى الخاصة.. أنا سألتك كنت بتعملى إيه فى التلات شهور اللي غبتهم..؟
 سهير : حاكون باعمل إيه..؟
 أحمد : حد عارف بقى..؟
 سهير : قصدك إيه يا أحمد..؟
 أحمد : أنا عارف..؟.. ده زمن ماحدش يضمن نفسه فيه..
 سهير : انت بتشك فيه يا أحمد؟
 أحمد : حضرتك داخله بتتكلمى معاه كده أكنك تعرفيه من عشرين سنة.. ياسلام على الصداقة..
 سهير : اسمع الخزعبلات دى أنا أرفض أتكلم فيها.. ولو إحنا فى ظروف تانية ماكانش ممكن أغفرك اللي قلته.. أكيد انت جرى لعقلك حاجة مش معقول دى تصرفات انسان عادى

انت جرى لعقلك حاجة مش معقول دى تصرفات انسان
عادى.. تسمح تقوللى استقلت ليه؟.. ماتقدرش أبدا تبدأ
من جديد فى الحمامة بعد ما وصلت للسن دى.

أحمد : ومن قال انى حاتشغل محامى.. أنا مش حاسيب
التدريس.. حافتح معهد.. معهد للرقص الشرقى..

(تنهار على كرسيها فى الوقت الذى يضغط فيه على زرار فى
الريكورد فترتفع نغمات التخت الراقصة).

أحمد : (يشرح لها بحماس هادئ وكأنه يلقي محاضرة).. الرقص
الشرقى من الفنون العظيمة التى ترتبط دايما بعظمة
الشرق وسحره.. وهو فى تدهور مستمر لعدم عناية الدولة
أو الأفراد به.. ومن المؤكد انه لو ترك هكذا، فسيستدهور
ويندثر ويموت ونفقد هذا الفن الجميل... وبالفعل فيه
راقصات أجنبيات بتشتغل بره على أنهم شرقيات.. كل ده
راجع لعدم التنظيم..

سهير : (مصعوفة).. كمل.. كمل

أحمد : كام رقاصة كويسه فى مصر..؟ كام واحدة معروفة..؟
ثلاثة.. أربعة..؟ والباقيات دخيلات على الفن.. ثلاثة
أربعة أو حتى خمسة مايغطوش السوق المحلية.. فما بالك
بالدول العربية وأسواق أوروبا بالإضافة إلى فتح أسواق
أخرى فى إفريقيا وأمريكا.. لابد أن يكون عندنا على
الأقل خمسين واحدة على مستوى عالى جدا..

سهير : فعلا.. مش عارفه إيه اللى كان مسكتنا على وضع زى ده..
كمل.. كمل..

أحمد : المعهد اللى حاعمله.. هو اللى حايوتلى كل ده.. حاكتشف
وجوه جديدة، حاجيب مدرسين وأعمل حملات دعاية.. كل
حاجة حاتتعمل بطريقة علمية.. آه.. عاوزين نبطل

الفوضى بتاعت زمان.. كل حاجة مدروسة.. أنا خدت
شقة كبيرة فى وسط البلد.. دفعت فيها مكافآتى شوفى..
(يخرج خريطة صغيرة).. ده رسم المعهد.. ده مكتب.. ودى
صالة تدريب.. ودى حمامات وادشاش وده صالون.. ودى
أوده لسه مافكرتش أعملها إيه...

سهير : (صارخة)... والقانون؟

أحمد : هو القانون يمنع.. إيه بقى اللى حايزعل القانون؟.. هو
أنا بأسرق..

سهير : القانون اللى كنت بتحبه وتعلمه.. القانون اللى كنت
بتدرسه... القانون اللى كنت شايف ان الانسان خلاصة
فيه.. القانون؟... حانسيه؟

أحمد : حد فى الدنيا يكره القانون.. بس مش معنى ان الواحد
يحب حاجة يبقى لازم يدرسها.. انت مثلا.. بتحبى
المسقة.. بتدرسيها؟.. أهى الكتب والمحاضرات بتاعتى
مطبوعة وموجودة على قفا من يشيل.. اللى عاوز يذاكرها
يروح يذاكرها.. عموما.. ماتقديش تعتبرينى انفصلت عن
سلك التعليم.. كنت مدرس واثريقت وبقيت عميد معهد.

سهير : (ساخطة)... رقص؟

أحمد : ماله الرقص؟.. مش فن؟.. اوعى تجيبى سيرته على
لسانك بحاجة وحشة لحسن يبهلولوكى فى الجرايد..
الحكاية مش سايبه.

سهير : انت اتجننت يا أحمد؟

أحمد : أنا عقلت ياسهير.. (برمارة شديدة).. ماكفايا خلونا نعيش
بقى.. إيه اللى خدته من الجامعة.. إيه يعنى ستين جنيه
فى الشهر.. الرقاصة الكويسه بتاخذ ستين جنيه فى
النمرة الواحدة..

سهير : وانت... حاشتغل رقاصة؟
أحمد : لا.. أنا حاعلمهم.. وأعمل لهم دعاية وأشغلهم وأخذ عشرة
فى الماية قومسيون.. أنا أقدر أعمل ستمائة جنيه فى
الليلة الواحدة.. (لحظة) نصهم عملة صعبة..

سهير : قول انك بتتريق.. قول انك بتتكت.. قول انك بتهزر..
أحمد : انت عارفانى طول عمرى.. ماحبش أهزر فى الشغل..
سهير : مش انت أحمد اللى أنا اتجوزته.. أحمد كان أستاذ.. كان
انسان عنده مبادئ.. الفلوس مش هى كل حاجة...

أحمد : أيوه.. ماهى دى حكم المفلسين.. اعقلى ياسهير.. اعقلى
وبطلى الجنان والمنطق اللى فى عقلك ده وتعالى معايا..
مرتبك حاتاخذى قده أربع مرات.. حانعيش أحسن
عيشه.. حانتفرج على العالم كله.. عيبنا ان إحنا
ماينقراش جرايد ولا مجلات.. منعزلين.. ليهم حق يقولوا
أساتذة الجامعة منعزلين.. لازم نبطل العزلة بتاعتنا
ونلتحم بالأحداث والناس.. (يفتح مجموعة جرائد ومجلات)..
فيه حد عاقل فى الدنيا يكره انه يبقى معروف ومشهور
والناس كلها تتكلم عنه.. اتفضلى ياست (يربها المجلات)..
سهير.. ناهد.. نجوى.. زيزى.. لولا.. شوزى.. سوزا..
سوزو.. حتى بديعة بالرغم من انها اعتزلت من زمان..
وأدى الأغلفة.. طلعى لى غلاف عليه صورة أستاذة
منطق.. طلعى لى خبر عن القانون... لا حس ولا خبر..
لأ.. استنى.. احقاقا للحق.. فيه خبر هنا فى الأهرام فى
أول صفحة.. واحد بتاع قانون اتفقع علقه ورافع قضية
الظاهر كبيرة قوى عشان جاييبينها فى أول صفحة..

سهير : القضية..؟
أحمد : لا.. العلقه.. اقتعتى..؟

سهير : أنا مقتنعة بحاجة واحدة بس.. أنك بتهزر وبتمثل على..
وانك حاتعتذر بعد شوية..

أحمد : انت حاتفضللى هايغه لحد امتى..؟.. أرجوكى تعقلى
وتيجى تشتغلى معايا.. احنا مش حانعيش قد اللى
عشناه.. لازم نتمتع بالشوية اللى فاضلين من عمرنا..

سهير : (بانفعال حزين).. انت كنت فين يا أحمد..؟.. فين على الأرض
المكان اللى بيروحه الانسان ويرجع خريان من جوه.. فين
وليه..؟.. ولمصلحة مين..؟.. فين على الأرض المكان اللى
بياخد البنى آدمين ويرجعهم من غير ايمان بحاجة.. فين..
وليه.. ولمصلحة مين..؟.. وليه فى الضلمة..؟.. مش فى النور
ليه..؟

أحمد : أهى دى الأسئلة اللى ماتاكلش عيش.. واللى تجيب وجع
الدماغ.. ووجع فى أماكن تانية.. خليكى فى المفيد.. بلاش
الأسئلة الخرافية دى.. اتعلمى تسأللى أسئلة واضحة..
ملموسة، عشان تلاقى اللى يجاوبك..

سهير : زى إيه..؟

أحمد : يعنى مثلاً.. تسأللى.. الساعة كام..؟.. حاتلاقى ألف واحد
يجاوبك..

سهير : انت جرى لك إيه يا أحمد..؟

أحمد : إيه.. واحد عاوز يشهر.. يكسب.. يعنى كفرت..؟

سهير : يا أحمد يا حبيبى، حاول ترجع لنفسك.. هى مسألة شهرة
وفلوس؟ القضية هى رسالتنا.. دورنا فى صنع الحضارة..

أحمد : هى الحضارة ماتتعملش الا بالمنطق والقانون بس..؟.. فيه
مليون طريقه.. أنا قابلت ناس بيعملوها بطريقة تانية
خالص.. أنا كمان حاعملها بطريقةتى.. حاعملها على
واحدة ونص.. الظاهر أنا باضيع وقتى.. عن اذنك.. أنا

لسه قدامى شغل كثير.. لسه حاختر مزيكة واصمم
البدلة..

(يعود للوحتة وتسمع جرس الشقة يدق، تذهب سهير وتفتح الباب
فيظهر عبده الفلكى، وقد ظهرت له لحية مدبية)

عبيده : أبو حميد هنا؟

سهير : حضرتك غلطان فى الشقة...

عبيده : ليه؟ مش شقة خمسة..

سهير : انت عاوز مين بالضبط..

(أحمد يترك اللوحة)

أحمد : أدخل يا عبد .. (يدخل عبده وقد تسمرت الدكتورورة سهير فى
مكانها) ازيك يا عبد الورد..

عبيده : يامساء السيكا (ينظر للوحتة بإعجاب) .. يامساء العندليب
المتمكن من شدو صوته على الأغصان.. المسائل كلها فى
الحشوب التمام.. مساء الليل يامدام..

(بعض الكلمات التى سيتبادلانها ليست مفهومة ولا تعنى شيئا
محددا..

أحمد : أخبار المدافع إيه؟

عبيده : آخر تمام.. (يخرج عليه سجائر ويعطيه سيجارة يشعلها له)..
دى بقى أنقح من بتاع إمبراح..

(الدكتورورة سهير تراقبهما باشمئزاز شديد)

أحمد : وأخبار الشبك؟

عبيده : غمزت.. (يخرج بعض الصور الفوتوغرافية).. دى مطلقة..
بتموت فى الرقص الشرقى.. آخر ملين.. من بكرة
حاتيجى تملأ الاستمارة.

أحمد : تخينة شوية.. مش مهم.. فى التمرين.. تخلى الجزء ده
يخس والجزء ده يتملى..

عبيده : ودى.. كل حاجة فيها بتلعب من غير مزكدة.. ودى تلميزة
آخر رعد لسه مش مقتعة بالفكرة.. بس بييجى منها كمان
جلستين..

أحمد : دول مش كفاية.. عاوزين نبدأ بعشرة على الأقل..
عبيده : واللى خلك بعد ماتشتغل حاييجوا زى الرز.. وحاتعمل
مكتب تتسيق كمان..

سهير : (تصرخ فيهما بعنف).. إيه ده..؟.. إيه اللى بتعملوه ده..؟
أحمد : (ببرود).. ماعرفتكوش ببعض.. الدكتور سهير، مراتى..
البروفيسر عبيده الفلكى أكبر منوم مغناطيسى فى البلد..
وبيشتغل كمان مكتشف أجسام جديدة..

سهير : أنا مش ممكن أسمح بحاجات من دى تحصل فى بيتى..
الشقة دى ما عادتتش تساعنا احنا الاتنين..

أحمد : (يبدو كمن أفاق أخيرا).. فعلا ياسهير.. أنا آسف جدا.. احنا
الاتنين ماعدناش نصلح لبعض.. صحيح أنا اتغيرت فى
حاجات كتير.. بس فيه حاجة واحدة ماتغيرتش.. حبى
ليكى.. أنا باحبك ياسهير ومؤمن تمام انك ست عظيمة..
للأسف طريقنا اختلف دلوقت.. أنا حاسيب لك الشقة..
حاقيم فى المعهد.. أنا حاخذ شنتلة هدمى..

سهير : خد كل حاجة.. مش عاوزاك تسبب أى حاجة من بتاعتك.
أحمد : فعلا حاخذ كل حاجة.. ماعدا الكتب.. أنا معنديش مكان
فى المعهد للكتب.. حياتى نفسها معادش فيها مكان للكتب..

عبيده : الصلح خير يا جماعة..

سهير : أسكت يا أستاذ من فضلك.. أنا مش حاغفر لنفسى ان
فيه واحد زيك دخل بيتى..

(الدكتور أحمد يعد حقيبه ويلىم حاجياته بانهايار تام.. يتكلم برقة
حزينة وكان هناك آلاف الأشياء تتمزق بداخله).

أحمد : ماعرفش حانتقابل تانى والا لأ .. أنا عشت معاكى أجمل سنين حياتى .. كنت مؤمن ان احنا بنشتغل فى أعظم حاجة فى الدنيا .. فى المنطق والقانون .. كنت مقتنع ان احنا بنشترك فى صنع عالم أفضل .. كنت سعيد بكمه .. أخيرا اكتشفت ان مش كفاية ان احنا ندرس القانون والمنطق .. مش كفاية نقف نقوله قدام الطلبة فى المدرجات زى البغبفانات الريكوردر يعرف يشتغل الشغلة دى أحسن مننا .. على الأقل مش حايتهب .. مش هايكبر ويشيخ .. حتى لو انكسر ممكن يتصلح بريال .. أو نجيب ريكوردر تانى من المخازن .. الأستاذ لو انكسر ... تبقى كارثة .. مايتصلحش تانى .. (صوت حزين وعميق كأنه يأتى من أعماق بعيدة) .. مش كفاية ندرسه .. لازم نحميه ونحارب عشانه .. لازم نتحمل فى سبيلة كل حاجة .. كنت مغشوش فى نفسى .. مغشوش فى قوتى .. كنت فاهم انى أقدر أستحمل أى حاجة عشان القانون .. لما النور انطفى .. عرفت نفسى على حقيقتها .. أنا ضعيف قوى ياسهير ، ماقدرش أستحمل .. مفيش حاجة على الأرض أو فى السما تستاهل اللى أنا اتعرضت له .. مع أول ضربة كفرت بالقانون .. اللى زى غلط يشتغلوا فى القانون .. فيه حاجات كتير قوى ماقدرش تعرفها الا لما النور ينطفى .. الحضارة مايبعملهاش ناس ضعاف زى .. الحضارة عاوزه ناس أقوى .. ناس عندهم قوة ايمانك .. وقوة ايمان المأمور أعتقد هو كمان مؤمن بالحضارة .. مين عارف .. جايز لو انطفى عليكم النور تطلعوا ضعاف زى .. أنا أسف .. ماقدرتش أقاوم .. أنا عاوز أعيش عاوز أعيش فى سلام زى أى صرصار .. لما حاخرج من هنا أكون قطعت آخر

حاجة بتربطنى بأى قيمة حلوه.. أو انفعال نبيل..
(مع آخر كلماته يكون قد انتهى من إعداد الحقيبة).
أنا متشكر ياسهير.. متشكر لكل اللى عملتيه علشانى..
انتى كنتى زوجة كويسه.. وأنا عارف ان مفيش أمل أقابل
واحدة ثانية زيك..

سهير : (بابتهاش).. نبدأ تانى يا أحمد.. اللى اتكسر يتصلح.. نبدأ
من جديد..

أحمد : ماعادش ينفع ياسهير.. مش حاعرف أبص فى عنيكى..
الحاجات اللى اتكسرت جوايا مش ممكن تتصلح.. أنا مش
ريكوردر.. أنا أستاذ.. آسف.. قصدى كنت أستاذ.. (يتردد
لحظة).. سهير.. انتى.

سهير : أرجوك.. ماتقولهاش.. مش عاوزاها تكون آخر كلمة
أسمعها منك قبل ماتخرج.. قل لى كلمة حلوة..

أحمد : (ببراءة).. كنت دايمًا باقولك أنا بحبك أكثر من القانون..
دلوقت أنا ماعنديش حاجة أحبك أكثر منها..
(يدق جرس الشقة، وتفتح سهير الباب فيظهر المأمور).

سهير : أهلا وسهلا.

عبيده : (خائفا ولكنه يحاول قدر استطاعته ان يكون طبيعيا).. أستاذن
أنا عندى شوية شغل..

المأمور : ازيك ياعبد..

عبيده : (فى طريقه للخارج).. كويس قوى..

المأمور : استنى ياعبد.. عاوزك..

عبيده : (فى ارتباك شديد).. عندى شوية شغل متأخر.. أصل فيه
واحد قدامه سكة سفر.. بعد نقطتين.. وأنا غلطت وقلت

له ثلاثة كنت عاوز ألحقه.. وأنهه ان البن اللى فات...

المأمور : (بلهجة باردة).. طلع الصور اللى فى جيبيك ياعبد...

عبيده : صور إيه..؟

المأمور : اللي فى جيبك فى جيبك اليمين..

(عبده يخرج الصور)

المأمور : (وهو يفحص الصور).. ازيك يادكتور أحمد.. ألف مبروك

المعهد.. مشروع هایل.. عبده اقرأ الفنجان والكف وافتح

الكوتيشينة وبس مفيش داعى انك تحرض البنات على

حاجات مش كويسه.. البنات دى اتولدت علشان تبقى

أمهات.. معايا والا ايه يادكتور أحمد..؟

أحمد : حضرتك معاك أمر من النيابة تدخل بيتى..؟

المأمور : لأ.. أنا جاى أزورك بصفتى صديقك..

أحمد : انت مش صديقى...

المأمور : ليه يالأخى.. ده انت لو عاشرتنى حاتلاقينى كويس قوى

وحاتحبينى وابقى صديقك وأجى أزورك...

أحمد : حظى سيئ.. ماعنديش وقت نتصاحب.

المأمور : خلاص.. اعتبرنى ضيف.. (ملتفتا لعبده).. فاهم ياعم

عبده.. اعقل كده وامشى جنب الحيط.. بطل دجل..

لحسن وشرفى أقفل هولك وأدخلك السجن..

عبيده : دجل..؟ الف لك دجل..؟ النجوم دجل..؟ التنويم

المغناطيسى دجل..؟ ودى حاجات بتدرس فى جامعات

أوروبا دلوقت.

المأمور : الكلام ده تقوله لحد تانى.. فاهم..؟ كل عيش أحسن لك..

أنا أقدر أوديك فى داهية وانت واقف دلوقت.. بعلبة

السجائر اللي فى جيبك.. بس أنا مش عاوز أنسى انك

لجأت لى فى يوم من الأيام.. تطلب حمايتى.. مع السلامة

ياعبده.. وخد بالك من نفسك.

(عبده يخرج مسرعا)

المأمور : أقعد أنا بقى.. مدام محدش قال لى أقعد.. اتفضل أقعد
يادكتور... واقف ليه..؟ الدم طاب طبعاً..
سهير : أنا أسفة.. ارتبكت شوية.. تحب تشرب ايه..؟
المأمور : لأ.. شكراً.. ماتتعبيش نفسك.. أنا جاى اتكلم كلمتين
صغيرين مع الدكتور أحمد.

أحمد : مفيش كلام بينى وبينك.. عاوز ايه..؟
المأمور : انت عارف انى مش حاقول لك حاجة..
سهير : أحمد أرجوك تفكر تانى بهدوء..
أحمد : من فضلك الموضوع ده يخصنى أنا وهو بس..
ماتدخليش.. أنا ما عنديش حاجة أقولها.. سلام عليكم.
(يتناول الحقيبة)

المأمور : انت مسافر والا ايه..؟
أحمد : وانت مالك.. حاجة غريبة والله.. انت مالك اذا كنت
مسافر والا قاعد.. ولى أمرى..؟
المأمور : هى دى الطريقة اللى بتعامل بيها ضيوفك..؟ فيه حد
يسيب ضيوف فى بيته ويخرج..
أحمد : مابقاش بيتى.. بيت الدكتور سهير.. أنا لما يبقى لى بيت
مش حاخليك تدخله..
سهير : أحمد...

أحمد : إيه..؟ أنا حر أدخل بيتى اللى يعجبنى.. باقول رأى..
مش البلد فيها حرية رأى والا ايه..؟
المأمور : أية.. بس مافيهاش حرية قلة الأدب.. مافيهاش حرية
الصفاقة..

أحمد : انت جاى تشتمنى..؟
المأمور : لأ.. انت عارف كويس قوى انى مش جاى أشتمك.. لأن
عرى ماشتمت جد ولا حاشتم حد.. انت اللى بتستفزنى

من ساعة مادخلت وأنا لسه محتفظ بهدوئى .. لحد
ماقوللى على كل حاجة.

أحمد : عاوز تعرف الحقيقة ليه؟.. عشان تبقى ضابط ناجح فى
كل حاجة خايف لحسن يقولوا عليك انك انسان فاشل..
خايف لتتأخر لك علاوة.. والا ينقلوك البدارى..

المأمور : لأ.. واللى يعرفونى كويس يعرفوا انى مابفكرش فى
حاجات من دى.. أنا كل همى أرجع الطمأنينة للناس.. أنا
م باشتغل عشان الوظيفة.. أنا أكبر من كده.. أنا باشتغل
عشان عظمة الانسان نفسه.

أحمد : تعرف ايه عن الانسان؟..

المأمور : أعرف كل حاجة...

أحمد : مغرور وصغير فى السن..

سهير : أحمد.. مش طريقة مهذبة تتكلم بيها مع حد..

أحمد : اسكتى انتى من فضلك.. سببىنى أصحيه.. انسان مين اللى
تعرفه.. الانسان اللى بتشوفه فى المطاعم والسينمات..
اللى بيقولك آسف لو داس على رجلك فى الأتوبيس.. لازم
ينطفى النور عشان تعرف الانسان على حقيقة.. الانسان
اللى موجود دلوقت واللى حضرتك بتشغل عشانه،
ماتقدرش تعرفه ولا تشوفه الا فى الضلمه تحياتى
وتمنياتى الطيبة انك تمسك العصا (بتهمك).. لسه
بيتصلوا بيك..؟

(يتأهب للانصراف)

المأمور : استنى يادكتور.. كلمنى كمان.. صحينى..

أحمد : ليه؟.. هو حد كان صحانى.. أنا اللى صحيت بعد مادفعت
التمن.. بس للأسف صحيت متأخر.. انت كمان لازم تدفع
التمن عشان تصحى ده آخر كلام حاتسمعه منى..

المأمور : (يلجا للتهديد).. كده.. طب خد بالك من اللعبة الجديدة

اللى بتلعبها .. لعبة الرقص..

أحمد : انت بتهددنى .. لا يا حبيبى اطمئن .. اطمئن قوى .. كل اللعب

اللى بالعبه قانونى جدا .. انت ناسى انى كنت أستاذ فى

القانون؟ .. حاجة كمان عايزك تفهمها وتضيئها

لمعلوماتك .. أنا باكون دلوقت جمعية لاشهار الرقص

الشرقى .. جمعية قانونية جدا ولها فروع فى كل الأقاليم

وحاخذ أمانة الشئون الاجتماعية كمان .. اطمئن .. لو حبيت

تعمل أى هلس فى الدنيا .. تعالى لى وأنا أخليهولك

قانونى .. اصحوا بقى .. تحياتى ..

(يخرج بهدوء وثقة)

المأمور : (بحزن شديد).. كل الجماعة اللى رجعوا .. رجعوا تلفانين ..

بيكرهوا كل حاجة .. حتى بيكرهوا أنفسهم .. قلعةدين

يبوظوا فى البلد .. وأنا مش عارف أعمل لهم حاجة مش

عارف أمنعهم .. بيفسدوا كل حاجة بطريقة قانونية .. تنويم

مغناطيسى ودجل وهلس .. وكله قانونى .. أعمل ايه بس

ياربى .. أنا تعبت وقرت أياأس ..

سهير : عارف ان إحنا انفصلنا ..

المأمور : أنا آسف ..

سهير : على إيه ..؟ الدكتور أحمد أبو الفضل خسرته يوم ما

اختفى .. اللى رجع ده واحد تانى .. ده اسمه أبو حميد ..

مايهمنيش انى أخسره ..

المأمور : اتغير كثير ..؟

سهير : اتغير لدرجة انى أقدر أقول انه مش هو ...

المأمور : معهد رقص .. أنا لما عرفت الحكاية دى ماقدرتش أستنى

وجيت على طول أرجو حضورى مايكونش ضايقتك ...

سهير : لا أبدا .. غير حكاية المعهد .. كل حاجة فيه اتغيرت ..
المأمور : لاحظتى إيه عليه .. فيه حاجات محدش يعرفها عن
الرجال الا الست بتاعته ..

سهير : بيتكسف يقلع هدومه قدامى ...
المأمور : (يقفز صائحا) مطبوط .. صح .. دى حاجة ماشية مع
استنتاجى .. لازم يحصل كده .. (بلهفة) .. إيه كمان ؟
سهير : حاجة كده مش عارفه اذا كان ليها معنى والا لا ..
المأمور : زى إيه .. ؟

سهير : طول عمره بلبس جزمة مقاس أربعين .. لما رجع اشترى
جزمة مقاس أربعة وأربعين وبرزه على قده ..
المأمور : (بفرحة شديدة وكأنه وجد أخيرا ما يبحث عنه) .. هى
دى .. هو ده الكارت اللى كان ناقصنى .. بتقولى وبرزه
على قده .. ؟

سهير : أيوه .. ودى معناها إيه .. ؟
المأمور : هى مفتاح اللغز كله .. هى اللى كشفت سر الظاهرة كلها ..
أنا دلوقت عرفت الحقيقة كلها ..

سهير : إيه هى الحقيقة ..
المأمور : فكرى كويس ، ورتبى العناصر دى جنب بعض .. تعرفى
الحقيقة بسهولة .. اختفى من ثلاث شهور ورجع مرعوب
جدا وعنده دمل .. ساب الكلية وفتح معهد رقص .. جزمته
كبرت أربع درجات (بمرح شديد) اذا عرفت الحل ياسيدتى
ارسليه إلى الاذاعة واكتبى على الظرف فوازير رمضان ..

سهير : أنا مش فاهمه حاجة .. ماتقول وترىنى ..
المأمور : (يتصل بالتليفون) .. فى المؤتمر .. حاسل مؤتمر .. وحاقول
بيان وافى وشامل .. الناس كلها لازم تعرف الحقيقة الليلة
دى .. ألو ادينى ١٥ يابنى .. ألو .. أيوه ياقتدم .. أنا حسن ..

أنا عرفت كل حاجة.. عرفت الحقيقة كلها.. لا.. لا.. لا..
مسألة بسيطة ماتسببش الازعاج ده كله.. أيوه يافندم..
حاتكلم فى المؤتمر.. بلغوا الصحافة والاذاعة
والتليفزيون.. بلغوا كل الجهات المهمة بالموضوع.. أرجوك
يافندم كمان تركبوا ميكروفونات على القسم عشان
الستات اللى بيستتوا يعرفوا الحقيقة.. أنا حاكون جاهز
بعد ساعة.. مع السلامة يافندم.. (مرددا لنفسه).. وبرضه
تطلع على قده شوف يا أخى النصيب..

سهير : أرجوك قوللى الحقيقة دلوقت.. أنا خايفه.. لحسن..

المأمور : اختقى يعنى.. هاها.. ماتخافيش على..

سهير : اشمعنى...

المأمور : لا أنا مرح.. ولا مقاس حزمتى أربعين..

(يخرج بينما تخفت الإضاءة بالتدريج)

• المشهد الأخير •

(أعضاء اللجنة القديمة بالإضافة إلى مجموعة من الصحفيين..
كاميرات سينما وتليفزيون مندوب الإذاعة يجلس وحول أذنه
السماعات وأمامه أجهزة الإذاعة)

أصوات : أتأخر قوى...

... يا جماعة لا أتأخر ولا حاجة.. إحنا اللي مستعجلين..

... جايز اختفى هو راخر...

مصطفى : أنا اتصلت بيه فى البيت.. قالوا لى جاي حالا....

المنذيع : أيها السادة لازلنا الآن فى انتظار الرائد حسن
عبد السلام.. وهو المسئول عن التحقيق فى ظاهرة
الاختفاء والأصوات التى تصل إلى أسماعكم الآن هى
أصوات السادة المجتمعين الذين ينتظرون سماع الحقيقة..
بعد قليل أنها السادة تصل لكم الحقيقة عبر الميكروفون
على موجة طولها ٥,٩ مترا.

(يدخل المأمور بخطوات سريعة ونشطة)

المأمور : أسف يا جماعة أتأخرت عليكم شوية.. نمت.. أول مرة أنام
بعمق ساعة كاملة من يوم ما حصلت الظاهرة دى..

(يقف بينهم بحيث يرونه جميعا)

المأمور : قبل ما أتكلم.. فيه أسئلة.. أو استفسارات..

الانبيـابى : قبل ماتقول البيان ياسيادة المأمور.. لى طلب بسيط
بخصوص مؤسسة الغاز والكهرياء..

المأمـور : اتفضل..

الانبيـابى : أنا معايا جواب ممضى من رئيس مجلس الادارة بيطلب
منك انك توضح موقف المؤسسة من ظاهرة الاختفاء..
وتعرف الراى العام أن مؤسسة الغاز والكهرياء مش
مسئولة أبدا عن حوادث الاختفاء.. وان الكهرياء بتاعتنا
سليمة ومفيش أى اهمال من ناحيتنا..

المأمـور : مفيش صلة بين حوادث الاختفاء وانقطاع التيار الكهري..
يعنى انقطاع التيار الكهربائى مش هو سبب الاختفاء.. هو
مجرد ظاهرة مصاحبة لظاهرة الاختفاء.. والسبب
حانعرفه فى البيان.. ميسوط ياسيدى..

الانبيـابى : (يواجه الصحفيين بابتسامة عريضة وهم يلتقطون صورته)..
شكرا أرجوك يا أخ مصطفى وضع المسألة دى..

أبو العينين : أرجو كمان من سيادتك انك تعرف الراى العام بالمجهود
اللى بذله رجال البحث العلمى..

المأمـور : لم أكن أتصور أن أجهزة البحث العلمى فيها ناس من
أمثال الدكتور أبو العينين.. عندهم قدرته الهائلة فى فهم
اللوائح المالية والادارية التى تنظم البحث العلمى..
ميسوط..؟

أبو العينين : (يقف مبتسما بينما تلتقط له عشرات الصور).. شكرا ..

د. مننسى : والطب ياحضرة الرائد..

المأمـور : والطب كمان.. ميسوط؟ وانت يا مصطفى.. مش عاوزنى
أقول حاجة أشكر فيها الدور اللى قامت بيه الصحافة..

مصطفى : سواء قلت يافندم أو ماقلتش.. أنا كتبت انك قلت..
ميسوط؟

المأمور : شكرى العميق للدكتورة سهير الخليلى أستاذة المنطق فى كلية الآداب.. أيضا للأستاذ أحمد أبو الفضل والأستاذ عبده الفلكى.. فلولا عدة ظواهر مرضية ظهرت على عقلمهم وجسمهم ماكنتش عرفت الحقيقة.. تحياتى لهما بالنجاح فى مشاريعهم الجديد..

صوت : فيه صلة بين اللى بيحصل وبين اختفاء الغواصات والطيارات..؟

المأمور : لا...

صوت : آمال إيه..؟

المأمور : حاتعرف.. أى أسئلة.. متشكر.. أتكلم بقى.. كلمة الاختفاء كلمة غير دقيقة وغير علمية.. وده أول خطأ وقعنا فيه.. لأن مايفتفى من أمامك فى مكان يكون مرثيا لناس تانية فى مكان تانى.. أن يفتفى شئ معناه أن يتلاشى أو يفنى والعلم بيقول المادة لا تفنى أو تستحدث ولكنها تتحول أو تتغير من صورة لأخرى وبالرغم من كده أنا حاستعمل كلمة الاختفاء كتعبير عن هذه الظاهرة.. لحد ما نلاقى كلمة تانية تدى نفس المعنى.. والاختفاء ظاهرة قديمة قدم الحياة نفسها وأوضح وأسوأ شكل لهذه الظاهرة هو الموت.. الموت معناه البسيط أن يفتفى انسان من حياتنا وتتوقف كل تعاملاتنا معاه وتنقطع كل صلة لنا بيه.. الاختفاء من الناحية الشكلية صورة صغيرة جدا من الموت.. عدد الناس اللى يفتفى نسبتهم ضئيلة جدا جدا بالنسبة للناس اللى يتموت، موت طبيعى أو فى الكوارث.. ومع ذلك هذه الاختفاءات اللى تحدث لعدد بسيط جدا من الناس، تحدث فى المجتمع حالة من القلق وعدم الطمأنينة كقيلة يقتل كل ابتسامات الناس وتدمير حضارة

الانسان على المدى البعيد.. تناقض غريب ولكنه منطقي..
أول حقيقة يعرفها الإنسان، هى أنه حاي موت ومع ذلك
الانسان مشى فى طريقه من آلاف السنين يبني الحضارة
ويعمل الفن.. الموت والاختفاء فى حد ذاتهم مش مشكلة..
مش قضية.. القضية ان الانسان يعرف.. وهى دى مفتاح
القضية.. إن الإنسان يعرف حايختفى امتى؟.. وليه؟
ويرجع امتى؟.. وإزاي؟.. لو عرف.. تفقد ظاهرة الاختفاء
كل مساوئها.. وترجع الابتسامة والطمأنينة ويواصل
الانسان طريقه يبني الحضارة ويعمل الفن ويصبح
الاختفاء ظاهرة أخرى من ظواهر الطبيعة ليها القوانين
اللى بتحكمها.. الانسان كان زمان مرعوب.. من كل
الظواهر اللى حواليه.. الرعد.. البرق.. المطر..
العواصف.. لما بدأ يعرف القوانين اللى بتحكم الحاجات
دى.. بدأ يسخرها لخدمته ويبني بيها حضارته وحرية
المشكلة الحقيقة قدام الانسان هى أنه يعرف القوانين اللى
بتحكم الظواهر اللى حواليه.. كل حاجة بنعرفها بتمشى
بيننا خطوة لقدام فى طريق الحضارة.. أنا مش باقول كلام
انشا.. أنا باقول حاجات لازم تعرفوها قبل ما تعرفوا
الحقيقة.. ولما حاقول الحقيقة حاتكتشفوا كلكم انها كانت
راقده جواكم.. وهى دى عظمة الحقيقة.. ان كل واحد
يعرفها.. بس المهم اللى يقولها.. الانسان ماكانش حر لما
كان بيجهل القوانين التى تحكم ظواهر الرعد والبرق
والمطر.. لما بدأ يعرف.. بدأ يبقى حر.. جاليلو ماكانش
عبيط لما مات فى سبيل أنه يقول أن الأرض بتلف.. إيه
يعنى بتلف.. عنها مالف وتعيش وبلاش وجع دماغ..
أبدا.. هو اكتشف انه لازم يقول ان الأرض بتلف لأنه

اكتشف هذا القانون الهام.. معرفة أن الأرض بتلف بتمشى
بيه خطوة لقدام فى طريق حريته.. وهنا تصبح الحرية
والمعرفة شئ واحد.. ولذلك ييموت فى سبيلهم.. ده اللى
عاوز أقوله.. لا يمكن الفصل بين المعرفة والحقيقة
والحرية.. أى حقيقة بيعرفها الانسان مهما كانت مزة
ومؤلة هى الطريق الوحيد لصنع الحضارة والحرية..
دفاثر القسم عندى بتسجل حوادث كتير اليومين دول..
سرقة.. رشوة.. اختلاسات.. نشل... بعد ما أقول
الحقيقة.. الستات اللى قاعدين بره حايروحوا بيوتهم
ستختقى العفاريث من عقول الناس وتعود الابتسامات
وتعود الطمأنينة وتعود مصر الجديدة مرة أخرى ضاحية
هادئة وستصبح دفاتر القسم نظيفة ويرضه انشاء &
حاخذ جايزة الدولة ودرع الأمن والطمأنينة المطلقة
(حسين يقترب منه).. أيوة يا حسين فيه حاجة..

حســــــــين : الست والددة حضرتك.. موجودة بره..

المــــــــأمور : خليها تتفضل..

حســــــــين : دى قاعدة مع الستات اللى بره..

المــــــــأمور : طيب أنا حاقول البيان وأخرج لها.. الشئ المهم إننا نعرف
القوانين التى تحكم هذه الظاهرة.. بيانى شامل لكل هذه
القوانين.. واليكم البيان..

(يخرج ورقة صغيرة من جيبه فى الوقت الذى تطفأ فيه كل الأنوار
على المسرح دفعة واحدة ويسبح المسرح فى ظلام دامس.. عندما
تعود الاضاءة مرة أخرى يكون المأمور قد اختفى.. الوجوديين فى
حالة تجمد تام.. ينسحبون من المسرح فى حالة رعب شديدة ولا
ينطقون بكلمة واحدة لا يبقى على المسرح سوى حسين والدكتورة
سهير..)

حسـين : دكتورة سهير .. حانعمل إيه ..؟
سهـير : ندرس ملفات القضية تانى.. حانواصل.. على الأقل فيه
حاجة مهمة عرفناها .. اللى يعرف الحقيقة .. يقولها
بسرعة.
(جرس التليفون يدق فيمد حسين يده نحوه)
سهـير : استته يا حسين .. ماتردش .. (ترفع سماعة التليفون وتضعها
بجوار التليفون) .. هات الملفات ..
حسـين : وإذا النور انطفى ..
الدكتورة : عندى فكرة (تخرج من حقيبة يدها شمعة تشعلها وتضعها فوق
جهاز التليفون) ..
(تخفت إضاءة المسرح بالتدريج ولكن ضوء الشمعة ما زال
كافيا لنرى سهير والعريف حسين يقرآن الملفات بينما
تنزل
«الستار»

إنت اللي قتلت الوحش

كوميديا أديب

انت اللى قتلت الوحش (كوميديا أوديب)

قدمها مسرح الحكيم فى فبراير ١٩٧٠
من إخراج الأستاذ جلال الشرقاوى

الفنيون :

الديكور : مجدى رزق

الملابس : فوزى أبوشال

الموسيقى : يوسف شوقى

الإدارة المسرحية : جلال توفيق

إدارة الإنتاج : فاروق عبد الباقي

المخرج المساعد : ماهر عبد الحميد

الشخصيات

- أوديــــــــب : شاب يعيش فى طيبة لا نعرف من أين جاء على وجه التحديد
- جوكاستا : ملكة طيبة
- حور محب : رئيس كهنة آمون ومدير جامعة طيبة.
- أونــــــــح : رئيس الغرفة التجارية ورئيس مجلس مدينة طيبة.
- أوالــــــــح : رئيس الشرطة فى طيبة
- كــــــــريون : رئيس الحرس فى طيبة
- تريزياس : هو نفسه تريزياس بنفس أبعاده المعروفة فى الأدب الإغريقى القديم
- كــــــــورس : من أهالى طيبة.
- شخصيات ثانوية :

توزيع الأدوار

أوديب :	أحمد عبدالحليم
جوكاستا :	ماجدة الخطيب
تريزياس :	جلال الشرقاوى
أوالح :	فاروق نجيب
حور محب :	عبدالحفيظ التطاوى
أونح :	فؤاد أحمد
سنفرو :	محمد نوح
كريون :	أنور إسماعيل
كامى :	محمود العراقى
كاعت :	محمد الغناني
نفر :	تهانى راشد
أهالى طيبة :	من طلبة المعهد العالى للفنون المسرحية

• الفصل الأول •

المشهد الأول

المكان : طيبة القديمة.. طيبة مصر وليس طيبة اليونان أسوار طيبة العالية وقد تسلقها الأهالي وأخذوا يرقبون بقلق شيئا بعيدا عن المدينة. وإلى الشمال شرفة القصر الفرعوني وجرة من القصر نفسه، جزء من معبد طيبة وحوله بعض تماثيل الكباش وكأنها تحمى الطريق إليه، تحيط بالمكان مدرجات حجرية دائرية، وفي المنتصف منضدة حجرية مستديرة وحولها أربعة مقاعد، المنضدة والمقاعد مخصصة لجلسات مجلس المدينة... والمدرجات مخصصة لجلوس أهالي طيبة، على يمين مقدمة المسرح يجلس شخصان، إنهما أوديب وصديقه كامى، وقد انهماكا فى مباراة شطرنج هادئة. من أعماق المسرح الذى يسبح فى ضوء خافت يقترب تريزياس العجوز متوكئا على عصاه.. يقترب من مقدمة المسرح حيث يبدو واضحا لجمهور المشاهدين.. الزمان: منذ زمن بعيد، بعيد جدا..

تريزياس: أيها السادة.. يا من تسكنون هذه المدينة، أقص عليكم قصة مدينة أخرى، قصة طيبة، طيبة.. عروس النيل، وعاصمة العالم القديم، طيبة، ذات المعابد العظيمة، والتجارة المزدهرة .. طيبة اليوم تسعة وحزينة.. لقد عرف الفقر والبؤس طريقها لمدينتي الجميلة لأول مرة فى عمرها الطويل.. (لحظة صمت).. فى مكان غير بعيد عن طيبة وعلى الطريق الوحيد المفتوح إلى بلاد الشمال، ظهر وحش غريب.. يقولون إن له رأس امرأة جميلة وجسد حيوان هائل الحجم، يسمونه «أبوالهول».. هذا الوحش يلقى الغزا على المسافرين ويقتل من لا يعرف الحل وطوال الشهور الثلاثة الماضية قضى على كل رجال القوافل القادمة إلى طيبة عن طريق البر، أو القادمين عن طريق النيل العظيم، وذهب الكثيرون ليحلوا اللغز ويحصلوا على الجائزة ولم يعودوا.. وأخيرا ذهب الأستاذ بتاح.. أستاذ الدراسات العقلية المبدعة وجراح الجمجمة الملكية.

«فى الناحية الأخرى يتكلم أوديب مع صديقه..

أوديب : هو مجلس المدينة عامل الجائزة كام جنيه..؟

تريزياس : (يواصل كلامه).. خمسون ألفا من جنيهات طيبة الذهبية سيحصل عليها الأستاذ بتاح إذا حل اللغز .

(يخرج تريزياس من المسرح فى هدوء.. فى الوقت الذى تخرج فيه

الملكة إلى الشرفة)

جوكاستا : (تنادى).. كريون..

كريون : (يرد عليها من مكانه فوق السور).. أيوه يا مولاتى.

جوكاستا : وصل..

كريون : فى طريقه يا مولاتى..

(تتعالى صيحات الأهالى).. وصل.. وصل.. وصل..

أونـج : (يرفع صوته).. وصل يا مولاتى.. وصل.. واقف قدام الوحش

بيفكر .. ماسك دماغه ..؟

أودييب : (بهوء) .. مايعرفش يفكر إلا إذا مسك دماغه ..؟

(اصوات الأهالي ترتفع مشجعة الأستاذ بتاح)

أصوات : قول يا بتاح .. قول .. اتكلم .. حل اللغز .. حايقول .. حايتكلم ..
تراهن.

(صياح وحشى مفاجئ من الأهالي، ثم صمت شديد يسود المسرح)

شخص : (كانه يتذب) .. عكشه من قفاه ..

كريون : خده ورا التل .. مش شايفه

شخص : دراع .. دراع طاييره ..

شخص آخر : رجل ..

شخص : جاييز مش رجله، جاييز رجل حد من اللي قبله ..

شخص آخر : هي رجله وحياة آمون .. أنا عارفها كويس .. ياما ضريني
بالشلوت في الجامعة .

شخص : (يصيح في صوت باكى) .. يا ساتر .. أستر يا رع .. الراجل اتقطع
حتت ..

(الأهالي ينزلون من فوق الأسوار وقد استولى عليهم حزن)

عميق .. ياخنون أماكنهم على المدرجات الحجرية ويتجه أعضاء

مجلس المدينة (إلى المنضدة المستديرة).

أودييب : سامع

كمامى : إيه ..؟

أودييب : زى ما يكون حد بيمضغ حاجة .. بيقرقش حاجة ..

كمامى : (يصيح السمع) .. حاجة زى إيه ..؟

أودييب : أستاذ في جامعة على وجه التحديد .. يالله يا سيدى .. كش

ملك، مات الملك .. كان ممكن يحل الضرورة .. لو هو رايح عشان

يحل الضرورة ..

كمامى : أمال هو كان رايح يتقسخ ..؟ .. أما أنت ليك آراء غريبة يا أوديب ..

أوديب : أبدا، رايح وبيفكر فى الجائزة.. مش ممكن الواحد يفكر فى الجائزة وفى اللغز فى الوقت نفسه.

(عندما ينتهى أوديب من حوار مع صديقه يكون مجلس المدينة

قد اتخذ مجلسه على المنضدة والأهالى قد اتخذوا مجلسهم على

المرجآت الحجرية)

أوديب : يالله بينا نقعد فى وسط الناس..

(يجلس أوديب وزميله وسط الأهالى)

حور محب : أنا قلت كده من الأول.. دى مؤامرة للقضاء على ثروة طيبة العلمية، وحش يأكل أستاذ الرياضيات ويعددين أستاذ الإبداع العقلى.. ولذلك (يتخذ هيئة خطابية) أعلن أنا حور محب رئيس كهنة آمون ومدير جامعة طيبة.. أعلن رفضى أن أى أستاذ من الجامعة يروح يحل الفوزرة.. اعتبروا ده قرار.

أونـسـح : آمال مين اللى حايروح؟

حور محب : (بغضب) .. ماعرفش يا أونـسـح.. ماعرفش.. أنا مش مسئول..

أوالـسـح : لأ.. مسئول .. الألفاز والفوايزر والمعادلات والحاجات اللى زى

كده مايعرفش يحلها إلا الجماعة اللى بيفكروا كويس ..

والجماعة اللى بيفكروا كويس هم أساتذة الجامعة..

حور محب : ده صحيح.. لكن أنا مقدرش أنزل بمستوى الأساتذة بتوعى..

إذا كان الوحش ينزل لنا محاضرات أو ماجستيرات أو

دكتوراهات مفيش مانع.. لكن فوايزر وكلام فاضى.. أنا

أرفض..

أونـسـح : خلاص .. أرفض.. لحد ما البلد تموت من الجوع.. مفيش ولا

قافلة دخلت البلد من ثلاث شهور..

حور محب : هو ده اللى يهكم.. انت بصفتك رئيس الغرفة التجارية يهكم

أن التجارة تمشى وخزائيك تتملى تانى.

(الملكة تخرج إلى الشرفة)

جوكاستا : إنتم حانتخانقوا .. أنا جايباكم عشان تفكروا وتخلصوا الناس
من المصيبة اللي هي فيها، والا عشان تنشروا غسيلكم وتفرجوا
الناس على هيافتكم.

أوالسح : يا مولاتى.. إحنا بنتبادل وجهات النظر..

جوكاستا : انت ليك عين تتكلم يا رئيس الشرطة..

أوالسح : ليه يا مولاتى...؟

جوكاستا : ... مش عارف ليه..؟ فين جلالة الملك.. فين مولاك وولى
نعمتك ملك طيبة.. لو كان موجود كان حل اللغز ده فى دقيقة
واحدة..

سخص من الأهالي: الله يرحمه.. كان راجل غيبى هو راخر..

(ينفجر الأهالي ضاحكين.. فينظر لهم رئيس الشرطة بتهديد

فيتوقفون من الضحك)

جوكاستا : انتقتل فى مفارق الطرق على بعد خمس مراحل من طيبة ..
مش كده.. مين القتلة؟ .. فين القتلة؟ دورت عليهم يا رئيس
الشرطة.. جاوب..

أوالسح : (يتلعثم).. يا مولاتى.. التحريات .. أقصد سرية التحركات..

جوكاستا : جاوب .. أنا بأمرك إنك تجاوب..

أوالسح : فيه أسرار يا مولاتى ماقدرش أقولها على الملأ..

جوكاستا : اتفضل جاوب على الملأ .. دروت على القتلة..؟

(يتلفت حوله فى حيرة ثم يترك الاجتماع ويقترب منها)

أوالسح : (فى حديث جانبي مع الملكة.. بصوت خافت وعصبية) إيه مولاتى..

انتي مش قلتى لى ماتدوررش..

جوكاستا : أنا قلت كده..؟

أوالسح : آه.. قلتى لى ماتدوررش قوى يعنى.. وهو نصيبه كده.. والموت

مكتوب علينا..

جوكاستا : طيب أنا آسفة يا أوالح.. ماخدتش بالى..
أوالـح : مش تاخدى بالك يا مولاتى.. كنت حاتودينى فى داهية..
(أوالح يعود لمكانه وسط الاجتماع.. ينهض أوديب من بين الأهالى)

ويصبح بحزم)

أوديب : أوالح.. رئيس الشرطة.. هو اللى يروح يحل اللغز..
الأهالى : (بصوت كالرعد).. أبوه.. هو اللى يروح يحل اللغز..
أوالـح : (مصعوقا) .. أنا .. ؟ .. اشمعنى أنا..
أوديب : أنت رئيس الشرطة.. المفروض إنك أذكى واحد فى البلد دى..
(يخاطب الأهالى فى محاولة لإقناعهم).. أى جريمة بتحصل
رئيس الشرطة بيفكر فيها ويذكائه يعرف مين المجرم.. أى
جريمة تعتبر لغز.. والمفروض رئيس الشرطة يعرف يحل أى
لغز..

كريون : ده كلام سليم.. أنت رئيس الشرطة عشان أنت أذكى واحد فى
طيبة.

الأهالى : صح..

(وقد لاحظ أن الحبل بدأ يضيئ حول عنقه)

أوالـح : إيه هو اللى صح؟.. انتم عاوزين تودونى فى داهية؟.. ألغاز إيه
وجرائم إيه اللى بافكر فيها.. أنا فى الحاجات دى أغبى خلق
الله..

حور محب : إزاي الكلام ده..؟

أوالـح : هو كده..

أوديب : (يتحده) .. أمال بتعرف المجرمين إزاي..؟

أوالـح : وحاعرفهم ليه؟.. أنا باقبض عليهم بس.. أنا راجل قبيض..
جلالة الملك الله يرحمه هو اللى كان عارفهم بالواحد.. وكان
عاطلينى كشوف بأسمائهم وعناوينهم.. أقبض على دول..
أقبض على دول.. سيب دول.. أسيب دول افقع دول علقه..

أفقع دول علقه .. (صانحا فى توسل) .. أبقى راجل ذكى..؟

الأهالى : تبقى راجل غبى..

(يعود لمقعه وهو يغمغم)

أوالـح : غبى، غبى، غبى، بس أعيش..

كـامى : قلت إبن الإيه..

جوكاستا : اتفضلوا كملوا .. لازم المشكلة دى تتحل الليلة دى..

أونـح : يا جماعة أنا عاوز أحذر من جماعة خطيرة.. كمية المواد

الغذائية اللى موجودة فى طيبة ماتكفيناش أكثر من أسبوع ..

وبعد كده..

صوت من الأهالى : وبعده كده حاتكلونا

(ترتفع ضحكات الأهالى)

(يظهر تريزياس من مكان ما فى المسرح صارخا .. يلاحظ ان

تريزياس يظهر ويختفى فى اى وقت).

تريزياس : يا ناس.. يا ناس.. .. شوية جد.. المرح شىء عظيم .. بس

المعابد والمقابر والأسوار العظيمة اللى أنتم قاعدين جنبها

ماتبنتش بالمرح.. عظيم قوى أن الواحد يقابل الكوارث وهو

بيضحك.. لكن لما يبقى الضحك مقابر، يندفن فيها مستقبل

البلد.. لما النكت تبقى غيلان تاكل إحساسكم بالمسؤولية.. لما

المرح يبقى كفن.. ولما تسموا التعاسة والبؤس مرح.. يبقى إيه

الى بيريطكم بالدنيا..؟.. يبقى كل حاجة ضاعت.. واللى

فاضل حايضبع..

شخص من الأهالى: وعاوزنا نعمل إيه يا عم تريزياس.. حانقعد نعطى..؟

تريزياس : أنتم فعلا قاعدين تعيطوا.. بتلطموا كمان.. انتم فاكرين العياط

إيه.. دموع بتتزل على الخدود.. انتم فاهمين اليأس إيه.. (يدور

بينهم وكأنه يريد ان يفرس كلماته فى اعماقهم).. اليأس هو

الضحكات الغبية، والتفاؤل الساذج والسخرية العبيطة من كل

حاجة.. هي دى الضلمة اللى انتم عاملينها عشان ماتعرفوش الحقيقة.. سنفرو.. سنخت .. آتون.. كاعت.. وغيركم وغيركم.. كل بيت فى طيبة اتاكل واحد من أولاده.. مستنيين إيه؟

حور محب : يا سيد تريزياس، الأسلوب العاطفى ده عمره ما بيحل مشاكل.. مفيش داعى للاستسلام.. للغضب.. لا بد من التفكير الهادى..
أوالسح : القضية الأساسية يا سيد تريزياس أن فيه لغز.. ومطلوب واحد يحل اللغز..

أوالسح : صح.. مش يقعد بقى يقول لى النكت والمرح والسخرية.. انت عاوز تنكد على الناس وألا إيه..؟ ماتسيب الناس فى حالها يا أخى.

حور محب : وإذا احنا لقينا اللى يحل اللغز ده.. حايمشى الوحش ويسبنا فى حالنا هي دى القضية..

تريزياس : كذب.. ده تخريف.. مش هي دى القضية..
أوالسح : قصدك إيه..؟ .. مفيش وحش ومفيش لغز..
تريزياس : فيه وحش .. وفيه لغز.. مش اللغز اللى بتفكروا فيه .. لغز تانى.. ولا واحد فيكم جاب سيرته.. يا ناس.. الألفاز دى يقولوها الفلاسفة والمفكرين والجماعة اللى بيتسلوا بالليل فى ضوء القمر.. الوحوش حاتقول ألفاز ليه..؟ الوحوش تستعمل عقلها ليه..؟ الوحوش بتستعمل عضلاتها وأنيابها.. الوحوش بتستعمل مخالبها وضوافرها .. سمعتوا على تعبان طلع لواحد قال له لغز.. سمعتم عن أسد طلع لواحد لعب معاه السيجة.. يا ناس.. اعقلوا .. اللغز ده حجة .. الوحش هدفه واضح جدا.. أنا باستغرب إزاي أنتم مش شايفينه..

أوالسح : (بتهمك) .. إحنا اللى مش شايفينه، وانت اللى شايفه..
تريزياس : أنا أعمى العينين بس يا أوالح .. الدور عليك أنت يا أعمى

القلب.. يا أهل طيبة اسمعوا.. الوحش غرضه واضح جدا..
يأكل الأذكياء اللى فى البلد واحد واحد.. وبعدين الأغبياء اللى
فاضلين مش حا ياخدوا وقت.. حاياكلهم بالجملة..
أوديب : والحل إيه يا تريزياس؟
تريزياس : اطلعوا على الوحش كللكم.. لو كانت حكاية اللغز صحيحة..
قطعا فيكم حد حايعرف يحله.. وإذا كانت افترا.. يبقوا تاكلوه
أنتم..

صوت من الأهالى: وإذا هو كلنا..
تريزياس : ما ياكلكم يا أذى.. هو أنتم أحسن من اللى كلهم.. فى الحالتين
مشكلتكم حاتحل.. إذا هو كللكم.. أو إذا أنتم كلتوه..
(الصمت يشمل الجميع)

.. قلتوا إيه..؟ .. مش عاجيكم كلامى طبعاً.. مابتحبوش
تسمعوا الكلام اللى من النوع ده.. أنتم عاوزين حد يقف يقول
لكم نكت.. يزغزغكم.. (بتهمك مريض).. يا أهل طيبة يا شجعان..
كل واحد فيكم عنده استعداد يعدى بحور.. يقابل التماسيح
فى عز الفيضان.. يصارع الآلهة.. يضحى بحياته، فى سبيل
إنه يسمع نكتة جديدة.. كتكم خيبة أكثر من اللى أنتم
فيها..

(تتعالى ضحكات الأهالى بينما يخرج تريزياس فى هدوء)

أوالسج : مش من حق الراجل ده إنه ييجى يهين الأهالى فى وجود
مجلس المدينة.. طول عمرنا بنسكت له.. لكن الظروف اللى
إحنا بنمر بيها، ماتسمحش ان إحنا نسيب واحد بيلبل أفكار
الناس ويحطم عزائهم.. ولذلك أنا أطلب من المجلس أنه
يسمح لى أقبض عليه..

كريون : (ينهض صارخاً).. أنا أعترض.. بصفتى رئيس الحرس فى
طيبة، أرفض إن واحد ينقبض عليه بسبب آرائه.. تريزياس

بالذات محدش يقدر يشكك فى حبه العظيم لهذه المدينة..

تريزياس اتولد مع طيبة.. تريزياس هو طيبة..

شخص ١ : احنا اتولدنا لقيناه..

شخص ٢ : أبويا قال لى إنه كان موجود قبل ما يتولد..

شخص ٣ : جد جد جدى. سمع من جد جد جده.. انه كان موجود قبل ما يتولد.

كريون : إذا أنت سجت تريزياس يبقى بتسجن كل طيبة.. إذا طلبت من تريزياس أنه يسكت يبقى بتكمم كل أفواه الناس فى طيبة..

حور محب : خرجنا عن موضوعنا..

أوالـح : فعلاً مش هو ده الموضوع..

أوديـب : لأ.. هو ده الموضوع..

(أوالـح ينهض واقفا وقد استشاط غضبا يتجه ناحية أوديـب)

أوالـح : قصدك إيه..؟ بتلمح على إيه..؟ .. انكلم بصراحة..

أوديـب : أنت عارف قصدى..

أوالـح : قصدك انى عامل حجر على حرية الكلام.. قصدك انى مانع الناس انها تتكلم.

حور محب : خلاص بقى يا أوالـح.. انت حاتقلبها خناقة..

أوالـح : لأ.. أنا مش ممكن أعدى النقطة دى من غير ما أوضحها.

(يواجه الأهلـى ويصرخ فيهم بتهديد)

أنا منعت حد فيكم إنه يتكلم..

(بعض رجال الشرطة الواقفين يتحركون فى شبه حصار)

للأهلـى

اتكلموا... حد فيكم عاوز يقول حاجة ومش عارف يقولها..؟

(يمد يده وينتزع احد الجالسين ويوقفه على قدميه)

... سنفرو .. انكلم.. انت بتشتغل كاتب مسرحى... وكل سنة

بتتقدم لك مسرحية فى ساحة المعبد (تتغير لهجته).. وكان

ممکن مايتقدملكش حاجة..مش كده..؟

سنفرو : أيوه..

أوالسج : ومع ذلك بنقدم لك كل مسرحياتك وبتقول كل اللي علوز
تقوله.. مش كده؟

سنفرو : أيوه..

أوالسج : آخر مسرحية قلت فيها إيه..؟.. اتفضل قول عشان السيد
أوديب يعرف ان فيه هنا حرية كلام..

سنفرو : (بهمس).. أنهو مسرحية.. اللي انتم منعتوها..؟

أوالسج : (بصوت خافت ويغل) .. اللي طلعت يا مغفل..

(سنفرو يتكلم باعتداد وثقة ولا زال أوالسج ممسكا به من كتفه)

أنا قلت في مسرحيتي الأخيرة .. أجرأ حاجات ممكن تتقال..
وأنا لا أستعمل الرموز أو ألجأ للتاريخ.. اننى أكتب بجرأة
شديدة وعلى استعداد لأن أضحي بحياتى من أجل أن أكتب ما
أريد أن أكتب.. لقد طالبت في مسرحيتي الأخيرة بأن نحاول
من جديد دراسة أسطورة إيزيس وأوزوريس على ضوء
احتياجات الشعب الحقيقية.. وعدم تجاوز ما يقوم به بعض
الناس من هدم للأساليب التى لا تتفق وقدرتنا على تحقيق
الحضارة خصوصا فى الفترة التى تعقب فيضان النيل
مباشرة..

أوالسج : (صائحا) .. فيه أجرأ من كده يا اخوانا.. فيه بلد فى الدنيا
تسمح بكلام من النوع ده يتقال على مسارحها.. أهو إحنا بقى
بنسمح.. بس على شرط يكون فى إطار فنى.. فيه حاجات بقى
مايتقالش فى إطار فنى كويس.. مش إحنا اللي بنمنعها..
الفنانين المسئولين هم اللي بيمنعوها.. (يتجه بالحديث
لمجموعة من الأهالى يرتدون ثيابا زاهية الألوان).. مش كده يا
فنانين يا مسئولين..

(المجموعة تقف)

المجموعة : أيوه...

أوالسح : إقعدوا .. (يواجه أوديب) .. لازم تفهم يا أخ أوديب ان إحنا مش همج .. إحنا متحضرين .. بل وأكثر حضارة من البلد اللي انت جاي منها.

كريون : (بغضب شديد) .. كفاية تهريج .. طيبة بتواجه مصيبة، والسيد أوالح قاعد يدافع عن نفسه ويستعرض قدراته فى الخطابة .. مين اللي حا يخلصنا من الوحش؟

أوالسح : ما تخلصنا انت .. روح حل اللغز .. انت رئيس الحرس والمسئول عن صد أى عدوان خارجى .. اتفضل صد العدوان ..
كريون : أنا مقاتل .. أقدر أنفاهم بسيفى .. وأعرف أموت تحت أسوار طيبة قدام أى عدو يحاول يقرب من بلدى .. حكاية الألفاز مافهمش فيها ..

(تخرج الملكة من الشرفة)

جوكاستا : لسه بتتخانقوا .. لسه ما اكتشفتوش واحد له عقل كبير يقدر يحل اللغز .. لما بتكون فى وظائف محتاجة لعقول كبيرة .. كلكم تتقدموا .. ولما يكون فيه مصيبة .. كلكم تعملوا أغبيا .. فى ظرف ربع ساعة رملية إذا ما طلعتش واحد يحل اللغز .. مجلس المدينة يعتبر نفسه مرفود .. (تتوجه بكلامها للأهالى) .. يا أهل طيبة .. أكثركم حكمة .. أحذكم ذكاء .. أكبركم عقلا .. أوسعكم خبرة .. يتقدم، ويحل اللغز ..

أوديب : أنا يا مولاتى ..

(يخرج أوديب من بين الأهالى ويتجه للشرفة حيث تقف الملكة ..

يقف بحيث يراه الجميع .. يتردد اسمه على أفواه الأهالى ..

أوديب .. أوديب .. أوديب).

جوكاستا : إنت منين يا أوديب؟

أوديب : مش مهم يا مولاتي.. سواء كنت من ميتاني أو من بابل.. أو من
أى مكان على الأرض.. كل اللى يهتمكم أنى أخلصكم من
الوحش..

جوكاستا : رئيس الشرطة.. تعرف إيه عن أوديب؟
(أوالح يكلم أحد رجاله)

أوالصح : ملف أوديب ...

(الرجل يعطيه الملف فيفتحه ويقرأ)

أوالصح : أوديب.. لون العينين، عسلى.. الوجه، قمحى يميل للسمره..
علامات مميزة، له قدمان متورمتان.. الطول..

جوكاستا : انت حاتوصفولى.. ما هو واقف قدامى أهو؟ اتفضل كمل..
أوالصح : تتردد عنه شائعات كثيرة.. انه هرب من ميتانى بعد أن قتل
والده أو تسبب فى موته.. وهناك شائعة أخرى أنه هارب من
قضية نفقة.. القدرة العقلية، يتمتع بقدرات عقلية كبيرة،
استطاع خلال شهر واحد من إقامته فى طيبة أن يغلب كل
حريفة للشطرنج.. درجة خطورته، ليس له نشاط سياسى آخر..
يتردد أحياناً على معبد آمون قبل مباريات الشطرنج المهمة..
أوديب : كل ده مالوش أهمية.. الحاجة المهمة.. انى أعرف أحل اللغز..
حاتدونى إيه..؟

أوالصح : إذا حليت اللغز، تأخذ خمسين ألف قطعة ذهبية وأنا بصفتى
رئيس الغرفة التجارية أتعهد بأن أدفع لك من فلوس الغرفة
التجارية خمسين ألف كمان..

الأهالى : ياه...

حور محب : ونعينك مساعد كاهن.. تاخذ لك كمان ميت حته ذهب فى
الشهر.. غير بدل التمثيل... ونرقك كاهن بعد سنتين..

أوديب : أنا ما قلتش تدفعولى كام.. ولا توظفونى إيه.. أنا باقول تدونى
إيه..؟

حور محب : عاوز إيه..؟
 أوديب : طيبة..
 الأهلالي : (بدهشة).. طيبة..
 أوديب : أيوه .. انتم عندكم وظيفة ملك فاضية.. اتعين ملك..
 الأهلالي : ملك..؟.. ملك طيبة..
 أوديب : أيوه.. هى دى الوظيفة الوحيدة اللى أنفع لها..
 حور محب : إيه رأيكم..
 أوالسح : رأيى ان إحنا نوافق..
 أونسح : ولو ضايقتنا..
 أوالسح : مش مشكلة.. نقول عليه أنه ضد آمون ونقله..
 جوكاستا : عاوز تبقى ملك ليه يا أوديب.. إيه مؤهلاتك عشان منصب
 خطير زى ده..
 أوديب : عقلى.. عبقريتى.. ذكائى..
 كريون : يا ريت مؤهلاتك تكون حيك لطيبة..
 أوديب : أنا ماباحبش أشياء تتمسك بالايده.. أنا باحب مبادئ ومثل
 وأفكار..
 جوكاستا : وإذا نجحت فى حل اللغز وبقيت ملك.. ناوى تعمل إيه عشان
 طيبة..
 أوديب : حانقلها خمس آلاف سنة لقدام.. حاعمل لها كل المخترعات
 اللى الإنسان حايعملها بعد خمس آلاف سنة.. باختصار شديد
 حاعمل الحضارة.. الحضارة.. آلات الطباعة.. والسيارات..
 والطيارات.. والكهرباء.. والأليكترونيات والتليفون واللاسلكى..
 (تتصاعد صيحات الاستفسار من كل الموجودين)
 إيه..؟.. إيه..؟.. إيه..؟.. يعنى إيه؟ .. يعنى إيه..
 أوديب : يعنى حاجة واحدة.. بلاش نضيع وقتنا.. أحل اللغز. يبقى لازم
 أبقي ملك طيبة.. موافقين..

أوالـح : إحنا موافقين..

أوديـب : والناس..؟

أوالـح : والناس مالها .. إحنا جهة الاختصاص..

أوديـب : لازم الناس هى اللي توافق على تعيينى.. انتم ممكن تعينونى

النهاردة وترقدونى بكرة.. الناس لو عينتنى محدش حايعرف

يرفدنى.. يا أهل طيبة.. موافقين؟

الأهالى : موافقين..

أوديـب : حاجة كمان..

إيه..؟

اتجوز الملكة..

(لحظة صمت)

جوكاستا : صفيق.. إزاي تتجراً وتطلب تتجوز واحدة من سلالة آمون...

أوديـب : بالنسبة لى يا مولاتى انتى مش ملكة أو من سلالة الآلهة.. انت

بالنسبة لى أجمل امرأة خلقتها الآلهة..

(جوكاستا تدارى وجهها فى خجل بينما يستمر أوديـب فى كلامه)

... منذ سنوات عديدة يا مولاتى وأنا أجوب الأقطار والبلدان..

أركب الجار وأعبر المحيط، إلى بلاد المكسيك أبحث عن سيدة

هذا الكون، جميلة الجميلات وأميرة الأميرات وملكة الملكات

لحد مالفيتك يا مولاتى..

جوكاستا : أنا باحترم وجهة نظرك.. وشايفة أنها وجهة نظر جديرة

بالنقاش.. لكن كل ده لا يعطيك الحق انك تتجوز ملكة..

ماتساش انك إنسان عادى من أبناء آمون ولا من أبناء رع..

أوديـب : خلاص يا مولاتى.. تحت أمرك.. ويستحسن كمان واحد من

أبناء آمون ولا من أبناء رع هو اللي يحل اللغز..

يبتعد الأهالى بينما ترتفع أصوات احتجاج وسخط من الأهالى..

يقترب أوالح من الملكة ويتبادل معها حديثاً جانبياً)

أوالــــح : وافقى يا مولاتى .. وافقى.. أوديب ده واد يعجبك قوى..

جوكاستا : وعرفت إزاي..؟

أوالــــح : التحريات..

جوكاستا : ولو طلع مقلب..

أوالــــح : مش ممكن يا مولاتى.. أنا مسئول عن كلامى..

(يعود لمكانه)

جوكاستا : يا أهالى طيبة.. من أجل طيبة.. ومن أجل طيبة وحدها..

أضحى بكل التقاليد المقدسة.. وأكثر من ذلك.. أضحى بنفسى

من أجل إنقاذ طيبة.. يا سيد أوديب.. موافقة..

(يرتفع صياح الأهالى ويسود الهرج)

حور محب : شوية نظام..

أونــــح : مفيش وقت اتفضل يا سيد أوديب.

كــــريون : حراس.. افتحوا باب السور.. اتفضل يا سيد أوديب..

(أوديب يسير بين الأهالى وهم يتصايحون ويهتفون.. فجأة يظهر

تريزياس ويعترض طريق الأهالى)

تريزياس : (صائحا فى جزع).. يا ناس.. يا ناس.. يا ناس.. استنوا .. إيه

اللى بتعملوه ده.. إيه اللى بتعملوه؟ جايز أوديب يحل اللغز

ويحل مشكلة الوحش.. والوحش اللى جواكم..؟ مين اللى

حايموته..؟.. الوحش العبيط اللى بيخليكم تستنوا دايما لما

يبجى حد يحل لكم مشاكلكم وتدوله أى حاجة.. قريتوا قبل

كده ان فيه واحد بقى ملك لمجرد انه حل فزورة.. أرجوكم

فكروا كمان.. فكروا مرة واثنين قبل ما تعملوا اللى حاتعملوه..

إفرضوا أوديب مش موجود فى وسطكم.. كنتم عملتوا إيه..؟

شــــخص : ده حايثفلسف.. ونفرض ليه.. إذا كان الراجل موجود أهو

وحايحل الفزورة.

شخص آخر : أنا عارف.. ده باينه راجل عاوز يتكلم ويس..

تريزياس : يا ناس.. بطلوا نكت بقى..
جوكاستا : جرى ايه يا سيد تريزياس.. انت عاوز تقنعنا إن إحنا كلنا
غلطانيين وانت بس اللى صح..
تريزياس : هى بالكثرة يا مولاتى.. الصبح بيبقى صح لأنه صح.. الحقيقة
بتبقى حقيقة لأنها حقيقة.. لو كل شعب طيبة وقف وقال النيل
مش موجود.. يبقى مش موجود؟
شخص : يا عم روق بقى، ماتخوتناش..
(الأهالى لا يعباون به ويمودون للهدف الموقع المنخم اطلع يا
أوديب.. يالله يا أوديب.. اطلع يا وحش الوحوش)
تريزياس : (فى تعاسة بالغة).. يا ناس.. يا ناس.. يا ناس.
(يخرج)
(أوديب يخرج من باب السور ويتجمع الأهالى على السور
يراقبونه ولا زالوا يصيحون ويهتفون).
شخص : الوحش ورا التل..
... : مش باين..
... : أوديب لسه ماشى.. اطلع يا وحش
... : يا وحش الوحوش.. أوديب وصل التل..
... : ياواد يا هایل.. ماشى ولا همه.
... : وراء التل .. مش باين .. مش باين..
الأهالى : (فى صوت واحد).. استر يا رع..
شخص : أوديب .. ظهر .. رافع ايده لفوق .. جاى يجرى.
شخص : (بفرحة هائلة) .. أوديب حل اللغز.. أوديب قتل الوحش..
(صیحات الفرحة تتفجر فى المسرح.. الأهالى يرقصون فرحا
ويتبادلون القبلات، يستقبلون أوديب عند باب السور فيحملونه
على الأعناق.. الزهور تنهال عليه من كل جانب)
أوديب : (يحاول رفع صوته لى يعلو على صوت الجميع)..

يا أبناء طيبة .. يا أبنائي.

(صوته يضيع في الزحام)

الأهالى : (يهتفون في كلمات منغمة).. انت اللي قتلت الوحش..

أوديـــــب : اسمعوني..

الأهالى : انت اللي قتلت الوحش..

أوديـــــب : عاوز أقول حاجة..

الأهالى : انت اللي قتلت الوحش..

(يفقد السيطرة تماما على الأهالى.. تريزياس يظهر في جانب

المسرح يصيح هو الآخر في ياس)..

تريزياس إسمعوه.. سييوه يتكلم.. سييوه يتكلم.. يا ناس..

الأهالى : إنت اللي قتلت الوحش..

(تخفت الإضاءة وينوب الصباح ويسبح المسرح في ظلام تام)

(تظهر الإضاءة بالتدريج فتضيء قاعة العرش في القصر

الفرعوني.. أوديب يجلس على العرش مرتديا العباة الملكية

وعلى رأسه التاج.. يدخل حور محب وينحنى انحناء طويلة)

حور محب : صباح الخير يا مولاي

أوديـــــب : صباح الخير يا حور..

حور محب : المجلس الأعلى لكهنة طيبة ينتظر توجيهاتك..

أوديـــــب : اعمل اجتماع النهاردة بعد الغروب.. حاتكلم معاكم عن نظام الطقوس

الجديدة في المعبد وعن نظام التعليم الجديد اللي ناوى أعمله.

حور محب : حاضر يا مولاي..؟

أوديـــــب : عاوز حاجة كمان..؟

حور محب : إمبراح بالليل وأنا بادور في وثائق آمون ورع المحفوظة عندنا

في أرشيف المعبد لاحظت أن اسم أوديب تردد في سبع وثائق

بردى.. فانا اندهشت جدا يا مولاي لأن الوثائق دى ماييجيش

فيها إلا أسامي الآلهة أو البشر اللي من سلالة الآلهة..

أوديب : قصدك إيه..؟

حور محب : قصدى يا مولاي ان حضرتك أكيد من سلالة الآلهة..

أوديب : (يفكر فى كلماته) .. حضرتى من سلالة الآلهة .. والحكايات دى انت اكتشفتها بالليل.....؟

حور محب : أيوه يا مولاي...

أوديب : انت راجل هایل.. مابتضيعش وقت أبدا.. على العموم، اتفضل دلوقت أنا حافكر فى الموضوع ده بعدين..

حور محب : مش عاوزين نأجل إعلان المسألة دى كتير يا مولاي.. واجب الأمانة العلمية يحتم على أنى أعلنها..

أوديب : الأمانة العلمية..؟.. طب نصاب وموافق.. إنما تطلع بجح كمان.. اتفضل.. اوعى تجيب سيرة الموضوع ده دلوقت..

حور محب : أمر مولاي..

(ينحنى ويخرج)

(يدخل أوالح)

أوالح : صباح النهر المتدفق يا مولاي..

أوديب : أهلا أوالح..

أوالح : أنا ميعادى مع جلالتك الظهر. لكن فيه موضوع مهم اكتشفته إمبارح بالليل وكان لازم آجى أعرضه على جلالتك..

أوديب : الظاهر فيه ناس كتير اكتشفت حاجات مهمة إمبارح بالليل.. موضوع إيه يا سيدى..؟

أوالح : فى اللحظة اللى جلالتك طلبت انك تبقى منك.. أنا بيعت المخبرين بتوعى يعملوا تحريات عن أصلك.. لا مؤاخذه يا مولادى.. كمان لازم أعمل كده.. دى مسئوليتى الشخصية..

أوديب : أيوه.. أيوه.. كمل..

أوالح : التحريات والتقارير اللى جات لى بتثبت يا مولاي. أنك بتتحرر رأسا من صلب آلهة..

أوديب : لا يا شيخ ..

أوالـح : و حياة حورس يا مولاي .. اللي عمرى ما حلفت بيه ..

أوديب : حورس ده إله إيه ؟

أوالـح : ده إله الشرطة يا مولاي ..

(أوديب ينهض من على كرسيه ويمسك بأوالح ويكلمه ببرود)

أوديب : اسمع يا أوالح .. أنا إنسان ابن إنسان .. فاهم .. سر عظمتى

الحقيقية إنى إنسان .. أول بشرى بيحكم طيبة .. فاهم .. فهم

زمايلك كده .. حاولوا تساعدونى أنى أحقق أحلام طيبة ..

فاهم .. ؟

أوالـح : وأنا ذنبى إيه .. ؟ التحريات بتقول كده ..

أوديب : انت فاكرنى عبيط .. التحريات دايما بتقول الحاجة اللي انت

عاوزها تتقال ..

أوالـح : أنا آسف يا مولاي ..

أوديب : اتفضل شوف شغللك ..

أوالـح : طب لو سمحت جلالتك تدينى كشوف المجرمين ..

أوديب : مجرمين إيه .. ؟

أوالـح : اللي هم أعداء حكمك يا مولاي ..

أوديب : حكمى أنا .. ؟ أنا لسة لحقت .. ده أنا لسة متعين إمبارح ..

أوالـح : وهى دى فترة قصيرة يا مولاي .. تلاقى نص البلد بقى ضدك

دلوقت .. حساد على حاقدين، على مغامرين على مجانيين ودول

الى إحنا بنسميهم أعداء النظام .. فلو سمحت جلالتك تدينى

الكشوف اللي فيها أساميهم وعناوينهم عشان نقبض عليهم ..

أوديب : أنا ما عرفتش حاجة اسمها أعداء النظام .. فيه حاجة اسمها

أعداء طيبة .. ودى شغللك .. أى واحد يعمل حاجة ضد طيبة

حضرتك مسئول أنك توقفه عند حده ..

أوالـح : آه .. كل شيخ وله طريقة .. جلالة الملك اللي قبل جلالتك سلمنى

الكشوف قبل ما يستلم العرش بتلات أيام.. ولذلك قعد يحكم

خمسناشر سنة من غير أعداء.. كان محبوب جدا..

أوديــــــــب : ولذلك لما مات مقتول محدش اهتم أنه يعرف مين اللى قتله..

مش كده يا رئيس الشرطة..؟

أوالــــــــح : مسيره يتعرف يا مولاي.. على العموم يا مولاي.. أنا حاشتغل

على الكشوف القديمة..

أوديــــــــب : كشوف قديمة..؟

أوالــــــــح : شوف يا مولاي.. عيلتنا .. عيلة أوالح.. ماسكة منصب رئيس

الشرطة من أربعمائه سنة.. لاحظت حاجة غريبة.. الكشوف

اللى فيها أسامى أعداء النظام هى هى.. كنا بنورثها أبا عن

جد.. ساعات بيزيد كام اسم.. ينقص كام اسم.. لكن الكشوف

هى هى..

أوديــــــــب : أوالح.. أنا مش فاضى للمسائل دى.. المفروض فيك انك عارف

شغلك كويس.. شغلك هو حماية أمن طيبة الداخلى.. اتفضل..

أوالــــــــح : تحت أمرك يا مولاي..

(ينحنى ويخرج)

(يدخل كامى وهو صديق أوديب الذى كان يلعب معه الشطرنج

فى أول المسرحية)

كــــــــامى : (فى حالة مزاجية رائقة).. يا عينى.. إيه الأبهة دى كلها..

أوديــــــــب : أهلا كامى..

(كامى يستغرق فى الضحك)

كــــــــامى : حد كان يصدق.. أوعدنا يا رع.. قولى بقى يا عم.. حاشغلتنى إيه؟؟

أوديــــــــب : (يقلق).. كامى إتقل..

كــــــــامى : (ما زال مندفعا فى الضحك).. هاها.. (يغنى).. إنت اللى قتلت

الوحش.. ساعة ما طلعت تجرى تحل اللغز.. كنت أنا باجرى

وراك.. استخبيت ورا التل أشوفك حاتحل اللغز إزاي..؟

أوديب : قصدك إيه ؟

كامي : ولا حاجة ..

أوديب : كامي .. سيبك من التهريج .. أنت دلوقت واقف في القاعة الملكية .. يستحسن ماتكلمش بالطريقة دي .

(كامي يستغرق في الضحك مرة أخرى وفي هذه اللحظة تمتد

يد من خلف كرسي العرش وتمسك به من عنقه ثم تختفي به

بسرعة .. أوديب ينظر بذهول .. يظهر أوالح من خلف العرش)

أوديب : إيه اللي جابك يا أوالح .. وجيت منين وإزاي ؟ وإيه اللي حصل .. ؟

أوالح : (بلهجة باردة) .. دي حاجات لا بد منها يا مولاي .. صحيح هي مش مستحبة قوى .. لكن ضرورية ..

أوديب : ضرورية .. ؟

أوالح : حاتكتشف بعدين انها ضرورية .. لا مؤاخذه يا مولاي .. دي مسئوليتي الشخصية ..

(ينحنى ويخرج)

(تختفي الإضاءة على أوديب الذي ينظر امامه في ذهول وحيرة

ويظهر تريزياس في ركن المسرح)

تريزياس : إن أفضح الفضائح وأعتى الكوارث تبدأ هكذا دائما .. كما قال السيد أوالح بالأشياء التي ليست مستحبة ولكنها ضرورية، ولكنه لم يقل لنا .. لماذا هي ليست مستحبة .. ولماذا هي أيضا ضرورية ..

(تخفت الإضاءة بينما ينزل الستار)

• الفصل الثانی •

الفصل الثانی يتكون من مشاهد عديدة وسريعة .. وهذا يلقي عبئا أكبر على المخرج ومصمم الديكور.. ولإيجاد حلول سهلة لمشكلة النقلات السريعة .. من الأفضل أن يلجأ المخرج للتكنيك العرائسى .. المسرح الأسود، الأضعة فوق البنفسجية، خيال الظل .. وقد يكون من المحتم أن يلجأ المخرج فى تنفيذ أجزاء من بعض المشاهد إلى العرائس نفسها.

المشهد الأول:

«فى صالة المعيشة بمنزل سنفرو .. الأثاث شبه عصرى .. ولكن يغلب عليه الطابع الفرعونى .. نفس الشئ بالنسبة للملابس. سنفرو جالس يقرأ إحدى المجلات يقلبها بين يديه بطريقة تنم عن عدم الرضا .. طفل صغير يلعب بإحدى اللعب .. زوجة سنفرو تداعب الة هارب كبيرة .. صالة المعيشة يظهر فيها تليفزيون كبير وجهاز راديو وتليفون .. يذق جرس التليفون».

سنفرو : ألو .. أيوه أنا سنفرو .. اسمع يا كاعت .. بعدين .. بعدين ..

نتقابل بالليل .. مع السلامة.

(يضع السماع يعنف)

نفسر : حاسب على التليفون .. حاتكسره ...

سنفرو : كاعت ده غبى.. قلت له ألف مرة مش أى حاجة تتقال فى
التليفون..ومع ذلك.. كل ما يمस्क التليفون يتعد يدش.. ألف
مرة قلت له أنا ورايا بيت وعاوز أربى ابنى .. غبى..

الطفل : (يمسك باللعبة) .. بابا .. صلح لى اللعبة دى..
سنفرو : هات يا حبيبى.. حاصلحك.. روح حل الواجب.. ويعد ما
تخلص مذاكراتك حاتكون اتصلحت.

(الطفل يمسك كتابا كبيرا وينزوى فى ركن)

سنفرو : إيه يا نفر.. مالتيتيش للواد لعبة ثانية غير دى.. لازم يعنى
وحش وأوديب بيقتله.

نفر : حاجيب منين.. كل اللعب اللى فى السوق كده.. وحش راكب
بسكلتة وأوديب بيموته.. وحش راكب طيارة وأوديب بيموته..
وحش بيلعب كورة وأوديب بيموته.

(سنفرو يهز راسه فى ضيق)

الطفل : و. ح. ش.. وحش.. ق. ت. ل .. قتل.. هل رأيت الوحش يا
رمسيس؟ نعم رأيتة يا كاميس.

سنفرو : أحمس.. بتعمل إيه يا حبيبى.. كتاب إيه ده؟

الطفل : ده كتاب المطالعة الوحشية يا بابا..

سنفرو : طب روح ذاكر فى أودضتك.

(الطفل يخرج)

سنفرو : حتى الأولاد

نفر : مالك.. أعصابك تعبانة قوى.. فيه حاجة..؟

سنفرو : أبدا ولا حاجة.. بلاش المقطوعة اللى بتعزفيها دى..

(سنفرو يقوم ليفتح الراديو)

صوت المذيعة : تستمعون الآن لبعض الأغانى العاطفية.. أغنية انت اللى قتلت
الوحش من المجموعة ثم يا حبيبى يا واحسننى.. وأغنية
وحشونى الحبايب.. ثم نستمع للمطرب العاطفى كاميل بع فى

أغنية جديدة .. حبيبي وحش في خصامه وحش في عواطفه
وأخيرا إلى أغنية أوحشني كمان يا واحشني.

(سنفرو يفلق الراديو)

نـفـر : قفلته ليه ..؟.. دى أغانى حلوة قوى..

سـنـفـرو : نتفرج على التلفزيون أحسن. فيه برنامج أدبي دلوقت..

(يفتح التلفزيون.. تظهر مذيعه)

المذيعه : أيها السادة .. جآئنا آلاف الرسائل تطلب إعادة إذاعة

المسرحية الضاحكة لا توحشني ولا أوحشك.. ونحن ننبه

السادة المشاهدين إلى أننا سنذيعها فى نهاية السهرة..

نـفـر : السهرة حتبقى حلوة النهارده.. مسرحية حلوة قوى..

ماتخرجش بقى الليلة دى..

(سنفرو ينظر لها بسام)

المذيعه : أما الآن فمع الناقد الكبير ماحى كاه فى برنامج كلمة ورد

غطاها..

(يظهر الأستاذ ماحى كاه على شاشة التلفزيون)

ماحى كاه : إن الصراع القدرى الوحشى بين الإنسان والوحوش الذى

تتعرض له بعض الأعمال الفنية، يجعلنا نحس بوحشة شديدة

لذلك الصراع الوحشى.. أقول هذا بمناسبة الكتاب الذى صدر

هذا الأسبوع للمؤلف أبوخ كلت.. والذى سماه «نظرات على

الوحش المقتول».

(ينهض سنفرو ويقفل التلفزيون)

نـفـر : إيه مالك مش طابق نفسك ليه؟.. عاوز تكسر التلفزيون

وتكسر الراديو.. وتكسر التلفزيون.. ليك حق ما هو انت مش

تعبان فى حاجة أنا اللى بيتخرب بيتى فى الأقساط.

سـنـفـرو : (وهو يكاد يبكى).. أرجوكى يا نفر.. أرجوكى.. اسكتى..

سببىنى فى حالى..

نفسر : هو أنا جيت جنبك..؟.. مالك..؟
سنفرو : مماليش.. كل حاجة بقت وحشة (يسترك) .. قصدى رديئة.

(إضلام تدريجي)

المشهد الثانى

(قاعة المحاضرات فى جامعة طيبة عشرات الطلبة يجلسون فى المدرج، لا تظهر منهم سوى رؤوسهم... يقف أمامهم حور محب).

حور محب : تعرضنا فى المحاضرة السابقة إلى ما كانت عليه طيبة قبل ظهور الوحش وفى هذه المحاضرة سنذكر بالتفصيل المراجع المهمة فى هذا الموضوع حيث سيتأكد لنا بصفة قاطعة أنه لا يمكن بأى حال من الأحوال أن يتمكن أى إنسان من حل اللغز الذى ألقاه أبوالهول.. أقول أنه لا يمكن لبشرى أن يحل اللغز إلا إذا كان من صلب الآلهة .. ولذلك تمكن أوديب من حل اللغز.. راجع من صفحة ١٥ إلى صفحة ٣٤٠ من رسالة الدكتوراه الخاصة بسيادتنا.. والتي تحدثنا فيها بإسهاب عن الأصول الإلهية التى ينحدر منها صاحب الجلالة أوديب رع.. أعود لموضوع المحاضرة.. وبذلك قضى أوديب على الوحش وأتى لطيبة بالازدهار وبالثروة وبالمخترعات الحديثة التى جعلت من طيبة أعظم مدينة فى العالم..

(إظلام تدريجى بينما تضىء شاشة كبيرة ويظهر خيال أوديب بقامته المديدة وأمامه عشرات الآلاف يصيحون)

أوديب : يا أبنائى .. يا أبناء طيبة .. نحتفل اليوم بالذكرى الخامسة لقتل
الوحش.
الأهالى : (يهتفون فى صيحات منغمة) .. انت اللى قتلت الوحش ..

(إفلام تدريجى)

المشهد الثالث

(فى قبر ضيق داخل أحد المعابد، أوالح يستجوب كاعت وهو واحد من أهالى
طيبة، كاعت مقيد إلى عمود حجرى ويجواره شاب صغير من الشرطة).

أوالـح : ثبت من التحريات إنك بتردد إشاعات أن أوديب ماحلش
اللفز.. وماقتلش الوحش.. ماسيتش حثة ماقتلش فيها الكلام
دم.. فى القهاوى والبارات والمقابر وفى التليفون.

كـاعت : أنا ماقتلش كده..

أوالـح : أمال قلت إيه..؟

كـاعت : أنا سألت سؤال واحد.. اللفز كان إيه..؟

أوالـح : وانت مالك انت..؟ .. بتسأل ليه..؟

كـاعت : عاوز أعرف.. وأعتقد فيه ناس كتير عاوزين يعرفوا..

أوالـح : كويس قوى.. حانوصل.. حانوصل.. مين بقى يا سيدى اللى
عاوزين يعرفوا؟

كـاعت : أحلف لك بحورس..

أوالـح : ماتحلفش بحورس.. ماتوديش نفسك فى داهية..

كـاعت : أحلف لك بكل الآلهة إننى ماعرفش حد على وجه التحديد..

أوالـح : كداب .. أمال إيه اللى عرفك ان فيه ناس عاوزه تعرف ..
بتتجم حضرتك؟

(يتكلم بصعوبة شديدة وهو فى حالة إعياء شديد)

كـاعـت : اسمع يا أوالـح .. أنا سئمت اللعبة دى .. كل ما يتعين ملك جديد ،
تمسكونى وتضربونى بنفس الطريقة وتسالونى نفس الأسئلة ..
عاوز أعرف يا ناس .. عاوز أعرف .. كفرت وإلا الواحد يموت
بقى أحس .. (رأسه ترتضى على صدره)

أوالـح : ما تحاولش تتهرب من السؤال .. بلاش لف ودوران .. إيه اللى
عرفك ان فيه ناس عاوزه تعرف ..؟ رد ..
(كاعت لا يجيب، أوالـح يعيد ترديد السؤال .. الشرطى الشاب
يرفع رأس كاعت ويتركه فيسقط على صدره)

الشرطى : (فى هلع) .. مات ..
أوالـح : (يهدهو) .. طب وإيه اللى خلاك اضطريت كده ..؟
الشرطى : (باضطراب شديد) .. أصله مات .. مات ..
أوالـح : هو حر يا أخى .. كل واحد حر يعمل اللى عاوز يعمل .. قوللى
انت متعين بقى لك قد إيه ..؟

الشرطى : بقى لى أسبوع ..
أوالـح : عشان كده .. بكره تتعود .. أقعد أكتب التقرير ..
(الشرطى يمسك ورقة وقلم ويكتب ويده ترتعش بشدة)

أوالـح : (مواصل) .. وعند مواجهة المتهم بالأدلة الدامغة على سرقته
لكنوز رع (الشاب يتوقف وينظر لأوالـح مبهوتا) .. أكتب يا سيدى
وقفت ليه .. على سرقته كنوز رع المخزونة فى المعبد .. عند
مواجهته بالأدلة .. أنهار وانتحر بإلقاء نفسه من الشباك من
الدور الرابع ..

الشرطى : مفيش شبابيك فى الدور الرابع ..
أوالـح : بيبقى من الدور الخامس ..
الشرطى : ومفيش فى الدور الخامس ..
أوالـح : يا سيدى إكتب ماتتعبنيش .. ده مجرد اصطلاح ..
الشرطى : اصطلاح ..

أوالـح : مش شباك بالمعنى الواقعى.. شباك رمزى.. لما تتقدم شوية
حاتفهم .. وحاتتعود.. اقلل المحضر.. أنا مضطر أمشى
دلوقتى.. عندى ميعاد على السينما (ينظر فى ساعته) .. بيه..
متأخر نص ساعة.. (ينظر للجنة) .. الله يخرب بيتك يا شيخ..
كويس العطة دى..؟.. حاقول لمراتى إيه دلوقت.. عن إذنك..

الشرطى : وده حاعمل فيه إيه..؟

أوالـح : مش تقيل أوى.. حاتشيله. وترميه من فوق السطوح..

الشرطى : (برعب شديد).. من فوق السطوح..؟

أوالـح : مش بتقول الدور الرابع والخامس مفيش فيهم شبابيك..
(بغضب شديد).. انت حاتحيرنى معاك ليه..؟.. آمال حاترميه
منين يعنى إيه الغباء ده..؟

الشرطى : (بانهيأ شديد).. أنا آسف.. اتفضل حضرتك.. اتفضل روح
السينما.. لحسن يفوتك الميكى ماوس.

(إظلام تدريجى)

المشهد الرابع

(قاعة العرش الملكية.. جوكاستا تتحرك غاضبة.. بينما يقف
أوالح صامتا)

جوكاستا : طول النهار وطول الليل فى المعمل بتاعه. مشغول فى
الاختراعات حضرته.. من يوم ماتجوزته ماشفتوش أكثر من
أربع مرات.. صحيح أنا ملكة.. ومن صلب الآلهة كمان.. لكن
أنا بشر برضه..

أوالح : وأنا مسئوليتى إيه فى ده كله يا مولاتى..
جوكاستا : مسئوليتك انك خليتى أوافق أتجوزه .. انت اللى قلت لى وافقى..
أوالح : ماهو أنا ماكنتش عارف يا مولاتى انه حايعمل كده..
جوكاستا : ولما انت جاهل ومش عارف حاجة.. خليتى أوافق ليه..؟
(تقلده) وافقى يا مولاتى.. أوديب ده واد يعجبك قوى.. وإذا
طلع مقلب.. أنا المسئول يا مولاتى.. اتفضل يا أستاذ تحمل
مسئوليتك.

أوالح : وحامل إيه يا مولاتى..؟
جوكاستا : إنت عارف يا أوالح. انت عاوزنى أفهمك شغلك كمان انت
عارف تعمل إيه.. زى ما عملت مع اللى قبله واللى قبل قبله..
حادثة من الحوادث اللى بتحصل كل يوم.. حد ضامن عمره..؟
أوالح : المرة دى ماقدرش يا مولاتى..

جوكاستا : اשמعنى المرة دى؟ ما أنت كنت بتقدر كل مرة..
أوالسح : قبل كده الناس ماكانتش بتسأل.. مات الملك، عاش الملك..
يروح أحمس ييجى رمسيس.. يروح مينى ييجى تحتمس..
مالهمش دعوة بالنسبة لأوديب الموضوع يختلف.. هم اللى
عينوه.. غير كده، هو اللى اخترع لهم الاختراعات دى كلها..
وإذا قدرنا على الناس.. فيه جماعة كبيرة قوى من أهالى طيبة
بتاكل عيش من الحكاية دى.. الجماعة دول أقويا جدا.. ولهم
نفوذ.. أوضح مثال لكده الأخ أونع والأخ حور محب.. أوديب
بيخترع الحاجة من هنا وهم ياخدوها يصنعوها ويبيعوها من
هنا.. ناس كتير قوى مستفيدة.. لو حصل لأوديب حاجة مش
حايستكو وحانتكشف يا مولاتى..

جوكاستا : والحل؟ قطعاً فيه حل..
أوالسح : سلاحك يا مولاتى.. سلاح المرأة.. أقوى من القنبلة الذرية..
اللى ناوى أوديب يخترعها.. اعتنى بجمالك يا مولاتى.. فيه
عطور نزلت البلد اليومين دول تلوح أجدع راجل.. فيه روايح
تلوح الكاهن يا مولاتى..

جوكاستا : عطور وزیوت ودهون ومساحيق.. ماخليتش حاجة.. برضه
مافيش فايده.. مشغول باختراعاته..

أوالسح : خلاص.. مفيش غير الطريقة التقليدية.. اللى عيلتنا
تخصصت فيها.. هى صحيح بتاخذ وقت.. لكن مضمونة فى
النهاية..

جوكاستا : إيه بقى الطريقة التقليدية؟..
أوالسح : كل ما بيعمل حاجة كويسة بيزود عدد الناس اللى بتحبه..
شغلتنى أنا بقى أزود عدد الناس اللى بتكرهه.. طبعاً انت عارفة
الباقى..

جوكاستا : حاتخليهم يكرهوه إزاي؟..

أوالسج : أبدا.. حاجة بسيطة قوى.. أخليهم يحبوه.. (لحظة) .. بالعافية
شعلنا بقى يا مولاتى.. اطمنى انت.. بس سايق عليكى ايزيس
انك تدعيلى ان حورس ياخذ بيدى..

جوكاستا : حاروح الليلة دى أصلى فى معبد آمون وأدعيك..

أوالسج : (ينحنى) شكرا يا مولاتى..

(تخرج الملكة من المسرح)

(يبدو أونغ قادما من الداخل ممسكا بيده بعض الأجهزة

الحديثة)

أوالسج : أبوه يا عم.. شغال انت.. المخترعات دى كلها حاتتحول لذهب..
والذهب فى الآخر بيصب فى مجلس المدينة والغرفة التجارية..

أونسج : طب ما هو انت عضو يا خويا..

أوالسج : باخذ إيه يا حسرة..»

أونسج : خدت أتومبيل ويخت وطيارة هليكوبتر.. وكل عيل من ولادك
خد أتومبيل صغير وكل شهر بيجييلك المعلوم.. عاوز إيه

تانى..؟

أوالسج : ولا حاجة.. بس تفتح مخك شوية.. كل اللى بتقول عليه ده
فتافيت جانب اللى بتأخذه..

أونسج : بس كده. عنيه ليك.. هو إحنا عندنا كام أوالح.. أوامر انت بس..

أوالسج : انت خسران حاجة .. صاحبنا يخترع.. وانت تكسب..

أونسج : قصدك إحنا .. (يفنيان).. إحنا اللى قتلنا الوحش..

(ينفجران ضاحكين)

(إظلام تدريجى)

المشهد الخامس

(على الشاشة الضخمة.. خيال لأهالي طيبة يركعون ويغنون
بصوت فيه مهابة وقداسة وكأنهم يصلون وأوديب يقف أمامهم)

الأهالي : أوديب رع.. أنت اللي قتلت الوحش.. أوديب رع..

(إفلام تدريجي)

المشهد السادس

(قاعة العرش الملكية، أوديب يجلس على العرش وامامه أوالح وهور محب وكريون أونح.. أوديب فى أشد حالات الهياج).

أوديب : ايه اللى بيحصل من ورايا..؟.. الحكاية دى حصلت إزاي..؟.. عاوز أفهم.
هور محب : هدى نفسك يا مولاي.. إحنا اللى عاوزين نعرف.
أوديب : الأهالى النهاردة كانت بتركب لى والمركب الفرعونى ماشى..
الأهالى النهاردة سجدولى فى المعبد وأنا باصلى..
أونح : بيحترموك يا مولاي..
أوديب : وقبل كده ماكانوش بيحترمونى؟.. قبل كده ما كانوش بيركعوا..
قبل كده كانوا بيسمونى أوديب أوديب بس.. دلوقتى أنا أوديب
رع.. انت أصدرت بيان يا أوالح انى إله..
أوالح : ماحصلش يا مولاي.. انما جاوز الخبر تسرب..
أوديب : تسرب..؟
أوالح : مفيش حاجة بتستخبى يا مولاي.. مش كده يا هور محب.. ما
تتكلم واقف ساكت ليه..
هور محب : فى الواقع يا مولاي.. الحقيقة.. فى تصورى.. يعنى وجهة
نظرى.. أنا أزعم..
أوديب : يبقى ناوى تكذب.. ما دام قلت فى الواقع وفى الحقيقة يبقى
ناوى تكذب.

حور محب : لا يا مولاي.. مش حاكذب.. الناس كلها دلوقت عارفة إن

جلالتك بتتحدّر من صلب الآلهة..

أوديـــــب : أنا نيهت عليك بلاش تقول الحكاية دى..

حور محب : إحنا مش بنقولها يا مولاي.. إحنا بندرسها..

أوديـــــب : بتدرسوها كمان؟..

حور محب : أيوه.. فى مراحل التعليم المختلفة..

أوديـــــب : أنا ما أصدرتش أوامر بكد..

حور محب : لا مؤاخذه يا مولاي.. مع احترامى لجلالتك.. ده مش

اختصاص جلالتك.. الموضوع ده حقيقة علمية والحقائق

العلمية لازم تتعرف.. الأمانة تحتم.

أوديـــــب : (ينهض من على العرش صارخا).. الأمانة..؟.. الأمانة: انك

تكذب.

حور محب : أنا مش كداب يا مولاي.. عيب تقول حاجة زى كده لواحد قد

والدك.. كمان عيب تزعق قدام ناس أكبر منك.. الحكاية دى

مش كذب.. دى حقيقة مش كده يا أوالح..؟

أوالـــــح : فعلا...

أوديـــــب : حقيقة..؟.. يعنى انتم الاتنين عارفين انى أبقى إله وأنا مش

عارف.. ومش عايزنى أزعق.. كريون.. ماتتكلم.

كـــــريون : أنا آسف يا مولاي.. يستحسن أفضل بعيد عن أى تيارات

سياسية.. لو الحرس دخل فى السياسة الداخلية أو الخارجية

بتكون النتيجة مش كويسة.. أنا تحت أمرك يا مولاي فى أى

حاجة تتعلق بنظام حراسة طيبة.

أوديـــــب : يعنى مايهمكش ملك طيبة يبقى إنسان ولا إله..؟

كـــــريون : ماتفرقش معايا يا مولاي.. أنا معنديش وقت.. أنا مسئول عن

تدريب الحرس عشان حماية طيبة.. معنديش وقت لحاجة

تانية..

أوديب : (بحزن حقيقى) .. متشكر يا كريون .. اتفضل مع السلامة ..

(كريون يشد قامته فى تحية عسكرية وينصرف)

أوديب : كريون راجل جاد .. كل اللى يهमे حماية طيبة ..

حور محب : واحنا كمان يا مولاي .. يهمننا حماية طيبة

أوديب : يبقى فيه وظيفة ناقصة .. عاوز حد يحمينى منكم ..

اونسح : يا مولاي انت بتتظر للموضوع نظرة رومانسية خالص .. لازم

تتظر للموضوع ده من وجهة نظر واقعية .. شعب طيبة بيحكمه

الآلهة من آلاف السنين .. عبادة فرعون .. مش مجرد عادة

مقدسة .. ده تقليد وطنى .. مانقدرش تيجى فى يوم وليلة ونقول

للناس إن الملك بنى آدم عادى ..

حور محب : أضف إلى ذلك أن مناهج التعليم فى كل المراحل بتقول كده ..

مستحيل نغيرها .. الصلوات بتقول كده .. كل العادات والتقاليد

والأغاني والحواديت بتقول كده .. هرم يا مولاي .. هرم من

المعتقدات والمفاهيم .. هرم كبير قوى .. الهرم ده مبنى على

قاعدة متينة جدا .. القاعدة دى بتقول إن فرعون إله .. إذا احنا

جيننا دلوقت وقلنا إن فرعون إنسان عادى .. حايتهد الهرم ده ..

حاتتلخبط كل حاجة وتبقى فوضى ونروح كلنا فى داهية ..

خصوصا كهنة آمون ..

أوديب : أنا ليه وجهة نظر ثانية .. لازم نفهم الأهالى ان فيه حاجة

اسمها قانون التطور .. لازم تدرسوا المادة دى .. صحيح كان فيه

ملوك آلهة .. أو أبناء آلهة ..

حور محب : (مقاطعا) .. انت بتصدق الكلام ده يا مولاي .. بتصدق برضه ان

كان فيه ملوك آلهة .. ما هم كلهم بنى آدمين غلابة زينا .. وكان

فيهم ناس شحاتين كمان .. بس كان لازم نعلمهم آلهة ..

أوديب : ليه لازم .. أنا مش شايف لها لزوم أبدا ..

اونسح : يا مولاي انت متهيلك أن الموضوع ده يخصك انت لوحده ..

أوديب : طبعاً يخصصنى لوحدى..

أونـح : أبدا ده يخصصنا إحنا أكثر منك.

أوديب : ليه...؟

أونـح : الأجهزة والإدارات والمصالح والمؤسسات اللى بيشرف عليها

مجلس المدينة.. واللى مطلوب مننا تشغيلها على خير ما يرام

.. الناس بتعترمنا أكثر لما تعرف أن رتيسنا إله.. لكن لو عرفت

أن اللى بيشغلنا بنى آدم عادى.. حاييجوا فينا ومش حانعرف

نشغلهم..

حور محب : مسألة برستيچ يا مولأى..

أونـح : طبعاً.. تفتكر لو الناس عرفت أن خوفو ده مش إله.. كانوا

حايينوا له الهرم برضه..؟ ولا كانوا حايحطوله طوبة على

طوبة..

أوالـح : أصل جلالتك لسه جديد ومالكش خبرة بالمسائل الفرعونية..

ده إحنا حايشين عن جلالتك بلاوى كثير قوى..

أوديب : بلاوى..؟

أوالـح : طبعاً.. مثلاً فيه ناس بتشك فى حكاية الوحش وحكاية اللغز..

وعاوزين يعرفوا اللغز كان إيه..؟ طبعاً هم مش قصدهم يعرفوا

اللغز.. كل غرضهم أنهم يخربوا.. تصور بقى لو الناس عارفة

أنك بنى آدم عادى كلهم حاييججوا.. باقول لجلالتك إحنا

حايشين عنك مصايب كثير.. بس الواحد مش عاوز يتكلم..

أوديب : وحكاية اللغز تخوف فى إيه.. أنا أقول لك اللغز يا سيدى (يفكر

قليلاً) إيه الشئ اللى يمشى الصبح على أربعة والظهر على

اتنين.. والمغرب على ثلاثة..

أوالـح : (يبالغ فى التهويل) .. يام.. مش ممكن حد كان حايحله فى طيبة

أبدا يا مولأى..

حور محب : والحل إيه يا مولأى..؟

المشهد السابع

(الساحة الكبيرة أمام القصر الفرعونى.. بعد أن تغيرت معالمها..
دكاكين كثيرة يقف أمامها الأهالى يبيعون أحدث الأجهزة وينادون
عليها بعبارات منمغة يظهر تريزياس وتخفت أصوات الأهالى).

تريزياس : ان النغمة المائدة الآن هى أوديب والوحش المقتول.. الكل يفنى
أغنية واحدة لفرعون الجديد الذى اختصر من عمر الزمن
خمسة آلاف عام.. وأخذ أهالى طيبة يتمتعون بالمخترعات التى
لن يراها غيرهم قبل زمن طويل ولقد أحسن مجلس المدينة
استغلال تلك المخترعات كلها فى تثبيت الألحان المطلوبة فى
أذهان الناس.. وفى ملء بعض الخزائن بالمال فى الوقت
نفسه.. ولم ينس مجلس المدينة أن يصدر بياناً باللفز والحل
الذى قدمه أوديب للوحش.. وكان الحل هو الإنسان.. ومن
الغريب أن الإنسان، ظل لآلاف السنين وسيظل إلى الأبد.. هو
الحل الوحيد لكل الألغاز.. سيظل الإنسان هو النغمة
الصحيحة.. النغمة الصحيحة الواضحة بين كل الألحان الرديئة
على مر العصور.. ومن الغريب أيضاً أن هذه الحقيقة
الواضحة وضوح الشمس فى نهار طيبة، كثيراً ما تغيب عن
أذهان الكثيرين من الملحنين الذين يصنعون للشعوب موسيقاها.
(يختفى تريزياس فى الوقت الذى يظهر فيه أوديب فى شرفة
القصر فيسارع الأهالى فى التجمع فى الساحة أمام الشرفة).

أوديـــــب : يا أبناء طيبة.. يا أبنائى.. نحتفل اليوم بعيد مقتل الوحش..
الأهـــــالى : (يغنون) انت اللى قتلت الوحش..
أوديـــــب : ما زلت أذكر ذلك اليوم كما لو كان قد حدث بالأمس عندما
ذهبت إلى الوحش..
الأهـــــالى : انت اللى قتلت الوحش..
أوديـــــب : كانت هناك فكرة واحدة تستولى على وتمتلك كل مشاعرى.
إيمان كبير أن هذا الوحش..
الأهـــــالى : انت اللى قتلت الوحش..
(من بين الجماهير يخرج أوالح ممسكا بسنفرو ويقف به بعيدا عن
الناس فى مقدمة المسرح.. ما زال أوديـــــب يخطب ولكننا لا نسمعه..
أوالـــــح : (برقة قاتلة) سنفرو.. مابتغنيش ليه..؟ أنا مراقبك. واقف بقى
لك ساعة مابتغنيش..
سنفـــــرو : (يتشجع قليلا) .. حضرتك كمان ماكنتش بتغنى..
أوالـــــح : أنا الملحن يا سنفرو..
سنفـــــرو : (يحاول اصطناع بحه فى صوته) .. أصل صوتى مبجوح
النهاردة..
أوالـــــح : لأ يا شيخ.. صوتك مبجوح.. تصفر.. تهمهم.. نتجاوب مع
المزىكة.. انت إيه.. حجر؟
سنفـــــرو : بصراحة..
أوالـــــح : آه.. اتكلم بصراحة..
سنفـــــرو : أصل ودنى مش موسيقية..
أوالـــــح : العفو.. يا سيد سنفرو.. الواقع ودنك موسيقية جدا.. بس هى
مش نضيفة.. أنا بقى حانضفهالك..
سنفـــــرو : (يتوسل فى صوت خافت) .. أوالح.. أنا فى عرض آمون..
أوالـــــح : (هامسا) .. إمشى معايا من سكات.. ولا عاوز الناس تعرف أن
ودنك مش نضيفة.. وتبقى فضيحة..

سنفرو : حاروح البيت أغسل ودنى وأجى أغنى فورا..
أوالسح : مش حاتعرف .. دى مسألة تخصص.. دقيقة واحدة.. تمالى معايا..
(يخرج به من الكواليس.. يرتفع صوت أوديب)
أوديب : كنت أفكر فى شىء واحد.. يجب أن تصبح طيبة أعظم مدينة
فى هذا العالم ولكى تصبح طيبة عظيمة.. يجب أن..
(يدخل سنفرو مندفعاً وهو يغنى فى صوت مرتفع وبحماس
وانسجام حقيقى)
سنفرو : انت اللى قتلت الوحش..
(يتوقف أوديب وينظر الأهالى بدهشة لسنفرو الذى يعزى فى
الفناء بحماس.. يتحول انسجامه وحماسه بالتدريج إلى بكاء
مرير.. ينتحى ركناً فى مقدمة المسرح وينهار جالساً يبكى فى
صوت خافت)
أوديب : وهكذا يا أبناي.. مات الوحش..
الأهالى : انت اللى قتلت الوحش..
(أوديب يشير لهم بذراعيه محبياً ويختفى داخل القصر..
.. فى نفس اللحظة ترتفع صيحة هائلة لإنسان يتعذب.. الأهالى
يتسمرون فى أماكنهم فى هلع.. يدخل أحد الأشخاص من السور
مندفعاً وقد غطى الدم وجهه وكل جسمه.. ما زال الرجل يصيح
صيحات بشعة.. ويرتمى على الأرض بين الأهالى)
الرجل : وحش.. وحش كبير قوى.. جنب السور كل رجلى.. آه.. حاموت..
الأهالى : وحش. .
(تسكن حركة الرجل.. الأهالى يتبادلون النظرات فى وجوم)
سنفرو : (من خلال الدموع) يبقى الوحش رجع..
(أوالح يقفز على سنفرو)
أوالسح : .. يا نذل.. وحش إيه اللى رجع.. انت مش كنت بتغنى من شوية
أن أوديب موت الوحش؟

سننفرو : (وقد استولى عليه الذعر).. أيوه.. أيوه.. يبقى وحش تانى.. وحش
تانى.. الوحش الأولانى أوديب قتله.. أوديب قتل..
(يحاول الغناء فلا يستطيع فيواصل البكاء بصوت خافت وقد
أخذ جسمه كله يهتز بتعاسة بالغة بينما تنزل...)

الستار

• الفصل الثالث •

المشهد الأول

(كما حدث فى بداية المسرحية.. أهل طيبة يجلسون على المقاعد الحجرية وقد استولى عليهم الوجود هذه المرة.. أعضاء مجلس المدينة يجلسون فى الوسط يقف أوالح ممسكا بورقة كبيرة يقرأ منها موجها حديثه للأهالى).

أوالح : يا أهل طيبة.. كلفنى مجلس المدينة بتقديم تقرير لشرح أبعاد الموقف الحالى بخصوص هجوم الوحش على أسوار المدينة..
أولا : مجلس المدينة يؤكد أن هذا الوحش.. وحش جديد.. وهو أيضا على هيئة «أبو الهول» إلا أنه أصغر حجما من الوحش القديم الذى قتله أوديب وذلك حسب تقرير خبراء الوحوش والمعتمد من الأستاذ حور محب.
ثانيا: هاجم الوحش خمسة وثلاثين شخصا التهم منهم ثلاثين.. وأصاب خمسة إصابات قاتلة انتهت بالوفاة، وقد تم نقلهم إلى الدار الآخرة بما يليق بهم من تكريم وذلك خصما على حساب الغرفة التجارية ومجلس المدينة يشكر للأخ أونغ هذه اللفتة الكريمة..
ثالثا: ليس لدينا دليل مؤكد على أن الوحش يلقى ألغازا.. ولكن قياسا على الوحش القديم وحيث أن الوحش الجديد من نفس فصيلة ونوع الوحش القديم لذلك

فقد أصبح واضحا بطريق شبه مؤكدة أن الوحش الجديد يلقي هو الآخر ألغازا على المسافرين ويطلب الحل.. ولقد تقرر عقد هذا الاجتماع الذى يضم كل أهالى طيبة لبحث هذه المشكلة وإيجاد حل لها، عاشت طيبة، عاش مجلس المدينة، عاشت الغرفة التجارية، عاش شعب طيبة القادر دائما وأبدا على قتل الوحوش فى كل مكان عاش أوديب..

الأهالى : (يغنون) اللى قتل الوحوش..

أوالـح : صدر فى مقر مجلس المدينة الدائم بمعبد آمون.. إمضاء.. رئيس مجلس المدينة بالنيابة.. أم.. أم.. أوالح..
أوالـح : يا أهل طيبة الأعزاء.. انطلاقا من قاعدة الديمقراطية الحقة.. اجتمعنا هنا النهاردة عشان ناخد رأيكم.. نخلص من الوحش ده إزاي..؟

(شخص من الأهالى يتكلم دون أن نراه أو نعرف مصدر الصوت)

الشخص : أما بجاجة يا أخى.. إحنا مالنا إحنا.. ما هى كل حاجة بتعملوها لوحكم اشمعنى يعنى النهاردة.. هى أهل طيبة إيه..؟.. فى الفرع منسية وفى الحزن مدعية..

أوالـح : (غاضبا).. مين اللى بيتكلم.. اللى بيتكلم يقوم يقف (يزداد غضبه) اللى بيتكلم يقوم يقف.. (يدارى غضبه ويحاول ان يكون رقيقا).. اللى بيتكلم خايف ليه..؟ يقول اسمه عشان نشبته فى محضر الجلسة.. (يترك مكانه ويمور بين الأهالى) مين اللى بيتكلم..؟.. الصوت جاى من الناحية دى.. مين اللى اتكلم.. اللى عاوز يتكلم يرفع إيده ويطلب الكلمة ويقول اسمه.. فى حاجة اسمها آداب اجتماعات فيه حاجة اسمها ديمقراطية يا بقر.. يعطيهم ظهره ويتركهم ويعود لمكانه).. عالم ماعندهاش أى إحساس بالديمقراطية..

صوت : بطل بقى.. بطل بقى يا أوالح (بصوت هامس).. يلعن روح أبوك.
أوالح : (يقف فجأة مذهولا ويلتفت لهم).. مين اللى شتم دلوقت..؟ مين
اللى شتم دلوقت..؟ (منفجرا).. لأ.. ما هو أنا ما تشتمشى اللى
شتم يقف فورا.. مش عاوزين تقولوا (ينظر لرجال الشرطة)..
شرطة.. اقبضوا على طيبة.

رجال الشرطة : طيبة..؟

أوالح : أيوم.. طيبة.. كلها.. الأهالى ومجلس المدينة وأديب
وجوكاستا.. العالم كله ينقبض عليه.. محدش يتحرك من
مكانه.. كله مقبوض عليه لحد ما تجيبولى اللى شتمنى (بتأثر
شديد وهو يكاد يبكى).. أنا..؟ أوالح.. أنتشم؟

حور محب : هدى نفسك يا أوالح..

أوالح : (بوحشية).. ماتتكلمش يا أستاذ.. انت مقبوض عليك دلوقت..
المسائل دى مافيهاش هزار.. ماتتكلمش إلا لما أقولك.. (يواجه
الأهالى).. أنا يلعن روح أبويا..؟ ملعون روح أبو أتخن مافيكم
واحد واحد..؟ مين اللى شتم؟ مش عاوزين تتكلموا..؟ خلاص..
خلينا قاعدين.. (يجلس على الأرض).. هو إحنا ورانا حاجة؟..
محدث مروح النهاردة (يتكلم مع رجال الشرطة).. اسمع يا بنى
انت وهو.. اللى يتحرك يتفقع سهم فى قلبه فورا.. إن شاء الله
يكون أنا.. أما أشوف أنا باتشتم إزاي.. (صوته يختنق من
التأثر).. بقى بعد الخدمة دى كلها تشتمونى.. سنين وأنا باشتغل
عشانكم ليل نهار.. وفى الآخر إتشتم طب أنا حاريكم..

تريزياس : (من بين الأهالى).. أنا يا أوالح..

(واضح انه لم يكن تريزياس الذى شتم)

أوالح : تعالى.. اطلع لى.. ورينى نفسك.. مين؟ (تريزياس يقف)
تريزياس.. اتفضلوه خدوه.. (لا يتحرك احد من الشرطة ويقفون
مضطربين).. نفذ الأمر يا عسكري انت وهو..

تريزياس : ماتبقاش عبيط يا أوالح.. تريزياس ما ينفعش يتقبض عليه
يا بنى.. انت ناسى ولا إيه..؟ ده أول درس خدته وانت صغير..
إذا كنت نسيت .. العساكر مانسيتش..

أوالح : (وقد اسقط من يده) .. مش عيب تشتمنى يا عم تريزياس.. وحيات
حورس لولا إنك راجل كبير.. ما كان حايحصل لك طيب
النهاردة..

تريزياس : أسف يا أوالح.. غصب عنى.. انت عارف انى باشتم مرة واحدة
كل ميت سنة.. معلىش.. جت فيك المرة دى..

أوالح : ما هو آخر واحد شتمته كان جدى برضه يا عم تريزياس..
تريزياس : حظكم كده.. أنا أسف..

أونح : الصلح خير.. زى والدك برضه يا أوالح..

أوالح : خلاص .. افراج.. افراج عن طيبة.. يا جماعة أرجوكم فيه
تقاليد لازم نحترمها.. أى واحد عاوز حاجة.. يقولها.. بس
يقول اسمه فى الأول لازم نعرف اسم أى واحد عاوز يتكلم..
وإلا ديموقراطيتنا تنهد من أساسها، والوحش ياكلنا.. عاوزين
الوحش ياكلنا؟ طبعاً لأ.. خلاص.. ماحدش يقول حاجة إلا لما
يقول اسمه.. وإذا ما قالش يبقى أى واحد فيكم يقول عليه..
خلاص انتهينا.. اسمحولى بالكلمة أنا رأيى أن المسئول عن
القضاء على الوحش هو السيد كريون بصفته المسئول عن
حراسة طيبة وعن حمايتها.. ولذلك اقترح تكليفه بالقضاء على
الوحش..

كـريـون : إذا كان هدف السيد أوالح أنه يقضى على وعلى حرس طيبة،
مفيش مانع نروح نقابل الوحش.. أما إذا كان الهدف هو
القضاء على وحش حجمه زى ما بتقولوا قد الهرم.. وله وش
واحدة ست وجسم حيوان.. يبقى المسألة حتاخذ منى وقت
طويل..

حور محب : نفهم من كده انك خايف تدخل معركة دلوقت..
كـريون : إفهم يا حور محب.. أنا ماعرفش الخوف.. كل الدراسات
والتدريبات اللى يعرفها حرس طيبة مبنية على أن المقاتل يقابل
مقاتل زيه.. حرس طيبة يعرف يقاتل بالسهم والرمح
والعريبات الحربية والمنجنيق يعرف يبارز.. يعرف يصارع.. لكن
حرس طيبة ماتعلمش يقابل وحش إزاي..

أوالسح : اهجموا عليه كما لو كان جيش..
كـريون : خناقة يعنى.. فيه فرق بين الحرب والخناقات.. اللى انت بتقول
عليه.. عملية انتحار جماعية.. عشان نحارب وحش زى ده..
لازم نعرف حجمه قد إيه.. لازم نعرف سمك جلده.. عينه
بتشوف لمدى قد إيه فى أى مكان من جسمه الضربة تكون
مؤثرة بيتحرك إزاي.. سرعته قد إيه.. بينام امتى.. وكام
ساعة؟ ولما نعرف الحاجات دى كلها.. نعدل تدريباتنا على
أساس أن عدونا وحش معين صفاته كذا وكذا.. ونقطة القوة
فيه كذا.. ونقطة الضعف كذا.. هى دى الحرب.. وكان
المفروض جهاز الرصد التابع للسيد أوالح يجب لنا المعلومات
دى كلها.. بس الظاهر كانوا مشغولين فى حاجات تانية.. هى
دى الطريقة اللى أعرفها.. فيه طريقة تانية أسهل.. جلالة
الملك أوديب رع زى ما خلصنا من الوحش الأولانى.. يخلصنا
من الوحش التانى ومفيش داعى حد يتعب نفسه..

(يقول جملته الأخيرة بمرارة يخالطها شيء من التهكم).

حور محب : التقاليد الفرعونية تمنع تعريض فرعون لاحتمالات أى خطر..
كـريون : ما هو اتعرض قبل كده..
حور محب : ماكانش لسه بقى فرعون..
أونسح : لايد من احترام التقاليد الفرعونية مهما كان الخطر الذى
تتعرض له طيبة.. التقاليد دى هى حياتنا..

كـريـون : التقاليد الفرعونية هي حياتكم يا أونح يا رئيس الغرفة التجارية..؟ ما تقولوا الحقيقة مرة واحدة في حياتكم الحقيقة إنكم خايفين على أوديب ليحصل له حاجة .. خايفين على الوزه اللي بتبيض دهب.. لو حصل له أى حاجة حانتوقف سلسلة الاختراعات.. ودكاكينكم حانتقل..

حور محب : (يثور) .. أنا لا أسمع أن يقال مثل هذا الكلام المهين في مجلس المدينة.

أوالـح : ولا أنا..

كـريـون : لا يا شيخ.. ماتقبض على بالمره.. انت بيهلك حاجة مانت لسه من شوية قابض على طيبة.

(تخرج جوكاستا إلى الشرفة)

جوكاستا : إيه.. فيه إيه..؟ الاجتماع ده عشان إيه..؟

كـريـون : الوحش ظهر يا مولاتي..

أوالـح : وحش تانى يا مولاتي.. وحش تانى..

جوكاستا : بلغتوا أوديب..

أونـح : مولاي أوديب في العمل بيعمل أهم مخترعاته يا مولاتي..

جوكاستا : برضه كان لازم تبلغوه.. هو المتخصص في حل ألغاز الوحوش وقتلها..

أوالـح : مظلوم يا مولاتي.. ده كلام سليم.. أوديب رع.. هو المتخصص.

حور محب : التقاليد الفرعونية يا مولاتي..

جوكاستا : مفيش حاجة اسمها التقاليد.. كل التقاليد الفرعونية تتضاءل

ولا يصبح لها أى قيمة عندما تتعرض طيبة للخطر (توجه كلامها

للأهالي) يا أهل طيبة.. لقد ثبت بالتجربة أن أوديب هو أذكى

الأذكاء.. ولذلك.. أوديب هو اللي يحل اللغز..

الأهـالي : أيوم.. هو اللي يحل اللغز..

صـوت : شوف الولية ياخويا.. عاوزه تودى الراجل في داهية..

(يلتفت اوانح للالهالى)

أوالــــح : ما قلنا اللى عاوز يتلكم يقول اسمه .. انتم حاتتفرزونى ليه ..؟..

مين اللى اتكلم..؟

الأهـالى : مانعرفش..

· (يخرج أوديب إلى الشرفة ويمجرد ظهوره يغنى الأهالى)

الأهـالى : انت اللى حاتقتل الوحش..

أوديب : إيه.. مالكم..؟ فيه حاجة..؟

جوكاستا : فيه وحش تانى ظهر يا مولاي.. والشعب كلفنى ببإبلاغ جلالتك

رغبته انك تروح تحل اللغز وتقتل الوحش..

أوديب : (يواجه الأهالى) .. عاوزينى أقتل الوحش..؟

الأهـالى : أيوه..

أوديب : حاضر.. حاروح أحل اللغز وأقتل الوحش.. ولو جه وحش تانى

حاروح أحل اللغز وأقتله.. وبمدين..؟ لما أموت أنا حاتمعلمر'

إيه..؟

الأهـالى : تموت..؟.. أوديب يموت..؟

أوديب : أيوه.. أوديب يموت..

الأهـالى : أوديب إله..

أوديب : لا.. أوديب إنسان..

(يتدخل حور محب فى الحوار)

حور محب : صحيح أوديب إنسان.. لكن من سلالة الآلهة.. والبشر الذين

من سلالة الآلهة.. لا يموتون ولكنهم ينتقلون إلى العالم الآخر

ليحكموه أيضا.. أنتم تعلمون جيدا أن فرعون يحكم الدنيا

والآخرة.. هذا هو ما يقصده مولاي.. (يحزم لأوديب).. هو ده

اللى بتقصده يا مولاي..

أوديب : إسمعونى.. مش عاوزين النظريات تعطل تفكيرنا.. مش عاوزين

الكلمات تلخبطنا .. فرعون يموت، ينتقل للعالم الآخر.. يحكم

هناك .. ما يحكمش ده كله ما يهمناش .. لازم نحترم الواقع
العملى والفعلى .. الواقع بيقول فى يوم من الأيام .. سوف
يتوقف قلبى عن النبض .. وتتوقف رئتائى عن التنفس ويتوقف
عقلى عن التفكير .. ويكف الدم عن السريان فى عروقى .. عند
ذلك سوف ينتهى وجودى .. عند ذلك سيتم تحنيطى فى دار
الموتى كائى إنسان فيكم ..

أوالسبح : بعد الشر عليك يا مولائى ..

أوديب : اخرس يا أوالح .. (للناس مرة أخرى) .. لما ده يحصل .. حاتموا
إيه كل الحضارة اللى أنا عملتها حا يحصل لها ايه ..؟ الطرق
المعبدة .. الأجهزة الكهربائية .. الأجهزة الأليكترونية .. السيارات
والطيارات .. الخمس آلاف سنة اللى ضغطناهم فى سنين
قلائل حا يحصل فيهم إيه ..؟ كل الحضارة دى يهددها وحش
جائ من الصحراء ..؟ لقد بدأت أحس أن كل هذا البناء
الضخم من الحضارة .. بناء هش يستطيع أى وحش أن يدمره
عندما سأنقل إلى الدار الآخرة .. سوف يلاحقنى العذاب
لأننى تركت كل هذه الحضارة لمن لا يستطيع حمايتها .. يا أهل
طيبة .. اننى أطلب منكم باسم الحياة أن تخرجوا لملاقاة
الوحش والقضاء عليه .. من أجل من سيأتون بعدكم .. ومن أجل
طيبة ..

تريزياس : (يهب واقفا بين الأهالى) .. أخيرا نعود لنقطة البدء هذا ما قلته
فى المرة الأولى .. يجب أن يتولى الشعب بنفسه حماية نفسه
ضد الوحش إذا كان هناك لغز فيجب أن يقوم الشعب بحل
اللغز .. وإذا كان هناك قتال فليخرج الشعب للقتال دفاعا عن
نفسه .. هل كان يجب أن يحدث كل ما حدث لكى تفهموا هذه
الحقيقة الواضحة .. إن الوحوش لا تلقى ألفاظا بقصد
التسلية .. إن الوحوش تهاجم المدن لكى تأكلها .. هناك حيوانات

صفيرة تقابل الإنسان الفرد كالثعابين والذئاب وهناك وحوش
تقابل الجماعات.. وهناك أبوالهول.. ان «أبو الهول» يا أهالى
طيبة يأكل البلاد والمدن.. إفهموا هذا جيداً.. وإذا ترك طيبة
الآن فسيعود لها مرة أخرى.. وبعد ذلك يذهب إلى بقية مدن
الأرض.. يا أهل طيبة.. ليس من أجل طيبة وحدها.. ولكن من
أجل كل المدن.. لنذهب لملاقاة الوحش.. وسننتصر فى كل
الأحوال.. إذا قضينا على الوحش فسنغنى لأنفسنا.. سيغنى
الشعب لنفسه فقط.. وإذا قضى علينا فهذا معناه أننا لا
نستحق الحياة ومن العدالة أن نموت.. وبذلك يبدأ عصر
جديد على الأرض.. عصر إنتهاء البشر وانتصارات الوحوش..
يا أهل طيبة جميعاً.. إلى الوحش..

الأهالى : (يرعدون).. إلى الوحش.. إلى الوحش..

(يندفعون جميعاً إلى السور.. وتختفى جوکاستا من الشرفة.. ما زال
أوديب واقفا ينظر بفخر لأهل طيبة الذين يخرجون من المسرح فى
حماس شديد لا يبقى من الجميع إلا أوالح)

أوديب : مارحشش معاهم ليه يا أوالح..؟

أوالح : وأمن طيبة الداخلى يا مولاي..؟.. مين اللى حايعافظ على
الأمن فى طيبة..

أوديب : أنا شايف البلد قاضية..

أوالح : بالعكس.. تلاقى أعوان الوحش مالىين البلد..

أوديب : أنا مش شايف حد إلا أنا وأنت.. يبقى لازم حد فينا..

(ترتفع صيحات عالية ويرتفع الغبار عبر الأسوار مع زمجرة

هائلة من الوحش.. ترتفع أصوات المعركة.. إظلام تدريجى).

المشهد الثانى

(أوديب يجلس منهارا على كرسى العرش وقد القى برأسه إلى الوراء وأغمض عينيه.. تمثال مجسم للتعاسة.. كريون يقف أمامه وقد غطت بقع الدم والوحل ملابسه ووجهه).

أوديب : إزاي يا كريون.. إيه اللى حصل بالضبط..؟
كريون : ماعرفش يا مولاي.. ومفيش حد يعرف.. حاجة واحدة بس اللى أعرفها.. اتهزمننا.. أبو الهول هزم شعب طيبة.. ماقدرناش نقف قدامه.. ماكتاش عارفين بالضبط بنحارب مين أو بنحارب إيه.. لأول مرة فى تاريخ طيبة، لا يستطيع شعبها أن يصمد فى قتال.. طيبة العظيمة.. أم الأبطال أم الحضارات لم تستطع أن تصمد أمام الوحش فى معركة.

أوديب : مسئوليتك يا كريون.. مسئولية الحرس.. الحرس كان فى المقدمة.. قطعنا فيه نقص فى إعداد وتدريب الحرس.
كريون : فعلا يا مولاي.. أنا المسئول عن الهزيمة.. زى كل قائد ما يبقى مسئول عن النصر والهزيمة.. لكن ليه أنا اتهزمت..؟

أوديب : مفيش حاجة تبرر الهزيمة..؟
كريون : أنا مش بابرر الهزيمة .. أنا متحمل مسئوليتى كاملة.. مش هى دى القضية، القضية حاجة ثانية.. بين صيحات الجرحى والقتلى، وسط غبار المعركة وقدام زئير الوحش المفزع.. حسيت

فجأة بعقلى هادى وصافى صحيح .. أنا مسئول عن تدريبات
السلاح .. لكن السلاح مش بيحارب لوحده .. السلاح بيحارب
بيه راجل .. مين اللى بيدرب الراجل ؟

أوديب : يدربه على إيه ؟

كريون : يدربه على أنه يبقى راجل .. بمعنى أوضح .. مين المسئول عن
صنع الإنسان فى هذه المدينة ؟ .. إحنا وزعنا قواتنا صح ..
خدنا موافق صح .. أسلحتنا كانت قوية وسليمة .. حماسنا كان
كبير .. إيماننا كان قوى كان فيه حاجة غلط .. أنا مش
عارفها .. أنا عارف شعب طيبة كويس .. شعب طيبة، جرى
جدا .. وعمره ما خاف من الموت .. الموت بالنسبة لشعب طيبة
هو الانتقال لحياة أخرى، أفضل .. ليه فيه ناس كثير ماوقفش
فى مكانها لحد ما مات أو لحد ما قضينا على الوحش .. هل
لأننا مانعرفش حاجة عن الوحش .. جايز .. بس ده مش سبب
كافى .. فيه طاعون أصاب شعب طيبة .. مرض غريب .. إيه
هو ؟ .. مش عارف .. مين المسئول عنه ؟ .. مش عارف .. الإنسان
هنا فيه حاجة غلط والمسئول عن الغلط ده .. هو بالضرورة
المسئول عن صنع الإنسان هنا .

أوديب : الهزيمة حولتك لشاعر يا كريون .. طيبة خسرت قائد وكسبت شاعر .
كريون : إذا كنت بتقصد تهيننى يا مولاي .. فأنا دلوقت مش حاسس
بأى حاجة .. مش قادر أحس بالعار .. أنا كمان جوايا حاجة
غلط .. أنا كمان الطاعون تسلل لأعماقى ..

أوديب : من ناحية مسئوليتى فى صنع الإنسان فى طيبة .. انت عارف يا
كريون إيه اللى أنا عملته .. أنا عملت أقصى ما يمكن عمله ..
أنا طورت طيبة آلاف السنين .. اخترعت للناس كل ما سيصنعه
الإنسان فى المستقبل .

(يظهر تريزياس)

تريزياس : واخترعت كمان يا مولاي.. أسوأ اختراع فى التاريخ.. الخوف..
الاختراع الوحيد اللى يفسد أثر كل الاختراعات الثانية.. أبشع
أمراض الإنسان.. أبشع من الطاعون.. المرض الوحيد اللى
بيحول الآدميين إلى أشياء.. كل الأمراض اللى نعرفها أعراضها
واضحة ومعروفة.. أما أعراض الخوف فهى أعراض خادعة
ومضللة.. ولما الخوف بيتسلل لقلب إنسان، بيختلط بدمه وعقله
وأحلامه.. بيصبح الإنسان والخوف شىء واحد.. بل إن
الإنسان يصبح هو نفسه الخوف ماشى على قدمين.. عند ذلك
لا يصبح الإنسان إنسانا.. إنه يتحول لشىء هش.. والأشياء
الهشة تتكسر بسهولة عند أى محنة..

أوديــــــــب : تريزياس.. انت بتقول كلام خطير.. بشع.. أنا كان كل همى،
سعادة الإنسان فى طيبة.. كل همى أنى أحرره من الخوف.
تريزياس : انت تحرره من ناحية.. وناس غيرك تكبله بالخوف من الناحية
الثانية.. الظاهر جلالتك ماتعرفش أوالح بيعمل إيه..

أوديــــــــب : ماعرفش..

تريزياس : مسئوليتك انك كنت تعرف..

أوديــــــــب : حتى لو كان أوالح بينشر الخوف فى البلد.. ودى حاجة أنا
ماعرفهاش برضه ماتبقاش مسئوليتى.. أوالح كان موجود قبل
أنا ما أبقي ملك..

تريزياس : ومع ذلك سمحت له أنه يشتغل.. وينفس الطريقة اللى كانت
ماشية بيها عيلته من أربعمئة سنة.

أوديــــــــب : (فى عذاب وحيرة شديدة).. طريقة إيه.. أنا مش فاهم حاجة..
أخيرا اتضح لى أنى كنت أعمى.. (صارخا) .. أوالح.
(أوالح يظهر على الفور من خلف إحدى الستائر)

أوالــــــــح : أيوه يا مولاي..

تريزياس : أوالح زى الهوا.. دايما موجود فى كل مكان..

أوديب : انت عملت إيه فى الناس يا أوالح؟
أوالح : ولا حاجة يا مولاي.. حتى أسألهم..
تريزياس : (يسخرية) .. هـ .. حايقلوا ماحصلش.. دايمًا الخايف يدلك
الإجابة اللى انت علوزها..
أوالح : إذا كان قصدك ان بعض الأفراد تعرضوا لمعاملة مش.. مش..
(يبحث عن كلمة).. مش ظريفة.. فده معناه أنهم بعض أفراد..
مش شعب طيبة وده كان لازم يحصل.
أوديب : ليه..؟

أوالح : عشان حماية طيبة يا مولاي..
تريزياس : إحنا مش بنتكلم على الخونة والأشرار واللصوص والمجرمين..
كل دى أجزاء فاسدة فى جسم المجتمع.. إحنا قصدنا حاجة
تانية يا أوالح.. انت عارف إحنا بتقصد مين..
أوالح : فاهم قصدك إيه.. فيه ناس بتقول ان جلالتك ماحليتش
اللفز.. وناس بتشكك فى الحل.. محدش كان مع جلالتك عند
الوحش.. وفيه ناس بتقول أن الوحش الثانى هو الأولانى..
ولذلك زودنا العيار حبتين مع بعض الناس.. كان لا بد من منع
الناس إنها تقول الكلام ده حفاظًا على هيبة النظام الفرعونى.

أوديب : كنت بتمنعهم إزاي يا أوالح؟
أوالح : بكل الطرق الممكنة يا مولاي..
تريزياس : كل الطرق الممكنة.. يعنى طريقة واحدة.. التعذيب.. تفتيت كل
الأشياء الجميلة والرديئة اللى جواهرهم.. ثم إيقاظ أبشع ما فى
داخل الإنسان.. الحقد.. كراهية كل شىء..
أوالح : واضح إنك علوز تودينى فى داهية.. المسألة مش بالبشاعة
دى.. لما ثلاثة أربعة يتعرضوا لمعاملة مش.. مش..
أوديب : مش ظريفة..

أوالح : آه مش ظريفة.. مايقاش معنى كده أن أهالى طيبة كلهم يتأثروا..

تريزياس : الخوف مايعرفش التجزئة يا أوالح.. الخوف مرض جماعى..
شعب طيبة مش أفراد.. شعب طيبة جسم حى متكامل.. زى أى
مجتمع فى الدنيا أى حاجة تحصل لأى جزء فى الجسم ده
يتأثر بيها جسم المجتمع كله..

أوالـح : خلاص.. أنا آسف..

أوديـب : أسف إيه..؟

أوالـح : باعتذر عن غلطى.. أصل ماكنتش واخد بالى من حكاية جسم
المجتمع دى.. ما هو إحنا طول عمرنا شغالين بنفس الطريقة
والأمور كانت ماشية كويس ومحدث عمره اشتكى مننا..
اشمعنى المرة دى..؟

تريزياس : عمرك ما حاتفهم يا أوالح.. انت بتتنمى لعالم آخر.

أوديـب : أوالح.. قبل شروق الشمس لازم تكون بره أسوار طيبة..

أوالـح : حاضر يا مولاي.. أنا كمان كنت عامل حساب حاجة زى كده..
ولذلك جيت عقد عمل فى بابل (يخرج من جيبه بعض الأوراق)...
والعهدة حاسلمها لمين يا مولاي..؟

أوديـب : عهدة إيه..؟

أوالـح : كشوف المجرمين..

أوديـب : خدهم معاك..

تريزياس : عرفت يا أوالح أن الخوف مرض جماعى.. انت كمان كنت
خايف.. ولذلك كنت مجهز عقد عمل فى بلد تانية..

أوديـب : لو استتيت لحظة واحدة.. حاعاملك معاملة مش ظريفة...

أوالـح : (يتمتم بغضب وهو خارج).. طول عمرنا شغالين بالطريقة دى
ومحدث قال لنا حكاية جسم المجتمع.. اشمعنى المرة
دى...؟

(يخرج)

أوديـب : (فى باس شديد).. كريون..

كـريـون : مولاي.. أؤمرنى أعمل أى حاجة.. أنا مستعد أضحي بكل

حاجة عشان طيبة.. وعشانك يا مولاي..

أوديب : تريزياس.. كريون، يا أعز اتنين عندى.. ماتسيبونيش.. أنا مش

عارف أعمل إيه.. أول مرة باحس إني مش شايف طريقى..

أول مرة باحس أنى أعمى.. أنتم دلوقتى عنيه اللى باشوف

بيها.. نعمل إيه..؟

كـريـون : من وجهة نظر عسكرية.. لازم نعرف كل حاجة عن أبوالهول..

ولازم نعيد صنع الإنسان فى طيبة.. سلمونى إنسان جيد

الصنع وأنا أسلمكم النصر.

أوديب : فىن حور محب وأونح...؟

كـريـون : ماشفتهمش فى المعركة..

تريزياس : دول مايظهروش فى المعارك.. لكن لما تحصل أى مكاسب،

حايطهروا وينطوا عليها فورا..

أوديب : ونعيد صنع الإنسان إزاي ياتريزياس..؟

تريزياس : شعب طيبة بيحبك يا مولاي.. لتكن هذه نقطة البداية..

لنحافظ على هذا الحب ونقويه.. أى محاولة لإخفاء الحقيقة

الناس حتدفع تمنها فى النهاية.. أنا ماعرفش جلالتك موت

الوحش ولا لأ فى المرة اللى فاتت.. لتكن الحقيقة ما تكون..

لكن فيه حقيقة لازم طيبة تفهمها.. لازم تفهمهم أن الفرد مهما

كانت قوته وعبقريته فإنه لا يستطيع قتل الوحوش دائما

بمفرده حتى لو كنت حليت اللغز.. حتى لو كنت قتلت الوحش..

يالاً يا أوديب ابتدى.. ماعندناش وقت نضيعه..

(أوديب يخرج إلى الشرفة ومعه تريزياس وكريون)

يا أبناء طيبة .. يا أنيائى..

(الناس يتجمعون)

أوديب : لقد خسرنا معركة.. وبقيت أماننا الحرب كلها.. وأريد أن

أعلن لكم بعض الحقائق.. لقد طرد أوالح من طيبة.. وهذا
معناه أنه لن يكون للخوف مكانا بيننا.. لن يكون هناك فى طيبة
ما يعوق نمو عظمة الإنسان وإبداعه.. وهناك حقيقة أخرى
لا بد أن تعوها جيدا من أجل الانتصار على «أبو الهول» لا يمكن
لإنسان بمفرده أن يقتل الوحوش التى تهاجم المدن.. لم يحدث
فى المرة الأولى أننى قتلت الوحش..

الأهـالى : (يفنون).. انت اللى قتلت الوحش..

أوديب : انتم اللى قلتم كده.. أنا لما جيت ماقلتش كده..

الأهـالى : (يفنون) .. انت اللى قتلت الوحش..

أوديب : .. لكن الحقيقة ماكانتش كده بالضبط..

الأهـالى : (يفنون).. انت اللى قتلت الوحش..

أوديب : أرجوكم..

الأهـالى : (يفنون) .. انت اللى قتلت الوحش..

(يضيع صوته وسط الغناء)

(إظلام تدريجى)

المشهد الثالث

(ظهور تدريجي لبقعة إضاءة واحدة فيها تريزياس في مقدمة المسرح بينما يسود الإظلام باقى المسرح)

تريزياس : من السهل أن نطرد أوالح من طيبة.. ولكن من المستحيل أن نطرده من قلوب الناس فى لحظة، ولقد كنت أعلم بهذه النتيجة المحزنة.. ولكن كان لا بد لأوديب أن يرى بنفسه ماذا يفعل الخوف بالناس.. من الممكن أن يتغنوا بالخطأ.. من الممكن أن يتحمسوا للزيف.. ومن الممكن أن تضيع بينهم الحقيقة.. حتى أنبل الانفعالات مثل الحماس والجرأة والشجاعة قد تكون أعراضا لهذا الطاعون.. الخوف.. إن نقطة البداية الحقيقية لإعادة صنع الإنسان من أجل إطلاق كل الطاقات الإبداعية بداخله هى أن نحرره من الخوف والقلق والشك..

(الإضاءة تظهر بالتدرج فى قاعة العرش أوديب وكريون)

أوديب : إزاي يا تريزياس.. إزاي..؟

تريزياس : أنا أعرف ملايين الأجوبة لملايين الأسئلة.. لكن السؤال ده هو الى حير كل الفلاسفة.. هو ده اللغز الحقيقى.. الى يعرف الإجابة حايعمل أعظم الحضارات على الأرض.. الى يعرف يحرر الإنسان من الخوف يستحق أن يكون أبو الحكماء والفلاسفة.. انه.. وببساطة يا مولاي يستحق لقب.. حاكم.

أوديب : النور قليل في القصر الليلة دى.. مش شايف كويس..

(كريون ينظر بدهشة)

كريون : فعلا يا مولاي.. المشاعل مش فى كامل قوتها..

أوديب : حاجة غريبة.. مش شايف كويس..

كريون : الحل بدأ يلمع فى عقلى يا مولاي..

أوديب : ماتقولوش يا كريون.. نفذه بكل حماس الشباب.. ومعاك

تريزياس..

كريون : وانت يا مولاي..

(أوديب ينهض من على كرسى العرش)

أوديب : أنا حادور على الحل بنفسى.. فى قمة مجدى اكتشفت ان فيه

لسة حاجات ماعرفهاش.. أنا حامشى.. حابدأ رحلة طويلة..

عشان أتعلم.. كريون.. خد بإيدى.. ورينى الباب.. كنت فاكر أن

الضوء هو اللى قليل.. (بالم).. ماكنتش عارف إن الدنيا ممكن

تكون فيها كل الضلمة دى.. ارجع أنت يا كريون..

كريون : مولاي..

أوديب : ده أمر.. آخر أمر يصدره أوديب..

(أوديب يخرج)

كريون : لازم كل واحد فى طيبة يدفع ثمن كبير.. وبالثمن ده نشترى

طيبة.. نشترى حياة طيبة.. واحد يكون له مكانة كبيرة..

تريزياس : وضع...

كريون : حاوضح لك بطريقة عملية..

يخرج كريون إلى الساحة بينما تظهر فيها الإضاءة بالتدريج.

(كريون يسير فى الساحة بكبرياء.. وقد رفع راسه عاليا، يخرج

من باب السور.. الناس تمتلئ السور)

شخص ١ : كريون رايج يقابل الوحش لوحده..

الأهالى : لوحده...؟

شخص ٢ : ارجع يا كريون...

شخص ٣ : يقرب من الوحش ماسك سيفه ورأسه مرفوعة لفوق..

الأهالى : لوحده...

شخص : حاييب معلومات عن الوحش..

شخص ١ : لازم نروح وراءه...

(صرخة من الجميع.. البعض يقفز خارج السور ويعودون بكريون

محمولا على الأعناق جثة هامدة)

(يتجمع الأهالى حول الجثة بينما تخفت الإضاءة بالتدريج

وتتركز حول تريزياس فى مقدمة المسرح)

تريزياس : لقد دفع كريون الثمن.. ثمن أن تفهم الناس فى طيبة أنه لا بد من الموت فى سبيل الحياة، وأنه بالموت لن يخسر الإنسان سوى خوفه.. وأن حياة يتهددها أبو الهول خير منها الفناء.. ليس مهما أن نعرف ماذا حدث لأوديب فقد أصبح - كما قال أحد الناس - ملكا للشعراء... ولكن طيبة ستبقى للأبد ملكا لشعبها الذى بدأ يعرف الحل جيدا.. وبعد آلاف السنين.. من يزور منكم مدينتى الجميلة، طيبة .. سيرى المعابد العظيمة ويباقى ما صنعه الإنسان خالدا يتحدى الزمن.. ووحوش الصحراء.. يا أيها الناس يا من تسكنون هذه المدينة، ويا من قصصت عليكم قصة مدينتى، اعلموا أنه وإن كانت قد ارتفعت منكم بعض الضحكات عندما استمعتم إلى هذه القصة.. إلا أننى وأقسم على هذا بكل الآلهة.. لم أكن أقصد ذلك..

(ستار)

* * *

عملية نوح

قدمها المسرح القومي فى موسم ١٩٨٤
من إخراج الأستاذ سعد أردش

• الجزء الأول •

المشهد الأول

(قاعة المجلس الشعبى لمحافظة مصر كما يسميها الناس أو محافظة القاهرة كما تسمى عادة في المكاتبات الرسمية. بعض ممثلى الهيئات يجلسون بينما يتوافد باقى الأعضاء. يتبادلون التحية باشارات وقورة لا تخلو من التكلف. كما يتبادلون أحاديثا هادئة تلفها ابتسامات مصقولة.. الحديث يتناثر فى القاعة.. ولا أهمية كبيرة فى بداية المسرحية لمعرفة هوية المتكلم.. الحديث التالى يلور بين مسئول كبير ومسئول صغير.. المسئول الصغير فى الغالب هو مدير الاحتفالات).

مدير الاحتفالات : أهلا يا سعادة البيه..

المسئول : أهلا بيبك يا عزيزى..

م. الاحتفالات : سيادتك يا فندم كنت رائع إمبارح..

المسئول : أشكرك..

م. الاحتفالات : حقيقى يا فندم.. حضرتك لخصت الموضوع ببساطة شديدة

جدا.. وبطريقة مقنعة تماما..

المسئول : أشكرك يا عزيزى.. أصل..

م. الاحتفالات : والله يا فندم.. بالرغم أنه كان عندى شغل مهم إمبارح فى المكتب.. إلا أنى كنت حريص أنى أخذ معايا التليفزيون الترانزيستور.. عشان أشوف سيادتك..

المسئول : (وقد بدا يتضايق).. أشكرك.. الواقع أنت بتجاملنى أكثر من اللازم (يحاول تغيير مجرى الحديث).. هو.. هو.. هو التليفزيون الترانزيستور ده يكام؟

م. الاحتفالات : والله يا فندم.. أنا جبته رخيص جدا من السوق الحرة.. واحنا راجعين من ندوة الاشتراكية الدولية فى فرنسا.. وجاى لى واحد تانى من الجمعية الدولية لمساعدة كبار المسئولين.. لو تحب سعادتك أبعتھولك..

المسئول : أنا لا أقبل الهدايا..
م. الاحتفالات : أعوذ بالله.. مش هدية.. الجمعية بتبعية لنا بتمنه من غير أرباح.. هو تمنه تقريبا ثلاثة جنيه وسبعين قرش..

المسئول : إذا كان كده معلش..
(يستمر الحديث بينهما همسا)
(شخصان آخران)

أ : مش ناوى تاخذ مفاتيح الفيلا يا عزيزى؟..
ب : صدقنى يا أختى.. أنا مش حادخل الفيلا دى.. ولا حاسكنها إلا لما أدفع ثمنها..

أ : ثمن آيه يا عزيزى؟.. المسألة بسيطة.. الأرض بتاعتك..
ب : آيوه.. الأرض بتاعتى.. بس أنت اللى بنيتها..
أ : يعنى كلفتنى آيه؟.. شوية رمل على شوية أسمنت على شوية طوب على شوية بلاط على شوية أبواب على شوية شبابيك على شوية حمامات على شوية عمال على شوية دهانات..
المسائل بسيطة يا عزيزى..

ب : ولو.. لازم أدفع ثمنها.. الشعب فى يوم من الأيام حا يسألنا على كل صغيرة وكبيرة فى حياتنا الخاصة. إحنا لازم نكون قدوة..

١ : خلاص.. مادام سعادتك مصر.. الفاتورة بالصدفة فى
جيبى.. ١٢٢٤ ألف ومائتين أربعة وعشرين جنيه.. اتفضل..
كده أنا فى فيها وأنا مستريح.. وفى الحالة دى الواحد يبقى له
عين يطلب منك بقلب جامد أنك تبتدى فى الفلل بتاعت
الأولاد..

١ : قوى.. قوى.. أوامر..

(مدير الاحتفالات مع شخص اخر)

م. الاحتفالات : حقيقى يا فندم والله.. كلامك إمبارح، وده مش رأى
لوحدى.. أنا سألت ناس كثير من اللى شافوك إمبارح.. ناس
عادين، من البسطاء دول اللى هم بيمثلوا فى مجموعهم
شعبنا المناضل.. كلهم أجمعوا أن حديث حضرتك فى
التلفزيون إمبارح.. كان.. كان أكثر من رائع.

ج: عزيزى.. أنا.. أنا ماتكلمتش فى التلفزيون إمبارح..

م. الاحتفالات : إزاي يا فندم..؟.. هو مش كان فيه برنامج مع أن سعادتك
امبارح الساعة سبعة ونص على الهوا.. ده معلن عنه فى كل
الجرايد..

ج: فعلا.. بس أنا مارحتش.. ما تمكنتش أنى أروح فى ميعادى..

م. الاحتفالات : آه.. يبقى برنامج قديم يا فندم ويبيعهده..

ج: (متهريا).. جايز..

م. الاحتفالات : لكن حقيقى يا فندم.. كلامك إمبارح..

ج: (ينفجر).. أرجوك يا عزيزى.. أرجوك.. أرجوك.. أنا عمري

ماتكلمت فى التلفزيون فى حياتى... لسه برضه مصر أنك

شفتنى امبارح فى التلفزيون؟..

م. الاحتفالات : (يكاد يغمى عليه).. الواقع يا فندم.. الظاهر التلفزيون بتاعنا..

يعنى الشاشة بتاعته..

(يلمح شخصية ده تدخل القاعة فيهرع لملاقاتها)

.. عن إذنك يا فندم..

(يصفاح د بحرارة شديدة)

م. الاحتفالات : أهلا يا فندم.. ألف مبروك يا فندم.. يا ريت يا فندم كنت جيت بنفسك تشوف الناس البسطاء إمبراح وهم بيرقصوا لما عرفوا أن سعادتك حاتمك المؤسسة.

د : ما هو أنا ماسكها من شهرين.. الخبر اللي نزل فى الجرايد إنهاريه.. خبر قديم..

م. الاحتفالات : (بإعجاب شديد).. يا سلام.. يا سلام.. بقى الناس اللي أنا شفتها فرحانة.. بترقص عشان تعيين سيادتك.. بترقص بقالها شهرين؟.. دى حاجة عظيمة فعلا.. عن إذنك يا فندم..؟

(الحوار بين و، ه)

و : تصور.. بلغت بيهم الصفاقة.. أنهم يختلسوا من المشروع خمسين ألف جنيه..

ه : أعوذ بالله..

و : ماسكتش طبعا.. بلغت النيابة.. كل موظفى المشروع دخلوا السجن إمبراح..

ه : ويعددين؟

و : خرجوا النهارده، بكفالة..

ه : دول ناس مجرمين.. يختلسوا خمسين ألف جنيه من مشروع صغير زى ده؟.. هى ميزانية المشروع كام؟..؟

و : واحد وخمسين ألف..

ه : يعنى سابولك ألف فى المشروع..

و : كانوا حياخدوه هو راخر.. بس أنا لحقته منهم فى آخر لحظة.. الخطير يا محسن بك أنهم مش حرامية ويس.. بل وفاقدى الأخلاق أيضا..

هـ : أعود بالله..

و : ما يشوفوش حد بيعحيا فى سعة من الرزق.. إلا ويحقدوا عليه.. يتقولوا عليه.. ويحاولوا تلويث سمعته.. تصور إنهم بيتقولوا على أنا..

هـ : مش معقول.. هى وصلت للدرجة دى؟..

و : تصور.. بيتقولوا العمارة اللي فى كامب شيزار اشتراها منين.. والعمارة اللي فى السيدة زينب بناها إزاي.. والتلات عربيات اللي عنده، جابههم منين.. والفيللا اللي فى العجمى.. عارفها حضرتك طبعاً.. الفيللا الصغيرة.. اللي حضرتك شرفتتى بأنك صيفت فيها السنة اللي فاتت..

هـ : أيوه.. عارفها.. مالها؟

و : برضة جابوا سيرتها فى التحقيق..

هـ : سفلة..

و : تصور.. عاوزين يجيبوا رجلى..

هـ : بس مع مين.. كل الحاجات دى مش باسمى.. ولا باسم مراتى.. ولا باسم أولادى.. كلها مرهونة للبنوك..

(العبارات التالية تتناثر فى القاعة)

.... : هو ميعاد الساعة كام..؟

.... : اتناشر بالضبط.. اتناشر إلا خمسة دلوقت تقريبا..

.... : تفكر أنه جاي بخصوص الدفاع الشعبى..؟

.... : جايز.. بس إحنا عمرنا ما سمعنا عنه.. هو صحيح عضو اللجنة المركزية؟..

.... : أيوه..

.... : ده شخص غريب جداً.. اسمه نوح.. نوح محمد على.. عمره ما طلع اسمه فى الجرايد.. وعمره ماتتشر له صورة.. ومع ذلك يقال أنه شخص مهم جداً..

.... : الظاهر المسألة خطيرة.. لى صديق فى المجلس الشعبى فى
بنى سويف.. سافر النهاردة الصبح، لأن عندهم اجتماع مهم
الساعة اتناشر برضه..

.... : وأسويوط كمان..

.... : ودمياط..

.... : واسكندرية..

.... : وطنطا..

.... : والمنصورة..

.... : والمنيا..

.... : وسوهاج..

.... : وقنا..

.... : وأسوان..

.... : الظاهر المسألة على مستوى الجمهورية كلها..

.... : أكيد فيه نص شهر على العيد..

(الحديث بين س، ص)

س : خلصت الدورة التثقيفية...؟..

ص : خلصتها إمبراح.. دورة مفيدة جدا.. أنا لما دخلتها..

بصراحة كنت بوجوازي رأسمالى متعفن..

س : ودلوقت..؟

ص : لا، الحمد لله.. كل تفكيرى وكل سلوكى بقى اشتراكى..

باشترك مع أصدقائى فى المحافظة فى كل حاجة.. اشتريت

معاهم وخذنا حته أرض فى الهرم.. واشتركنا برضه وخذنا

الأسمنت والحديد.. الاشتراكية دلوقت بقت فى دمنا..

بنشارك سوا وبنأخذ أى حاجة تقابلنا..

س : أنا بقى ماخبيش عليك.. لسة مابقيتش اشتراكى قوى.. ما

باحبش أشترك مع حد فى حاجة.. باشتغل لوحدى..

ص : ما هو ده برضه سلوك اشتراكى.. الاشتراكية يا عزيزى
مابتلغيش النزعة الفردية.. شوف.. أنا حالخص لك
الاشتراكية دى فى جملة واحدة.. اللي يأكل لوحده يزور..
(يرتفع صوته قليلا).. يعنى أحنا ناكل.. والجماهير تاكل
برضه..

توحيد : (الذى استمع للجملة الأخيرة).. مش لو فاض حاجة
للجماهير..

ص : (يبتسم لتوحيد ويهز راسه محبباً) أهلاً.. (لزميله).. الأفندى ده
منين..؟

س : ده شخص ززل قوى.. اسمه توحيد.. مهندس معمارى.. معاه
دكتوراه من أمريكا..

ص : يسارى..؟

س : هو زى ما تقول كده.. شيوعى يمينى.. بالتحديد هو من
وسط يسار اليمين.. عارف أنت النوع ده..
ص : أيوه.. بيبقى ززل قوى.. (لتوحيد) ... بس أنا ماتشرفتش
بمعرفة حضرتك.

توحيد : دكتور مهندس توحيد المصرى.. والمعلومات اللي قالها لك
البية، مش دقيقة.. أنا اتسجنت مع الشيوعيين وماكنتش
شيوعى.. ومرة مع الأخوان وما كنتش منهم..
س : حاجة غريبة جداً.. ليه..؟

توحيد : زى البية ما قال لك.. ززل.. يا سعادة البية.. المسألة مش
غريبة ولا حاجة.. أى شاب فى سننى.. يا اتسجن يا اما كان
حايئسجن..

س : مفيش داعى للتشاؤم ده.. صحيح انت حظك كان وحش بس
مش هى دى القاعدة.. احنا فى أسرتنا شباب كتير جدا من
سنك.. ومع ذلك ما حصلهمش حاجة..

توحيد : ولا حـا يحصل لهم.. عيلتكم يا فندم مشهورة جدا.. أنا
أعرف شباب كثير منهم.. أعرف على عبدالحاكم ومجدي
عبدالحاكم.. وإبراهيم عبدالحاكم..

س : كانوا معاك فى الدراسة..؟...

توحيد : لأ.. كانوا معايا فى المعتقل.. ضباط على شاويشية.. ولما
خرجت من المعتقل.. كانوا برضه ماسكين المؤسسات اللى
اشتغلت فيها..

ص : وحضرتك.. يعنى.. قصدى..

توحيد : أنا عارف يا فندم من الأول، إن حضرتك نفسك تسألنى عن
مذهبى السياسى..

ص : إذا ماكانش يضايقك..

توحيد : (يحدق فى وجهه للحظات).. أنا معجب بإخاناتون..

ص : (هامسا لزميله).. معجب بإخاناتون.. إخاناتون ده مين؟..

س : واضح من اسمه أنه فيلسوف صينى.. مش قلت لك من الأول
أنه شخص رزل.. العالم دول يموتوا فى الفكر المستورد..

ص : ده بس اللى معجب بيه؟.. مفيش حاجة تانية فى البلد
عاجباك.. مفيش حاجة تانية بتحبها؟.. مفيش حاجة فى

البلد بتؤمن بيها..؟..

توحيد : أنا معجب بحاجات كثير..

س : مستوردة برضه..؟..

توحيد : لأ.. مصرية صميمة.. (يحول الأمر لدعابة.. يتكلم جادا).. أنا
باحب سلطة الطحينة.. ومعجب بالمسقة.. ومخلص للفتة
بالكوارع... ومؤمن بورق العنب المحشى.. وأخذ موقف
متسامح من الملوخية.. وداخل فى تحالف مؤقت مع المعمار..
وعلى فكرة برضه الحاجات دى كلها مستوردة من المطبخ
التركى..

(يتجاهلانه)

(يدخل نوح، يحمل معه حقيبة متوسطة الحجم وشاشة عرض

سينمائي صغيرة.. ملفوفة على حامل.. يتجه على الفور إلى المنصة)

نـــــــــــــــــــــوح : السادة.. أعضاء المجلس الشعبى لمحافظة مصر.. أقصد

محافظة القاهرة، السلام عليكم ورحمة الله وبركاته (ينظر

فى ساعته).. المفروض أن اجتماعنا يبدأ الساعة ١٢ بالضبط،

فاضل دقايق.. لذلك حانت هذه الفرصة دى ونتعرف على

بعض.. أنا نوح محمد على.. عضو اللجنة المركزية..

(كل منهم يقدم نفسه)

..... : فلان الفلانى.. التعليم..

..... : فلان الفلانى.. المواصلات..

..... : فلان الفلانى.. التموين..

..... : فلان الفلانى.. الإسكان..

..... : لواء فلان الفلانى.. الأمن..

..... : فلان الفلانى.. الدفاع المدنى..

..... : فلان الفلانى.. الثقافة والفن والسياحة..

..... : فلان الفلانى.. الأوقاف..

..... : فلان الفلانى.. الإعلام..

..... : فلان الفلانى.. الخزانة..

..... : فلان الفلانى.. الصحة..

..... : فلان بس.. سكرتير المجلس..

تـــــــــــــــــــــوحيد : توحيد المصرى.. مهندس معمارى..

نـــــــــــــــــــــوح : (ينظر فى ساعته).. فى نفس اللحظة دى يا حضرات.. لى

زملاء فى كل المجالس الشعبية لم محافظات الجمهورية،

بيطرحوا نفس الموضوع اللى حاتكلم فيه مع حضراتكم.. وهو

أمر مهم وخطير.. بل يمثل أعلى درجات الخطورة والأهمية

والسرية.. وقبل ما نخرج من هنا.. سوف نقسم بالحفاظ

على سريته على المصحف والإنجيل والمسند..
(يخرج من حقيبته المسند والكتابين المقدسين ويضعهم على المنضدة)
المصحف وفهمناه..

... : الإنجيل وفهمناه..

... : المسند ليه..؟

نـــــــــــــــوح : لسبب بسيط وواضح.. أى كلمة حانتسرب عن اللى حا
يحصل فى هذا الاجتماع.. أنا شخصيا مكلف باعدام اللى
يقولها.. واللى حايستمعها..

الـــــــــــــــــجميع : ايه..؟.. إعدام..؟..

نـــــــــــــــوح : بالضبط..

سكرتير الجلسة : (يقف مرتعدا).. لو سمحت يا فندم..

نـــــــــــــــوح : لحظة من فضلك.. لما أخلص كلامى..

السكرتير : أرجوك.. أرجوك.. قبل ما تخلص كلامك.. وقبل ما تدخل
فى الموضوع.. لو سمحت.. أرجوك..

نـــــــــــــــوح : اتفضل..

السكرتير : يا فندم أنا مش سكرتير الجلسة دى... ومش سكرتير
المجلس..

نـــــــــــــــوح : آمال أنت أيه..؟..

السكرتير : أنا القائم بأعمال السكرتير.. سكرتير الجلسة الأصلى فى
إجازة..

نـــــــــــــــوح : خلاص.. أنت اللى حاتسجل وقائع الجلسة..

السكرتير : أنا يا فندم عمري ما اشتغلت فى حاجة مهمة ولا سرية..

نـــــــــــــــوح : يبقى المرة دى حاتشتغل فى حاجة مهمة وسرية..

السكرتير : أرجوك يا فندم.. بلاش أنا.. المفروض أن السكرتير الأصلى..

نـــــــــــــــوح : من فضلك أقعد.. بلاش تغرقنا فى شكليات..

السكرتير : مش شكليات يا فندم.. المسألة أخطر من كده.. أنا طول
عمري باشتغل فى الإدارة الفنية فى المحافظة.. يعنى فتان..

وأنت عارف الفنانين.. أنا عارف نفسى كويس.. أنا عمري ما
احتفظت بسر.. ده أنا باتكلم وأنا نايم يافندم.. فيه ناس
كده.. لا يصلحون لأى سرية.. وأنا واحد منهم.. أنا راجل
ماشى جنب الحيط وكافى خيرى شرى طول عمري..
مفيش داعى أنضرب بالنار فى الآخر.. لمجرد أن واحد خد
أجازة وأنا اشتغلت مطرحة.. أرجوك يا فندم.. قبل ما ندخل
فى الجدد.. إسمح لى أنا أستأذن.. وأنا أجيب لك حد من
اللى بيشتغلوا فى الحاجات المهمة دى..

نـــــــــــــــــوح : من فضلك أقعد.. أنت دلوقت عرفت جزء من سر الاجتماع..
خليك راجل وتحمل مسئوليتك..
السكرتير : يا فندم أنا لسه ماعرفتش حاجة خالص.. هو حضرتك لسه
قلت حاجة..؟

نـــــــــــــــــوح : على الأقل عرفت أن فيه اجتماع خطير تم الساعة اتناشر
على مستوى الجمهورية.. من فضلك أقعد.. وتأكد.. لو
تسريت كلمة واحدة عن طريقك انت.. أنا حاخليك تندم على
اليوم اللى اتولدت فيه.. اتفضل..

السكرتير : (يتفعل بشدة).. يافندم كل اللى قاعدين هنا ناس كبار جدا..
وكلهم لهم ضهر.. أنا الوحيد هنا.. اللى غلبان قوى.. لو حد
فيهم اتكلم.. أنا اللى حاروح فى داهية..
نـــــــــــــــــوح : اتفضل أقعد.. ما تعطلنيش..

(سكرتير الجلسة يأتى بحركة تنم على اليأس.. ينظر حوله كأنما
يستجد بأحد ما.. يجلس)

(نوح يفرد شاشة السينما الصغيرة على الحامل ويخرج من الحقيقة
بروجكتر.. يضع فيه الإضاءة على المسرح، تظهر على الشاشة خريطة
ملونة للوجه البحرى.. نوح يشرح على الخريطة)

نـــــــــــــــــوح : زى ما حضراتكم شايفين.. دى خريطة الوجه البحرى.. دلنا
النيل.. الشاطئ الشمالى لمصر.. فى السنوات الأخيرة،

لاحظنا أن الشواطئ هنا.. (يشير تشاطئ البحر شمال الدلتا)..
ببتآكل بمعدل أكثر من المعدل الطبيعي وأن مياه البحر
أصبحت بتآكل أجزاء كثير من الشاطئ..

... : لأن مفيش طمي.. لأن السد العالي..

روح : من فضلك ما تقاطعنيش.. فعلا.. كنا متصورين أن هذا

التآكل كان يحدث بسبب إعدام الطمي عند مصبات النيل
 في فرعى دمياط ورشيد.. ولكن بمزيد من الدراسة اتضح..
 إن في المنطقة دي.. وعلى بعد مائة كيلو على وجه التحديد
 حدثت هزات أرضية تحت الماية.. نتج عنها تشقق في قاع
 البحر.. تحولت بعد كده إلى ما يشبه الأخدود.. الأخدود ده
 بيتوسع.. وبيتمدد في اتجاه الوادي.. وادي النيل.. الأخدود
 في اتجاهه لأرض الوادي فعلا.. سرعته مش منتظمة.. لذلك
 ما نعرفش حايوصل لنا امتى على وجه التحديد.. ولكن في
 تقدير الخبراء.. المنطقة اللي حايصلها الأخدود وتعرض
 للتدمير.. هي دي..

(يغير الشريحة الملونة، فنظهر صورة وادى النيل كله وقد ظللت
باللون الأسود.. يطفئ البروجكتر.. إضاءة المسرح تعود لطبيعتها)

سكرتير الجلسة : (هامسا في رعب) .. يعنى إيه .. يعنى مصر كلها .. حا ..

نـــــــــــــــوح : آیوہ .. کمل .. قولها ..

السكرتير : أقولها؟ أنا ما قدرش حتى اتصورها.. وما اعتقدش فيه
مصرى يقدر يتصورها..

نوع : للأسف الى باقوله صحيح..ومبنى على تقديرات علمية سليمة.. ما لم يحدث معجزة، في عصر لا يعرف المعجزات.. هي دى المشكلة اللي أنا جاى أعرضها على حضراتكم النهاردة..

(سكوت وصمت يشملان كل الموجودين لعدة ثوان)

س : وإيه موقف الاتحاد السوفيتى؟

نـــــــــــــــوح : موقفه من إيه..؟

س : موقفه من المصيبة دى..

نـــــــــــــــوح : الظاهر حضرتك مافهمتش كلامى.. إحنا اللي حانغرق..

مش الاتحاد السوفيتى..

س : (يفقد اعصابه).. ما قلنالكم من الأول أن الاتحاد السوفيتى ده

منيل..

توحيد : عزيز، المسألة أكبر من الاتحاد السوفيتى والاتحاد

الأمريكى..

س : اسكت أنت ماتتكلمش.. إخرس خالص.. ما أنت زيه.. أنت

منهم.. أنا عارفك كويس.. عارفكم.. اسكتوا يا أولاد الكلب..

ضيعتونا..

(توحيد يحاول الرد.. ولكنه يسكر)

نـــــــــــــــوح : أستاذ فلان الفلانى.. حضرتك ممكن تهدا وتقعده..

حاسمك لما أخلص كلامى..

(يجلس وهو يضع الكلمات غير المفهومة)

مدير الأوقاف : (يهب صارخا).. من الكفر.. من الافتراء.. العالم كفرت..

الناس افتتحت.. شوف الستات ماشيين إزاي فى الشوارع...

نص جسمهم عريان.. شوفوا الأفلام كلها بوس.. ومش

عاوزين ربنا يفرقنا..؟.. ده ربنا يحرقنا كمان.. والتمثيلات

كمان فيها بوس.. وأنا اللي اتجوزت أربع مرات عمرى ما

بست حد.. (يلتفت تزملائه) وأنا إيه اللي يقعدنى وسط الكفر

والضلال..؟ أنا راجل مش حاعيش قد اللي عشته.. أنا أروح

أموت جانب قبر حبيبى.. (يخرج من مكانه متجها للخارج وقد

انتباهته نوبة هنيان).. أنا جاي لك يا حبيبى.. جاي لك يا

حبيبى.. جاي لك يا حبيبى..

... : كلنا نروح معاه..

نـــــــوح : اهـدوا.. اهـدوا.. كل واحد فى مكانه.. هو أغمى عليه من التوتور.. من فظاعة المشكلة اللى سمعها.. سيـبوه.. هو حايفوق لوحده..

مدير الصحة : (يتنبه منفعلا).. يعنى إيه يسيـبونى؟.. أنت حاتشخص كمان؟.. أنا عندى ذبحة يا أستاذ..

نـــــــوح : حظك سيء.. لأنى حاسيك تموت هنا..

مدير الصحة : دى مش دكتاتورية ويس.. دى وحشية كمان..

نـــــــوح : زى ما تقول كده..

(مدير الصحة يخرج زجاجة ويشمها ويجلس فى حالة طبيعية)

توحيـد : أستاذ نوح أنا آسف للمظهر اللى بيبدا فيه الحاضرين.. لكن أرجوك كمل.. اللى فات من كلامك هو الجزء المؤلم.. ولكن الجزء الخطير والمهم.. هو حانعمل إيه؟.. حانعمل إيه لانقاذ الوادى؟.. حانعمل إيه لإنقاذ مصر؟..

(لحظة صمت ثم يبدأ نوح الكلام)

نـــــــوح : بحثت المسألة على كافة المستويات.. فى سرية كاملة.. وأخيرا تم وضع خطة شاملة لإنقاذ كل محافظة على حدة.. وأنا المسئول عن تنفيذها.. وقبل ما ندخل فى تفاصيل الخطة.. عاوز أشرح لحضراتكم.. الأساس النظرى اللى إتبتت عليه الخطة.. بما أنه لا يمكن عمليا إنقاذ كل الناس.. لذلك فقد أتفق على إنقاذ روح مصر نفسها.. ولكن ما هى روح مصر؟.. بعد دراسة طويلة.. استقر الرأى على أن روح مصر مركزة فى أحسن عناصرها.. أحسن العقول فيها.. هى دى عملية نوح.. نيجى للمطلوب.. المطلوب عمل كشوف بأسماء أحسن العناصر فى البلد.. من كل زوجين اثنين.. أحسن مهندس.. أحسن مهندسة.. أحسن طبيب.. أحسن

طبيعية.. أحسن مدرس.. أحسن مدرسة.. وهكذا فى كل
المهن.. فى كل المجالات.. مطلوب عمل كشوف بأسماء عشرة
آلاف شخص، نقدر نقول عليهم هم دول روح مصر..

.... : حانعرف إزاي أن الطوفان جاى فعلا..؟..

نـــــــوح : فيه دلوقت مركب أبحاث واقفة فى عرض البحر فوق
منطقة الهزات الأرضية. المسئول عن المركب دى واحد من
أهم علمائنا فى الجيولوجى.. قبل حدوث الطوفان بوقت
كاف المركب دى بتدينا انذار..

.... : وقت كافى يعنى قد إيه؟..

نـــــــوح : أربعة وعشرين ساعة.. الإنذار حايجلى على تليفون لاسلكى
محطوط جوه الشنطة دى.. الشنطة دى مابتفارقنيش ليل
نهار.. فيه كمان جوه الشنطة.. مطروف أصفر كبير.. مكتوب
عليه عملية نوح.. فيه تفاصيل الخطة كاملة.. وفيه أوامر
التشغيل لكل الجهات اللى حاتشترك فى العملية.. لما يحصل
الإنذار.. عشرات الأجهزة حاتنطلق وتجبب العشرة آلاف
شخص اللى تم اختيارهم.. حايتم نقلهم بالطائرات
والقطارات والسيارات.. إلى الإسكندرية.. وفى الإسكندرية
حايجدوا فى انتظارهم ثلاثة مراكب كبيرة.. حمولة المراكب
دى.. عشرة آلاف شخص بالإضافة إلى عشرة آلاف كيلو
جرام من الوثائق المهمة..

.... : المراكب دى حاتطلع بالناس على فين؟

نـــــــوح : حاتطلع بيهم عرض البحر.. بعيد عن الطوفان.. وبعد كده
إنشاء الله.. حاترسى فى مكان معين غرب وادى النيل... أو
غرب ما كان يسمى وادى النيل.. وفى الصحراء سوف نبدأ
مرة أخرى فى بناء بلدنا.. المطلوب من حضراتكم الآتى:
أولا : .. السرية المطلقة.

ثانيا : الموضوعية التامة والحياد الشديد .. والنزاهة فى اختيار هذه العناصر .

ثالثا : كل شئ فى حياتنا يمشى فى مجراه الطبيعى .. كل مشاريعنا هى .. كل شئ فى حياة الناس يجب أن يمشى كما هو .. 'ما تتصرفوش على أنكم بتستنوا النهاية .. لأن ده معناه إن الإهمال والفساد، حايسود كل حياتنا .. فإذا شعرت الناس بكده .. يبقى حانفرق من غير مايه ومن غير طوفان .. من فضلكم عاوزين نشغل فى كل المجالات بجد .. بل ويجد أكثر من الأول .. ودلوقت يا حضرات .. أى أسئلة ؟ ..

م . الاحتفالات : بصفتى مدير الاحتفالات يا فندم، عندى سؤال مكون من شقين .. الشق الأول هل ممكن مع الحفاظ على السرية طبعا تكليف السيد اللواء الدكتور محمد عبدالوهاب بتلحين نشيد إعادة البناء .. ؟

نـــــــــــــــوح : الإجابة .. لأ ..

م . الاحتفالات : الشق الثانى من سؤالى .. مرتبط ارتباط وثيق بعملية نوح العظيمة .. بعدما تبنى البلد دى .. حانسميها إيه .. ؟

نـــــــــــــــوح : زى ما هو .. وزى ما كان .. وزى ما حا يكون للأبد ..

م . الاحتفالات : أنا مش قصدى المحافظة .. ما هى طبيعى يكون اسمها القاهرة .. ولو أنى باقترح تعديل بسيط .. إنها تبقى القاهرة نوح العظيمة .. عموما هذا الموضوع سابق لأوانه .. ولكن سؤالى ينصب أساسا على بلادنا ككل .. بعد ما ننقذها ونبنينا .. حانسميها إيه .. عشان بس ألحق أجهز المطبوعات والأفشيات ..

نـــــــــــــــوح : والله يا أخى أنا مش عارف اسمها تاعبكم فى إيه .. ؟ .. دى حتى الأشياء الجميلة البسيطة اللى فى حياتنا، ماحدش بيجرؤ يغير أسمائها .. لا أحد يجرؤ على تغيير اسم الهرم

وأبو الهول.. لا أحد يجرؤ على تغيير اسم لحن شهير.. ومع ذلك انتم احرار سموها زي ما تسموها.. بس نعملها في الأول..

(مدير الخزنة العمومية)

مدير الخزنة : .. فيه ناس موظفين فى المحافظة .. وفيه متعنيين على مكافآت .. وفيه ناس على درجات .. بس لم يشملهم التقييم الجديد .. وفيه ناس معارين لمخاضات أخرى .. وفيه ناس تبع المحافظة .. بس سا كتين فى الدقى والعجوزة .. يعنى فى زمام محافظة الجيزة .. نسيبهم يفرقوا .. ولا حانتصرف معاهم
إزاى ..؟

مدير الإعلام : وفيه ناس مفصولين من الاتحاد الاشتراكي.. وناس معزولين.. وناس مستبعدين.. حايكون موقفنا منهم إيه؟

نوح : أنا كلامي واضح جدا.. المطلوب هو أحسن العناصر في البلد..

نوح : اتفضل..

توحيد : إذا سمحت لي.. أنا شايف أن الأساس النظري لعملية نوح..
أساس خاطئ..

... : حایفلسف بقى..

... : دذل.. مش قلت لك..

... : يموتوا في الكلام..

نـــــــــــــوح : من فضلكم .. سيبوه يتكلم..

توحيد : الأساس خاطئ.. وشرعية العملية كمان منعدمة.. خطة براءة ورومانسية.. لكن فيها من حسن النية.. أكثر ما فيها من العلم..

نـــــــوح : يا باشمهندس من غير خطابة.. العملية غلط ليه ؟
توحيد : روح مصر لا تعنى أحسن عناصرها.. روح مصر تعنى المصريين.. المصريين كلهم.. أما من ناحية الشرعية، ما حدش له الحق يقول ده يغرق وده يعم.. ده ينجو وده يروح فى داهية.. كل واحد من أهل البلد دى يمتلك قدر من الأرض مساوى لزميله.. يمتلك قدر من الماضى والحاضر مساوى لزميله وبالتالي يمتلك قدر من المستقبل مساوى لزميله..

... : حايقول شعر بقى..

... : ده عاوز ينقذ الناس كلها..

... : عشان تبقى فوضى..

... : ما قلت من الأول أنه فوضى..

نـــــــوح : من فضلكم.. وضع يا باشمهندس.. يعنى إيه ؟
توحيد : يعنى مفيش حد.. أى حد.. من حقه إنه يخفى أى حقيقة عن الناس.. خصوصاً حقيقة كارثة زى دى.. وإذا كان كل مواطن معرض لقدر من احتمالات الغرق.. يبقى من حقه كمان أن يتمتع بقدر من احتمالات الإنقاذ.. لذلك أنا أطالب بعرض هذه الحقيقة فوراً على مجلس الشعب.. وعلى الناس بكل وسائل الإعلام..

... : إيه قلة الذوق دى.. فيه حد يقول للناس انهم حايفرقوا... ؟

... : ده شخص ما يصلحش للعمل السياسى..

... : لازم ندى للجماهير الأمل..

... : لازم نقول الحياة حلوة..

... : مش نعتن عليهم...

... : ويعدين هو زعلان على الناس ليه .. ٩.. هو فيه حد حا يخلد..

ما كله حا يتكل على الله فى الآخر..

نـــــــوح : برضه فكرنا فى الحل ده يا باشمهندس.. عندنا برضه ناس خياليين زيك.. كانوا بيطالبوا بكده.. لو إحنا خدنا برأيك حاتكون النتيجة إيه.. أقصى درجات الفزع والذعر.. انهيار فى المعاملات المالية.. انهيار فى كل شىء..

تـــــــوحيد : هو ده الخطأ.. إننا نتصور دايما إن الناس لسه مابلفتش سن الرشد.. وإننا أوصيا عليهم..

نـــــــوح : من فضلك.. دى خطتى إذا كان عندك جديد قوله.. دى خطتى.. عندك خطة تانية..

تـــــــوحيد : هو حضرتك بتطلب منى خطة إنتقاذ شعب.. الشعب هو اللى يعملها..

... : آه.. ده عاوز يقلبها ديموقراطية ووجع دماغ..

... : عاوز كل من هب ودب يقول رأييه..

نـــــــوح : يا باشمهندس أنا باحترم كلامك.. بس أحب ألفت نظرك إني جاي النهارده مش عشان أناقش خطط جديدة.. أنا جاي أنفذ عملية نوح..

تـــــــوحيد : (بعضبية).. أنت متصور انك بالناس دول تعرف توصل لأحسن العناصر فى البلد.. ولو وصلت لهم.. حا تعرف توديعهم إسكندرية.. ٩.. والله ما حا يوصلوا بنها..

... : عيب.. عيب.. عيب..

... : قلة حيا..

... : ارفدوه الأفتدى ده..

... : غرقوه دلوقت..

نـــــــوح : سكوت من فضلكم.. خلاص.. انتهينا.. ودلوقت يا حضرات.. سوف نقسم جميعا..

توحيد : (منفعلا).. أنا حاحلف معاكم.. وحابذل كل جهدى من أجل
إنجاح عملية نوح.. ولكن.. وأرجو من الأخ سكرتير الجلسة
إنه يثبت تحفظاتى.. لست مؤمنا بشرعية هذه العملية.. كما
أننى أيضا.. لا أثق فى نجاحها..
(توحيد يتجه للمنصة، يضع يده فوق يد نوح.. الموجودون يتبعونه..
تختفى إضاءة المسرح بالتدريج)..

المشهد الثانى

(على سطح مركب الأبحاث.. نوح مستندا إلى السياح..
يحدق فى البحر.. بجواره مائدة صغيرة وثلاثة مقاعد.. المكان
غارق فى أشعة الشمس.. تدخل فاطمة تحمل بين يديها
صينية أدوات الشاى..)

نـــــــوح : متشكر يا دكتورة فاطمة.. واضح أنى باتعكبن لما باجى..
فاطمة : أنت بتتعبنى فعلا لما بتقول لى يا دكتورة.. أما حكاية الشاى
دى فمش متعبة بالنسبة لى.. لأنى دايما باعمل الشاى
للأستاذ فى الميعاد ده..

نـــــــوح : هو فىن دلوقت..؟..
فاطمة : أنا وديت له الشاى فى المعمل تحت.. حايجى بعد شوية..
نـــــــوح : فيه حاجة مهمة..؟..
فاطمة : أبدا.. مرور عادى..
(تصب له الشاى)

نـــــــوح : بتشتغلى معاه بقالك كثير يا فاطمة..؟..
فاطمة : أنا كنت تلميذته.. ولما تخرجت اشتغلت معاه.. وكان هو
المشرف على الرسالة بتاعتى.. أنا باشتغل معاه من عشر
سنين..

نـــــــــــــــوح : مبسوطه من الحياة هنا؟

فاطمة : جدا.. أنا ماليش حد.. أخواتى كلهم اتجوزوا.. والدى ووالدتى توفوا من زمان.. أنا ماليش حاجة فى الدنيا غير شغلى.. ومن حسن حظى إنى بأحب البحر.. البحر بيشعر الإنسان بالسلام الحقيقى.. نوع من الهدوء الرقيق يخليك تشعر بجمال كل شىء.. وده شىء مهم جدا.. خاصة فى انتظار.. (تتردد).. فى انتظار.. على العموم.. ما بنحسش هنا بالملل.. المركب نصها معمل ونصها مكتبة.. الأستاذ كمان جايب كل مكتبته الموسيقية..

نـــــــــــــــوح : فاطمة.. انت قلت فى انتظار.. وماكملتش الجملة.. فى انتظار إيه؟

فاطمة : فى انتظار النهاية.. أنا مشتركة مع الأستاذ فى رصد الظاهرة دى من سنين..

نـــــــــــــــوح : يعنى عارفة كل حاجة؟

فاطمة : قبل ما حضرتك تعرف..

نـــــــــــــــوح : ومع ذلك.. مش باين عليكى أى إحساس بالفزع..

فاطمة : فى الأول حسيت بالرعب.. لكن بعد كده بدأت أحس بالهدوء.. بل وبدأت أتمتع بحياتى أكثر من الأول.. مزيجة ماكنتش سمعتها.. باسمعها.. كتب ماكنتش قريتها.. باقراها.. أكتشفت أن أهم شىء فى حياة الإنسان.. إنه يبقى له دور.. ودور مهم للأخرين.. أخيرا أكتشفت أنا عايشة ليه..؟

نـــــــــــــــوح : غريبة.. أول إنسان أقابله فى حياتى أكتشف هو عايش ليه.. ليه بقى يا ستى..؟

فاطمة : الإنذار اللى حايوصل لك على التليفون ده.. (تشير للحقيبة).. أنا مسئولة عنه.. الأستاذ وأنا مسئولين.. يعنى أنا باتحمل

مسئولية التنبيه لتنفيذ عملية نوح.. باشارك فى مسئولية
التنبيه لإنقاذ مصر.. هى دى الحاجات اللى أنا عايشة
علشانها.. وعشان كده.. أنا هادية جدا.. مش شاعره بأى
خوف..

نـــــــوح : والبحارة اللى هنا ؟..

فاطمة : مش عارفين حاجة على وجه التجديد.. بس من الواضح أنهم
حاسين إن فيه حاجة خطيرة حاتحصل.. وأنهم مسئولين عن
عملية كبيرة..

نـــــــوح : وعرفتى إزاي ؟..

فاطمة : من سلوكهم.. هادين جدا.. ماحدش منهم بيفكر ياخذ
اجازة ويسيب المركب.. هم بيثقوا جدا فى الأستاذ..
وبيشغلوا معاه من سنوات طويلة..

نـــــــوح : تفتكرى يا فاطمة.. لو الناس كلها عرفت.. لو قلنا لهم
الحقيقية.. حايبقى سلوكهم هو نفس سلوك البحارة اللى
هنا.. ؟

فاطمة : مش أنا اللى أجابو على السؤال ده.. لأنى ما اشتغلتش فى
السياسة قبل كده.. انت اللى تجاوب..

نـــــــوح : ما انت عارفة يا فاطمة.. سنوات طويلة والقيادة بتفكر
بالنيابة عن الناس كل القرارات بتنزل من فوق..
فلما نيجى فى الآخر ونقول لهم الحكاية دى.. يبقى
جنون..

فاطمة : فعلا.. يبقى جنون.. لازم يعرفوا بشكل واضح دورهم
حايبقى إيه.. لو عرفوا المطلوب منهم، حاتختلف النتيجة..
(تغير الحديث).. أنت كل ما تيجى تتكلم فى الناس
والسياسة ما تكلمنى عن نفسك شوية.. نوح أنت
مين؟

نـــــــوح : ما عرفش.. مفيش حاجة مؤكدة بأعرفها عن نفسى.. الشئ

المؤكد إنى بأحب أشوفك.. بأحب أقعد معاكى..

فاطمة : ده غزل؟

نـــــــوح : صدقينى.. مرة فكرت إن حد غيرى يتحمل مسئولية

العملية..

فاطمة : وأنت؟

نـــــــوح : آجى هنا.. أعيش معاكى للأبد..

فاطمة : (تضحك بصفاء).. عموما الأبد ده مش بعيد قوى.. جايز يكون

بكره.. جايز يكون بعده.. جايز يكون بعد ثوانى..

(يقترب الأستاذ.. فى حوالى السبعين.. أشيب الشعر.. هادئ)

الأستاذ : أقول إيه..؟.. آسف عشان أتأخرت عليكم.. ولا آسف عشان

ازعجتكم..؟

نـــــــوح : أهلا يا دكتور..

الأستاذ : من فضلك يا فاطمة.. هاتى آخر قراءات من تحت..

(فاطمة تخرج.. الأستاذ يدخن الباب وهو يحق فى البحر)

الأستاذ : البحر جميل النهارده..

نـــــــوح : دكتور إحنا عملنا كل الترتيبات اللازمة من أجل عملية

الإنقاذ.. لكن لى سؤال أخير.. هل فيه احتمال.. ولو واحد

فى المليون.. أن كل اللى بنفكر فيه.. ما يحصل..

الأستاذ : (يفكر للحظات).. لا.. حا يحصل.. إسمع يا نوح.. أنا كعالم..

ما قدرش أسمع لنفسى أنى أخد عكم.. دايمًا فيه احتمال

وجود خطأ فى أبحاثنا.. فى الحالة دى ممكن تحصل

المعجزة.. لكن تبقى خيانة لو سبتكم تخططوا فى انتظار

معجزة.. (نوح يصمت الأستاذ يحق فى البحر) لسه ما أدركتش

الجانب المشرق فى الحكاية دى..؟

نـــــــوح : مشرق؟.. حضرتك بتقول مشرق؟..؟

الأستاذ : مش مشرق ويس.. ده عظيم كمان.. التاريخ طول عمره
بيقول إن مصر هبة النيل.. لأول مرة فى التاريخ حاتبقى
بلدنا من صنعنا إحنا.. شىء عظيم لما تبقى مصر، هبة
نـــــــــــــــوح : المصريين.

الأستاذ : التمن حايبقى غالى قوى..
كل الحاجات الغالية ثمنها غالى.. (لحظات).. اللنش حاوصل
نـــــــــــــــوح : امتى؟

الأستاذ : بعد دقائق..
نـــــــــــــــوح : فاطمة حاتنزل معاك مصر..
الأستاذ : عندها اجازة..؟

دورها معايا انتهى.. كفاية عليها كده.. البنت دى عمرها ما
نـــــــــــــــوح : تمتعت بحياتها..
متأخر قوى يا دكتور. متأخر قوى.. ياريت كنا اتقابلنا فى
الأستاذ : ظروف تانية..

نـــــــــــــــوح : دايمًا فيه وقت للحب.. خصوصًا فى ظل الخطر..
الأستاذ : ما أعتقدش انى حاقدر أسعدها..

السعادة وهم مستحيل.. شىء مش فى برنامج الدنيا وأسوأ
حاجة أن الواحد يحاول يسعد التانى.. النتيجة فى النهاية
أنه حايعذبه.. مايجبش ندور على حد نسعده أو يسعدنا.. كل
المطلوب.. حد نشعر معاه بأقل قدر من الألم..
(تظهر فاطمة.. تحمل ورقة صغيرة.. تعطيها للأستاذ الذى يلقي

الأستاذ : عليها نظرة سريعة)
فاطمة : فاطمة.. حاتنزل مصر دلوقتى.. حضرى شنتك..
الأستاذ : مأمورية؟
فاطمة : أيوه..
الأستاذ : كام يوم..؟

فأطمة : ما عرفش.. دورك هنا خلص.. الباقي على أنا..
الأسـتاذ : (تدرك هدفه) .. أنا مش حاسيب المركب يا دكتور..
من فضلك إنزلى حضري شنطتك.. (صوت اقتراب اللنش)..
فأطمة : اللنش وصل..
الأسـتاذ : باقول لحضرتك.. أنا مش حاسيب المركب..
دكتورة.. ماتخلنيش أعاملك بشكل رسمي.. (يخرج من جيبه
ورقتين).. ده جواب بانتدابك لجامعة القاهرة.. وإذا رفضتي..
يبقى ده جواب بفصلك..
(لحظات صمت.. تقبله في جيبه.. يعلو صوت اقتراب اللنش.. إظلام)

المشهد الثالث

(قاعة المجلس الشعبي.. توحيد يراجع بعض اللوحات
الورقية الكبيرة)

نـــــــــــــــوح : (داخلا.. يحمل ملفا كبيرا.. أو عدة ملفات).. أهلا يا توحيد
أخبارك إيه؟..

تــــــــــــوحيد : كل خير.. (يفرد بعض الأوراق).. ده تصميم ميدنى للبلد.. أرجو
تستعينوا بيه وأنتم بتشتغلوا.. زى مانت شايف.. أهم شىء
فيها، المصانع والطرق.. دى طرق تربطنا بأفريقيا.. كل
أفريقيا.. ودى طرق تربطنا بآسيا.. وكل المنطقة العربية..
ودى ممتدة لأوروبا.. ودول عدة ضواحي صغيرة.. للمفكرين
والعلماء والفنانين..

نــــــــــــوح : عملت حساب كام سنة؟..

تــــــــــــوحيد : مليون سنة.. قابلين للزيادة..

نــــــــــــوح : عارف إن الجماعة اشتغلوا بسرعة البرق..

تــــــــــــوحيد : عارف..

نــــــــــــوح : اختاروا العشرة آلاف اسم.. أحسن عشرة آلاف عنصر فى
كل المجالات، اختاروا فى أسبوع..

توحيد : معلوماتى إنهم اختاروهم فى يوم.. والستة أيام ضاعوا فى كتابتهم على الآلة الكاتبة..

نـــــــوح : زى ما يكونوا محضرين الكشوف من قبل كده.. عارف انك مش فيهم؟

توحيد : ده أمر طبيعى.. أنا مش أحسن مهندس معمارى فى البلد..

نـــــــوح : جايز.. بس من المؤكد أنك أكثرهم إخلاصا..

توحيد : متشكر جدا.. أنا كل اللى باطلبه.. تعملوا حساب صندوق وزنه عشرة كيلو جرام.. حاحط فيه الرسومات والتصميمات.. يمكن تنفعكم.. ويرضه لو سمحت لى يافندم.. أنا لازلت باطلب من حضرتك إعادة النظر فى «عملية نوح».. الناس دول حضرتك ماتقدرش تتصور ممكن يعملوا فيك ليه لو جد الجد..

نـــــــوح : (بغضب).. أنا مش حاتكلم فى الموضوع ده تانى يا توحيد..

(تبدا المجموعة فى الدخول..)

نـــــــوح : أيها السادة.. أنا باشكر لكم جهدكم فى إعداد الكشوف.. فى هذا الوقت القصير (يتصفح احد الملفات بسرعة).. لكن بعد نظرة سريعة للأسماء.. بنكتشف أن أحسن مهندس معمارى فى البلد هو الدكتور فلان الفلانى مدير الإسكان.. وأحسن طبيب هو الدكتور فلان الفلانى مدير المنطقة الطبية.. وأحسن مدرس هو الأستاذ فلان الفلانى مدير التربية والتعليم.. وأحسن ضابط شرطة هو اللواء فلان الفلانى مدير الأمن.. وأحسن عالم دين هو السيد فلان الفلانى مدير الأوقاف.. وأكبر اقتصادى هو السيد مدير الخزانة.. إلى آخره.. يعنى حضراتكم أحسن ناس فى البلد..

... : حضرتك بتسأل ولا بتشتم؟..

نـــــــــــــــــوح : صدقتى أنا بأسأل..

... : والله ما تسألناش إحنا.. اسأل الله عينونا..

... : لو ماكانش أحسن العناصر فى البلد.. تفكر كنا حانوصل

لنناصبنا دى ازاي؟..

نـــــــــــــــــوح : أنا مش مسئول عن الله بيعمله غيرى.. إمبارح مش

مسئوليتى.. أنا مسئول عن بكره..

... : نفهم من كده.. إن حضرتك بتطعن فى كفاءتنا؟..

... : ده بيطعن فى نزاهتنا كمان..

... : ياريت كان على كده وبس.. ده كمان بيطعن فى نزاهة الله

حطونا هنا..

نـــــــــــــــــوح : كل ده مش قصدى.. كل الله اقصد ان حضراتكم لما

حاتيجوا تعملوا البلد تانى من جديد.. حاتعملوها زى ما

عملتوها.. وزى ما انتم عاملينها دلوقت..

... : الله.. ده حايببتدى يهاجم.. اذا كان فيه قصور فى بعض

النواحى.. فده راجع لقلة الامكانيات..

... : والانفجار السكانى.. لكن إنشاء الله.. لما نيجى نعملها تانى..

حانشتغل على رواقه..

... : يا جماعة، السيد نوح بيلف ويدور عشان يتهمنا بعدم

النزاهة..

نـــــــــــــــــوح : أنا ماجبتش سيرة النزاهة.. لكن ما دمت مصرين تتكلموا

فيها.. أنا لى سؤال.. أنا عاوز أعرف.. الأستاذ مدير

الاحتقالات.. اسمه محطوط فى الكشوف ليه؟..

م. الاحتقالات : .. ده اعتراض على شخصى.. ولا على وظيفتى..؟

نـــــــــــــــــوح : هو أنا بينى وبينك حاجة؟.. أنا باعترض على الوظيفة..

مفيش مهنة اسمها كده.. دورك حايبكون إيه إنشاء

الله؟..

م. الاحتفالات : (يقف).. إنشاء الله يا فندم.. بعد ما تنزلوا من المراكب..
وتيجوا تبناو البلد... مش محتاجين حد يحتفل بيكم..؟..
نـــــــــــــــوح : قصدك يطبل ويزمر.. لأ.. المرة دى حانشتغل من غير طبل..
ومن غير زمر..

م. الاحتفالات : وهو أنا أكره.. هو أنا أكره اننا نشتغل من غير طبل ومن غير
زمر.. والله العظيم هو ده كان رأيى طول عمرى.. وأعلنته فى
أشد العهود ظلمة.. وتفتكر حضرتك أنا سعيد بوظيفة مدير
الاحتفالات دى.. أنا أتخلقت عشان اقف قدام الفرن فى
مصنع الحديد والصلب.. اتخلقت عشان ابنى السدود وأشق
الأنهار.. وأهد الجبال..

نـــــــــــــــوح : طيب.. طيب.. اتفضل..

م. الاحتفالات : (يلتفت لزملائه يؤنبهم فى صوت مسموع).. قلت لكم من الأول
ماتحطونيش وأنا حاجيلكم بطريقتى.. لازم يعنى أقول لكم أن
الحاج فؤاد واخد باله من اسكندرية ومجهز المركب دلوقت..
الراجل مجهز المركب ومجهز الثلج.. ومجهز الأكل والمالية.. وكافة
شئ.. مالكوش دعوه.. أنا حاتصرف إنشاء الله أجيلكم عايم..
نـــــــــــــــوح : ..ومادام حضراتكم أحسن ناس فى البلد.. المهندس توحيد
اسمه مش موجود فى الكشفو ليه؟..

... : القاعدة اللى حطيناها.. اننا نأخذ درجات الادارة العليا.. مش
معقول يبقى عندنا مدير عام.. اللى هو السيد مدير
الإسكان.. ونسيبه.. وناخذ الأخ توحيد اللى لسه فئة خامسة..

نـــــــــــــــوح : معقول.. (يتصفح الملف).. كلامك معقول.. منطقى.. عندك
حق.. فيه ملحوظة ثانية.. هى البلد اللى حاتتعمل دى.. مش
حايبقى لها عقل؟.. مش حايبقى لها قلب.. فىن عقلها..
وفىن قلبها.. فىن أحسن كاتب.. فىن أحسن شاعر.. مفيش
رسام..؟.. مفيش نحات..؟..

... : مدير الإسكان بيكتب شعر.. ومدير التموين بيكتب مسرحيات.. ومدير الصحة يعرف يكتب لك عشر قصص فى ليلة.. هى شغلانة يعنى؟

... : وأنا أعرف أرسم بالزيت.. والتمائيل الللى فى الحوش دى أنا الللى عاملها..

... : حانجيب ناس من الخارج ليه..؟

... : يا جماعة واضح إن الأستاذ نوح بيشك فى ذمتنا.. ولذلك إحنا نسحب الكشوف ونسيبه يتقى بنفسه..

نـــــــوح : عاوزين تحطوا ضهرى للحديقة.. عشان اختارهم لوحدى.. محتاج خمس سنين على الأقل.. اسمعوا يا جماعة.. مبدئيا أنا موافق على الكشوف دى..

تـــــــوحيد : خلاص.. مادام حضرتك موافق عليها.. يبقى أنا باطلب تسجيل حقيقة مهمة جدا.. «عملية نوح» الللى بدأت من أجل إنقاذ روح مصر.. تحولت الآن لتصبح عملية إنقاذ الموظفين.. نـــــــوح : سيبنى أخلص كلامى يا توحيد.. (بهدهو).. مبدئيا أنا موافق على الكشوف دى.. ويرضه حادور بنفسى.. كمان باعلن لحضراتكم.. حل المجلس..

الـــــــجميع : حل المجلس..؟

نـــــــوح : أيوه.. بعد ستين يوم حاتحصل انتخابات جديدة..

الـــــــجميع : انتخابات جديدة؟

نـــــــوح : أيوه..

الـــــــجميع : ييه... حايزلنا تانى نسلم على الجماهير فى الشوارع وعلى القهاوى..

(اختفاء تدريجى للإضاءة)

المشهد الرابع

(مكتب نوح.. فاطمة.. تراجع أوراق.. وتطلب أرقام
تليفونات.. يدخل نوح.. مظهره يدل على أنه يعمل منذ وقت
طويل.. يتناول وجبة خفيفة.. يفرغ شايا من ترمس صغير).

فاطمة : ألو.. هنا مكتب الأستاذ نوح فى محافظة مصر.. من فضلك
ممكن أكلم الدكتور حسن..

(نوح يرقب المكالمات باهتمام)

فاطمة : .. ممكن أكلم المدام؟..

نوح : مش موجود هو راخر؟..

فاطمة : ألو.. صباح الخير يا مدام.. يا ترى الدكتور حسن حايرجع
امتى...؟

(تستمع فى صمت)

.. متشكرا يا مدام، مع السلامة (تضع السماعة).. فى اليونان..

بيشرف على بناء قرى نموذجية..

نوح : (باستياء وتوتر).. أحسن مهندس معمارى فى مصر بيبنى

قرى فى اليونان.. أحسن عالم بترول بيشغل فى أمريكا..

أحسن قانونى مش عارف منتدب فىن.. أحسن عالم ذرة..

سافر هو راخر.. الظاهر فيه قوة طاردة مركزية.. والغريب
أن القوة دى ما بتطردش إلا الكويسين بس..
(تدير قرص التليفون)

نـــــــــــــــوح : بتطلبى مين؟

فاطمة : (تلقى نظرة على الكشف).. الدكتور عبدالرحمن.. ألو.. صباح
الخير.. ممكن أكلّم الدكتور والله؟.. (لحظة).. حضرتك
المدام؟.. (تستمع إليها طويلا.. يبدو على وجهها انفعال الدهشة
المصحوب بالانزعاج).. عمل حاجة معينة؟.. محاضرة؟.. على
كل حال ما تنزعجيش يا مدام.. قطعنا المسألة حا تنتهى على
خير.. وبسرعة إنشاء الله.. قلبى معاكى يا مدام.. مع ألف
سلامة..

(تضع السماعة ببطء وانكسار)

فاطمة : دى أخته.. هو فى بلد عرى..

نـــــــــــــــوح : فى الجامعة؟

فاطمة : فى السجن.. راح اشتغل أستاذ فلسفة.. الظاهر قال
محاضرة ماعجبتهمش..

نـــــــــــــــوح : هو ده يستحمل حاجة.. ده عنده سبعين سنة وسبعين
كتاب.. (يضحك فى مرارة).. فى السجن.. قطعنا فى أول
ربع ساعة حاينسوه كل الفلسفة اللى عرفها فى سبعين
سنة..

(يستمر فى الضحك.. زوجته تنتظر له فى هدوء)

فاطمة : نوح.. حاتروح دلوقت..

نـــــــــــــــوح : لسه قدامنا شغل.. إتصلى بالباقيين..

فاطمة : أنا أتصلت بخمستاشر.. وطلعوا مش موجودين.. لسه فى
الكشف بتاع النهارده خمس أسماء.. ماعندهمش تليفونات..

نـــــــــــــــوح : نروح لهم بيوتهم..

فاطمة : اشعنى يعنى الخمسة دول هم اللى حا يكونوا موجودين؟..

نوح أنت ما نمتش من إمبارح..

نــــوح : حاعمل إيه يا فاطمة.. الكشف دى أنا وافقت عليها.. (يشير

للملفات).. لكن مش مقتنع بالأسماء اللى فيها.. لازم أدور

بنفسى على الأسماء الكويسة..

فاطمة : شهر كامل لحد ما عرفت سبعمائة وخمسين اسم.. طلع

منهم سبعمائة خمسة وأربعين مسافرين.. ماتقدرش تشتغل

لوحذك.. لازم تعتمد على أعضاء المجلس..

نــــوح : (مشيرا للملفات).. ده اللى عمله أعضاء المجلس..

فاطمة : أنا بأنكلم على المجلس الجديد.. مش الانتخابات النهارده..؟

نــــوح : أيوة.. والنتيجة حاتطلع النهارده.. وفيه اجتماع الساعة

ثمانية بالليل..

فاطمة : بالتأكيد العناصر الجديدة فى المجلس حاتعمل كشف

تطمئن لها..

نــــوح : الوقت بيسرقنا.. لسه حاستنى لحد ما يعملوا كشف

جديدة..؟ أفرض الكارثة حصلت فى أى لحظة..

فاطمة : تشتغل على الكشف اللى معاك.. هو ده الممكن.. غير كده

مستحيل..

نــــوح : المطلوب عمل المستحيل يا فاطمة..

فاطمة : المطلوب دلوقت إن حضرتك تنام ساعتين.. عشان تبقى فايق

لجلسة بالليل..

نــــوح : حنام على الكنية دى..

فاطمة : إذا كنت تقدر تستحمل.. أنا ماقدرش.. الدكتور قال لى

امبارح.. إنى لازم استريح..

نــــوح : ماقتلش أنك رحتى للدكتور إمبارح..

فاطمة : (بعد تردد).. ماجاتش مناسبة..

نـــــــوح : مالك يا فاطمة.. فيه حاجة؟

فاطمة : مش عارفة إذا كان الخبر ده يضايقك وإلا يفرحك..

(لحظات).. حايبقى فيه طفل..

نـــــــوح : (مذهولاً.. رنة الغضب فى صوته).. مش ده اتفاقتا..

فاطمة : مش دى القضية.. القضية إن حايبقى فيه طفل..

نـــــــوح : خطأ..

فاطمة : ان يبقى لنا طفل..؟

نـــــــوح : انت عارفة ظروفنا يا فاطمة.. وعارفة إنه شىء مستحيل،
 إننا نعرف نعتنى بطفل.. أنا مش حاطلع المركب إلا آخر
 واحد.. لحد ما أطمئن أن عملية الإنقاذ تمت بنجاح.. ويمكن
 ما يتمش انقاذنا إحنا الاثنين.. حاهتم بالعملية.. ولا أهتم
 ببيكى وبالطفل.. ليه يا فاطمة؟ ليه نزود عدد المفقودين
 واحد..؟

فاطمة : أنا حاهتم بيه.. إبنى وأنا مسئولة عنه..

نـــــــوح : وأطفال الآخرين؟

فاطمة : ده قدرهم..

نـــــــوح : وهو قدره أنه يعيش لأن أبوه مسئول.. لأن أبوه وأمه يعرفوا
 ينقذوه.. لأنه هيتولد ممتاز.. مش كده؟ ممتاز عن أطفال
 الآخرين.. خطأ بشع..

فاطمة : خطأ بشع إنك تطلب منى أتخلص منه..

نـــــــوح : مش حايجصل.. (يعانى).. مش حاطلب أنك تتخلصى
 منه.. أنا كمان إنسان يا فاطمة.. انسان مليان ضعف..
 ويبدو أن مسئوليتى أكبر من قدرتى.. ليه يا فاطمة..
 ليه..؟

فاطمة : نوح يا حبيبى.. أنا من رأى تاخذ مهدى وتنام..

نـــــــوح : أنا..؟ هـ.. فعلاً.. ماليش حق ألومهم.. ماليش حق ألوم
 أعضاء المجلس لما حطوا أنفسهم فى الكشف..

(فاطمة تحرص على ان تظل هادئة بينما تزداد عصبية).

فاطمة : ممكن تحصل معجزة يا نوح.. تحصل معجزة والكارثة اللي بنستناها ماتحصلش..

نـــــــوح : انت اللي تقولى الكلام ده..؟.. الدكتور فى العلوم؟.. مين اللي بيتكلم دلوقت؟ فاطمة الدكتور فى العلوم ولا فاطمة الأم؟..

فاطمة : علوتم؟.. إيه اللي نعرفه يا نوح.. كل اللي نعرفه قشرة، قشرة رقيقة جدا فى جدار المعرفة، يتبقى ايماننا ان بكره حايبقى أجمل من النهارده..

نـــــــوح : وإذا حصلت المعجزة دى.. حانربيه ازاي..

فاطمة : حانربيه كويس..

نـــــــوح : مش احنا اللي حانر بيه.. حايتربى فى حجر التليفزيون والراديو والسينما والصحافة.. الحاجات دى كلها حانتعاون وتربيه.. يا اما حاتطلعه حمار.. ياتطلعه نمر.. يا اما يبقى تلعب..

فاطمة : البيت أهم من ده كله.. حانعمل منه انسان.. انسان كبير قوى..

نـــــــوح : آيوة.. انسان كبير قوى.. عظيم.. أحسن واحد فى مهنته.. وبعدين يهاجر.. مش كده؟..

فاطمة : أنت محتاج ترتاح.. أنت مصاب بحالة اكتئاب.. نظرتك بقت سوداوية جدا..

نـــــــوح : حالة اكتئاب...؟.. أرجو ما أطلعش مجنون فى الآخر..

فاطمة : انت مش فى حالة عادية.. مابتتامش...

نـــــــوح : أقرى الكشف دى وحاولى تنامى.. ورنى حاتعرفى تنامى إزاي.. ولما أدور بنفسى على الناس الكويسين أكتشف أنهم مشبوا.. ومش عاوزه يجلى اكتئاب..

فاطمة : مش مشكلة.. لو حسوا فى أى لحظة أن مصر عاوزاهم.. حايجوا فوراً..

(تخرج من مكان ما فى المكتب.. مخدة صغيرة.. ومفرش كبير تضعهما

على الكنبه)

فاطمة : أنا حاسيك تمام..

(صوت طرق خفيف على الباب)

نـــــــوح : أدخل..

(يدخل توحيد ومعه دوسيه ملئ بالأوراق)

نـــــــوح : أهلا يا توحيد.. تعالى لما أعرفك بالمدام.. الدكتورة فاطمة..

المهندس توحيد..

(بصافحها.. ينظر لنوح بتساؤل)

نـــــــوح : عارفة كل حاجة.. بحكم وظيفتها.. مش لأنها مراتى.. تقدر

تتكلم قدامها.. توحيد ده يا فاطمة معروف فى المجلس أنه

رزل جدا..

فاطمة : أهلا.. وسهلا..

نـــــــوح : ومع ذلك باحبه جدا.. ليه..؟... مش عارف؟

توحيد : حايكون ليه يعنى..؟.. لأنى رزل..

فاطمة : واضح..

توحيد : لو المجتمع كله تحول لناس ظرفاء.. يبقى مجتمع ميت.. لازم

يكون فيه مجموعة أفراد رزلين.. يقولوا لأ.. وليه..؟.. ومين..؟..

وكام..؟.. وإزاي..؟..

فاطمة : عندك حق...

نـــــــوح : أخبار الانتخابات إيه..؟..

توحيد : النتيجة حاطع الساعة ستة.. ماتخافيش على.. فيه ألفين

صوت فى جيبى.. الإدارة الهندسية كلها بتثق فى.. أنا جاى

لك فى موضوع تانى..

نـــــــوح : قطعاً حاجة رزلة..

توحيد : فعلاً.. (يخرج بعض قصاصات صحف).. مهما كانت الرقابة

حديدية إلا أن الإنسان يقدر يكشف أى مجتمع من صفحة
الأدب والفن.. ومن صفحة الحوادث..

فاطمة : فيه حاجة جديدة فى صفحة الأدب والفن..

توحيد : فيه إعلانات.. إعلانات عن مبيدات حشرية.. وإعلانات عن..

(يعد يده بالقصاصات)

نـــــــــــــــوح : (مقاطعا).. يارزل.. يا رزل..

توحيد : أنا باتكلم جد.. ومع ذلك ده مش موضوعى.. أنا جاى أتكلم

فى صفحة الحوادث.. (يعد يده بقصاصه اخرى).. ده موظف

فى بنك.. اختلس ٤٠٠ أربعمائة ألف جنيه..

فاطمة : ٤٠٠ ألف..

توحيد : أيوه.. أربعة وقدامها خمسة أصفار.. ولا حظى اننا لسه فى

سنة ٧٢ مانعرفش بعد عشر سنين الرقم حايبقى كام..

نـــــــــــــــوح : ده حرامى مفترى قوى..

فاطمة : أو مجنون..

توحيد : لا هو حرامى.. ولا هو مجنون.. ده واحد متأكد أن اللعبة

خلصت.. وإن كل واحد لازم يمد أيده ويأخذ نصيبه اللى هو

يحدده.. فيه مثل بيقول إن خرب بيت أبوك الحق خدلك منه

قالب.. فهو مد ايده.. وخذ قالب.. بس ماخدش قالب.. خد

جدار بحاله..

(يعد يده بقصاصه اخرى)

توحيد : دى حادثة تانية.. صاج.. صاج اتسرق من الترسانة البحرية

فى اسكندرية.. صاج يعمل سفينة.. باخره.. تقدر تتصور

حجمه، لو تصورت أن فيه حد سرق أبو الهول.. عارف

يعنى إيه ان مجموعة من الناس تسرق صاج يعمل

سفينة..

فاطمة : يعنى إيه..؟

توحيد : برافو يا مدام.. لو سألتى كمان ثلاث أسئلة.. حتأخدى اللقب بتاعى..

نـــــــوح : مزاجك عال قوى النهارده..

توحيد : جدا.. لما بتتزايد شحنة الألم جوايا بأحس أنى شخص مَرَح جدا.. (بيطء وحزن).. ده معناه ببساطة أن السر اتعرف. بص حواليك كويس.. السلوك العام ملئء باللامبالاة.. والإهمال.. والكذب.. وده معناه ان فيه إحساس عام بالنهاية.. بالطوفان..

فاطمة : لازم حد اتكلم..

توحيد : ما أعتقدش..

نـــــــوح : يبقى أعضاء المجلس أهملوا فى شغلهم فالناس اتصرفت زيهم..

توحيد : أعضاء المجلس ما أهملوش فى شغلهم.. هو شغلهم كده.. ما يعرفوش أكثر من اللى بيقدموه.. بتظلمهم لما بتطلب منهم يشتغلوا بجد أكثر.. أوعى تصدق ان اللى بيْفهم الصح يعرف يعمل الفلط..

فاطمة : والحل..؟

توحيد : حل واحد يا مدام... (يلتفت لنوح).. النى عملية نوح فوراً.. وفكر فى مشروعى..

نـــــــوح : أنا طلبت منك ما تتكلمش فى الحكاية دى تانى..

توحيد : حاولت.. ماقدرتش.. حتى لو قطعت لسانى.. حاكتب على ورق وأقدمهولك..

نـــــــوح : (محذراً).. يا توحيد ما ترغمنيش أغير طريقتى فى معاملتك..

فاطمة : (تهدى نوح).. ماتعقدش المسألة يا نوح.. (تتوحد).. أنت عندك مشروع تانى يا باشمهندس..؟

توحيد : أيوة.. الناس.. كل الناس مسئولة عن مصيرها.. عليها أنها تفكر لنفسها وب نفسها.. بالتاكيد حايقولوا طريقة ينقذوا بيها

نفسهم.. لازم نصارحهم بكل شىء.. صدقونى ممكن عمليا

إنقاذ كل الناس..

فاطمة : كل الناس..؟.. الرجالة والستات.. والأطفال..؟

توحيد : أية..

فاطمة : أنا مش عاوزه أتسرع وأقول أن فكرتك عاجباني.. (نوح)..

لكن حقيقى يا نوح.. الفكرة دى جديدة بالدراسة..

نوح : طبعا.. ليكى حق.. ما هو انت مش بتدافعى عن البلد

دلوقت.. انت بتدافعى عن طفلك..

فاطمة : البلد هى طفلى.. انت متصور البلد إيه..؟.. مبانى وشوارع

ومصانع.. البلد هى طفلى وأطفال الآخرين..

نوح : أنا مش داخل فى مناظره لتعريف كلمة بلد يعنى إيه.. أنا

ماعنديش وقت للأبحاث الفلسفية... كل اللى عندى.. لا

كلام فى غير عملية نوح.. اعتبروا الموضوع منتهى..

(طرق عال على الباب.. مضطرب وعصبى)

نوح : أدخل..

(يدخل سكرتير الجلسة.. مرعوبا مغزوعا)

سكرتير الجلسة : (ساقاه لاتقويان على حمله).. أنا أتكلمت يا أستاذ نوح..

اتكلمت.. (بانهيار) قلت كل حاجة اتفضل اقتلنى.. يالله..

موتنى حالا.. والا حانتحر...

نوح : اهدا.. تمالك اعصابك.. اتفضل.. اقعد..

سكرتير الجلسة : (يجلس منهارا ويتكلم وهو يكاد يبكى).. أنا قلت لك من الأول..

حذرتك.. رفضت تسمعى.. قلت لك أنا ما أعرفش أحفظ

بسر.. ولا سألت فى.. قلت لك أنا باتكلم وأنا نايم.. مفيش

فايدة..

نوح : اهدا بس.. اهدا.. خد سيجارة (يعطيه سيجارة) هاتى كباية

ليمون يا فاطمة..

(فاطمة تسرع إلى ترموس صغير.. تصب منه كوب ليمون.. سكرتير
الجلسة يشربه دفعة واحدة)

نــــــــــــوح : إيه بقى اللى حصل بالضبط..؟
السكرتير : ولا حاجة.. اتكلمت.. مش مهم التفاصيل.. النتيجة انى
اتكلمت.. النتيجة إنى حاكون السبب فى فشل خطتك كلها..
نــــــــــــوح : برضه عاوز أعرف التفاصيل.. أهدا واحكى لى..

(يجذب نفسا من السجارة.. يبدأ فى استعادة رباطة جأشه بالتدريج)
السكرتير : أنا كنت خايف من نفسى جدا.. كنت خايف لا تطلع منى
كلمة كده ولا كده فى أى قعده.. ولذلك بطلت قعاد على
القهاوى.. قطعت صلتى بكل اصدقائى.. خفت أحسن أتكلم
قدام مراتى.. طلقته.. قلت اسكن بعيد عن البلد.. أسكن
بعيد عن أى حد.. (ينتابه الانفعال مرة أخرى) أنت
السبب فى كده ياأستاذ نوح.. أنا حذرتك وقلت لك بلاش
أنا..

توحييد : يا عزيزى اهدا.. تماسك.. جازى نتدارك المسألة.. وبعدين؟
السكرتير : مراتى خدت العيال وراحت تعيش مع أبوها.. وأنا سبت الشقة..
فاطمة : ليه..؟

السكرتير : أنا ساكن فى آخر دور.. السطوح فوق منى على طول.. خفت
حد يحط لى ما يكروفون فوق السطوح.. يسجل لى وأنا
نايم..

فاطمة : المايكروفون حايسجل لك من فوق السطوح..؟
السكرتير : حصلت لواحد صاحبى.. برضه كان ساكن فى آخر دور..
اتضح أن فيه مكروفونات بتجيب من على بعد ستة متر
مبانى..

نــــــــــــوح : طبعاً سبت الشقة.. وسكنت فى أول دور..
السكرتير : لأ.... سكنت تحت الأرض..

نــــــــــــوح : تحت الأرض..

السكرتير : أيوه.. عندى نص فدان جنب قليبوب.. وكان عندى قرشين..
بنيت شقة بالأسمنت المسلح على بعد عشرة أمتار من سطح
الأرض.. أوضة وصالة ودورة مايه..

نــــــــــــوح : كويس قوى.. وبعدين..

توحيد : لأ.. مش كويس قوى.. سلوك زى ده يخلى أجهزة الأمن كلها
تشك فى تصرفاتك.. المسألة كان علاجها أبسط من كده..
حثة بلاستر صغيرة تلتزقها على بقلك.. لما تيجى تمام..

السكرتير : عملتها.. وكنت حاتخنق.. أنا عندى لحمية.. ماعرفش أتفس
من مناخيرى..

نــــــــــــوح : كمل وبعدين..

السكرتير : وفى مره وأنا مروح البيت..

توحيد : قصدك وأنت مروح الخندق..

السكرتير : سميه زى ما انت عاوز..

فاطمة : سيبوه يتكلم يا جماعة..

السكرتير : لقيت عربية شيفروليه طويلة فخمة جدا واقفة قدام الـ..
قدام البيت.. وفيها واحد افندى أنيق.. لابس نضاره سودا
كبيرة.. قال لى أهلا يا أستاذ فلان.. قلت له أهلا وسهلا..
قال لى أنا زميلك فى المحافظة.. وكنت جاى من اسكندرية
وقلت أحوذ وأشرب عندك شاي.. وأريح الموتور شوية..

توحيد : شفته قبل كده؟

السكرتير : لأ.. بس قال لى أنه يعرفنى من زمان.. وأنه كان معايا فى
الدراسة.. كان زميل فى الجامعة..

نــــــــــــوح : وافكرته..؟

السكرتير : حاولت أفكره.. وعلى آخر لحظة.. واحنا نازلين السلالم
سوا.. افكرت انى مادخلتش الجامعة..

فاطمة : ده انت كنت مضطرب جدا ..

السكرتير : كنت خايف قوى يا مدام ..

نُـسُوح : من إيه ..؟

السكرتير : مش من حاجة معينة يا أستاذ نوح .. أنا خايف على طول ..

توحيد : ويعدين ..؟

السكرتير : نزل معايا .. عملت له الشاى .. قعد يتمشى فى الأوضة ..

ويبص فى الكتب اللي عندى ... ويبص تحت السرير .. دخل

دورة الماية .. كان واضح أنه بيدور على حاجة ..

نُـسُوح : ويعدين ..؟

السكرتير : بعد ما شربنا الشاى .. قال لى باقول إيه .. ما تيجى نروح أى

كازينو ندردش وناخد فنجان قهوة .. قلت له فرصة تانية ..

أصر أنى أروح معاه .. خدنى فى العربية .. قعدنا فى كازينو ..

بعد ما خدنا القهوة .. قال لى يا راجل بلاش العبط اللي انت

عامله ده .. إرجع لمراتك وأولادك وأصدقاءك .. انت خايف من

إيه ..؟ .. مخبى إيه ..؟ مش عملية نوح؟ ولا حاجة تانية؟ .. هو

قال لى كده وأنا أترعشت .. ركبى سابت .. سألته .. إيه اللي

عرفك بعملية نوح؟ .. قال لى إنت إنت إتكلمت وإنت نايم ..

وسألته .. عرفت إزاي ..؟ الميكروفونات بتجيب على بعد ستة

متر مباني .. وأنا ساكن على بعد اتناشر متر .. قال لى .. آخر

دفعة وصلت لنا بتجيب على بعد خمستاشر متر .. (يختنق

صوته بالبكاء) .. انت المسئول يا أستاذ نوح .. أنا حذرتك ..

وقلت لك .. انت اللي أصريت ..

نُـسُوح : طب اهدا .. اهدا ..

توحيد : عزيزى .. أنا عاوز أؤكد لك أنك مش انت اللي افشيت السر

ده .. وما أعتقدش حتى أنك اتكلمت وأنت نايم ..

السكرتير : آمال عرفوا إزاي ..؟

نـــــــــــــــــســـــــــــــــــوـــــــــــــــــح : المسألة ببساطة ان ده سر صحيح .. بس مش سر بيننا .. ده
سر بين الخمسة وثلاثين مليون ..
(صورة ثابتة .. تنزل)

الـــــــــــــــــســـــــــــــــــتـــــــــــــــــار

• الجزء الثانى •

المشهد الأول

(القاعة.. السكرتير يوزع أوراقا على الأماكن التى يفترض أن القادمين سيجلسون عليها.. فى دائرة ضوء فى المستوى الثالث يقف مدير الاحتفالات فى مكان مرتفع مواجهها للجماهير التى لا تراها ولكن يصلنا صياحها.. ربود فعل الخطبة واضح على السكرتير)..

م. الاحتفالات : يا جماهيرى.. انتم تعرفوننى جيدا.. بل وتعرفون ما أقوله فى كل مرة.. فى كل مرة أقول.. نحن مقبلون على مرحلة جديدة.. أما هذه المرة، فالأمر مختلف.. لأننا لسنا مقبلين على مرحلة جديدة فحسب، بل جديدة وحاسمة.. لقد تابعتم جهودى من أجل إعادة بناء الإنسان المصرى... ولعلكم لاحظتم فى كل مرة اننى كنت أعيد بناؤه بشكل أسوأ.. أما اليوم فقد تعلمت من أخطائى الماضية.. وازدادت خبرتى.. واقتنعت بأنه لا فائدة من إعادة بناء الإنسان المصرى.. وأنه من الأفضل أن نكتفى بترميمه أو تنكيسه أو تقوية جذرائه.. وصلب عواميده.. أو تركه على ما هو عليه.. لعله يبنى نفسه بشكل أفضل.. وأعترف، نعم، أن لدى القدر الكافى من الشجاعة

لكى اعترف أمامكم يا جماهيرى.. لقد كانت هناك تجاوزات.. نعم.. كانت هناك أخطاء.. نعم.. سرقات، نعم، اختلاسات، نعم، تسريب، نعم، اهمال، نعم.. لا مبالاة، نعم، جهل، نعم، نعم، نعم، . أعترف بكل ذلك.. ولكن هل حدث ذلك كله بسوء نية.. كلا.. فكلنا نحب مصر، كل على طريقته.. وكلنا طيبون، كلنا نبلاء.. وكلنا اشتراكيون وديمقراطيون، ورأسماليون، وبورجوازيون، وكلنا عمال، وكلنا موظفون، وكلنا ليبراليون، وكلنا فلاحون، وحتى لو ثبت أنه كانت هناك أخطاء أو خطيئة.. فمن منا بلا خطيئة..؟.. من كان منكم بلا خطيئة، فليقدم وليرمنى بحجر.. (صياح الجماهير).. أقولها بشجاعة..

السكرتير : (معلقا).. ليك حق.. ما انت عارف إن المحافظة اتنضفت النهاردة.. مفيش فيها طوب ولا حجر ولا زلط..
م. الاحتفالات : ... هيا يا جماهيرى.. من كان منكم بلا خطيئة.. فليقدم وليرمنى بحجر..

(السكرتير يتلفت حوله بسرعة ثم يخرج من جيبه حجرا صغيرا يقذفه به.. وعلى الفور تنهال عليه الأحجار من كل مكان)

م. الاحتفالات : أى.. أى.. إمسك يا شاويش محمد.. إمسك يا شاويش عبده.. إمسك يا شاويش أحمد..

(يجرى خارجا)

(يدخل نوح)

نـــــــوح : ظهرت النتيجة..؟..

السكرتير : نتيجة إيه..؟..

نـــــــوح : الانتخابات..

السكرتير : ظهرت.. وكل الناجحين أبلغوا بميعاد الاجتماع..
 نـــــــوح : المجلس القديم نجح منه حد..؟
 السكرتير : حاشوف يا فتدم دلوقت بنفسك..
 (يدخل مدير الاحتفالات... إصابة خفيفة على إحدى وجنتيه.. يبدو
 على نوح الاستياء.. يفتصب ابتسامة)
 نـــــــوح : أهلا..
 م. الاحتفالات : أهلا بيك يا فتدم..
 نـــــــوح : نجحت..؟
 م. الاحتفالات : اكتسحت..
 نـــــــوح : (باستياء).. مبروك..
 م. الاحتفالات : الله يبارك فيك يا فتدم..
 نـــــــوح : الظاهر عندك قاعدة شعبية متينة..
 م. الاحتفالات : أنا بانجح فى أى انتخابات من أيام هيئة التحرير..
 نـــــــوح : اشمعنى..
 م. الاحتفالات : (يبتسم ابتسامة لزجة).. أصل وشى سمح..
 نـــــــوح : آمال إيه حكاية الطوب والزلط اللى حدفوك بيه..
 م. الاحتفالات : يبدو ان اللى نقل لحضرتك الصورة، كان واقف بعيد
 وماشافش كويس.. ده مش طوب.. ده ورد.. زهور.. قل
 وياسمين.. قرنفل..
 نـــــــوح : والإصابة اللى فى وشك دى.. من الورد؟..
 م. الاحتفالات : من الشوك اللى فى الورد.. بعض الجماهير من فرط
 حماسها ما كانت عندها وقت تشيل الشوك..
 (يواصل التحديق فى نوح بنفس الابتسامة المزجة وكأنما
 يتحداه.. يبدأ الآخرون فى الدخول.. يتخنون نفس أماكنهم
 بتعال يعكس إحساسهم بالانتصار.. إنهم نفس الوجوه.. نفس
 أعضاء المجلس القديم. يحرق فيهم وقد الجمت الصدمة لسانه..

تمر لحظات قبل ان يتمالك نفسه ويحاول ان يبدو

طبيعيا)

نـــــــــــــــوح : مبروك ..

الجمـــــــــيع : الله يبارك فيك ..

نـــــــــــــــوح : ماكنتش عارف انكم بتتمتعوا بثقة الناس للدرجة دى ..!

الجمـــــــــيع : آديك عرفت.

نـــــــــــــــوح : آمال فين المهندس توحيد ..

..... : للأسف سقط... خد صوت واحد.. اللي هو صوته..

نـــــــــــــــوح : ليه ..؟

..... : حا يكون ليه .. ؟.. شخص ززل .. وماحدث بيثق فيه ..

..... : والجماهير ما صدقت تحصل انتخابات وتتخلص منه ..

نـــــــــــــــوح : ده كلام غير صحيح. توحيد شخص أهل لكل

ثقة .. وفى الحالة دى أنا مضطر أراجع الانتخابات

بنفسى. حاراجع التذاكر .. والنتيجة .. وكل

حاجة ..

(توحيد يدخل ومعه لفة ورق، لوحات رسم)

توحيد : حاتلاقى النتيجة سليمة .. ماحصلش أى تزوير فى

الانتخابات .. أنا فعلا ماخدتش إلا صوتى ..

نـــــــــــــــوح : مش معقول ..

توحيد : فيه ألفين صوت .. كنت ضامنهم فى جيبى .. كل الناس اللي

شغالين فى الإدارة الهندسية .. بيتقوا فى ويبحبونى ..

نـــــــــــــــوح : راحت فين الأصوات دى ..؟

توحيد : راحت اسكندرية والفيوم .. الأستاذ مدير الاحتفالات عمل

رحلة أربعة أيام للإدارة الهندسية .. يومين فى اسكندرية

ويومين فى سيدى عبدالرحمن بجنيه ونص .. إقامة كاملة ..

ثلاثة جنيهات ..

م. الاحتفالات : يا باشمهندس.. أنا ماقبلش التعريض بى.. وأرفض كلامك الملىء بسوء الظن.. الرحلة دى مقررة من خمس شهور ومستعد أجيب لحضرتك محضر لجنة الاحتفالات اللى عملت الرحلة دى..

توحيد : عزيزى، أنت عبقرى.. أنا عارفك كويس.. أنت تقدر تجيب فواتير يحفلات استقبال عملتها لنابليون..

م. الاحتفالات : أنا أحتج.. وباطلب من السيد رئيس المجلس..

توحيد : مفيش داعى.. أنا مش جأى أشتكى.. ولا أحتج على اللى حصل.. ولا أنا حريص أقعد مع حضراتكم فى مكان واحد.. أنا جأى أسلم الرسوم الهندسية دى.. يمكن تنفعكم.. السلام عليكم..

(يستدير فى طريقه للخارج)

نـــــــوح : استنى يا توحيد.. ماتخرجش.. أنت عضو المجلس بالتعيين.. أنا عينتك..

... : حضرتك حاتلغى الديموقراطية بكلمة عشان المهندس توحيد..؟

نـــــــوح : الألفين شخص دول.. لو كانوا موجودين، كانوا انتخبوه..
... : الديموقراطية مافيهاش لو كانوا.. الناس دول لو كانوا بيحبوه ومؤمنين بيه صحيح.. كانوا يحرصوا انهم يتواجدوا فى مصر يوم الانتخابات.. مهما كانت إغراءات الرحلة..

توحيد : (يواجههم).. ماتتخضوش قوى كدم.. (لنوح).. متشكر قوى يا أستاذ نوح.. كبريائى يجعلنى أرفض أقعد مع ناس مش عاوزينى..

نـــــــوح : (يبدو عليه الإجهاد الشديد).. استنى يا توحيد..

توحيد : (يتوقف).. اذا احتجتنى حضرتك.. فى أى لحظة من لحظات الليل والنهار.. ادبنى تليفون.. أنا تحت أمرك..

نـــــــوح : استنى يا توحيد.. أرجوك ما تمشيش... أنا محتاجلك
جانبى...

(بيدو عليه الإجهاد الشديد، لا يعرف كيف ينهى الموقف.. تمر لحظات)
نـــــــوح : حضرات السادة أعضاء المجلس الشعبى الناجحين فى
الانتخابات وكل انتخابات.. هذا الاجتماع مخصص لشيء
واحد.. هو إبلاغ حضراتكم تهنئتى.. وألف مبروك، انتهى
الاجتماع..

(يحرص على أن يظل متماسكا بالرغم من ضعفه)
(يخرجون.. بعد أن يخرجوا يتهاوى على مقعده.. توحيد يقترب منه)
توحيد : أطلب لك الدكتور ؟..
نـــــــوح : لأ.. أنا حاستريح بعد شوية.. فجأة حسيت الأرض بتلف بى..
توحيد : اجهد.. أطلب لك دكتور..
نـــــــوح : لأ.. لأ..
(تدخل فاطمة)

فاطمة : خير..؟..
نـــــــوح : خير.. كل خير.. مفيش حاجة..
فاطمة : مدير الاحتفالات قال لى أن الاجتماع انتهى بسرعة لأنك
تعبان..
نـــــــوح : أنا مش تعبان.. أنا كويس.. بس بيدو أن الجماعة دول كفيلين
بقتل أى إنسان..

توحيد : أنا معسيهم أجمل قتلة فى التاريخ.. بيقتلوا من فرط
الظرف.. والطاعة.. والانضباط.. والتأييد.. صعب قوى
تمسك على أى واحد فيهم غلطة.. لأنهم هم نفسهم الغلط..
نـــــــوح : أنا بدأت أخاف من الفشل..

فاطمة : أنا لو منك أبتدى أخاف من النجاح..
توحيد : عندك حق يا مدام.. أنا متصور الجماعة دول ممكن يعملوا
إيه لو حصل الطوفان ونجحت عملية نوح..

نـــــــــــــــــــــوح : فى تصوركم يعملوا ايه..؟
فاطمة : إحنا مانقدرش نفهم أى واقع، إلا إذا اتمتعنا بقدر من
الخيال..

نـــــــــــــــــــــوح : المطلوب هو الخيال السياسى.. القدرة على التنبؤ باللى
حايحصل منهم لو حصل الخطر..

فاطمة : يالله بينا نتخيل.. بمعنى أصح نفكر فى الواقع بقوة الخيال..
لنفرض أن الانذار حصل..

توحيد : وتمت الخطوات الأولى بنجاح فعلا..

(فى الجزء التالى كل العناصر المسرحية من إضاءة وديكور ومؤثرات

صوتية.. سرينات بواخر، امواج بحر.. نورس.. بالإضافة لأسلوب

الآداء.. لابد أن توحى بقوة للمتفرج أن هذا المشهد متخيل.. أو أنه نوع

من الفلاش للأمام Flash Forward.. الذى يحمل رؤيا كابوسية..

وعلى نوح أن يكون جاهزا من بداية المشهد.. مرتديا بنطلونا وقميصا

أبيض.. بحيث يكفى أن يرتدى كلبا بحريا وجاكت ليصبح قبطانا..)

فاطمة : حصل فعلا أن كل العناصر الممتازة انتقلت اسكندرية..

توحيد : فى المواعيد المحددة.. بدون متاعب.. بدون عقبات..

فاطمة : وطلعوا المراكب..

توحيد : بانضباط.. بدون ما يفرقوا بعض..

فاطمة : بدون مايزقوا بعض على السلالم..

توحيد : بدون تزاحم.. بهدوء..

فاطمة : من غير فزع.. من غير هستريا.. وباحساس كامل

بالمسؤولية..

توحيد : خلاص.. كل واحد فى مكانه.. والثلاث مراكب طلعت

بالسلامة فى عرض البحر.. (اصوات الأمواج).. انتم دلوقت فى

عرض البحر..

فاطمة : وخذتوا الاتجاه الصحيح..

توحيد : الانزال حايكون بعد أربعة وعشرين ساعة فى المكان اللى اتحدد من قبل كده..
فاطمة : بدأت تبعت إشارات لاسلكية تحكى فيها اللى حصل للعالم كله..
(إشارات مورس)

توحيد : وطبعاً ما نسيتمش تبعت إشارة لاسلكية لكل المصريين الناجحين والمبدعين فى الخارج تطلب منهم المساعدة .. إنت دلوقت قائد عملية الإنقاذ .. حاتكلم الركاب بتوعك..
فاطمة : أيوه.. إنت دلوقت حاتكلم مع الركاب بتوعك .. حاتكلم مع أحسن العناصر فى مصر..
(اختفاء تدريجى للإضاءة)

المشهد الثانى

(أختفى توحيد وفاطمة.. نوح الآن يرتدى ملابس قبطان بحرى.. يوجه حديثه من خلال ميكروفون.. صوته يصل عبر سماعات الصالة..)

نــــوح : أيها السادة.. يا أحسن العناصر فى مصر.. لقد اختارتكم الأقدار لتصنعوا ما لم يصنعه أحد من قبل.. إن مهمتكم شاقة وصعبة.. ولم يذكر لنا التاريخ مهمة أكثر منها صعوبة ومشقة.. إلا أنى أؤمن أنكم قادرون على إتمامها.. أتمنى لكم التوفيق.. وشكرا..

(لحظة ويدخل مدير الاحتفالات)

م. الاحتفالات : يا سلام يا أستاذ نوح.. كلمتين.. بس اللى هم.. القائد العظيم يتكلم.. يقول سطرين بس.. بس سطرين يحركوا الجماد.. حضرتك تفتكر الشعوب العظيمة بتبقى عظيمة إزاي؟

نــــوح : إزاي..؟

م. الاحتفالات : حد يقول لهم كلام عظيم، زى اللى حضرتك بتقوله.. الكلام ده يآثر فيهم.. يخليهم يعملوا أعمال عظيمة.. بس.. هى دى المسألة.. ألف مبروك يا فندم..

نـــــــــــــــــــــــوح : مبروك على إيه..؟

م. الاحتفالات : على نجاح عملية نوح..

نـــــــــــــــــــــــوح : إحنا نفذنا البند واحد من برنامج فيه ألف بند..

م. الاحتفالات : ده تواضع منك يا فندم.. عملية انقاذنا.. أقصد روح مصر

هى أهم بند..

نـــــــــــــــــــــــوح : ماشفتش الدكتور فاطمة..

م. الاحتفالات : شفتها من فوق.. من الهليكوبتر وإحنا جاين.. كانت راكية

عربية نقل ومعاه ناس كتير من المركز القومى للبحوث.. بس

لما وصلنا اسكندرية ماشفتهاش.. حانعمل حصر للركاب

دلوقت، ونعرف هى فين..

نـــــــــــــــــــــــوح : ماحدش شافها فى المينا فى إسكندرية..

م. الاحتفالات : حاعرف لك دلوقت.. حاشوف الأفلام اللى عندى.. أنا صورت

العملية كلها فيديو.. خوفا من أن أى واحد غريب يتسلل فى

وسطينا.. أنا عارف العشرة آلاف بتوعنا بالواحد شخصيا..

نـــــــــــــــــــــــوح : وأنت بتتفرج عاوزك تتأكد إن المهندس توحيد معانا..

م. الاحتفالات : للأسف المهندس توحيد اتحايلت عليه عشان يركب

الهليكوبتر.. رفض.. وخد عربيته وطلع جبل المقطم.. للأسف

جبل المقطم دلوقت بقى تحت الماية لستين متر.. بس

ماتخافش عليه، هو حايعرف يتصرف..

نـــــــــــــــــــــــوح : طيب من فضلك.. روح أعمل حصر للركاب بسرعة.. وادينى

تمام..

م. الاحتفالات : تحت امرك...

(يخرج مدير الاحتفالات)

(نوح يكتب ببعض المنكرات، نستمع لصياح جماعى، هيل هوب يعقبه

اصطدام جسم ثقيل بالماء.. الصوت يستلفت نظره.. يتوقف.. مرة أخرى

يعود الصياح.. هيل هوب ثم سقوط جسم ثقيل فى الماء.. يترك القلم)

نـــــــــــــوح : (صانحا) ايه يا أسيادنا .. إيه اللى بيترمى فى البحر ده..؟
(مدير الاحتفالات يدخل)

م. الاحتفالات : دول متسللين...

نـــــــــــــوح : إيه..؟

م. الاحتفالات : متسللين.. التصوير بالفيديو نفع.. أول ماشفت وشهم، عرفت
انهم مش معانا.. هم صحيح بيقولوا إنهم عباقرة وإنهم تبع
روح مصر.. بس أساميههم مش فى الكشف..

نـــــــــــــوح : (مصعوقا).. تقوموا ترموهم فى البحر..؟

م. الاحتفالات : كلام إيه اللى بتقوله ده يا أستاذ نوح.. هو إحنا قتلة.. إحنا
بنلبسهم طوق نجاة ونديهم سندوتش جبنة وسندوتش
روزبف وزمزية فيها مايه ونسيبهم..؟

نـــــــــــــوح : (مفروعا من كلامه) .. تسيبوهم يروحوا فين..؟

م. الاحتفالات : هم أحرار بقى.. أنا حانتدخل فى مستقبلهم ليه؟.. كل واحد
يشوف مصلحته.. والله لو ربنا مديهم عمر ما حايجصل لهم
أى حاجة..

نـــــــــــــوح : (يصرخ فيه).. أبعت اللنشات تجيبهم فورا.. فاهم.. ولا
حارميك وراهم.. سامع..؟

م. الاحتفالات : سامع وفاهم..

(يتكلم فى الميكروفون)

م. الاحتفالات : إشارة من مدير الاحتفالات.. أوقفوا عملية الاحتفال بتوديع
المتسللين فورا.. أوقفوا عملية الاحتفال بتوديع المتسللين
فورا.. أرسلوا لنشات الإنقاذ لإحضارهم.. يصرف لكل منهم
شراب دافى.. لقد كنا نختير درجة حبههم ودرجة ولائهم..
ولقد نجحوا جميعا فى الاختبار.. شكرا لهم ولكم.. انتهت
الإشارة..

(لنشات تتحرك)

... : اذا كنت معترض على كندا .. نطلع على امريكا ..
... : ما انتم عارفين يا جماعة ان الاستاذ نوح مش مبال لأمریکا ..
... : خلاص .. نطلع على الاتحاد السوفيتى .. أهو برضه صديق
قديم .. نعمل معاه وقفه .. ونروق الجو ..

... : أو تلف من عند رأس الرجاء الصالح ونطلع على السعودية ..
... : حانبعد بعيد ليه يا جماعة .. ليبيا ما هي جنبنا أهي ..
... : وتونس مالها؟ .. دى تونس تجنن فى الوقت ده من السنة ..

نـــــــوح : لو نزلنا فى أى مكان من الأماكن دى .. مش حانشوف
خلقة واحد فيكم بعد عشرة دقائق .. كلامى لازم يتنفذ ..
(تتغير لهجته ويتكلم ببطء) .. يا سادة .. إحنا طالعين على
مصر ..

... : هي فين دى...؟ بص من الشباك .. إحنا طالعين على
الصحرا ..

نـــــــوح : هي دلوقت صحرا .. بس أنا شايفها .. أقدر ألسها بايدى ..
شايف مصانعها وشوارعها .. شايف أطفالها بيلعبوا فى
الجنانين مليونين صعة .. المسألة محتاجة خيال ..
... : أهو ده اللى بنعترض عليه .. الخيال .. إحنا ناس واقعيين
جدا ..

م. الاحتفالات : خلاص بقى يا جماعة .. إحنا عملنا اللى علينا وأرضينا
ضمائرننا .. نقول له بقى .. (يلتفت لنوح) .. أستاذ نوح .. إحنا ما
نقدرش نسيب عملية زى دى تقشيل بسبب واحد خيالى زى
حضرتك .. المجلس خد قرار بعزلك وتعيين أكبر الأعضاء
سنا .. والقرار بيطبع استئسل دلوقت ..
(نوح يتحرك... فى نفس اللحظة، يهجم عليه اثنان، يطويانه من
الخلف... يشلان حركته تماما .. المفاجأة تعقد لسانه .. فى نفس
اللحظة يتقدم مدير الاحتفالات من المايكروفون)

م. الاحتفالات : بيان من القائد الجديد «لعملية نوح».. للسادة ركاب سفن الإنقاذ نوح واحد نوح اثنين ونوح ثلاثة.. تقرر تغيير وجهتها.. ستطلق الآن المراكب الثلاثة متجهة إلى..

(نوح يصرخ مقاطعا وهو يحاول عبثا التخلص من القابضين عليه)
نـــــــــــــــــــــوح : إحنا طالعين على مصر.. (يصرخ فيهم).. اطلعوا على مصر.. اطلعوا على مصر..

م. الاحتفالات : (بقسوة باردة).. سكتوا الأفندى ده..
(احدهم يضربه على رأسه بكعب مسدس.. يتهاوى نوح على الأرض ببطء شديد.. تبدو حركة نوح والمجموعة حوله وكأنها تقدم بالعرض السينمائي البطيء.. تخفت الإضاءة بنفس الإيقاع.. عندما يصل نوح للأرض يكون المسرح قد اظلم تماما.. ولكن الكابوس مستمر.. امواج.. سريعات بواخر.. طائر النورس.. صياح نوح.. إحنا طالعين على مصر.. اطلعوا على مصر.. ثم صوت مدير الاحتفالات بقسوة باردة.. سكتوا الأفندى ده.. نميز من بين الأصوات..)

ص/ توحيد : لسه درجة حرارته مرتفعة..؟

ص/ فاطمة : جدا.. وعرقان قوى..

ص / توحيد : استمرى معاه بالكماذات الباردة..

ص/ فاطمة : واضح أنه بيتعرض لكابوس..

(إن الزج الجيد بين كل هذه العناصر الصوتية بالإضافة للإظلام الكامل. سوف يعطينا التأثير المطلوب للكابوس وفي نفس الوقت يعطينا الوقت اللازم لتغيير المشهد)

ظهور تدريجي للإضاءة على المشهد الثالث

المشهد الثالث

(غرفة في مستشفى.. نوح يرتدى بنطلونا وجاكete
بيجاما.. يخلع جاكete البيجاما ويتناول قميصا يأخذ في
ارتدائه.. تدخل فاطمة)

فاطمة : إيه يا نوح.. إيه اللي بتعمله..؟..

نوح : بالبس.. زهقت من السرير..

فاطمة : الدكتور مصر إنك تقعد كمان يومين.. اتفضل إلبس البيجاما
ونام على السرير..

نوح : خلاص.. أنا استريحيت بما فيه الكفاية..

فاطمة : الدكتور هو اللي يقرر ده..

نوح : حاستريح في البيت.. لو قعدت هنا حاتعب أكثر.. مش
عارف أنام هنا.. هنا باتعرض لكوابيس فظيعة.. باحلم
أحلام مخيفة..

فاطمة : عيبك إنك مكابر.. مش عاوز تعترف انك مصاب بانهايار
عصبى.. نتيجة للاجهاد.. نتيجة للشغل ليل ونهار.. المطلوب
انك تستريح كمان يومين..

نوح : حاضر..

فاطمة : حاضر إيه.. بتأخذنى على قد عقلى..؟

نـــــــــــــــوح : خلاص يا فاطمة.. مش حاجد نفسى.. حاشتغل بطريقة مريحة (يرفع سماعة التليفون).. ادينى البوابة لو سمحت.. من فضلك يا مدموزيل.. فيه واحد حايجى يسأل على دلوقت.. خليه يطلع على طول..

فاطمة : مين ده..؟

نـــــــــــــــوح : مدير الأمن..

فاطمة : عاوزك فى إيه..؟

نـــــــــــــــوح : أنا اللى عاوزه..

فاطمة : الدكتور مانع الزيارة يا نوح..

نـــــــــــــــوح : أنا اتفاهمت معاه.. سمح لى استقبل زوار.. بس بدون انفعال.. بدون توتر..

فاطمة : أفهم من كده ان فيه حد تانى حايجى يزورك..؟

نـــــــــــــــوح : أيوه.. أعضاء المجلس..

فاطمة : بتقول بدون توتر..؟

نـــــــــــــــوح : أرجوكى يا فاطمة هى حياتى كده.. الراحة بالنسبة لى

ترف.. ويمكن تكون جريمة.. أنا فاضى أستريح..؟

فاطمة : آمال فاضى لإيه..؟ تعيا وتنهار..؟.. ممكن تكلمنى وأنت نايم..؟

نـــــــــــــــوح : دى ممكن..

فاطمة : ويمكن اللى يجى يزورك.. تتكلم معاه وأنت نايم..؟

نـــــــــــــــوح : ممكن.. أهو..

(يرقد على السرير)

فاطمة : وإيه الفايده.. حانتكلم.. وتتفعل.. وتتوتر..

نـــــــــــــــوح : ماتخافيش يا فاطمة.. خلاص.. أنا بقيت كويس فعلا..

(طرقات على الباب)

نـــــــــــــــوح : أدخل..

(يدخل مدير الأمن ومعه باقة من الورد، تصافحه فاطمة وتأخذ منه

باقة الورد، يصافح نوح الذى يهيم بالتهوض من سريره)

مدير الأمن : خليك مستريح يا أستاذ نوح.. ماتتعبش نفسك..

(فاطمة تقدم له مقعدا فى مواجهة نوح.. بالطبع نوح ينسى نفسه

خلال محادثته مع مدير الأمن ويترك السرير)

نـــــــوح : سيادة اللوا... أنا سعيد جدا بزيارتك..

مدير الأمن : قالوا لى فى البيت انك إتصلت بى مرتين.. خير..؟

نـــــــوح : خير إنشاء الله.. الموضوع باختصار انى عاوز أكلم حضرتك

فى الكشوف اللى عملتها فى المجلس..

مدير الأمن : تحت أمرك..

نـــــــوح : أنا مش باكلمك بصفتك عضو المجلس.. أنا باكلمك بصفتك

مسئول الأمن فى المحافظة.. باخاطبك فيك ضميرك

الوظيفى.. كرجل أمن تهمة بلده.. مش مصر تهمة برضه..؟

مدير الأمن : ومين ماتهموش مصر..؟

نـــــــوح : اتفقنا.. قطعنا يا سيادة اللوا.. فيه عندكم فى أجهزة الأمن

المختلفة.. كشوفات فيها أسماء أحسن العناصر فى البلد..

مدير الأمن : نعمل بيها إيه يا أستاذ نوح؟.. أنا ممكن فى ربع ساعة أجيب

لك كشوف فيها أسامى أسوأ العناصر فى البلد.. لكن حكاية

العناصر الكويسة دى مالناش دعوى بيها.. وعمرها ما كانت

مطلوبة..

نـــــــوح : أنا فاهم غير كده..الى أعرفه.. أنهم لما بيبجوا يعينوا حد

فى منصب بياخدوا رأيكم.. ده كويس.. ولا لأ؟..

مدير الأمن : السؤال ما بيقاش كده.. السؤال بيقى..ده وحش ولا لأ..

يعنى هل عنده سوابق..؟.. متورط فى أشياء مريبة..؟

نـــــــوح : وكفاعة فى العمل..؟

مدير الأمن : وإحنا مالنا ومال كفاعة.. إحنا مهمتنا نعرف سوابقه..

نـــــــوح : ولما أحب أعرف كفاءة واحد فى الشغل.. أسأل مين..؟ أسأل الاتحاد الاشتراكى..؟

مدير الأمن : لو حضرتك بعث تسأل الاتحاد الاشتراكى.. حايحول الجواب علينا..

نـــــــوح : (وقد بدا يتوتر).. يا سلام.. يا سلام.. حايحول الجواب عليكم..

فاطمة : (تهنئه).. بدون توتر يا نوح..

نـــــــوح : حاضر.. (مدير الأمن).. حصلت قبل كده الحكاية دى..؟.. مدير الأمن : كثير.. الاتحاد الاشتراكى مرة عمل حاجة اسمها التنظيم الطليعى.. أى واحد يدخل التنظيم ده كان لازم يسألنا عنه..

نـــــــوح : فلو كان سىء.. مايدخلش.. مدير الأمن : مش قاعدة.. والله دى مسألة محيرة يا أستاذ نوح.. أنا نفسى مش فاهمها.. ساعات تقول لهم على واحد أنه وحش..

نـــــــوح : يقوموا يرفدوه..

مدير الأمن : لأ.. يصعدوه وجايز يرفدوننا..

نـــــــوح : ليه..؟

مدير الأمن : مانا باقول لحضرتك إنها مسألة محيرة..

نـــــــوح : تقصد مسألة مفزعة.. (وقد بدا يفقد اعصابه).. يعنى يا سيادة اللوا.. نقدر نقول باختصار شديد ان إحنا بقى لنا عشرين سنة.. عندنا أجهزة نعرف بيها أسوأ العناصر.. لكن ماعندناش أجهزة تقول لنا مين أحسن العناصر..

فاطمة : مش كده يا نوح.. مش كده..

نـــــــوح : (صانحا فيها) اسكتى يا فاطمة.. (يتماك نفسه).. آسف يا فاطمة.. آسف.. أرجوكى اعذرينى..

مدير الأمن : أستاذ نوح.. حقيقى يا بنى أنت بتصعب على.. مليون مثل ووطنية.. لكن منعدم الخبرة.. يا بنى المسائل سايحة.. أنا ساعات بييجى لى تقريرين عن شخص واحد فى اليوم.. تقرير يقول إنه ممتاز جدا.. وتقرير يقول أنه سيء جدا.. أنا إمبارح جالى تقرير عن واحد انه من اتباع سعد زغلول..

نـــــــوح : دى مسألة خطيرة جدا..
مدير الأمن : حضرتك بتجسد المسألة بطريقة مبالغ فيها.. دى مسألة عادية جدا..

نـــــــوح : لأ.. دى مسألة خطيرة فعلا.. معنى كده أن خطتى بتتهز من أساسها.. عملية نوح كلها مبنية على اختيار أحسن العناصر..

مدير الأمن : مافيش حقيقة مطلقة.. كل حاجة نسبية.. الكشوف اللى معاك فيها أحسن العناصر نسبيا..

نـــــــوح : هو ده الفرق بينى وبينكم.. أنا بادور على المطلق.. أنا بادور على أحسن مصر فى الدنيا.. وانتم عاوزين تعملوا أى حاجة..

مدير الأمن : أنا أسف جدا.. كان بوى أساعدك.. لكن..

نـــــــوح : لكن إيه.. (أهى هى لكن دى.. لكن دى اللى حاتموتى..
فاطمة : (تتدخل مهذبة للموقف).. ممكن نغير الموضوع..؟.. يستحسن نتكلم فى حاجة مبهجة.. نام يا نوح.. نام على السرير..

نـــــــوح : حاضر.. حانتكلم فى حاجة مبهجة حاننصب القعدة دلوقت . ونقول نكت.. يالله يا سيادة اللوا.. قل لنا نكتة.. أراهنك لو عرفتى تغيرى الموضوع.. اتحداكى لو عرفتى تتكلمى عن حاجة مبهجة.. يالله.. كلمينى عن أغنية مبهجة.. كلمينى عن مسرحية عظيمة.. احكى لنا عن فيلم جميل.. يالله.. كلمينى عن مستقبلنا.. حاضر.. مش حانفعل.. مش حاتوتر..

حاهداً.. وأدى الأقراص اللى بتهدى (يبتلع عدة اقراص دفعة واحدة).. حاخذ المسائل ببساطة.. كل المسائل حاخذها ببساطة.. وحنام (يقفز فوق السرير).. أهو.. وحاتفطى.. أهو.. (يجذب عليه الغطاء.. يخفى تماماً تحت الغطاء.. تمر لحظات).. أنا بنام فعلاً دلوقت.. (يكشف الغطاء عن وجهه ويتكلم بهدوء شديد).. نوم هادى.. عميق.. كما الأطفال.. (يبدا صوته فى الارتفاع).. يالله أحكوا لى حواديت عشان أنا.. هاتولى كل الأدوية المنومة اللى فى الدنيا.. عشان أنا.. (يفطى وجهه ثم يكشفه بعد لحظة).. بعد ما عرفت أن بعد عشرين سنة.. كنا مهتمين بس بأسوأ العناصر.. ويا عالم.. كانوا أسوأ العناصر ولا لأ.. سيادة اللواء بيقول ان المسائل كانت سايحة.. ومع ذلك مطلوب منى أنا.. حاضر.. حنام.. يالله يا نوم.. (صانحا).. يالله يا نوم (يصرخ كالطائر الجريح).. عاوز أنا يا ناس..

فاطمة : اهدأ يا نوح.. اهدأ.. لو استمررت بالشكل ده.. حاجيب لك الدكتور..

نوح : اندهيله.. هاتيه فوراً.. حاقول له الحكاية دى.. أما أشوف حايعرف ينام إزاي.. هاتولى دكاترة البلد كلها.. عشان أقول لهم الحكاية دى.. اراهنك لو حد فيهم عرف ينام.. دول ناس بيتشطروا علينا إحنا بس.. عاوزينا إحنا بس اللى نهذا وننام..

مدير الأمن : أنا أسف يا مدام.. دى حالته لا تسمح بالزيارة فعلاً..

فاطمة : نوح...

نوح : فاطمة.. أنا سليم جداً.. متمالك نفسى تماماً.. وفاهم جداً.. وهى دى الكارثة.. أنا باهرج بس.. طلع فى مخى أنى أهرج شويه.. عاوز أزعق وأقول أى حاجة.. عاوز أهبل يا ناس.. هو ده علاجى الوحيد.. أنى أهبل.. أنا أخذ كل حاجة جد.. والجد حايقنتنى..

مدير الأمن : أستاذن أنا يا مدام..
نـــــــوح : أنا متشكر قوى يا سيادة اللوا .. وأسف إذا كنت ازعجتك..
مدير الأمن : لا أبدا .. رينا يكون فى عونك..
(فاطمة توصله إلى الباب .. قبل أن يخرج يكلمها همسا)..
مدير الأمن : هو عيبه أنه ما بياخدش المسائل ببساطة .. أمال لو قرأ
التقارير اللى اتكتبت فيه كان عمل إيه ..؟
فاطمة : يقولوا عليه إيه ..؟
مدير الأمن : عندك من تهريب العملة وطالع .. آخر تقرير فيهم بيتقول أنه
عميل لعشر دول أجنبية .. سلام عليكم يابنتى..
(يخرج مدير الأمن)
نـــــــوح : (هادنا تمام) .. ولعى لى سيجارة يا فاطمة..
(تشعل له سيجارة وتتأمله بهدوء)
نـــــــوح : فاطمة .. اطمنى..
فاطمة : على إيه ..؟
نـــــــوح : ماحدش فى عيلتنا أصيب بالجنون .. ما تخافيش على .. أنا
ارادتى أقوى من عقلى .. أنا هادى .. وحافظ لهادى على
طول.
فاطمة : يا ريت..
نـــــــوح : حاتشوفى..
(جرس التليفون .. يمد يده ليرفع السماعة ولكنها تلتقطها قبله)
فاطمة : يا مدموزيل .. الزيارة ممنوعة .. أنا حانزل لهم حالا..
(تضع السماعة)
نـــــــوح : هم مين ..؟
فاطمة : أعضاء المجلس..
نـــــــوح : يا شيخة خليفهم ييجوا .. خلاص أنا هديت .. مش هاكلهم
فى حاجة ..

فاطمة : حضرتك كنت حاتتجنن من شوية.. لما كلمت واحد فيهم..

واحد بس.. حايحصل إيه لما ييجوا كلهم؟

نــــوح : ولا حاجة.. خلاص.. الأزمة عدت.. كمان مش حاكلهم فى

الشغل.. أرجوكى يا فاطمة خليهم يتفضلوا.. مفيش داعى

يحبسوا أن حالتى سيئة.. لازم يشعروا أن كل شىء على ما

يرام..

فاطمة : لو فقدت أعصابك.. حانادى الدكتور فوراً.. أو حانسحب..

نــــوح : مش حافقد أعصابى.. أنا عندى أعصاب عشان أفقدها..

فاطمة : (ترفع سماعة التليفون وتتردد لحظة).. ألو.. خليهم يتفضلوا يا

مدموزيل..

(تضع السماعة)

(يدخل الجميع، نلاحظ أنهم يرتدون كرافتات سوداء، كل منهم يحمل

باقة صغيرة، يحيون فاطمة بهزة رأس وإبتسامة.. يرصون باقات الورد

حوله على السرير، يحيطونه بالورد تماماً.. تمر لحظات صمت طويلة)

نــــوح : لو سمحتوا شيلوا الورد من حوالى.. أنا لسه مامتش..

(يرفعون باقات الورد ويناولونها لفاطمة التى تكومها فى ركن)

... : حمد الله على سلامتك يا أستاذ نوح..

... : أهى المرة دى تعلمك أنك تاخذ المسائل ببساطة..

... : يا راجل.. صحتك بالدنيا..

... : متهيأله أنه حايصلح الكون لواحد..

... : روق كده وما تخافش.. ما تفكرش فى الشغل.. وراك رجالة..

فاطمة : لو سمحتم يا جماعة.. الدكتور سامح بالزيارة على أساس

أنها تكون هادية.. أى كلام فى الشغل خطر على صحته..

نــــوح : (بحزم).. فاطمة أرجوكى.. أنا ماحبش حد يتدخل فى

شغلى.. مهما كانت درجة صلته بى..

فاطمة : حاضر.. أنا أسفة.. تحب أسيب الأوضة كمان؟

نـــــــــــــــوح : لأ .. ماحيش .. وأسف .. (لأعضاء المجلس الذين يقفون محيطين به) .. أنا متشكر يا جماعة للزيارة دى .. وعاوز أنتهز الفرصة دى عشان أتكلم فى مسألة الكشف ..

الجميع : تانى ..؟

نـــــــــــــــوح : بصراحة يا جماعة .. مش قادر أقنع ضميرى .. أن الأسماء اللى انتم حطيتوها .. هى أحسن الأسماء فى البلد ..

الجميع : نشيل أسامينا عشان نستريح ..؟

نـــــــــــــــوح : لأ .. مش باطالبكم بكده .. إحنا بشر .. ولا يمكن حانحب الآخرين أكثر ما بنحب نفسنا .. أنا موافق على أساميتكم .. بس عاوزين نتكلم بصراحة ..

الجميع : اتفضل ..

نـــــــــــــــوح : نلعب ورقنا على المكشوف .. مفيش داعى للمجاملة .. حضراتكم مش أحسن العناصر فى البلد .. كده على بلاطة .. وأنتم عارفين ده كويس .. ومع ذلك .. أوعدكم بشرفى أنكم أول ناس حايتم انقاذكم .. بس على شرط .. تختارولى عشرة آلاف واحد أبقى واثق قدام ضميرى أنهم أحسن العناصر فى مصر .. إيه رأيكم فى الصفقة دى ..؟ .. أنا أنقذكم وأنتم تتقنوا عملية نوح .. أنا باقدم لكم حياتكم رشوة ..

... : أنا عن نفسى أرفض هذا الكلام .. أرفض أى كلام عن نزاھتنا ..

نـــــــــــــــوح : خلاص .. حضرتك تروح فى داهية .. (لجميع) .. وأنتم ..؟

... : أستاذ نوح .. لو وافقنا على الصفقة بتاعتك دى .. يبقى

معناها أن الكشف اللى عملناها مش سليمة ..

... : تحب نخلف لك بشرفنا أنها سليمة ..

... : ثم حضرتك إزاي تعرض علينا رشوة ..؟

... : مش وقته يا جماعة .. القضية دى نبقى نثيرها بعدين ..

... : الظاهر الانهيار العصبى أثر على تفكيره..

... : أنا مش عارف الدولة إزاي تكلفه بمسألة خطيرة زى دى..

نـــــــــــــــوح : فكروا فى اللى باقوله.. فكروا كويس.. ولا اشتغل لوحدى
بطريقة ثانية..

... : انت حر اشتغل لواحدك..

نـــــــــــــــوح : ماتفتكروش أنى عاجز.. أنا أقدر أشتغل.. وفى الحالة دى..
حاطريقها على دماغ أبوكم.. لسه قدامكم فرصة فكروا فى
اللى باقوله..

... : أستاذ نوح... أحنا هنا مجرد زوار وحضرتك مجرد مريض..
وعلى هذا الأساس حانقوت الكلام اللى قلته.. لكن بعد كده
لينا حساب تانى..

نـــــــــــــــوح : بتهددنى يعنى..؟.. خلاص..؟.. مش عارف أتفاهم معاكم؟
مفيش بيننا لغة مشتركة..؟.. طب الحل إيه..؟.. أقع فى
عرضكم..؟.. انزل من على السرير وأبوس رجلكم واحد..
واحد.. عشان تشغلوا بما يرضى الله.. وبما يرضى البلد..؟
مدير الاحتفالات: يالله بينا يا جماعة..

(يدخل توحيد فى نفس اللحظة التى يهمون فيها بالحركة. توحيد
يحمل معه كمية هائلة من ورق الجرائد)

نـــــــــــــــوح : أهلا يا توحيد.. أنت فين يا توحيد..؟.. أنت سايب الجماعة
دول يلتهمونى..؟.. كلمتك فى البيت إمبراح ماكنتش موجود..
توحيد : كنت باعزى..

نـــــــــــــــوح : البقية فى حياتك.. مين مات..؟..

توحيد : واحد تعرفه.. مدير الإسكان..

نـــــــــــــــوح : (هامسا لنفسه جانباً).. هانت.. فاضل تسعة آلاف وتسعمائة
وتسعين.. (لهم).. ماقلتوش ليه يا جماعة.. البقية فى
حياتكم..

... : أنت اديتنا فرصة نكلمك..

نـــــــــــــــــوح : آه صحيح.. ده كلهم لابسين كرافتات سودا .. إيه اللي معاك ده.. جرايد السنة دى..؟

تـــــــــــــــــوحيد : لأ.. دى جرايد النهاردة.. دول الثلاث جرايد..

مدير الاحتفالات: (برقة شديدة ويلهوجة كأنما يريد الخلاص من الموقف).. يالله بينا يا جماعة.. عشان نسيبهم يدردشوا.. سلامتك يا أستاذ نوح.. يالله بقى سيب السرير.. عشان نوضب لك حفلة حلوة قوى.. حلالة السلامة..

(الجميع يسرعون فى اتجاه الباب)

تـــــــــــــــــوحيد : (يقف بجسمه امام الباب يعترضهم).. استنوا يا جماعة.. استنوا.. مش تستنوا لما نتكلم شوية عن المرحوم.. عن مآثر الفقيد.. مش تدونا فرصة نذكر محاسن موتانا.. (نوح).. الجرايد النهاردة.. كل جورنال طالع ٢٢٠ مائتين وعشرين صفحة..

نـــــــــــــــــوح : ملاحق..؟

تـــــــــــــــــوحيد : لأ.. صفحة الوفیات لوحدها ٢١٢ صفحة مائتين واناشر صفحة..

نـــــــــــــــــوح : يا خبر.. حصل كارثة؟

تـــــــــــــــــوحيد : فعلا...

نـــــــــــــــــوح : باخرة والاطيارة..

تـــــــــــــــــوحيد : ما قلت لك.. مدير الإسكان (يمسك بجريدة ويقرأ).. توفى المهندس فلان الفلانى مدير الإسكان.. جوز بنت الدكتور فلان الفلانى مدير المنطقة الطبية.. ابن خالة الأستاذ فلان الفلانى مدير التعليم وابن عم فلان الفلانى مدير الاحتفالات.. وجوز بنت خال الشيخ فلان الفلانى.. مدير الأوقاف.. وابن عم حرم كل من مدير الخزنة العمومية..

وقريب كل من السادة الآتية أسماؤهم.. عشرة آلاف اسم..
العشرة آلاف اسم دول.. حتلاقيهم هم العشرة آلاف اسم اللي
عندك.. لو حضرتك كنت رحت تعزى إمبراح بالليل فى جامع
عمر مكرم.. يا أما كنت حاتموت من الضحك.. يا أما كنت
حاتموت من الغم.. صيوان وفيه يا أستاذ عشرة آلاف اللي كانوا
فى الصيوان.. هم اللي اسمهم منشور فى الجرايد النهاردة..
هم العشرة آلاف اللي المفروض فيهم انهم ييمثلوا روح مصر..
طلعت من العزا على صديق لى متخصص فى التاريخ المصرى
القديم.. سألته عن عائلة فلان الفلانى.. اتضح ان جدهم
الكبير كان رئيس الحكومة أيام الملك مينا.. الأسرة دى استلمت
الجهاز الادارى بمجرد مامينا وحد الوجهين.. (نوح).. مبروك
يا عزيزى.. هذه هى عملية نوح.. بدأت من أجل إنقاذ روح
مصر.. تحولت لعملية إنقاذ جهاز الموظفين اللي بيحكموا
البلد.. وأخيرا بنكتشف أنها انتهت بإنقاذ أسرة واحدة.. عائلة
واحدة بتنحل فى وبرنا من آلاف السنين.. (يهاجم نوح بشدة)..
عندك كلام تدافع بيه عن خطتك.. عندك كلام تدافع بيه عن
عملية نوح الفاشلة.. الساذجة..

فاطمة : (تصبح فيه).. يا باشمهندس.. انت بتتكلم مع إنسان مريض..
توحيد : أنا باتكلم مع إنسان مسئول.. مش عاوز يفهم.. كان لازم
يعرف من الأول أنه لا توجد فى مصر وسيلة لمعرفة أحسن
عناصرها.. مفيش تنظيمات كفيلة بكده.. مش هانعرف مين
الكويس إلا إذا الناس اتحركت فى اتجاه هدف ما.. خطتى
كانت بسيطة وسهلة.. نتجه شرقا لأرضنا.. ونشتغل.. هنا
العناصر الكويسة بتبان..
نوح : خطتى سليمة يا توحيد.. عمليتى ناجحة مائة فى المائة..
الناس دول هم اللي وحشين..

توحيد : الناس دول كويسين قوي.. ومش حتلاقى أحسن منهم.. الكارثة
أن عقولهم ماحصلهاش أى تدريب على النزاهة والإبداع..
عقولهم متمرنة إزاي تحافظ على مناصبها.. إزاي تتجنب غضب
الحاكم.. دول مساكين يا أستاذ نوح.. مايشوفوش ربع متر
حواليهم.. واقعين جوه أنفسهم.. هات أى واحد فيهم واسأله..
ماتعرفش يا دكتور كويس..؟.. هو حايعرف منين..؟.. حايسأل
مراته.. مراته حاتدله على الدكتور ابراهيم جوز بنت عمتها..
إفرض ما سألش مراته.. حايسأل زميله اللي قاعد جانبه.. ما
يعرفش هو راخر حايسأل خالته حاتدله على الدكتور فوزى جوز
بنت خالتها وفى الحالة دى حايتعين الدكتور ابراهيم أو الدكتور
فوزى.. والاثنين من عائلة فلان الفلانى.. لكن صدقتى هم ما
يعرفوش انهم من عائلة واحدة.. بيكتشفوها بس لما حد يموت
لهم.. ويتقابلوا فى العزا.. أستاذ نوح للمرة الأخيرة.. ولا
حاضرب نفسى بالنار.. قدامك دلوقت.. باسم أشرف وأجمل
الأشياء.. أرجوك.. الفى عملية نوح..

(توحيد يلهث بعد أن بذل مجهودا عنيفا فى إلقاء كلمته.. الصمت
يسود المسرح فى انتظار ما سيقوله نوح.. نوح ينهض من على السرير
وينزل إلى الأرض.. يفتح الحقيبة الكبيرة التى لا تفارقه.. يخرج منها
مظروفا أصفر كبيرا..)

نوح : إذا الواحد خسر كل شىء.. على الأقل ما يخسرش
شجاعته.. فعلا التجربة أثبتت أن عملية نوح غير قابلة
للتحقيق. أنا حاروح أعرض الموضوع كله على رؤسائى..
حاروح أعرض فشلى..

م. الاحتفالات : (بهوى شديد.. إنه هنا شخصية مختلفة تماما.. حازم، بارد.. يوحى
بأنه يستطيع أن يسود أى موقف إذا أراد..) مفيش داعى يا أستاذ
نوح. إحنا اللى حانتولى المسألة دى..

نـــــــوح : مسألة إيه؟..

م. الاحتفالات : مسألة عرض فشلك على رؤسائك..

نـــــــوح : انت بتتكلم بصفتك إيه يا أستاذ؟..

م. الاحتفالات : أنا معايا تفويض من المجلس كله أنى أتكلم باسمه.. وبطل

بقى نعمة التعالى اللى بتتكلم بيها..

فــــاطمة : من فضلكم.. ممكن ننهى المسألة دى دلوقت..

م. الاحتفالات : مدام من فضلك.. إحنا سئمنا المعاملة اللى بنتعامل بيها..

... : ده متصور أن مفيش وطنى فى البلد الا هو..

... : الأستاذ نوح مصاب بجنون العظمة.. وأنا مش باقول أى

كلام.. أنا طبيب ومستول عن كلامى..

... : أنا مش عارف إزاي المسؤولين يكلفوا واحد مهزوز بعملية

خطيرة زى دى..؟

... : إحنا ناس عندنا ضمير.. ولينا تاريخ.. ومانقدرش نسمح

بضياع روح مصر بسببه.

م. الاحتفالات : مش عاوزين كلام كتير من فضلكم.. أستاذ نوح.. تقرير

المستشفى أرسلت منه نسخة للقوميسيون الطبى ان حضرتك

لا تؤمن على اتخاذ قرارات لها صفة الأهمية..

تــــوحيد : ما هى العائلة فى كل حة..

م. الاحتفالات : (لتوحيد بصرامة).. حسابى معاك بعدين يا باشمهندس.. (لنوح).. لو

سمحت سلمنا كل أوراق عملية نوح.. احنا اللى حائنقذ العملية..

نـــــــوح : (يتشبث بالظروف بإحساس غريزى بالخوف).. عملية نوح مش

مجرد عملية فاشلة.. دى عملية خاطئة.. سيترتب عليها

تدمير روح مصر.. دى جريمة..

م. الاحتفالات : ادينا الظرف.. ما تضطرناش نلجأ للقوة..

(يتوزعون فوراً، اثنان منهم يسدان مكان الخروج.. والآخرين يتقدمون

فى اتجاه نوح)

نـــــــوح : يحدق فى وجه مدير الاحتفالات.. دى أسوأ حفلة عملتها فى حياتك.. حادفك ثمنها غالى..

م. الاحتفالات : هـ.. لو خرجت من المستشفى ابقى دفعنى ثمنها.. أدينى الظرف يا أستاذ نوح.. مفيش داعى للمقاومة.. خليك واقعى.. حانتبهدل انت ومراتك..

(صوت الإنذار ينبعث من الحقيبة.. مفاجئ.. حاد.. متقطع.. مفزع)

فاطمة : الانذار..

(الجميع يتسمرون فى أماكنهم وقد الجمتهم المفاجأة.. فاطمة تسرع

للحقيبة.. تخرج سماعة التليفون)

فاطمة : (تدارى اضطرابها بشجاعة هائلة).. أيوه يا دكتور.. أنا فاطمة..

أيوه.. نوح موجود.. والانذار وصل لنا.. اطمئن.. أخبارك

إيه..؟ (تلقت لنوح).. قدامنا أربعة وعشرين ساعة.. (تحقق

فى لاشى وهى تنقل ما يقوله الدكتور).. قدامه دقائق.. بدأ

الموج يعلى.. بتعمل إيه يا دكتور..؟.. (تحاول ان تبسو مرحلة)..

بتدخن البايب.. (لنوح) بيسمع مزىكة.. مش تسمعنى معاك يا

دكتور.. السيمفونية الخامسة.. مرسى يا دكتور.. فعلا

باحبها.. أنت لسه فاكـر..؟.. حاضر يا دكتور.. (لنوح)..

عاوزنى أهتف وراه.. حاضر يا دكتور.. جاهتف وراك..

(تصمت لحظة ثم تهتف بصوت خافت).. تحيا مصر.. تحيا

مصر.. (تكاد نسمع معها صوت الأمواج).. ألو.. ألو..

· (تضع السماعة وهى تدارى حزنها بنبالة.. لازال نوح قابضا على الظرف بشدة)

م. الاحتفالات : (نفاقه يأخذ شكلا حماسيا جادا، عليه مسحة من التوسل)... يا نوح

يا عظيم.. يا أعظم من أنجبته الأرض.. أنت أكبر منّا كلنا..

أكبر من كل تصرفاتنا الصغيرة.. قلبك كبير.. يغفر كل

حاجة.. احنا تحت أمرك فى كل شىء.. يالله ابتدى.. كل

لحظة حانتأخرها حاتفرق فيها قطعة من مصر.. مصر.. كل

شئ في حياتك وفي حياتنا.. آلاف السنين من التاريخ المكتوب بتبص لك دلوقة الزمن نفسه بيستنى أول خطوة منك.. يالله يا أستاذ نوح.. افتح الظرف.. وطلع أوامر التشغيل والكشوف.. وبلغ الجهات اللي حاتنقل الناس اسكندرية..

نوح : ناس مين؟ قصدك عائلة فلان الفلانى؟.. كما كنت عملية نوح.. مفيش عملية نوح..

نوح : يا مجنون..

(مدير الاحتفالات يتناول شينا ثقيل من على المائدة ويهجم على نوح لياخذ منه المظروف.. الجميع يساعونه.. توحيد يتدخل هو وفاطمة للدفاع عنه، يتمكن من الإفلات ولكن بعد أن يصاب بضربة على راسه.. يترنح.. لازال ممسكا بالمظروف..)

توحيد : إجرى يا نوح.. إجرى.. إجرى..

(يجرى نوح هاربا)

... : وراء..

... : امسكوه وخدوا منه الظرف..

... : اقتلوه..

(توحيد وفاطمة يسدان الباب بجسديهما للحظات إلى أن يتغلب عليهما

اعضاء المجلس ويجرون خارجين. توحيد وفاطمة وحدهما الآن..)

فاطمة : لو طلع على البيت حايمسكوه.. تفكر حايروح فين؟..

توحيد : أنا عاجز عن التفكير في أى شئ.. ماعرفش ليه في اللحظة دى بافتكر أبويا.. الله يرحمه كان راجل بسيط جدا.. مادخلش مدارس.. ساعات كنت أروح له في مشكلة مالهاش حل.. كان دايمًا يقول لى.. ارمى حملك على رينا يالله بينا يا مدام..

(يخرجان.. تخفت الإضاءة)

المشهد الأخير

(صالمة معيشة فى منزل ريفى قديم.. اثناء فخارى به
أخشاب مشتعلة، نوح يرتجف من البرد، يمد يده ليتدفأ..
يتحسس موقع الإصابة فى رأسه، ينتظر لراحة يده)

نـــــــــــــوح : ياه.. لسه بانزف.. ده أنا عندى دم كثير قوى.. هى دى
الحسنة الوحيدة فى كل اللى حصل.. عرفت أنى راجل
عندى دم.. بس بردان، بردان قوى.. (ينظر للأرض) .. ياه..
ده مالى الأرض، لو أمى هنا دلوقت، كان زمانها ضربتنى
ضرب.. بس هى مش هنا، ولا حد هنا ولا حد حايكون
هنا.. ده أنا طلعت غيبى غياب.. إحنا مش عاوزين عباقة..
إحنا عاوزين ناس عندهم دم.. يا سلام، لو فيه وقت كنت
أكتب البند ده وأنشره.. كل ما نريده هو رجال، عندهم دم..
(ينظر فى الكشوف).. عائلة فلان الفلانى.. بردانين طبعاً،
وعاوزين انقذك.. حاضر.. من عينى، حانقذك.. وحابعتكم
لمكان دافى جداً.. ملتهب.. (يلقى بالكشف الأول فى النار).. يصل
ويسلم إلى جهنم.. كله يتدفأ.. كله يولع.. كل عائلة فلان

الفلانى..وتستنى مصر، وييجى الهكسوس، ويولعوا،
وتستنى مصر، وييجى الرومان..ويولعوا..وييجى
الفرس..وتستنى مصر، كل اللى ييجى يولع..وتستنى
مصر..وتيجى عائلة فلان الفلانى، وبرضه تولع..
ومن حسن حظى أنى أنا اللى ولعت فيها..وتستنى
مصر..

وييجى الطوفان..

وتستنى مصر.

الطوفان هو اللى يفرق..

ياه.. ده أنا بردان قوى، لو فيه بطانية، لو أقدر أروح أجيب
الكليم المحطوط، على الكتبة دى.
أمى كانت دايما تغطينى بيه.

يا سلام.. لو أمى هنا دلوقت، كانت خدتنى فى حضنها
وعملت لى عروسة وخرمتها لى، لأنى عيان،
يا ترى حايجصل إيه بعد ما ييجى الطوفان؟
ولا حاجة.. حايفضل واحد وواحدة.
حايعملوا مصر تانى.

مطلوب واحد وواحدة عندهم دم.

وما حدش يضرهم..

وما ينزفوش.. ويعملوا مصر..

يعملوها إيه؟

يعملوها جميلة..

يا سلام.. ده أنا بقيت فيلسوف.. الظاهر الواحد وهو
بيموت، بيبقى فليسوف.. فعلا.. كل المطلوب هو مصر
جميلة..

مصر جميلة..

يا، ده أنا بردان قوى.. حاحاول أروح أجيب الكليم، اتفطى بيه.

(يحاول النهوض.. يفشل)

ياه، حتى الوصول للكليم أصبح حلم بعيد.. حلم مستحيل
طب أشوف النيل، أقعد جنب الشباك أشوف النيل، يا سلام،
النيل اللى كنت أمشى جانبه ومش حاسس بيه، أصبحت
رؤيته حلم مستحيل.

(خارت قواه تماما، فى اللحظة التى يسقط فيها ببطء يدخل توحيد
وفاطمة)

فاطمة : نوح..

(توحيد ينقل بصره بين رأس نوح وبين الأرض)

توحيد : (هامسا لفاطمة).. أصابته خطيرة.. نرف كثير..

(يرفعانه ويجلسانه إلى مقعد مريح)

نوح : (هامسا).. بردان.. (يشير للكليم).. الكليم ده..

(توحيد يفهم إشارته ويأتى بالكليم يغطيه به، يبدو أنه على وشك
الدخول فى غيبوبة الموت)

فاطمة : نوح، أنا فاطمة.. سامعنى..

(هزة خفيفة من رأسه)

فاطمة : ومعايا توحيد..

نوح : إزيك يا واد يا رزل.. عرفتوا إزاي أنى هنا ؟

توحيد : واحد من أصدقائك، قال لنا دوروا فى البيت اللى اتولد فيه،
عنندنا ليك خبر مفرح يا أستاذ نوح.. الطوفان ماحصلش..

الأخدود تمدد فى اتجاه البحر..

نوح : يعنى الطوفان هو اللى غرق.. احساسى كان سليم..

فاطمة : للأسف، البروفيسير وطقم البحارة اللى معاه يعتبروا
مفقودين.

نـــــــوح : ما تخافيش عليهم.. مش حايموتموا.. اللى مات فعلا.. هى عائلة فلان الفلانى.. أنا بعتهم جهنم كلهم دلوقت..

(فاطمة وتوحيد يتبادلان النظرات)

توحيد : أنا حاجيب دكتور فوراً.

نـــــــوح : متأخر يا توحيد.. (لحظة).. بس الطوفان موجود دايماً، دايماً موجود فى حياة الشعوب.. دايماً الطوفان مستعد يكتسح أى شعب غافل.. وما نعرفش نواجهه بعملية نوح.. عملية نوح فكرة قديمة.. ميتة.. أنا مش باموت من الإصابة اللى فى رأسى.. أنا باموت لأن فكرتى ماتت.. وأنت عايش لأن فكرتك حية.. فيه نوتة صغيرة فى جيبى.. فيها أسماء وعناوين، وأرقام تليفونات، روح لهم، وأشرح لهم فكرتك، فكرتك عملية جداً.

توحيد : حاسمها عملية نوح..

نـــــــوح : ما تعملش زى، ماتفرحش بالأكلشها، عشان ماتضطرش تدافع عنها.. سيب الناس تسميها زى ما تسميها.. عشان تبقى مسئولة عنها.. (يتفرس فى وجهه)... توحيد أنت مين؟ عارف أنت مين؟.. انت نوح انت الجزء الرزل اللى انفصل وأصبح على هيئة انسان.. فاطمة.. (بتساؤل).. إبنى؟

فاطمة : اطمئن عليه، حاربيه كويس قوى، حاخليه يحب المزيكة والشعر، ويفهم فى التاريخ.. حاخليه يعرف يضحك من قلبه.. حاعلمه يحب كل حاجة حواليه.

نـــــــوح : خليه يكره حاجة واحدة.. القبح.. أنا عاوزه يطلع زيك يا توحيد.. رزل.. عاوزه يقول لأ..

(يفمض عينيه، تمر لحظات، يفتح عينيه ببطء، وينظر فى دقشة)

نـــــــوح : سامع ناى..

(فاطمة وتوحيد يتبادلان النظرات.. بما يعنى انها لحظات النهاية)

توحيد : (يكذب).. إحننا كمان سامعين.. تلاقيه فلاح سهران في أرضه..

نسوح : بدأت أحس بالدفع.. يا سلام.. أنا دفيان جدا (يهمس باستمتاع).. الله..

(صوت الناي مع مؤثر صوتي لقارب يبتعد... مجدافان يصطدمان بالماء في رقة بالغة.. تثبت اللوحة.. صوت القارب يبحر بعيدا.. الناي مستمر، يبطء تخفت الإضاءة.. يبطء تنزل..)

الستار

بكالوريوس فى حكم الشعوب

قدمت على المسرح الجديد فى موسم ١٩٧٨
من إخراج الأستاذ شاكر عبد اللطيف
وبطولة الأستاذ نور الشريف.

• الفصل الأول •

المشهد الأول

المكان: عنبر النوم فى المدرسة الثانوية العسكرية فى بلد من

بلدان العالم الثالث.

الزمان: الأمس أو اليوم.. وقد يكون غداً.

(مجموعة من الطلبة مكونة من ثمانية أفراد يقفون فى حالة

انتباه صفاً واحداً وظهورهم للصالة.. امامهم يقف ضابط هو

المشرف على المدرسة).

المشرف : صفاء.. انتباه.. ولا حركة.. أشد من كده.. صفاء.. انتباه.. ثابت، ولا حركة.. منضبطين دلوقت، لما عرفتوا إنكم حتروحوا فى داهية.. صفاء.. لما عرفتوا أن الموضوع خرج من إيدى.. انتباه.. ولا حركة.. لو تعبنا قرصك وانت واقف فى الصف، مالكش دعوة.. ثابت ولا حركة... أقف كويس يا طالب يا بعكوك انت وهو.. إنتم أسوأ دفعة دخلت المدرسة.. حالاً حايبجى حضرة الضابط وكيل المدرسة وحضرة الضابط المدير.. حايبجوا يشوفوا كل حاجة على الطبيعة.. كل المنوعات وكل المصايب اللى معاكم حايشوفوها بنفسهم.. ويتصرفوا فيكم، أقف ثابت، ولا حركة.. بناقص سنة أولى.. تترفدوا وتيجى دفعة تانية.. آلاف الطلبة واقفين على الباب نفسهم يدخلوا.. ثابت، ولا حركة، خلاص.. أنا أعلنت فشلى.. أنا.. خريج أكبر كلية عسكرية فى بريطانيا.. مش عارف أسلك مع شوية عيال كانوا فى الاعدادية أول

إمبراح.. أربع شهور ومش عارف أعلمكم العسكرية.. المدرسة خدت قبلكم أربع دفع.. وفيه دفعة اتخرجت.. أقف ثابت، ولا حركة.. ماشفتش حد زيكم.. استهتار.. طراوة..

(يدخل الوكيل والمدير)

المشرف: صافحاً.. ثابت.. ولا حركة..

(المشرف يؤدي التحية للوكيل).

الوكيل: صفا.. انتباه.. ثابت..

المشرف: ولا حركة..

(الوكيل يؤدي التحية للمدير)

المدير: صفا.. استرح.. كل الطلبة اللي فى المدرسة، باعتبرهم أولادى.. وانتم عارفين كده كويس.. بس الظاهر الإنسان بيبقى له أحياناً بعض أولاد وحشين.. وإذا كان ده مسموح بيه فى الحياة المدنية إلا أنه غير مسموح بيه إطلاقاً فى الحياة العسكرية.. كل التقارير المرفوعة لى من حضرة الضابط المشرف على المدرسة، بتخلينى أشعر بالحزن... المدرسة ماشية زى الساعة، ما عدا سنة أولى.. وبمعنى أصح المجموعة «أ» من سنة أولى.. كنت فاكركم على وعى بحالة البلد.. إحنا حصلنا على استقلالنا من خمس سنين بس.. عندنا ثلاث مدارس ثانوى وكلية آداب لسه فاتحة السنة دى.. لكن أهم مدرسة عندنا.. هى الثانوية العسكرية اللي انتم بتتشرفوا بالانتساب إليها.. لحد دلوقت ما عندناش جيش محترف.. حتى أول دفعة اتخرجت.. طلعت بعثات برة.. ومارجعتش تانى.. وما عندناش بوليس كفاية يجيبهم.. صحيح بلدنا فقيرة.. لكن تقرير الخبراء بيقول إننا عايمين على بحيرة بترول.. أرضنا صحرا... لكن الصحرا دى، فيها مياه جوفية تزرع نص الدنيا.. انتباه..

(يعودون للانتباه فى حركة قوية)

الوكيل: ثابت..

المشرف : ولا حركة ..

المدير : انتم طليعة البلد .. صفا .. انتم الأمل .. انتباه.

الوكيل : ثابت ..

المشرف : ولا حركة ..

المدير : لما حاتظهر ثروة البلاد .. الكل حايطمع فينا .. ولابد من وجود جيش

قوى .. وانتم عماد هذا الجيش .. أنا عندي لكم خبر مؤلم .. صاحب

العزة ، رئيس البلاد ، عيان جداً .. بيحتضر .. وده سر .. أول حد يعرفه

الطبيب الخاص بتاعه .. وأنا .. وأنتم ..

الوكيل : (هامساً) .. الخبر أذاعته مونت كارلو .. ولندن وصوت أمريكا ..

والقاهرة .. وبغداد .. ودمشق والرياض ..

المدير : عارف .. وكل جرايد العالم نشرته .. بس آخر تعليمات عندي أنه

لا يزال سر .. (للطليعة) .. البلد .. مقبلة على فترة حرجة .. وجايز تحصل

متاعب .. ولى العهد صرح لوكالات الأنباء أنه مايقدرش يحكم ويسيب

أعماله التجارية .. مجلس الأعيان بدأت الصراعات تحصل جواه .. وده

أمر طبيعى .. أنا باقول لكم الكلام ده .. عشان تبقىوا رجاله وتتحملوا

مسئولية المستقبل .. من غيركم مش حا يكون فيه مستقبل (يخرج ورقة

صغيرة من جيبه يقرأها) ... طارق الرئيس ..

طارق : أفندم ..

المشرف : للخلف در .. خطوة للأمام ، مارش .. صفا .. انتباه .

(طارق يقوم بتأدية الحركات المطلوبة منه)

الوكيل : سريره فين؟

المشرف : أهو ..

(الوكيل يخرج من تحت مرتبة السرير عدة كتب ومجلات

وراديو ترانزيستور).

الوكيل : كتب ومجلات .. مخبئها فى سريره .. (يقرأ) .. ماهية الوجود .. إيه

ياخويا؟ .. مش عاجبك الماهية اللى بتدفعها لك المدرسة؟ فى كل البلاد

التانية، الطالب هو اللى بيدفع مصاريف.. (يعثر على صورة فوتوغرافية)..
وأدى صور عريانة..

طارق : مش ممكن يافندم.. أنا ماعنديش صور عريانة.

الوكيل : اخرس.. بتكذبني يا طالب.. أدى صورة بنت وشها عريان..

طارق : دى خطيبتى..

المدير : ماحدش طلب منك ترد.. وممنوع تخطب وانت طالب.. أنا حافترض

إنك ماعرفتش المعلومة دى.. أقف ثابت..

المشرف : ولا حركة..

الوكيل : جيل منحدر.. أنا عشت عشرين سنة مع مراتى.. وماتت من غير ما

أشوف وشها..

(يمسك احد الكتب ويلقيه بسرعة على الأرض كما لو كان لدغ منه).

الوكيل : يادى المصيبة.. يادى الليلة اللى مش فايتة..

المدير : كتاب إيه ده؟

الوكيل : شوف بنفسك يا أفندم.. أنا ماقدرش أنطق اسمه..

(المدير يلقي على الكتاب نظرة سريعة، بيتسم ابتسامة خفيفة

يدارها بسرعة، ويحدث طارق فى غضب مصطنع).

المدير : يخرب بيتك.. يخرب بيتك يا طارق..

طارق : حاضر يافندم..

المدير : ماتردش على..

طارق : حاضر يافندم..

المدير : ثابت.

المشرف : ولا حركة..

المدير : جمهورية أفلاطون؟.. كلمة جمهورية دى ممكن تقفل المدرسة وتحاكمنا

كلنا.. دى حتى النسخة الوحيدة الموجودة فى مكتبة القصر.. مترجمة

باسم مملكة أفلاطون.. الكتاب ده يتحرق فوراً..

طارق : حاضر يافندم.. أصله....

المدير : ثابت..

المشرف : ولا حركة..

(الوكيل يمسك ببضعة كتب أخرى).

الوكيل : كتب تاريخ.. وياريت تاريخنا اللي كله شجاعة وبطولة.. تاريخ أجنب..

طارق : فيه تاريخنا يا فندم تحت المخذة..

المدير : ثابت..

المشرف : ولا حركة.. عامل لى زعيم فى وسطهم.. وكل كلامه وأفكاره مستوردة

من بره المدرسة..

المدير : شهر حرمان من الفسح.. وسبعة حجز قشلاق.. (ينظر فى الورقة وينادى)

سعد السيف..

سعد : أفندم..

المشرف : للخلف در.. خطوة للأمام مارش..

(الآن يواجه الصالة)

المشرف : دائم الإخلال بالضبط والربط وحسن انضباط المظهر العسكرى..

إمبارح مريت عليه فى الخدمة لقيته نايم..

الوكيل : الحاجات دى تحصل من حد تانى يا سعد يا سيف.. أنت الوحيد اللى

يجب أن يكون قدوة فى الضبط والربط.. انت من عيله كلها سيفين..

أبا عن جد.. أبوك الله يرحمه كان بيعطل الخمسة جنب بعض ويضرب

رقايهم بالسيف.. ضربة واحدة.. عارف كده والا ماتوعاش عليه..؟

سعد : عارف يا فندم.. كان بياخدنى يفرجنى وأنا عندى ثلاث سنين.. عشان

كده لما باشوف لون أحمر باحس إنى علوز أتقايأ..

الوكيل : لأنك خرع..

سعد : حاضر يا فندم..

الوكيل : ثابت..

المشرف : ولا حركة..

(يخرج بعض الكتب من تحت المرتبة)

الوكيل : شعر.. وقصص حب.. وقلة أدب.. طالع رقيق لمين ياخويا؟.. أنت عاوز
تلوث تاريخ عيلتك؟.. ما كنت تدخل ثانوى أحسن لك وتدخل كلية
الأداب.. عشان تجيب لأهلك العار..

المدير : شهر حرمان من الفسح.. وخمسة حجز قشلاق.. غيره..

المشرف : أحمد تعيلب..

أحمد : أقندم..

المشرف : للخلف در.. خطوة للأمام مارش.. ده أحسن طالب عندى مثال للضبط
والريط.. حايفسد لو فضل فى المجموعة دى..

الوكيل : مش انت ابن تعيلب بتاع الشرطة؟..

أحمد : أيوه ياقتدم..

الوكيل : ونعم الناس.. عيلتك يابنى ولدة مائتين سنة قدمت للبلد أحسن
مخبرين.. جدك الكبير تعيلب البراق ابن البصاص.. كان يبص من
خرم الباب يعرف اللي قاعدين جوه بيفكروا فى إيه..

المدير : (باستياء)... غيره..

المشرف : ابراهيم كروان..

ابراهيم : أقندم..

المشرف : للخلف در.. خطوة للأمام.. مارش..

الوكيل : كل جدوده وأعمامه من كبار رجال الفقه والنحو واللغة.. ومع ذلك أبوه
طلع مغنى.. مش كده؟

ابراهيم : أيوه ياقتدم..

الوكيل : أبوك غلبنى لما كنت ماسك الأمن فى بلدكم.. أيام ما كان الغنا حرام...
كان عامل أوضة تحت الأرض بيغنى فيها لأصحابه، ويعزف لهم على
العود.. حاصرته عشر سنين.. ومع ذلك فشلت أضبطه متلبس.. اوعى
تكون طالع له..

ابراهيم : (باستنكار شديد).. أعوذ بالله يا فتندم.. أعوذ بالله..

المدير : معلوماتى أنك أحسن واحد يعرف عرى فى المدرسة..

ابراهيم : تقريباً ياقتدم..

المدير : آمال مين اللى كان بيغنى فى الميز إمبارح بعد العشاء؟

ابراهيم : أعوذ بالله ياقتدم.. ماكنتش بغنى.. كنت باقول تواشيح..

(الوكيل يخرج من سريره عدة شرائط كاسيت وجهاز ريكوردر

صغير).

الوكيل : أغانى وتواشيح من كل نوع..

المدير : شهر حرمان من الفسح.. وخمسة حجز قشلاق.. غيره.

المشرف : الأربعة اللى فاضلين من الجماعة لا حول لهم ولا قوة.. لكن

حايفسدوا.. طارق الرئيس بيعكى لهم حوادث من التاريخ وبيشرح لهم

حاجات تانية منيلة بمستين نيلة.. أسامة الزهار.. خليل الجمال..

مرسى محمد أحمد.. حسن أبو جراب.. للخلف در.. خطوة للأمام..

مارش.

المدير : أسبوعين حرمان من الفسح.. وثلاثة حجز قشلاق.. على سبيل

التحذير.. عشان تصحصحوا... (لابراهيم) ابراهيم..

ابراهيم : أقتدم..

المدير : تعال لى مكتبى بعد ربع ساعة..

ابراهيم : حاضر ياقتدم..

المدير : (للمشرف).. وزع الخدمات..

(الضابط، المشرف يحييهما، يخرج المدير والوكيل)

المشرف : أسامة..

اسامة : أقتدم..

المشرف : سور الكلية الغربى.. خليل..

خليل : أقتدم..

المشرف : سور الكلية البحرى.. حسن..

حسن : أقتدم..

المشرف : السور القبلى.. سعد..

سعد : أقتدم..

المشرف : باب السلاحليك.. صفأ .. انتباه.. انصراف..
(إظلام سريع للإضاءة مع كلمة انصراف وتصاعد المؤثر الصوتي لمدة عشر ثواني
ثم ظهور تدريجي للإضاءة).

المشهد الثانى

(ظهور تدريجى للإضاءة على أحمد تعليب وقد بدأ يخلع

ملابسه ويرتدى البيجاما.. يدخل طارق الرئيس..).

أحمد : حرقت كل الكتب؟

طارق : مش كلها.. اللى شافوها بس.. الكتب المهمة ماشافوهاش.. لأنها جوه

القطن بتاع المرتبة.. يعنى أنت يا أبو حميد طلعت أحسن طالب فينا..

أحمد : طبعاً.. أنا طالب مثالى..

طارق : مثالى فى إيه ياخويا؟... أنت بتعمل كل المصايب اللى فى الدنيا..

أحمد : لكن متغطى.. متدارى.. مش المهم الانسان يبقى كويس المهم أن

الآخرين تبقى فكرتهم عنه كويسة..

طارق : فى الغالب حاتطلع الأول علينا.. ولما نتوزع على الأسلحة، حاتسبقنا

فى الترقية..

أحمد : أنا دخلت المدرسة العسكرية عشان هدف واضح محدد..

طارق : تبقى ضابط كبير..

أحمد : تؤول..

طارق : رئيس مجلس إدارة شركة؟

أحمد : تؤول..

طارق : بطل عسكرى، من أبطال حرب الاستقلال.. لسوء حظك الاستعمار

خرج من عندنا بمزاجه..

أحمد : الأهداف الخيالية دى يفكر فيها اللى زيك.. (لحظات).. أنا فى أول

فرصة حاسمة لانتفاضة.. وأمسك الحكم..

طارق : إيه ... يخرب بيتك..

(ينفجر ضاحكاً)

أحمد : أمال انت فاكترنى حاتخرج ملازم تانى، وأول، ونقيب.. ورائد وعقيد

وعميد.. وكل رتبة من دول عاوزه مذاكرة وفرق.. ويعثات.. ولما أشم

نفسى ومرتبى يبقى كويس.. أطلع على المعاش..

طارق : نقيب على شونة.. الانقلابات العسكرية من هنا ورايح ماعادتش

مجزية.. مش حاتجيب همها..

أحمد : ليه..

طارق : عيبك إنك مايتقراش جرايد.. ولا بتتابع اذاعات.. الأمم المتحدة خدت

قرار أن أى حاكم عسكري.. لازم يكون حاصل على بكالوريوس فى

حكم الشعوب.. لأن حكم الشعوب، مهنة.. صنعة.. فن، زى الطب وزى

القانون.. وزى المحاسبة.. بل أصعب من دول كلهم..

أحمد : والأمم المتحدة حاتمنع الانقلابات إزاي؟

طارق : ماحدش فى الدنيا يعرف يمنعها.. حاترشدھا.. فيه أكاديمية أنشئت

فى الأسبوع اللى فات فى جنيف.. الأكاديمية دى حايدخلھا كل رؤساء

الحكومات العسكرية..

اللى ينجح، ياخذ بكالوريوس فى حكم الشعوب.. ويبقى حاكم شرعى

معترف بيه فى الأسرة الدولية..

أحمد : يا سلام يا طارق.. انت هائل.. فاهم كل حاجة.. أوعدك.. بمجرد ما

أوصل للحكم.. حاعملك رئيس وزارة.. أو وزير خارجية على الأقل...

طارق : أهو كلام.. أهو كلام بنسمعه منكم وانتم بره السلطة..

أحمد : لا والله، والعيش والملح..

طارق : أبو حميد مفيش داعى نضحك على بعض.. انت لو حكمت فى يوم من

الأيام.. حاتحطنى فى السجن، أنا وكل اللى زى..

أحمد : ليه لا سمح الله..

طارق : دلوقت انت ماتعرفش ليه .. لكن لما تحكم، حاتعرف .. ساعتها حاتلاقى أسباب وجيهة جداً ..

أحمد : (ضاحكاً) .. إحنا بنتكلم كما لو كانت المسألة جد ..

طارق : ليه لا ... ما هي بتبتدى كده ..

أحمد : طب افرض فيه واحد عمل انقلاب .. والتحق بالأكاديمية ..

طارق : أيوه ..

أحمد : وماعرفش يعيش في الدراسة .. وسقط في البكالوريوس .. يشيلوه ؟

طارق : يشيلوه إزاي ؟ ... حاييغتوله جيش ؟ ... حاييقتى تدخل في شئون الغير ..

واعتداء على استقلال دولة بالإضافة إلى أن الأمم المتحدة ماعندهاش

قوة تنفذ بيها قراراتها .. عارف زى إيه ؟ .. زى خالتي تقعد في الحوش

على الكنبه وأولادها نازلين ضرب في بعض .. وهى تقعد تقول ..

بس يا واد .. يا واد ماتضريش أخوك يا واد .. يا واد سيب أخوك يا

واد ..

أحمد : آمال يعملوا فيه إيه ؟ ..

طارق : ينشروا ورق الاجابة بتاعه .. ويعلنوا درجاته على العالم كله ..

أحمد : آه يفضحوه .. يجرسوه .. يقولوا أخذ صفر في الديموقراطية .. اتنين

على عشرة في الأخلاق .. صفر في التاريخ ..

طارق : ده انت بتقول الدرجات اللي ممكن تاخذها بالضبط ..

أحمد : فشر .. لا وشرفك .. لازم أخذ الفل مارك في كل مادة .. وأخذ

البكالوريوس بامتياز مع مرتبة الشرف .. لكن افرض .. افرض يعنى انى

سقطت .. مايقاليش كرسى في الأمم المتحدة ..

طارق : يبقى لك .. ويبقى لك مندوب .. بس مالكش حق التصويت .. تبقى عضو

في الأسرة الدولية صحيح .. بس عضو منتسب ...

أحمد : وبقية الدول حاييقتى موقفها منى إيه .. ؟

طارق : هي حرة .. تعترف بيك .. ما تعترفش .. بس على الأقل .. يبقى

معروف في العالم كله أنك ساقط .. ويتحكم من غير مؤهل ..

أحمد : مش مشكلة .. الواحد لما يوصل للحكم .. يبقى يقلع الكاكي .. ويبقى
يلبس مدنى .. ومايدخلش الأكاديمية دى.

طارق : هو الكاكي لبس بابو حميد .. الكاكي مفهوم .. وجهة نظر .. وبرضه
الأمم المتحدة عامله حسابها للحيل اللى من النوع ده تعريف الحاكم
العسكرى .. هو كل حاكم يصل للسلطة بلا انتخابات شعبية ..

أحمد : الله .. انت حانتقلها ليه ؟ ..بقى ندخل الأكاديمية ونتصرف .. نشترى
الامتحانات، نشترى الأساتذة .. نشترى الأكاديمية كلها ..

طارق : على رأيك .. مش مشكلة .. إحنا دلوقت فى عصر شرا كل شىء ..
ممكن تشتترى جوز ملكة .. رئيس حزب فى اليابان .. عصر مخجل ..
ومين عارف .. يمكن البلية تلعب معاك ..

(يدخل ابراهيم كروان، مضطرباً قليلاً. ولكنه يحاول ان يبدو هادئاً. يجلس على
سريره، يخرج من جوريه سيجارة ويشعلها).

أحمد : المدير كان عاوزك ليه يا ابراهيم؟

ابراهيم : ولا حاجة .. كان بياكد على ماغنيش تانى ..

طارق : لا يا شيخ .. طب ما كان ياكّد عليك قدامنا ..

أحمد : تلاقىه بيتفق معاه على حفلة خاصة .. عاوزك تروح تغنى للأولاد؟

ابراهيم : أعوذ بالله ..

طارق : صحيح كان عاوزك ليه ..؟

ابراهيم : حاجة شخصية ..

طارق : برهم .. عم الشيخ ابراهيم .. إحنا فيه بينا أسرار؟

(يدخل وكيل المدرسة، الثلاثة يهبون واقفين فى حالة

انتباه).

الوكيل : ابراهيم ..

ابراهيم : أهتدم ..

الوكيل : حصلتنى على المكتب ..

(الوكيل يخرج)

طارق : (معلقاً أثناء خروج ابراهيم) .. أيوه يا سيدى .. الفقى لما يسعد ..

(يخرج ابراهيم)

أحمد : حاجة غريبة ..

طارق : مفيش حاجة بتستخى .. حانعرف ..

(يدخل المشرف فيقفان انتباه)

المشرف : ابراهيم فين؟

طارق : عند حضرة الضابط ..

المشرف : رايح يعمل إيه ..؟ .. المفروض أى حاجة ييلفها لى أنا ..

طارق : حضرة الضابط الوكيل هو اللى طلبه دلوقت ..

المشرف : بمجرد ما يوصل بيحى لى فوراً .. أنا فى مكتبى ..

طارق : حاضر يا فتدم ..

(يخرج المشرف)

أحمد : سوجه على قوى ابراهيم .. الطلبات بتتزايد عليه جامد ..

ايه الحكاية؟

طارق : حانعرف .. يا خبر بفلوس .. بكره يبقى ببلاش ..

أحمد : على رأيك .. إنما انت تعتبر لغز بالنسبة لى طارق .. أربعة شهور مع

بعض دلوقت وماعرفتتش عنك حاجة غير إنك انسان مثقف وبتحب

خطيبتك .. إيه أحلامك ..؟

طارق : أنا أحلامى بسيطة جداً .. ماعنديش أهداف ولا آمال كبيرة زيك ..

أحمد : آمال دخلت الثانوية العسكرية ليه ..؟

(تبدا الإضاءة فى الخفوت ماعدا دائرة الضوء التى يوجد

فيها طارق .. تظهر عايدة خطيبة طارق).

طارق : حبيبتي أنا دخلت المدرسة العسكرية علشانك .. ثلاث سنين وأبقى

ضابط .. لى مكان .. ومعايا مرتبى .. ونتجوز ..

بعد كده حايبقى عندى فرصة آخذ ثانوية عامة وأدخل كلية الآداب ..

مين عارف يمكن أعرف آخذ الدكتوراه ..

عايدة : ولما تموت فى الحرب..
طارق : مش حايجصل حروب فى المنطقة بعد كده.. الحرب الوحيدة اللى إحنا
داخليناها دلوقت.. هى الحرب ضد الغلاء.. ودى مش حاموت فيها
لوحدى.. كلنا حانموت فيها..
عايدة : حارج معاك وأنا كاشفة وشى..؟
طارق : طبعاً.. وحاكون فخور بيكى..
عايدة : حاتسمح لى أشتغل...؟
طارق : لأ.. مش حاسم لك.. حارجوكى إنك تشتغلى.. البيت حايبقى محتاج
إنك تشتغلى.. وبلدنا محتاجة إنك تشتغلى..
عايدة : حايبقى عندنا بيت صغير وأولاد صغيرين..؟
طارق : أولاد صغيرين دى مضمونة.. بيت صغير حلم بعيد قوى..
عايدة : عارف يا طارق وأنا معاك باحس بإيه.. باحس إنى انسانة.. تفتكر
اليوم ده حايجى يا طارق.. إن الست فى بلدنا تحس إنها انسانة..
طارق : حايجى غصب عن الكل..
عايدة : النهاردة سمعت عمى بيقول لمراته يا حرمة، من الحرام.. تصور..
الست حرام.. يعنى أنا حرام..
طارق : حبيبتى انتى حلال جداً.. وحرام عليكى تقولى كلام من النوع ده..
ماتشغلش بالك بالمسائل دى.. أنا يهمنى تذاكرى.. وتنجحى.. من
حسن حظك أن أبوكى راجل متحضر، بيعاملك زى أخوكى بالضبط..
عايدة : ده مجتمع رجالة بس.. نص مجتمع يعنى.. رجالة خايفين من وش
المرأة.. من صوتها.. من عنياها.. من جسمها.. من وجودها نفسه..
يبقوا رجالة.. (تتردد) .. أقول والا تزعل؟..
طارق : أوعى تقولى الكلام ده فى المدرسة.. ليرفدوكى.. الجراءة الزيادة حماقة..
كل البنات بتقوله فى المدرسة.. لو سمعت مغامراتهم واللى بيعملوه فى
عايدة : الصيف فى لندن وباريس.. شعرك يشيب..
طارق : سيبك من القضايا الكبيرة دى.. طمئنى.. عاملة إيه فى الرياضة..؟

عايدة : زفت.. الست اللى بتدينا الرياضة مابفهمش منها حاجة ست فى
منتهى القسوة.. كل يوم تجيلنا عينها واردة، راسها مبطوحة، علامات
زرقا على دراعاتها.. اللى بيحصل لها من جوزها.. بتعكسه علينا..
ضربتني إمبارح خمستاشر عصاية..

طارق : ضريتك فين؟

عايدة : على أيدي..

(ياخد كفيها ويقبلهما)

طارق : (ينظر فى ساعته).. ميعاد المدرسة.. لازم أسلم نفسى قبل الساعة
ثمانية..

عايدة : حاشوك الخميس الجاي؟

طارق : إذا ماتحيستش..

عايدة : حاول ماتحيسش.. لو ماشفتكش الخميس الجاي حاتجن..

طارق : وأنا كمان..

(تخرج بهدوء، البروجى يعزف نوبة رجوع فى الوقت الذى تعود

فيه الإضاءة إلى ما كانت عليه).

أحمد : واضح إنك بتحيتها..

طارق : أنا باحب كل حاجة فى الدنيا.. كل شىء..

أحمد : يا أخى نفسى أحب الحب الكبير قوى ده.. أى واحدة باحبها.. يادوب

باحبها ربع ساعة بس.. تلت ساعة بالكثير..

(صوت موتور سيارة بيتعد، طارق يلقي نظرة سريعة من خلال

النافذة).

طارق : عربية جيب طالعة.. وفيها مجموعة بالسلاح.. فيه طوارئ الليلة دى..

أحمد : يبقى الراجل، الله يرحمه..

(يدخل سعد واسامة، سعد يصعد إلى سريره بكامل ملابسه).

سعد : الليلة دى أنا تعبان جداً.. وعندي خدمة كتجى.. تسيبونى أنا.. معنى

لا كوتشينة ولا طرقة.. ولا فرقة.. ولا مزيجة بصوت عالى..

أحمد : ماتكلمش اللي أقدم منك باللهجة دى ياله ..

سعد : أقدم منى إيه ياخويا .. إحنا دفعة واحدة ..

أحمد : اسمى قبل اسمك ..

أسامة : أنا كمان داخل أنا .. لو قلقنت ،، حانزل فيكم ضرب .. شوفوا لنا
سيجارة ..

(أحمد يقطع سيجارة نصفين ويتقاسمها معه)

سعد : (ينتبه فجأة وهو فوق سريرته) .. الليلة دى حصل حاجة غريبة قوى .. عربية
شيفروليه كبيرة .. طافية كل الأنوار .. جت وقفت جنب السور
الغريب .. ونزل منها واحد خواجة ومعاها شنطة سمسونايت ..

أحمد : شكله إيه ..؟

سعد : منزل البرنيطة على وشه .. وراح داخل على المكتب ..

خليل : عربية .. نفس الحكاية حصلت جنب السور القبلى .. عربية رولز
رويس كبيرة .. منورة النور الصغير .. جت وقفت جنب السور .. ونزل
منها واحد خواجة ومعاها شنطة سمسونايت .. وراح داخل على
المكاتب ..

(صوت موتور سيارة، أحمد يلقي نظرة سريعة من خلال

النافذة).

أحمد : يبقى أكيد الراجل مات .. وفيه طوارئ الليلة دى .. عربية جيب تانية
وفيها مجموعة بالسلاح ..

خليل : (يقف) .. عن اذنكم .. حاروح أنا .. أوضتكم دى تعلم الفساد ..

طارق : ليه ..؟ الكوتشينة حاتطلع دلوقت .. والسخان حايطظهر .. والشاى
حايتعمل .. والقعدة حاتحلو ..

خليل : لا ياخويا .. انت عاوزنى أنا فى الخدمة والا إيه ..

(يخرج من الكالوس الآخر، مرسى يدخل، يقطع المسرح فى

طريقه للخروج .. يستوقفه طارق).

طارق : أهلاً يا بو الأمراس .. استنى رايح فين؟

مرسى : رايح أنام.. عاوزين تودونا فى داهية والا إيه..؟.. خلاص.. بطلت كوتشينة..

طارق : تعالى أقعد.. (يعطيه سيجارة).. دخن السيجارة دى.. وروح نام.. لسة ما ضربيتش نوم.. اللى ضربيت من شوية دى.. نوبة رجوع..
(مرسى يجلس على أحد الأسرة ويشعل السيجارة.. يركن سلاحه بجواره، من الطبيعي أن الطلبة الذين كانوا فى نوبات حراسة معهم بنادق).

طارق : انت كنت خدمة على السور الشرقى؟
مرسى : أيوه..

طارق : ماحصلش حاجة غريبة وانت واقف؟
مرسى : آه حصل.. التلات أتوبيسات بتوع المدرسة طلوعوا..
طارق : طلوعوا فاضيين.. مش كده..؟

مرسى : أيوه..
طارق : ماحصلش حاجة تانى؟
مرسى : لا..

طارق : لأ إزاي يا مسطول.. يعنى مافيش عربية جت ووقفت جنب السور الشرقى؟

مرسى : آه.. آه.. فيه عربية سودة فخمة.. جت ووقفت جنب السور..

طارق : ماركتها إيه؟
مرسى : ماعرفش..

أحمد : مع انك غاوى عريبات.. ويتقول لنا على كل الماركات اللى فى الدنيا..
مرسى : شكلها غريب فعلاً.. بس فخمة..

طارق : نزل منها واحد خواجه.. سمين شوية كده..
مرسى : فعلاً.. انت شفته..؟

طارق : لأ.. وماكانش شايلى فى ايده حاجة..
مرسى : صح.. وايده كانت فاضية..

طارق : وخطوته عسكرية شوية..

مرسى : فعلاً..

طارق : وراح داخل على المكاتب على طول، من غير ما يبص يمينه ولا شماله..

مرسى : ده اللي حصل.. ليه؟

طارق : لا... ولا حاجة.. قوم نام انت..

(مرسى يدخل إلى الغرفة الأخرى، فى نفس اللحظة التى

نستمع فيها إلى صوت دوران موتور وانطلاق سيارة، أحمد

يتابعه بنظره من النافذة.. يدخل حسن أبو جراب فى طريقه

لغرفته).

حسن : سلام عليكم..

طارق : أهلاً يا أبو على.. ماتقعد تاخد شاي..

حسن : أقعد آخد شاي..

طارق : انت كان عندك خدمة على السلاحيك..

حسن : أيوه.. بس ماوقفتش، حضرة الضابط المشرف غيرنى.. ووقف طالب

من بتوع سنة ثانية..

طارق : آمال كنت فين؟

حسن : كنت فى الميز باتقرج على التليفزيون..

طارق : وانت جاى من الميز، مريت طبعاً على سنة رابعة وثالثة وثانية..

حسن : أيوه..

طارق : مين فيهم لابس طوارئ..؟

حسن : كلهم..

طارق : ليه..؟

حسن : ماعرفش.. أنا سألت واحد من بتوع سنة رابعة.. عمل نفسه مش

سامعنى.. واد من سنة تالته، قال لى اكل على الله.. واد من سنة ثانية

شخط فى..

طارق : طب روح نام..

حسن : آمال فين الشاي؟

طارق : شأى إيه يا مجنون .. إحنا عندنا شأى هنا ؟..

(يعنفه) .. إحنا فاتحينها قهوة ..؟

حسن : (ساخطاً) .. الله .. مش أنت اللي قلت لى أقعد خد شأى؟

طارق : الله .. ده بيقول لى الله ..

أحمد : عامله ميري أحسن ..

طارق : (بانفعال غاضب ينقصه الصدق) .. أقف انتباه وانت بتكلم حكمدارك ..

(حسن يتلصقاً فيصيح فيه) .. للخلف در .. على أوختك .. سريعاً مارش ..

(حسن يجرى داخلاً غرفته .. قبل أن يخرج يلتفت

لطارق) ..

حسن : نفسى أقابل حد فى المدرسة دى مايشخطش فى ..

(يخرج)

أحمد : طلعت بأيه يا شرلوك يا هولمز .. الراجل الملك مات ..

مش كده؟

طارق : راجل مين اللي مات يا أهبل .. الراجل ميت من أسبوع .. حاطينه فى

الانعاش وموصلين جسمه بقلب صناعى وكلية صناعية ورثة صناعى ..

كله صناعى .. بس يعتبر ميت من الجمعة اللي فاتت ..

أحمد : آمال ايه اللي بيعحصل .. إيه العربيات اللي وقفت دى ..؟

طارق : الشيفروليه الأولانية بتاع السفير الأمريكى .. والرولزرويس بتاع السفير

الانجليزى ..

أحمد : والعربية اللي ما نعرفلهاش ماركة ..

طارق : فولجا روسى .. واللى جاى بإيده فاضية السفير السوفيتى .. القوى

الأعظم نائمة معانا فى المدرسة الليلة دى بابو حميد ..

أحمد : يعنى إيه؟ القوى العظمى حاتعمل انقلاب ثلاثى ..؟ متيقين يعنى ..؟

طارق : لا .. كل قوة بتشتغل لحسابها .. يعنى ممكن أمريكا تكون مربطة مع

سنة رابعة .. انجلترا مع سنة تالتة .. الاتحاد السوفيتى مع سنة تانية ..

وفيه احتمال تانى وده الأرجح .. انهم مش مربطين ولا حاجة .. بس

مخابراتهم عرفت فجم يعرضوا خدماتهم.. الشنط السمسونات دى فيها الفلوس والنصايح.. هم بيسموها نصايح.. بس هى تعليمات طبيعاً..

أحمد : والسفير السوفيتى مش جايب معاه فلوس ليه؟.. عاوز يعمل انقلاب شكك؟

طارق : لا أبداً.. هو جاي الأول يشوف إيه اللى بيحصل على الطبيعة.. ويطلع جرى على السفارة، يكتب تقرير عاجل ويبعته موسكو بالشفرة.. أو باللاسلكى.. المخابرات الأمريكية طبيعاً حاتلتقطه بالقمر الصناعى، بالقمر الطبيعى بالشمس، بالهوا.. بالنجوم.. بأى حاجة.. وتروح طابعة منه عشرة آلاف نسخة توزعها على سفاراتها.. التقرير حاوصل الخارجية فى موسكو.. الخارجية حاترفعه لمكتب الحزب.. مكتب الحزب حايقوله لقسم العالم الثالث فى المخابرات.. بعد كده يتحول لإدارة الانقلابات.. يترفع لمجلس السوفييت الأعلى.. ينزل تانى لقواعد الحزب.. فى الآخر الورق كله يتحول للخارجية.. الخارجية تاخذ القرار...

أحمد : يكون حصل خمسة وعشرين انقلاب..

طارق : صح.. يدوروا على السفير السوفيتى عشان يبلغوها القرار.. يلاقوه قاعد فى موسكو.. هو وكل موظفين السفارة بيستوا بلد تانية يتعينوا فيها..

أحمد : والأمريكان؟

طارق : لأ.. الأمريكان حاجة تانية.. جاهزين.. السفير يفتح السمسونات... تلاقيها مرصوفة دولارات من فوق الوش.. ويروح قافلها تانى.

أحمد : وتحت الدولارات؟

طارق : فراخ.. جبنه.. زبده.. شوكلاته.. مصاصة.. الله؟ فىن يا سيدى الدبابات..؟ جاية حالاً.. فى السكة.. محطولة فى المينا.. بس لما الكونجرس يوافق.. ويروح باعت لك شوية رشاشات ومسدسات.. طب

عاوز طيارات... من عيني.. بس صبرك على لما آخذ موافقة
الكونجرس.. ويروح باعت لك شوية عربيات.. فى الآخر تصرخ بقى..
الحقونا بحاجة المسألة حايبقى شكلها وحش.. يروح باعت لك شوية
من الكونجرس بيتسموا لك...

أحمد : يعنى إيه.. مفيش أمل فى الاتنين..
طارق : لازم يبقى عندك أمل فى نفسك.. قبل ما يبقى عندك أمل فى
حد..

أحمد : آه.. أمل فى نفسى.. جينا للجد.. إحنا حا يكون دورنا إيه؟..

طارق : فى إيه؟..

أحمد : فى اللى بيحصل ده كله..؟

طارق : ولا حاجة..

أحمد : يعنى حانطلع من المولد بلا حمص؟

طارق : طبعاً..

أحمد : (تقلت اعصابه).. نعم.. ده بعدهم.. واللّه العظيم أروح فيهم السجن..
هم العيال بتوع سنة رابعة والا تالته ولا تانية.... أجدع مننا..؟

طارق : وطى صوتك يا مجنون..

أحمد : أوطى صوتى؟.. دول بيقتضوا على أحلامى.. بيدمروا مستقبلى..

أستنى أنا بقى مائة سنة لحد ما ييجى الدور على وأعمل الانقلاب

بتاعى..

(يرتدى ملايحه بسرعة)

طارق : حاتعمل إيه يا مجنون؟

أحمد : فيها لافخيتها.. حاخرج أشوف لى قوة عظمى من دول أتفاهم

معاهم..

(طارق ينهض ليمنعه فى حزم من تكملة ارتداء ملايحه).

طارق : أسمع يا انسان يا أهبل انت.. المسائل مش عبط.. ومش هزاز..

المسألة جد.. وخطر كمان.. ممكن يقتلوك ويقتلونى.. اعقل، البس

بيجامتك ونام.. وعدى الليلة دى على خير.. فيه احتمال ينزلوا ضرب
فى بعض.. خلىنا بعيد إحنا..

(يقاومه)

أحمد : سيبنى يا طارق.. سيبنى أرجوك.. لازم الحق حاجة..

طارق : حاتلحق إيه بس يا معنوه؟

أحمد : أى حاجة.. انشا الله حتى وزير أوقاف.. شئون اجتماعية.. شباب.. أى

حاجة من دى..

أحمد : بس.. لقيتها..

(يتجه نحو الكالوس الذى يؤدى للغرفة الأخرى)

أحمد : (صانحاً).. خليل.. حسن.. مرسى.. أسامة اصحى أنت وهو.. اجمعوا
عندى بسرعة..

(يعود لطارق)

أحمد : طارق.. لازم نسرق الانقلاب ده.. إحنا اللي حانعمله إحنا اللي هانقول بيه...

طارق : (يسرح).. إزاي؟

أحمد : أنا ماعرفش إزاي... لكن أنت تعرف..

(لحظات، طارق يهز رأسه بشدة وكأنه يبعد الفكرة من رأسه).

طارق : اطلع من نافوخي.. ابعد عنى..

أحمد : أوزنها فى مخك.. واسخن.. واسخن يا طارق.. اصحى معايا... أنا

عارف أن الفكرة بدأت تدخل عقلك.. وعقلك بدأ يشتغل فيها..

طارق : ابعد عنى يا أحمد يا تعيلب.. أنا مش قد الحاجات دى..

أحمد : خايف؟ انت عمرك ما كنت جبان.. خد قرار بسرعة يا طارق..

مفيش وقت..

(يدخل خليل وحسن ومرسى وأسامة يغالون النعاس)

مرسى : فيه إيه.. حصل حاجة؟

أحمد : فوق أنت وهو.. فيه انقلاب حايعصل الليلة دى.. وإحنا اللي

حانعمله.. وحانعمله حلو قوى..

خليل : حانعله إزاي؟
أحمد : طارق الرئيس هو اللي حاي فكر لنا .. هو اللي حايط الخطه وحانشكل
مجلس قيادة الثورة دلوقت..
حسن : (يتأهب).. ومين حايبقى الرئيس بتاعنا..
أحمد : أنا طبعاً..
أسامة : أنت حايتديها ديكتاتورية؟ تقول لى أنا طبعاً .. الرئيس بتاعنا لازم
يكون منتخب..
أحمد : مفيش وقت للديموقراطية..
أسامة : (وهو ينهض فى طريقه لغرفته) .. بلاش .. أروح أنا..
(أحمد يمنع من الخروج)
أحمد : طب تعالى.. ماتزعلش..
خليل : يا جماعة.. ديموقراطية، ديكتاتورية.. الوضع الطبيعى أن طارق هو
اللى حايفكر .. وهو اللي حايط الخطه .. وإحنا كلنا بنثق فيه.. فيه
حد عنده اعتراض أن طارق يبقى الزعيم؟
(الجميع يردون ماعدا أحمد)
الجميع : لا..
أحمد : أنا ماعنديش مانع.. طارق، أنا .. إحنا اخوات..
حسن : (يتأهب).. طب أنا عاوز أنا دلوقت.. ممكن نعمله بكرة الصبح..
أحمد : (ينهره بشدة).. انتيل اسكت.. قوم اغسل وشك عشان تفوق..
حسن : (يهمس جانباً).. لازم يشخط فى..
(يدخل غرفته)
طارق : يا جماعة من فضلكم.. كل واحد على سرير.. بلاش خرف فاضى..
أحمد : إيه يا طارق يا أخى..؟ هو الواحد ما يعرفش يطلب منك حاجة أبداً..
(أحمد يذهب لسرير سعد ليوقظه)
أحمد : سعد .. سعد .. قوم ياله.. فيه انقلاب..
سعد : يا أخى سيبنى أنا.. حرام عليكم..

أحمد : فيه انقلاب فى البلد.. (ينام مرة أخرى فينهره بعنف).. قوم يا ابن الكلب حاتبقى وزير..

(يجلس ولم ينهب عنه النوم بعد)

سعد : بتقول انقلاب..؟ دى بلدنا محتاجة انعدال..

(يدخل حسن نشطاً بعد أن غسل وجهه)

حسن : فقت.. جاهز.. عندى نشاط يعمل انقلابين ثلاثة..

(يدخل إبراهيم، يأخذ طريقه إلى سريره مكفهر الوجه).

أحمد : ابراهيم.. حانعمل انقلاب الليلة دى.. تدخل معنا..؟

سعد : (يتنأى بشدة، يعلق بهمس وعفوية).. آه.. ابراهيم يدخل بنفريقين..

(أحمد يلقي عليه نظرة غاضبة وهو يصبح فيه)

أحمد : قوم اغسل وشك يا سعد.. عشان تفوق..

(سعد يأخذ طريقه خارجاً من الكالوس)

ابراهيم : من فضلك ابعد عنى..

(ينهار على سريره يفشل فى منع نفسه من البكاء فينفجر باكياً).

أحمد : بتعيط ليه ياله..؟

طارق : سيبه يا أحمد.. ابعد عنه.. أنا عارف هو بيعيط ليه..

(إبراهيم ينجح فى السيطرة على نفسه ويبكى بصوت

خافت)

أحمد : اسمعوا يا جماعة.. المدير والوكيل والمشرف.. بيدبروا ثلاثة انقلابات

الليلة دى.. ومعاهم سنة رابعة وثالثة وثانية ده الموقف باختصار..

(يدخل سعد يجلس بجوار المجموعة)

أحمد : اسمع يا طارق.. خلص الهزار، مابقاش إلا الجد.. إذا كان قدر البلد

أن العسكريين يحكموها.. يبقى لازم انت اللى تحكم.. لما الانقلاب

يخرج من المدرسة دى، يبقى لازم انت اللى تقوم بيه.. أنا ماضمنش

حد تانى.. أنت انسان مثقف وقارئ.. وعندك مبادئ.. وبتحب بلدك..

وأدنى من المدير والمشرف.. وإحنا أكثر طهارة من سنة تانية وثالثة

ورابعة.. إحنا كنا لسه مدنيين من أربعة شهور.. يعنى حايبقى فينا

مزاييا الحكم المدنى.. والحكم العسكرى.. هم لأ.. هم خلاص بقوا
عسكريين.. الأهم من كده يا طارق، ممكن يكونوا بيشتغلوا لحساب
جهة أجنبية.. إحنا لأ.. إحنا حانشتغل لحساب بلدنا.. طارق إذا كنت
بتحب بلدك صحيح.. تقدم، لانقاذها.. أنا عن نفسى نسيت كل
أحلامى.. وبافكر فى حاجة واحدة وبس.. البلد.. أنا متأكد أنك لو
حطيتها فى مخك.. حاترسم خطة ناجحة مايه فى المايه.. طارق قلت
إيه؟ الوقت بيجرى قلت إيه يا طارق؟

(لحظات صمت، صوت طلقتى بندقية متتابعين.. سعد ينظر

من النافذة).

(بيطء وحزن).. ولد من سنة ثانية.. وولد من سنة تالتة.. مرميين على
الأرض بينزفوا..

(يبعد عن النافذة وهو يشعر بتقلص فى معدته، يجلس على

سريره وهو يحاول السيطرة على شعوره بالفئان).

سعد : بدأوا بالدم.. مش حايوقفوا..

ده اللي كنت خايف منه..

(طلقة بندقية أخرى.. يتحركون صوب النافذة).

سعد : (يصرخ فيهم).. أبعد عن الشباك أنت وهو..

طارق : (يبدو أن طارق يتعرض لإجهاد عصبى عنيف.. الكل ينظرون

له فى ترقب ولهفة.. صوت طلقة أخرى).

طارق : فيه اشتباك دموى حايحصل جوه المدرسة يا طارق.. وإحنا ممكن

نموت فيه.. أرجوك فكر.. على الأقل انقذ حياتنا..

(صوت طلقة أخرى.. طارق فجأة يتوقف وينظر للمجموعة

ويصيح فيهم بلهجة أمرة).

أحمد : اجمع..

(يتجمعون فى صف واحد بنشاط).

(لهجته الآن ونظراته شيء مختلف تماماً عن طارق الذى عرفناه فى الجزء

السابق من المسرحية)

طارق : .. السادة.. أعضاء مجلس قيادة الثورة.. صفا.. انتباه.. إحنا حانعمل دلوقت أهم وأسهل ثورة عسكرية فى التاريخ.. كل الخطوات والعمليات التمهيدية للثورة، اتعملت خلاص.. من حسن حظنا أن اللى قام بيها غيرنا.. مجموعة الأشخاص المسئولين المطلوب القبض عليهم.. خلاص اتقبض عليهم.. فيه مجموعات مسلحة طلعت وزمانها قبضت عليهم.. فى الغالب، حايعيسوهم هنا فى المدرسة.

(اصوات مواتير سيارات، يلقى نظرة سريعة من خلال النافذة).

طارق : قبضوا عليهم وجابوهم فعلاً.. الثلاث أتوبيسات مليانين.. البلد دلوقت مافيهاش مسئول واحد فى بيته أو على مكتبه.. القوى المتصارعة داخل المدرسة.. حاتشتبك مع بعض.. وحاكون اشتباك دموى زى ما قال أحمد.

أحمد : أنا من رأيي..

طارق : (فى غضب شديد).. ثابت.. ولا كلمة.. أنا المسئول وأنا اللى بافكر.. وأنا اللى باتكلم..

أحمد : (يعتذرى فى ضعف).. أنا آسف ياأندم..

طارق : (يوصل).. فيه احتمال أن القوى المتصارعة تخلص على بعض، فى الحالة دى إحنا حانتحرك بلا عقبات.. لكن أنا فى تصوورى أن سنة رابعة بحكم تدريبها وخبرتها، حاتتج فى القضاء على الثالثة وثانية.. بس حاتطلع من المعركة ضعيفة جداً.. قبل ما يلموا صفوفهم ويرتبوا أنفسهم.. حانكون إحنا اشتغلنا.. إحنا حانتحرك بمجرد الاشتباكات ما تتوقف.. أول حاجة حانعملها، نقبض على المدير والوكيل والمشرف.. أحمد..

أحمد : أفندم..

طارق : انت المسئول عن كده.. المشرف والوكيل يتحبسوا فى العنبر ده (يشير للكالوس).. المدير تجيبوهولى هنا.. مش عاوزه يغيب عن عيني لحد الثورة ما تتج..

أحمد : حاضر يا أفندم..

طارق : أسامة..

أسامة : أفندم..

طارق : حاتطلع على المكاتب.. تجيب لى آلة كاتبة.. وماكينه استتسل.. وختم المدرسة..

أسامة : حاضر يا أفندم..

طارق : خليل..

خليل : أفندم...

طارق : حاتنتظ من السور دلوقتى.. وتطلع على مبنى الإذاعة والتليفزيون..

تجيب لى أكبر موظف سهران هناك والدرجة المالية بتاعته.. ويعدين

تطلع على الداخلية.. تجيب لى اسم ورتبة أكبر مسئول نوبتجى..

علشان أطلع لهم القرارات..

خليل : قرارات فصل يا أفندم؟

طارق : ترقية.. حاخليهم وزراء.. وبالطريقة دى يبقى ضمنا الإعلام والأمن.. وهم

دول الجناحين بتوع أى دولة عصرية.. عاوزك لما تقابلهم تفهمهم إننا

مسكنا البلد خلاص.. مش لسه حانمسكها.. لو عرفوا أننا لسه حانمسكها

حايقبضوا عليك.. ماتطلعش مكانتهم، أقف تحت فى الاستعلامات واند

لهم بالتليفون، حاينزلوا لك على طول.. يالله.. ربنا معاك..

(خليل يخرج من الصف، يؤدى التحية ويندفع

خارجاً).

بقيت أهم نقطة.. وهى البداية الحقيقية للثورة.. إذاعة البيان رقم

واحد.. طبعاً المشرف والوكيل كتبوا ثلاث بيانات.. ولحسن حظنا

ولفرط غيابهم.. أدوها لشخص واحد..

(تتجه انظار الجميع لإبراهيم الذى يرتفع صوت نحيبه..

ينهض من على سريره ببطء ويخرج البيانات الثلاثة وقد

وضع كل واحد فى جيب، يعطيها لطارق الذى يمزقها).

ابراهيم : (يرفع رأسه لأعلى) سامحنى يا رب.. هم اللى ارغمونى على كشف

السرى.. وخدوا منى البيانات بالقوة..

طارق : طبعاً حلفوك على المصحف والمسدس إنك تكتم السرى..

ابراهيم : (بتعاسة) أيوه.. بس انتم هجمتوا على وخذتوا منى البيانات، تحت
تهديد السلاح..

طارق: لما يحاكمونا، حاشهد معاك بكمه... ولا يهمك؟
أنا بقى حاديلك البيان بتاعنا من غير ما أحلفك.. (بلهجة ودية)... أقف
فى الصف جنب اخواتك..

(ابراهيم متردداً)

طارق : أقف فى الصف، ماتحيرش المؤرخين.. حايقولوا كان معاهم، وماكانش
معاهم.. (لم يحسم الأمر بعد)... يا عزيزى ابراهيم، احنا قدرنا نموت
الليلة دى، يا حانموت فى الاشتباك، يا حانموت لما ننكشف.. وإذا
عشنا.. يبقى حانعرف نخدم بلدنا.. (بصرامة).. اجمع فى الطابور..

(إبراهيم ينضم لهم بسرعة)

طارق : كلمة أخيرة.. مفيش طلقة رصاص واحدة حانتضرب.. ولا حانستعمل
السلاح الأبيض.. البنادق اللى حانستخدمها.. كلها حاتكون مش
متعمرة..

(فجأة نستمع لدفعات مدافع رشاشة، وطلقات بنادق

وانفجارات).

طارق : (صارخاً).. أرقد..

(إظلام.. الضرب مستمر مع الإظلام الذى يستمر حوالى

عشرين ثانية، يتوقف كل شىء. ظهور تدريجى للإضاءة).

المشهد الثالث

(عند ظهور الإضاءة نجد طارق وحده على المسرح، هادئاً تماماً.
او لعله يحس بنوع من اليأس المريح أسلمه لحالة من
اللامبالاة. يمسك بيده أوراق كوتشينة يعيد ترتيب أوراقها في
هدوء. منضدة صغيرة في منتصف الحجرة تماماً.. يأتي
بكرسى ويضعه أمامها.. يأتي بجهاز راديو صغير ويضعه على
حافة المنضدة.. ينظر في ساعته ثم يفتح جهاز الراديو.. نستمع
إلى صوت محطة مغلقة... يخلق الراديو مرة أخرى.. يجلس..
يوزع أوراق الكوتشينة على نفسه وعلى لاعب وهمي يجلس
أمامه.. يبدأ في اللعب.. حسن ومرسى يدخلان بالوكيل).

الوكيل : (بصوت مختنق).. كده يا طارق..؟ ودينى لنا قاييل لأبوك..

(طارق يشير لهم أن يقتاداه للدخل)

الوكيل : (وهو يحاول المقاومة).. عيب يا طارق، ده أبوك صاحبى..

(يختفيان به، مرسى يعود)

مرسى : تصور.. الطجن ده كله.. ولا واحد مات.. إنما الإصابات كثير جداً..

(طارق لا يرد.. منهمكاً في اللعب تماماً... يدخل احمد وسعد

وأمامهما المدير.. لا يجب أن يقتاداه بشكل مهين).

طارق : اتفضل يا قندم..

طارق : المشرف فين؟

أحمد : مش لاقينه ..

طارق : (يقفز من مكانه وقد طاش صوابه) .. مش لاقينه؟ .. لو خرج من المدرسة
حاييوظ كل حاجة .. لازم تلاقوه فوراً .

(يتوتر، لا يدري ماذا يفعل .. وفجأة يسرع للمنافذة ويفتحها) .

طارق : (صائحاً بأعلى صوته) .. ثابت ..

(يأتى صوت المشرف من بعيد)

المشرف : ولا حركة ..

طارق : فى الجراش .. هاتوهولى ..

(يخرجان مسرعين، يجلس مرة أخرى إلى المنضدة، يلقي

بورقة وهو يشعر بالانتصار .. يدخل أحمد وسعد بالمشرف

يقتادانه بسرعة عبر المسرح ويختفيان به فى الكالوس الثانى،

يستولى طارق على كل الأوراق) .

طارق : أحمد .. اتصل بالمستشفيات .. وخليك مع المصابين وقدم لى تقرير ..

(أحمد يؤدي التحية ويخرج مسرعاً، طارق يلم الكوتشينة

ويضع أوراق اللعب جانباً) .

المدير : الدور لسه مانتهاش ..

طارق : الدور إنتهى .. والعشرة خلصت .. وأنا اللي خدتها ..

المدير : لأنك بتلعب لوحك .. أو متصور أنك بتلعب لوحك ..

طارق : لو لعبت مع أى حد .. أنا اللي حاكسب .. تحب تجرب ..

(المدير ينهض، يسحب كرسيًا ويجلس أمامه، مرسى يقف الآن

انتباه فى طرف المسرح. وطارق يرتب أوراق الكوتشينة بسرعة) .

طارق : (يوجه حديثه لمرسى) .. العصفور وصل العش؟

مرسى : وصل يا قندم ..

طارق : المهم يفنى على طول ..

مرسى : حايحصل يا قندم ..

(يوزع الأوراق)

المدير : حان لعب على إيه..؟

طارق : على الحاجة اللي طول عمركم بتلعبوا عليها..

المدير : واللى يخسر..

طارق : رقبته حاتطير بكرة الصبح.. رقبته ورقبة اللي خلفوه..

(اللعب مستمر.. المدير ورقه سيء)

المدير : انتم قد الحكاية دى؟

طارق : نجرب.. انتم بتحكموا من آلاف السنين..

المدير : احنا مين؟

طارق : الكبار.. كانت النتيجة إيه..؟.. تعاسة وغلب فى كل حته وكل مكان..

ادونا فرصة.. وسعوا لنا شوية جنبكم.. يمكن نعرف نعمل حاجة..

المدير : كل اللي حاتعملوه انكم تزودوا تعاسة الناس وغلبها..

طارق : مش ممكن.. دى مسألة عاوزه خبرة.. وإحنا ماعندناش خبرة من أى

نوع..

(يفتح الراديو، المارشات، يتوقف المارش ونستمع للمنيح).

المنيح : أيها السادة.. بعد قليل نذيع عليكم بياناً مهماً..

(يعود المارش، طارق يخفض الصوت).

المدير : (بحزم).. طارق، أنا باديلك فرصة دقيقتين.. تعتذر لى عن اللى إنت

عملته وتكتب استرحام وتروح تحط نفسك فى الكراكون انت

وزمايلك..

طارق : العب..

المدير : البلد فى ايدى..

طارق : البلد فى ايد الشخص اللي البيان حايتذاع باسمه.. العب..

المدير : البيان حايتذاع باسمى..

طارق : البيان بتاعك اتقطع من شوية.. العب.. خلص الدور وإنتهى

اللعب..

(تتوقف المارشات، طارق يرفع الصوت، نستمع للمنيح).

المذيع : أيها السادة.. بعد لحظات نذيع عليكم بياناً مهماً من طلبة السنة الأولى بالمدرسة الثانوية العسكرية..

(تعود المارشات، كالمذهول يقف المدير ويمد يده لرتبه العسكرية، ينزعها ثم يؤدي التحية العسكرية لطارق الذي يقف مشدود القامة.. ببطء شديد تخفت الإضاءة.. وتنزل..).

الستار

• الفصل الثانى •

المشهد الأول

(مكتب طارق.. شرفة متسعة في صدر المسرح تطل على ميدان.. منضدة اجتماعات نصف دائرية.. لوحة كبيرة عليها شعار.. (السعادة لكل مواطن).. طارق يطالع بعض الأوراق، وجهه متجهم قليلاً.. يرتدى ثياباً عسكرية زاهية.. أكبر عدد ممكن من أجهزة التليفون بأشكالها المختلفة.. يرد على مكالمات عديدة بإجابات مقتضبة.. مثال (موافق).. (لا).. (كويس).. (لسه بدرى على الحكاية دى).. (حدد له ميعاد).. (مش عاوز).. (حط نفسك فى السجن).. يدخل المشرف على مكتبه.. هو نفسه مشرف المدرسة.. يحمل أوراقاً، يضعها أمامه ويقف بأدب.. طارق يوقع على الأوراق.. يخرج المشرف.. يعود طارق للرد على التليفونات.. يدخل مدير المكتب ومعه أوراق.. هو نفسه مدير المدرسة السابق.. يقف بأدب وثبات إلى أن ينتهى طارق من التوقيع.. يخرج، طارق يعود للرد على التليفونات، يضغط على أحد الأزرار.. يدخل المشرف).

طارق : أنا طالب حضرة الضابط الوكيل، قصدى وكيل المكتب..

المشرف : وصل اليونان يا فتندم..

طارق : اليونان؟

المشرف : أبوه يا فتندم.. نزل بطيارة خاصة.. قال إنه حايفيب ساعتين..

طارق : حايعمل إيه فى اليونان..؟
المشرف : مأمورية خاصة.. ويبدو أنها شديدة الأهمية.. الطائرة كانت طالعة الكويت.. سيادة الوكيل استدعاها من الجو.. ونزل الركاب.. وخذ الطائرة، وطلع على اليونان..
طارق : فعلاً تبقى مأمورية مهمة.. بس أنا ماعرفش عنها حاجة..
(لحظة).. فيه احتمال يكون هربش..
المشرف : أنا متأكد يا فتندم أنه ماهربش ..
طارق : ليه متأكد..؟
المشرف : غداه هنا .. (طارق ينظر له فى برود).. وأسرته هنا .. وماكانش معاه شنط لما سافر..
طارق : أبتهولى بمجرد ما يوصل..
المشرف : حاضر يا فتندم..
طارق : مواعيدى إيه النهارده؟
المشرف : (يقرا من ورقة صغيرة).. عشرة ونص اجتماع مجلس القيادة.. حذاشر لقاء مع خبير السلاح.. حذاشر ورعب لقاء مع خبير الأمن.. متوقع أن المسيرة توصل الساعة اتأشتر.. حانخرج سيادتكم تحييبهم وتقول كلمة قصيرة..
طارق : المسيرة دى جايه منين..؟
المشرف : من كل أنحاء البلاد..
طارق : مين اللى عاملها..
المشرف : الشعب..
طارق : فاهم.. مين يعنى اللى منظمها..؟
المشرف : معلوماتى يا فتندم أن الشعب هو اللى منظمها.. (طارق يعاود النظر له ببرود).. بس الشعب استعان ببعض أعضاء مجلس القيادة..
طارق : هو ده اللى أنا عاوز أعرفه.. مين؟
المشرف : السادة.. سعد السياف.. مرسى محمد أحمد.. أسامة الزهار... خليل الجمال..

(يشير له بحركة خفيفة.. يخرج المشرف.. طارق يضغط زراً.. يدخل مدير المكتب يحمل دوسيهاً).

المدير : أفندم..

طارق : الوكيل سافر اليونان النهارده.. بدون ما يستأذن.. سفريه مربيه وتبعث على الشك.. عاوزك تبعث وراء مجموعة.. تدور عليه فى أوروبا كلها.. وتجيئولى..

المدير : فى صندوق يا فندم؟

طارق : صندوق؟ إيه حكاية الصندوق دى؟

المدير : ده نظام عامله هو شخصياً.. ساعات فيه ناس لازم نجيبهم من أوروبا بسرعة.. مايقاش فيه أماكن فاضية فى الطيران.. لكن العفش دائماً فيه مكان.. ولذلك بنجيبهم فى الشحن.. فى صندوق، وتذكره الطيران فى الشحن كمان بتبقى أرخص..

طارق : شكله إيه الصندوق ده..؟

المدير : شكله ظريف قوى.. من بره صندوق.. ومن جوه متجد على قد جسم الشخص المطلوب بالمللى.. الوكيل يجيب مقاس الشخص المطلوب من الترزى بتاعه..

طارق : طبعاً مش عامل صندوق لنفسه..

المدير : لا طبعاً.. بس أنا عامل له.. كنت عامل حساب حاجة زى كده...
(يدخل الوكيل مسرعاً وهو يلهث).

الوكيل : حضرتك عاوزنى يا فندم؟

طارق : (معنفًا).. كنت فين يا سيد؟

الوكيل : كنت فى اليونان يا فندم..

طارق : بتعمل إيه فى اليونان يا فندم؟

(يتردد ويبدأ فى الارتعاش تحت تأثير نظرات طارق الغاضبة).

طارق : رد ماتضطرنيش ألجأ لأساليب أخرى.. (يصرخ فيه)..
كنت بتعمل إيه فى اليونان؟

الوكيل : كنت باجيب زيتون أسود..

طارق : (مصعوقاً من الدهشة).. زيتون أسود؟

الوكيل : حضرتك طلبت إمبارح زيتون أسود على الفطار .

طارق : وجبت لى زيتون أسود على الفطار، ومستورد كمان..

الوكيل : أيوه يا فندم.. طليانى.. لكن لاحظت أنك بتاكل باستياء.. أو ماكنتش

مبسوط منه.. خطفت رجلى لحد اليونان.. لقيت زيتون كويس..

كالاماتا.. عظيم، حاتاكل صوابك وراء..

(طارق يطرق براسه فى اكتئاب ثم يكلمه بصوت مختنق،

وكانه على وشك ان يبكى).

طارق : حاتتهد الدنيا لو ماكلتش زيتون أسود كويس..

الوكيل : لو كنت حاجة مش عاجباك ممكن تتعكن.. ولما تتعكن ممكن تاخذ

قرار خاطئ فى أى مشكلة..

(ينظر للمدير مستنجداً)

المدير : ولو اتخذت أى قرار خاطئ فى أى مشكلة، ممكن الدنيا تتهد فعلاً..

الوكيل : المسألة بسيطة..

طارق : وجبت الزيتون؟

الوكيل : جبته يا فندم.. تحب تدوق..

طارق : لا.. كله انت.. مش حاكل زيتون..

الوكيل : زعلت يا فندم؟

طارق : لا.. مازعلتش.. مش فيه ناس بتبطل التدخين؟..

أنا بطلت الزيتون.. اتفضل..

(الوكيل يخرج.. طارق يعود لمكتبه.. المدير يعرض عليه

البوستة)

المدير : تلفرافات تأييد من كل أنحاء البلاد.. من كل نقابات العمال.. نقابة

عمال الحديد والصلب.. الغزل والنسيج.. الصناعات الثقيلة.. تعمير

الصحارى..

طارق : استنى استنى .. فيه فى بلادنا صناعة حديد وصلب؟.. ونسيج..
وصناعات ثقيلة.. أول مرة أسمع عن النقابات دى..
المدير : اتعملت الجمعة دى يا فندم.. (يمد يده بورقة أخرى).. برقية تأييد من
اتحاد عمال الغابات..

طارق : عمال الغابات فين؟.. فى فنلندا؟
المدير : لا عندنا..

طارق : هى بلدنا فيها خمس شجرات على بعض؟
المدير : ما هو علشان كده حانعمل غابات.. والبرقية من اتحاد العمال
الى ناوى يعمل الغابات دى.. ماتدقش يا فندم.. دى حاجات
معمولة من أجل العالم الخارجى.. آمال نقول للعالم الخارجى
إيه..؟

طارق : (بسخرية شديدة).. عندك حق.. أصل العالم الخارجى.. أهبل.. عيبط..
بريالة.. اللي نقولوله يصدق.. خواجهات بقى..
المدير : (وكانه يعتذر).. على العموم يا فندم.. دى تعليمات السيد أحمد
تيلب..

طارق : غيره..؟
المدير : (يمد يده بتقارير أخرى).. تقارير من أوروبا الغربية والشرقية..
وافريقيا... ومن البلاد العربية... كل رجالة العهد البائد.. وكل أفراد
مجلس الأعيان البائد.. عملوا خمسة وعشرين محطة إذاعة ضدنا..
وستين جرنال وبيجهزوا للغزو..

طارق : غزو؟
المدير : أيوه.. متطوعين.. ومأجورين.. ومرتزة..
طارق : يعترض على المجلس.. وتقارير الداخل؟
المدير : (يعطيه ورقة).. الشعب كله معانا.. ماعدا شوية طلبة وعمال ومتقشفين
ورجال دين.. شيوعيين طبعاً..
طارق : متأكد أنهم شيوعيين؟

المدير : والله يا فندم أنا باستنى توجهيات سيادتك.. لو حطينا ادينا فى ايد الكتلة الشرقية، حانقول عليهم رجعيين وتحريفيين.. وعملاء للبورجوازية والامبريالية العالمية.. ولو حطينا ادينا فى ايد الغرب.. حايقوا شيوعيين طبعاً.. ملحدين.. وأعداء الدين.. وفى الحالتين هم أعداءنا..

طارق : ولو وقفنا على الحياد.. يبقوا إيه؟

المدير : يبقوا ولاد كلب.. ومطلوب حماية البلد منهم..

طارق : قصدك حمايتنا احنا..

المدير : البلد هى الثورة.. وانتم قمتم بالثورة.. معنى انتم البلد والبلد هى انتم.. وأى عدو لكم.. يبقى عدو للثورة..

طارق : والحد؟

المدير : أهو.. على مكتب سيادتك..

(يشير لمجلد كبير موضوع على مكتب طارق)

طارق : (يفتح المجلد ويلقى نظرة ثم يصيح منفعلاً).. أمن أمن.. أمن أمن.. أجهزة أمن.. مكاتب أمن فى كل مكان.. وكل جهاز أمن يتعمل عليه جهاز أمن تانى.. وعشان الجهازين ينضبطوا، أعمل لهم جهاز أمن ثالث.. وهكذا.. كل المشاريع اللى متقدمه لى من زملائى.. كلها أمن فى الداخلى والخارج.. والميزانيات المتقدمة مخيفة.. عشرات الأصفار.. (يفتح بعض الأوراق).. الأسلحة المطلوبة غالية جداً.. لو وافقت على الطلبات دى كلها.. البلد حابقى نصها جيش ونصها مخبرين.. إحنا لازم نستفيد من كل أخطاء الحكومات العسكرية فى المنطقة.. لازم نفكر بشكل مختلف..

المدير : يا فندم ده علم.. لابد من جيش قوى.. وأمن قوى..

طارق : جيش قوى + أمن قوى = شعب ضعيف.. يتم ضربه وتفتيته وتقسيمه فى أول فرصة.. التاريخ قال كده أنا مش أجدع من هتلر.. والتجربة فى المنطقة بتقول كده..

المدير : مش فاهم..

طارق : الناس لازم تحب حياتها.. تعشقها.. كل واحد يحب نهاره وليله..
مفيش حد فى الدنيا.. يجروّ يقرب أو يعتدى على شعب بيحب حياته
ومستعد يموت عشانها.. تعالى.. (ياخذه من يده إلى الشرفة).. بص..
شايف إيه؟

المدير : أرض.. أرض.. أرض.. أرض..

طارق : تعبير مهذب جداً.. اسمها خرابة.. الخرابة دى مغربة جداً لأى حد..
أى عصابة.. أى واحد يفكر يستولى عليها بوضع اليد بقضية مزورة..
يعمل عليها غرزة ويقعد فيها وتبقى بتاعته بالتقادم.. ولو وقفت عليها
جيوش الدنيا مش حاتعرف تحميها.. لكن لو بنيت فوقها مصنع،
جامعة، معمل، لو زرعتها، مش ممكن حد يقرب منها.. هى دى
المسألة باختصار.. لو بلدنا وحياتنا بقت خرابة، أى حد حايطمع
فيها.. أى حد حاينط عليها.. يجيلك لابس عسكري، لابس سايح،
لابس تاجر، لابس مستثمر، لابس سمسار، لابس مزيكة، فى النهاية
هدفه واضح ومحدد.. الاستيلاء على الخرابة.. أنا بصراحة بقى مش
ناوى اعملها خرابة.. أنا حاعمل بلدنا شىء عظيم وجميل..

المدير : يا فتندم الرومانسية والأحلام حاجة، والواقع حاجة تانية..

طارق : مش أحلام.. الصحرا دى كلها لازم تترزع وتتصنع.. وكل واحد يحرس
غيطة ومصنعه بفاس ويندقية..

المدير : يا فتندم أنا باحترم فيك أحلام الشباب وطهارته، وتقواته، وحماسه..
لكن لو استمررت تفكر بالشكل ده.. حايجوا يدبجوك هنا فى مكتبك..

طارق : آه.. يعنى كل الاجراءات دى لازم تتعمل عشان أحمى نفسى..

المدير : عشان تحمى البلد..

طارق : (يكاد يصرخ فى انفعال شديد).. أنا مش البلد.. أنا طارق..

(على الفور نستمع لصوت عايدة وهى تنادى بعصبية وكأنها

تستغيث).

صوت عايدة : طارق.. يا طارق..

طارق : (ينسى وضعه الجديد ويجيب بصوت عال) .. أيوه.. مين اللى بينده؟
(يستعيد نفسه على الفور ويتكلم بوقار شديد) .. أيوه يا عايدة..
تعالى..

(عايدة تدخل مندفعة، يتلقاها بين ذراعيه.. مدير المكتب على
الفور يؤدي حركة للخلف در بنشاط زائد.. طارق يشعر بحرج
فيبعدها عنه بركة).

طارق : (للمدير) .. نستكمل نقاشنا بعدين..

(يخرج المدير)

عايدة : الناس دول تنبه عليهم، يدخلوني بمجرد ما آجى.. مش يسيبونى
ملطوعة بين السفرا والوزرا.. واللى..
طارق : (يقاطعها مهنئاً) .. طب إهدى بس.. إهدى يا حبيبتى.. فيه نظام.. لازم
نحترم النظام..

عايدة : خمستاشر نفر شافوا الكارنيه بتاعى.. وكل واحد يقعدنى على دكة
وياخد الكرنيه ويغيب نص ساعة.. ويرجع يعتذر لى ويبتسم.. الحكاية
دى اتكررت عشر مرات.. وفى الآخر واحد قعد يحقق معايا.. (تقلبه
بسخرية) .. عاوزاه ليه؟ .. أنا خطيبته.. أيوه يا فندم عارف إنك
خطيبته.. أنا قدامى ورق لازم أملاه.. لايد من كتابة الغرض من
الزيارة.. عاوزاه ليه؟ .. أخيراً اضطررت أقول له وانت مالك يا أخی
عاوزه أحبه شويه...

طارق : حبيبتى دى اجراءات أمن.. لايد من حماية الثورة..

عايدة : حمايتها منى أنا؟ .. دى تبقى ثورة ضعيفة قوى..

طارق : (يتلفت حوله كما لو كان يخشى ان يسمعها أحد) .. وطى صوتك..

عايدة : (هائسة) .. هى الحيطان لها ودان كمان؟

طارق : هنا بقى الودان لها حيطان.. الكلمة بتاعتك دى قالها واحد على قهوة
إمبارح..

عايدة : وحصل له إيه؟

طارق : أبداً.. مش حايقتد على القهوة تانى.. فى الغالب لمدة عشر سنين..
حبببتى مفيش داعى نتقابل هنا.. لأنهم بيطبقوا التعليمات على أى
حد.. انشا الله يكون أبويا..

عايدة : من يوم ما عملتوا الانقلاب..

طارق : (مصححاً).. الثورة..

عايدة : من يوم ما عملتوا (تتريد لحظة وكأنها لا تؤمن بصحة الكلمة ثم تواصل)..
من يوم ما عملتوا اللي عملتوه.. سبعة أيام دلوقت ومفيش ولا تليفون
منك..

طارق : أسف.. كنت مشغول جداً.. وما اتصلتيش انت ليه..؟

عايدة : كل ما اتصل، يحولونى على خمسين سويتش.. وفى الآخر الأليك
بتكلم واشنطنون.. باريس.. لندن.. موسكو..

طارق : معلش.. الفترة الأولانية.. حاتبقى عصيبة شوية.. لكن بعد كده،
حياتنا حانتتنظم.. وحانشوف بعض كثير..

عايدة : (صوتها بدا يكتسب رنة حزينة).. حانشوف بعض كثير؟.. والله أنا
خايفة يا طارق.. أنا بدأت أخاف على علاقتنا.. أكثر من كده،
بدأت أخاف على حياتنا نفسها.. كل اللي كنا بنحلم بيه.. اتهد
خلاص..

طارق : إيه الكلام اللي بتقوليه ده؟.. بقى الأحلام اللي كنت حاحققها وأنا
ضابط صغير.. مش حانعرف نحققها وأنا رئيس دولة؟..

عايدة : طارق أنا أحلامى صغيرة قوى.. وعادة رؤساء الدول مايعرفوش
يحققوا الأحلام الصغيرة.. (لحظة).. لما كنت بتأخر عن المدرسة عشر
دقايق.. كانت الناظرة بتستأنى على الباب ومعها العصاية.. إمبراح
رحت المدرسة متأخرة ثلاث حصص..

طارق : (ضاحكاً).. طبعاً لقيت الناظرة واقفة من غير العصاية..

عايدة : لقيت وزير المعارف.. وكل المسؤولين فى الوزارة.. ومنسوب اليونسكو..

واقفين صف واحد قدام المدرسة.. خير يا فندم؟.. إيه اللي أخرك
يا فندم؟.. عسى يكون خير يا فندم؟..

(يكتئب للحظة ولكنه يحول الأمر لنكتة)

طارق : ودى حاجة تزعلك؟.. ناس مهتمين بيكى..
عايدة : أهو الاهتمام ده هو اللي بدأ يفقدنى طعم حياتى.. كل ما أخرج من
البيت باخرج فى موكب.. موتوسيكلات.. وحرس.. انت عارف إنى
بالعب تنس فى نادى شركة البترول..

طارق : أيوه.. حد ضايقتك؟..

عايدة : لا.. بس كل ما ألب، اللي قدامى يتغلب لى.. غلبت كل أبطال النادي..
إمبراح دخلت السينما أنا والأسرة.. لاحظت حاجة غريبة.. بتوع
البوفيه يبيعوا ورق دمعة وطوايع دمعة.. وكل المتفرجين بيشتروا منهم
وهيصة وزيطه.. وخناق وضرب..

طارق : وبعدين؟..

عايدة : بمجرد ما السينما نورت فى الاستراحة.. كل المتفرجين اللي فى
الصالة والبلكون والألواج.. هجموا على يدونى شكاوى وعرايظ.. اللي
انطرد من بيته.. واللى عاوز شقة.. واللى مظلوم فى الترقية.. واللى
عيان وعاوز يتعالج.. (حزينة).. يبدو أنى من هنا ورايح.. حاعيش حياة
غير طبيعية.. (لحظات).. طارق..

طارق : أم..

عايدة : ماتعرفش ترجع فى كلامك؟

طارق : أرجع فى كلامى؟.. الثورة، هى الحاجة الوحيدة فى الدنيا.. اللي
يعملها، مايرجعش فى كلامه.. إلا فى حالتين.. يموت.. أو حد يرجعه
فى كلامه بالقوة.. عايدة، أرجوكى.. ماتحوليش المسألة لمأساة.. المهم
أننا ماننفيرش.. مانحشمش أننا فوق البشر.. هو ده المهم.. (يحاول تغيير
مجرى الحديث).. قوليلى يا حلوة.. الست بتاعة الرياضة عاملة فيكى
إيه؟..

عايدة : مابتديناش دلوقت.. الوزارة نقلتها على الحدود.. على بعد ألفين وخمسمائة كيلو..

طارق : (وهو يقوم ليكتب ملحوظة).. آمال مين اللي بيديكى الرياضة؟
عايدة : الوزير.. بيدى فصلنا بس.. راجل مهذب.. وبافهم منه كويس... (تقلد الوزير).. فهمتى يا فتندم؟.. أشرح لك تانى يا فتندم؟.. لو المسألة صعبة عليكى.. بلاش تحليها يا فتندم.. والحاجة الصعبة بيحذفها من المقرر وهو واقف..

طارق : جميل.. بيحذفها من المقرر بتاع الفصل ولا المدرسة؟
عايدة : متهيأ لى من المنهج بتاع الوزارة.. لأنه بيحذف ويروح ماضى على قرار وزارى بال حذف.. وكيل الوزارة بيبقى واقف وراه.. ياخذ القرار ويطلع جرى يطبعه استتسل..

(يكتب ملحوظة)

عايدة : طارق..

طارق : أيوه..

عايدة : أنا جاية أسألك سؤال محدد.. بابا وماما وكل قرايبى بيكلمونى فى الحكاية دى..

طارق : حكاية إيه؟

عايدة : حانتجوز امتى..؟

طارق : لما أنتخرج.. لازم أدخل أكاديمية حكم الشعوب فى جنيف.. عشان أكون حاكم معترف بيه.. فى الأسرة الدولية لازم يكون معايا بكالوريوس فى حكم الشعوب..

عايدة : تضمن لى.. بعدما تاخذ البكالوريوس وترجع.. ماحدش يقبض عليك فى المطار؟

طارق : ماحدش فى الدنيا بيضمن حاجة.. أنا أعمل الصح والباقى على ربنا .

عايدة : نتجوز وأسافر معاك سويسرا..

طارق : لا.. لازم تكملى تعليمك.. ماحدش ضامن الظروف.. يحصل لى أى

حاجة يبقى معاكى شهادتك... كمان قوانين وزارة المعارف بتمنع أى بنت
إنها تتجوز وهى فى المرحلة الثانوية..
عايدة : القانون ده اتلغى.. لجنة تطوير القوانين لغته... الوزير نده لى فى
الفسحة وقال لى الخبر ده.. والمدرسة كلها قالت لى مبروك..
(ينهض لمكتبه ويكتب ملحوظة)
عايدة : (تواصل).. والا عاوزنى أستاك أربع سنين.. المتغيرات الدولية سريعة
جداً.. ماحدش عارف حايجصل إيه فى الأربع سنين دول..
طارق : سنة واحدة.. المقرر بتاع حكم الشعوب مضبوط فى سنة واحدة.
عايدة : شكلى كما لو كنت باترجاك تتجوزنى.
طارق : حبيبى أرجوكى.. ماتقوليش الكلام ده..
عايدة : (ببطء وحزن).. طارق.. لأول مرة باشعر بالخوف.. مش المخاوف
العادية اللى كل الناس بتحسها.. لأ..
طارق : من إيه.. وعلى إيه؟
عايدة : من كل حاجة.. وعلى كل حاجة.. (يختنق صوتها).. أنا مش بالومك..
أنا جزء من الماضى.. أو زى الجرايد ما بتقول.. من العهد البائد....
مفيش داعى نخجل من بعض.. ومفيش داعى لمحاولة التهرب منى..
أنا مش حاطاردك.. (تبدأ فى خلع الدبلة).. مش حاطاردك يا ريس..
طارق : بتعملى إيه يا عايدة؟
عايدة : ولا حاجة.. (تخلع الدبلة).. عشان تبقى خفيف وإنى بتنطلق بالبلد
لقدام.. علاقتنا حاتثقل حركتك.. إنت كمان ماتتكسفش... اقلع
دبلك...
طارق : عايدة..
عايدة : مش عاوزه أحطك فى موقف اختيار صعب.. بين الحكم والحب.. حط
الدبلة فى دول فى متحف مكاسب الثورة.. (يزداد صوتها اختناقاً)..
باعتبارهم.. باعتبارهم رمز... رمز لأول خساير الثورة..
(تخرج فى اندفاع قبل ان تنفجر باكياً)

طارق : (ينادى).. عابدة..

(على الفور يدخل الوكيل)

الوكيل : أنا حاططها يا فتندم تحت رقابة شديدة.. فيه احتمال تكون فيه جهات
أجنبية وراء فسح الخطوبة..

(طارق يضطرب بعد ان أدرك أن كل حوار مع خطيبته كان
مسموعاً.. ينظر له بغل شديد ثم يكمل بتؤدة ويطء وكأنه
يحاول منع نفسه من الانفجار).

طارق : من فضلك.. شيل الميكروفونات اللى فى مكتبى..

الوكيل : يا فتندم الشغل له أصول..

طارق : من فضلك شيل الميكروفونات اللى انت حاططها فى مكتبى.

(وكيل المكتب يهز رأسه فى استسلام.. يخرج من جيبه حقيبة
بلاستيك صغيرة بها بعض مفاتيح ومفكات صغيرة، يبدأ فى
خلع الميكروفونات.. يتناول فاعة زجاجية.. الميكروفونات
موضوعة فى كل مكان فى الغرفة.. الحوائط.. الأرضية ..
مكتب طارق نفسه.. ملتصقة بكل الأثاث.. يضعها فى الفاعة
واحداً وراء الآخر فنستمع لصوت ارتطامها بقاع الفاعة
الزجاجى.. ولتسهيل المهمة على المخرج من الممكن أن تكون
هذه الميكروفونات، دبابيس رسم أو مسامير تنجيد... مفروسة
فى كل مكان.. الوكيل ينتهى من لم الميكروفونات ثم يأخذ
طريقه خارجاً..).

الوكيل: (وهو خارج).. الباقى مش بتاعى..

إظلام تدريجى

المشهد الثانى

(المسرح مظلم، أسامة يدخل ومعه شمعة، يرتدى عباة بيضاء لها غطاء رأس، ليس مهما أن يتبين الجمهور ملامح الممثلين فى هذا المشهد.. وإضاءة المشهد بشمعة واحدة كافياً تماماً.. ثلاثة اشخاص آخرين يظهرون .. يرتدون نفس الملابس.. الحوار يدور همساً بين الجميع وفى جو يفوح بالتأمر).

أسامة : قف من أنت..

سعد : ده أنا سعد .. ومعايا خليل ومرسى..

أسامة : كلمة سر الليل؟

الثلاثة : الحق نفسك قبل ما تتاكل..

أسامة : تعالوا..

الثلاثة : خير..

أسامة : لا مش خير.. عندى ليكم أنباء مؤلة..

الثلاثة : يا ساتر..

أسامة : الأفندى ناوى يضيع البلد .. ويضيعنا..

الثلاثة : يضيعنا مفيش مانع.. إنما يضيع البلد.. لأ..

أسامة : ناوى ياكلنا كلنا.. أول حاجة اتخلص منها خطيبته.. بعد كده

حابتخلص مننا واحد ورا واحد..

الثلاثة : مش معقول.

أسامة : معقول ونص.. أنا وقع فى ايدى تقرير خطير.. كاتب فيه بخط
إيده... لابد من الانفراد بالحكم والتخلص من بعض زملائى.. لأنهم
عيال..

الثلاثة : والله ما حد عيل إلا هو..

أسامة : هو طبعاً مش حايخلص من أحمد وإبراهيم وحسن لأنهم بتوعه..
ومسكهم أكبر حئت فى الوزارة.. ماسكين الداخلية والخارجية
والخزانة والإعلام.. ماسكين ومتبتين جامد..

سعد : أنا يا حسرة ماسك أهيف حاجة.. الثقافة.

خليل : آمال أنا أعمل إيه.. أنا ماسك الصحة.. يعنى العيانيين.. نفسى أمسك
حاجة فيها الخير..

مرسى : وأنا قال إيه ممسكنى السياحة.. مش عارف أمسك فيها حاجة
خالص.. ولا سابح عاوز ييجى..

أسامة : مفيش غير حل واحد.. عارفينه؟

الثلاثة : نتغدى به قبل ما يتعشى بينا..

أسامة : ونعم الكلام..

سعد : بس يا جماعة أحنأ حالفين على المصحف ماحدش يأذى الثانى.

أسامة : الحلفان ماينطبقش علينا.. لأننا حناأذيه أذية دفاعية.. دفاعاً عن
البلد..

خليل : وعلى أسوأ الظروف.. وعشان مانطلعش كدابين قدام رينا سبحانه
وتعالى.. ليها حل.

الثلاثة : نصوم ثلاثة أيام..

سعد : هس.. حد جأى..

(يطفىء الشمعة، يظلم المسرح)

المشهد الثالث

(ظهور تدريجي للإضاءة، إبراهيم وأحمد يدخلان)

إبراهيم : السلطة دى لذة.. أنا كنت فاكرا ان أحسن حاجة فى الدنيا هى الكباب.. بعدما وصلت للحكم غيرت رأيي.. تصور.. أبويا إمبراح راح يدفع ايجار الشقة.. صاحب البيت حلف مائة طلاق ماهو واخد فلوس.. خطيب أختي كان متفق يدفع خمسمائة جنيه مهر وشيكة...
جه من نفسه دفع عشرة آلاف استرليني..

أحمد : مش كده ويس.. السلطة كمان تخلى حظك كويس.. من خمسة أيام جالى واحد باع لى أرض المتر بربع دولار.. إمبراح بالليل جه اشتراها... تانى.. المتر بألف دولار.. عملت مبلغ ماكنش عند الملك قارون..

إبراهيم : حاجة غريبة.. الراجل ده عنده أرض كثير قوى.. أنا كمان اشتريت منه.

أحمد : بيعت له تانى؟

إبراهيم : إمبراح بالليل برضه.. راجل ظريف جداً.. سافر سويسرا النهاردة الصبح.. أدبت له المبلغ يحطهولى هناك فى اليوسته.. والظاهر كمان باع لبعض زملائنا.. الواد اسامة كان بيعتنى إمبراح.. ما باع لى وبعث له..

(يدخل حسن أبو جراب ومعه مجلة أجنبية)

أحمد : (يعتفه فى غضب).. إيه يا حسن.. كنت فين يا أخى؟

حسن : بأقولك إيه .. ماحدش يشخط فى .. ماتشخطش فى تانى .. كفاية اللي حصل؟

أحمد : إيه اللي حصل؟
حسن : شخط فى التليفون ... أجهزة التصنت التقطت المكالمات .. اتفضل شوف الجرايد الأجنبية كاتبة إيه النهاردة (يقرا) .. صراعات حادة وخلافات عميقة فى مجلس الثورة .. كويس كده؟

أحمد : أنا أسف يا أبو على ...
حسن : انتم قاعدين على مكاتيبكم وأنا دايع فى البلد باعمل نقابات .. وابعت تلفرافات تأييد ..
ابراهيم : برافو ..

حسن : نقابة واحدة اللي تعبتنى قوى .. الحديد والصلب .. قعدت أدور لحد مالقيت واحد حداد عجوز .. خليفته يمضى على التلفراف ..
ابراهيم : بس الدنيا كلها عارفة إن ماعندناش مصنع حديد وصلب ..
حسن : مش المهم يكون عندك مصنع .. المهم الياطرة .. الياطرة اتكتبت واتعلقت على دكان الراجل فى ربع ساعة .. أمال طارق فىن؟ ..
ابراهيم : جاى حالاً .. أصل العلاقة متوترة شوية اليومين دول ..
حسن : علاقته بواشنطن؟ ..
ابراهيم : بخطيبته ..

(المشرف يدخل ومعه صينية عليها اكواب الليمون ..
يرصها امامهم على منضدة الاجتماعات ويأخذ طريقه للخارج).

ابراهيم : (للمشرف) .. ابعت لى سجاير لو سمحت.
(المشرف يخرج، يدخل الوكيل، يضع أوراقاً أمام كل عضو ..
أحمد يكلمه برقة وتواضع تخفيان إحساساً شديداً بالعظمة).

أحمد : هيه .. عامل إيه دلوقت؟

الوكيل : كويس يا هندم..

أحمد : وازى الأولاد؟

الوكيل : بيبوسوا اديك يا هندم..

حسن : لو احتجت أى حاجة.. تعالى لى مكتبى..

الوكيل : ربنا يخليك لينا يا هندم..

(الوكيل يخرج)

(تدخل بقية المجموعة، سعد وأسامة ومرسى و خليل).

سعد : كله تمام.. أنا وأسامة حركنا المسيرة.. خليل ومرسى نظموا الهتافات..

(طارق يدخل.. يقفون فى تكاسل)

طارق : اتفضلوا..

(يجلسون)

أسامة : عارف يا طارق لو شفت المسيرة من الجو.. شىء جميل فعلاً.. آلاف

السيارات الملاكى..

خليل : ماشيين صفوف.. ويسرعة واحدة..

مرسى : والناس سعيدة بشكل جنونى.. وقاعدين يهتفوا بالكلاسات.. بيب

بيب.. طارق، بيب بيب طارق.

طارق : هم دول بقى اللى ممكن يهتفوا ضدى بنفس السعادة.. ونفس

الحماس.. حايبقى نفس الهتاف.. بس حايزودوا له كلمة يسقط..

سعد : طارق اسمح لى.. أنت بدأت تتعالى على الجماهير.. دى إهانة لعقيلة

الجماهير..

طارق : الجماهير هى اللى موتت سقراط يا سعد.. ثم المسيرة دى مش

جماهير ده انت وأسامة لابسين جماهير.. متنكرين فى هيئة

جماهير..

أسامة : ما هى طبعاً الجماهير عاوزه حد يقودها..

طارق : ياريت المسألة كانت تمت بالشكل ده..

خليل : ما هى تمت بالشكل ده فعلاً..

طارق : لأ .. بالفلوس ..

(يمسك بكشف فى يده)

طارق : ده كشف بالمبالغ الى انسحبت من وزارة الخزانة .. فيه مبلغ ضخمة جداً مكتوب قدامه تكاليف المسيرة ..

أسامة : فعلاً .. بنزين وزيت .. وغدا وسجاير .. وبوكيت منى ..

طارق : (لا زال يطالع فى الكشف) .. مفهوم .. الحاجة الى أنا مش فاهمها ..
عشرين ألف دولار .. أدوية للمسيرة؟ ..

مرسى : ابراهيم كروان هو الذى قدم لنا الاقتراح ده ..
ابراهيم : فعلاً ..

أسامة : دول يا سيدى اشترينا بيهم باستيليا للزور .. ودوا غرغرة .. وسكر نبات ..

خليل : فيه ناس كتير صوتهم بينشرخ وهم بيهتفوا .. لازم نكون جاهزين لكل احتمال .. وكالات الأنباء نازلة تسجيل صوت وصورة ..

طارق : بشكل عام .. أنا مش موافق على السلوك الى من النوع ده ..

أسامة : (يهمس للجاس بجواره) .. بدأت الديكتاتورية .. عاوز يفرض رأيه علينا كلنا ..

طارق : الاجتماع ده حاتخصصه ليبحث ثلاث نقط .. شديدة الأهمية .. طريقة الحكم .. ؟ .. كيف سنحكم .. النقطة الثانية .. التسليح والجيش ..
التالثة .. الأمن .. لابد من الانتهاء من بحث هذه المسائل النهارده .. لأنى حاسافر جنيف .. وحاغيب سنة ..

أحمد : مين الى حايجكم وانت غايب؟

طارق : مفيش حد .. لأنى مش حاكون غايب .. البوسطة حاتجلى كل يوم الصبح أمضيها .. وحايبقى جانبى فى الفصل تليفون مباشر .. إحنا عندنا دلوقة وزارة مدنية .. رئيس الوزراء حاىكون مسئول قدامى ..

أحمد : هى الوزارة المدنية دى لسه حاتتقعد؟

طارق : أيوه ..

أحمد : يبقى نروح إحنا بقى.. لازمنا إيه..؟
طارق : إحنا مسئولين عن التخطيط.. وعن القيادة..
سعد : الله..؟ مش المفروض نمسك كل حاجة..
طارق : (بتوتر).. أرجوك.. بلاش حكاية نمسك دى.. كلمة ماسك.. ويمسك..
وتمسك.. بتعمل لى حساسية شديدة.
خليل : (هامساً لزميله).. واضح أنه عاوز يمسك كل حاجة بنفسه..
سعد : بلاش كلمة نمسك.. مش المفروض اتنا حانحكم..؟
طارق : هو ده السؤال.. كيف سنحكم.. إيه النظرية اللى حانمشى عليها..
الأسماوية ولا الاشتراكية.. ولا النظرية الثالثة..
حسن : الرأسمالية نظام فاشل، والاشتراكية نظام فاشل.. والنظرية الثالثة
معرفة هاش.. والديكتاتورية مكروهة.. والديمقراطية ماتتفعناش..
يبقى مفيش قدامنا غير حاجة واحدة..

الجميع : إيه؟

حسن : نحكم بالبركة.

الجميع : يعنى إيه؟

حسن : يعنى زى ما تيجى معانا..

ابراهيم : يا جماعة المسألة بسيطة جداً.. إحنا هدفنا السعادة لكل مواطن..
والإنسان بيبقى سعيد لما يعمل اللى عاوز يعمل.. نديها حرية.. نسيب
كل واحد يعمل اللى على مزاجه.

أحمد : ماهو فيه ناس حايبقى لها مزاج تموتنا يا ابراهيم.. نسيبها تموتنا..؟

أسامة : إحنا ما سمعنناش رأى طارق.

(طارق يقف.. يتحرك صامتاً على المسرح فى حيرة).

طارق : أنا حاكون صريح معاكم.. إحنا مجموعة مليئة بالبراءة والطهارة
والنقاوة والحماس والنوايا الحسنة.. ومليانين كمان حاجة ثانية..
مليانين جهل، وأنا أولكم.. قرينا صفحة هنا وصفحة هنا.. كتاب هنا
وكتاب هنا.. عارفين نظريات الحكم بالشبه.. أنا كل أملى نعمل حكم

ديمقراطى حقيقى.. لكن إزاي؟.. ماعرفش.. الشيء اللى أنا متأكد منه، أننا بدأنا نرتكب نفس أخطاء الحكم العسكرى فى كل مكان.. وحا يكون مصيرنا.. هو نفسه مصير الحكم العسكرى فى كل مكان.. يا خوفى من اليوم ده.. لما نهزأ بعض.. ونشتم بعض.. ونقطع فى بعض.. ونسجن فى بعض.. وجايز نقتل فى بعض..

اسامة : مش ممكن ده يحصل.. مستحيل.. ده إحنا حالفين..

طارق : جهلنا وأخطأنا ممكن تتجمع فى النهاية وتتحول لقنبلة تنفجر فينا كلنا.. الحلفان مش حاينعها.. ولذلك أنا باقول نسيب كل حاجة على ما هى عليه لحد ما أتعلم أصول الحكم.. وفى خلال السنة اللى حاتعلم فيها.. ندعم قوتنا الذاتية.

سعد : (هامساً لزميله).. يقول اللى عاوز يقوله.. ويعد ما يسافر حانتصرف إحنا.. حسن : على العموم من حسن حفظنا أن مجتمعنا مفيش فيه مشاكل حادة.. يعنى لا عندنا اقطاع.. ولا استثمار ولا رأسمالية مستقلة.. ابراهيم : بالعكس الرأسمالية اللى عندنا ظريفة جداً.. يعنى تبيع أرض، تشتري أرض.. ولو لقينا بترول الشعب كله حايتبسط ويبقى سعيد جداً.. طارق : النقطة الثانية.. التسليح واقامة جيش قوى..

(يضغط الجرس فيدخل المشرف ومعه شخص شديد الأناقة

يحمل حقيبة سمسونايت).

المشرف : السيد عدنان البندقجى.. مندوب شركات السلاح العالمية..

ابراهيم : (هامساً لأحمد).. مش هو ده الراجل اللى باع لنا الأرض؟

أحمد : (هامساً).. آه هو..

ابراهيم : يخرب عقله.. لحق يرجع من سويسرا..

أحمد : هس..

(عدنان يتحدث بأناقة رجال العلاقات العامة، ولكنه ينسى

نفسه أحياناً ويصبح أشبه بهؤلاء الذين يبيعون الشرية

العجيبة فى الموالد).

عدنان : السادة أعضاء مجلس قيادة الثورة.. مجموعة الشركات اللى باتشرف بتمثيلها.. لا تقدم فقط العتاد والسلاح.. ولكنها أيضاً تقدم.. المعرفة.. تقدم الدراسات والمعلومات عن كل أعدائكم الحاليين والمحتملين.. وأيضاً تقدم لكم النصائح فى مواجهة كل الاحتمالات.. وآخر تقرير عندى.. أن حضراتكم معرضين لغزو قريب.. من الجو.. والأرض.. والبحر... كمان بنتولى عمليات التدريب وتقديم الخبراء.. وعمليات الصيانة وقطع الغيار.. وذلك بسعر التكلفة الفعلية.. وبتسهيلات فى الدفع... وبدون أرباح.. لأن الشركات اللى بامثلها.. تتمسك بالأخلاق والضمير وكل هدفها هو مساعدة شعوب العالم الثالث اللى بتبحث عن الاستقلال.. وعن غد أفضل..

(يفتح حقيبةته.. نكتشف أنها ممتلئة بعدد كبير من لعب الأطفال على هيئة اسلحة.. دبابات وطائرات... وغواصات.. إلخ).

عدنان : (يخرج طائرة صغيرة).. أعظم وأسرع وأقوى طائرة مقاتلة فى العالم.. H 4 .. (يمربها على الموجودين ليريهم إياها عن قرب.. عندما يقترب من احمد وإبراهيم يهمس لهما).. حصل.. الفلوس انحطت فى البوستة.. (يرفع صوته).. أهم ميزة فيها أنها ماتتضريش على الأرض.. أى ضربة جوية مفاجئة تزوغ منها.. وتحط نفسها فى أقرب مخبأ.. من غير طيار.. ولذلك العسكريين بيسموها الزواغة خفيفة الدم.. ثمنها ٤٠٠ مليون دولار ريعمئة مليون دولار.. يا بلاش.. تدفعوا عشرة دولار عند توقيع العقد.. والباقي على أقساط، ثمانية مليون دولار كل شهر.. طائرة واحدة بس فى الدنيا تعرف تتغلب عليها فى الجو وتضربها.. على الأرض ها.. وده برضه إحنا اللى بنعملها.. لسه بنعمل عليها تجارب.. بمجرد ماتخلص.. ناخذ القديم.. ونديكم الجديد.. وتدفعوا الفرق.

(يخرج غواصة من الحقيبة)

عدنان : الغواصة S 19 ... فتح فى عالم القتال البحرى... غواصة مقاتلة.. لا يمكن كشفها بأى رادار فى العالم.. لأن المواتير بتاعتها ساكنة..

معمولة على نظرية العدة الساكنة بتاعة وابور الجاز .. (يمر عليهم يريهم
إياها يهمس لهم من بين أسنانه) .. إحنا مفتحين قوى.. ونحب الرجل
المفتح.. وينطلع جدعان معاه قوى.. ماحدش ضامن الزمن.. يحصل
لك حاجة تلاقى لك قرشين حلوين ينفعوك فى سويسرا .. (يرفع
صوته) .. ولا السمك نفسه يسمعها تحت المايه .. أهم ميزة فيها القدرة
على المناورة السريعة .. والتنكر .. وإذا حوصرت من الأعداء، عندها
القدرة أنها تتحول لمركب شراعى عادى .. تمنها ستمائة وخمسين
مليون دولار .. حاتدفعوا الربيع والباقي على سنة وربع .. غواصة بس
هى اللي ممكن تكشفها وتضربها .. س ٢٠ .. ودى برضه إحنا اللي
حانعملها ... لما تجهز .. تاخذوها .. وتدفعوا الفرق.

(يخرج دبابة)

عدنان : أحدث ما وصل إليه العقل البشرى فى صناعة المدرعات .. دال ١٥ .. D
١5 .. دبابة مدرعة بأنواع سرية من الصلب .. لا يمكن اختراقها بأى نوع
من أنواع المدفعية أو القنابل .. مجهزة بمدفعية صاروخية فى كل
مكان .. (يمر عليهم وهو يهمس بصوت لا يكاد يكون مسموعاً) يا بخت من نفع
واستنفع .. (يرفع صوته) .. لو أصيبت اصابة عنيفة، حاتنقلب على
جنبها .. وتمشى، وتضرب .. ولو انقلبت على ظهرها .. حاتمشى برضه
وتضرب .. ولو حصل أنها حوصرت واتأسرت لا قدر الله .. الأعداء
مش حايعرفوا يفتحوها وياخدوا الناس اللي جواها .. لأنها بتتفتح من
جوه .. دى بتتباع بالدسته .. الدسته بألف مليون دولار .. ممكن نخفض
لكم ١٠٪ لو خدتوا عشر دست ..

طارق : (يسخرية) .. وطبعاً الدبابة الوحيدة اللي ممكن تضربها هى دال ١٦ ..
ودى لسه بتعملوها ولما تخلص، حاتدوها لنا وتدفع الفرق.

عدنان : مابنعملش دبابة اسمها دال ١٦ .. إحنا بنعمل دال ١٥ المعدل .. اللي هى
المحسن .. هى دال ١٥ .. الفرق فى الاكصدام والفوانيس وفى لون
الدفاع .. ومركب لها مراية زيادة .. لكن أنا أنصحكم تاخذوا دى.

طارق : شوف يا عزيزى البندقجى.. انت الظاهر عليك غلطت فى العنوان..
إحنا ماعندناش فلوس للحاجات دى كلها.. ولما يحصل الغزو.. أنا
حاعرف أخلى الناس تصده بالبنادق..

عدنان : عندكم فلوس يا فندم.. حاتلاقوا بترول.. التقرير اللي عندى أنكم
حاتلاقوا بترول النهارده الساعة اتناشر..

طارق : انت دمك خفيف قوى.. اتناشر ونص ومالتيناش حاجة.. (فى نفس
اللحظة يدخل المشرف ومعه ورقة صغيرة يضعها امام طارق وينصرف).

طارق : سحر.. كل الشركات لقت بترول..

عدنان : مش قلت لك يا فندم..

(تتناثر تعليقاتهم)

..... : الحمد لله..

..... : ياما انت كريم يارب.

..... : ده ربنا عالم بحالنا..

..... : أيوه كده يا أهى.. خلينا نعمل حاجة.. نعمل حاجة للبلد..

..... : أيوه.. نعمل حاجة للزمن..

..... : الخير على قدوم الواردين.. الراجل ده وشه كويس علينا..

..... : لازم نشترى منه حاجة..

..... : مدام ربنا ادانا.. نكسر بخاطره ليه...؟

طارق : بترول غريب.. بيلاقوه فى الوقت والمكان اللي هم عاوزينه بالضبط..
عشرين ألف برميل فى الساعة..

عدنان : (مصححاً وهو يقرأ من ورقة فى يده).. عشرين ألف ٢٢٥ يا فندم..

طارق : بالضبط.. دى كومبينة بقى.. لقوا البترول وعاوزين ياخدوه ويدونى
شوية حديد.. فلوس البترول حاصرها فى حاجات تانية...

أحمد : (محتد).. وده اسمه كلام يا طارق.. انت حاتسينبنا عريانين فى
المنطقة..؟.. معنى إيه..؟.. مش حانعمل جيش قوى؟..

(طارق يصمت وينظر له فى عتاب ثم يتوجه بحديثه لعدنان).

طارق : طيب يا سيد عدنان.. إحنا خدنا فكرة.. وحانبقى نبعث لك..
عدنان : تحت امركم..

(يخرج)

طارق : أحمد ماتنساخ نفسك.. ماتكلمنيش بالشكل ده قدام حد غريب..
ماتغلطش فى..

أحمد : غلطنا فى البخارى يا حى..

طارق : خليك مهذب واحترم نفسك..

(أحمد يواجهه فى غضب)

أحمد : الله.. ماتاخذنى قلمين بالمرة..

(حسن يتدخل يبعدهما عن بعضهما)

حسن : يا جماعة مش كده.. روقوا..

طارق : (محتدًا).. مش أول تاجر سلاح يجيلى أشتري منه.. ومش أى نوع
سلاح أشتريه.. انتم ناسيين أن إحنا لسه ماعملناش جيش..
أجيب الحاجات دى عشان تصدى عندى.. لازم أسأل ناس عندها
خبرة..

حسن : أنا من رأى تسأل الناس اللي بتثق فيها.. أنت مش بتثق فينا..؟

طارق : طبعاً..

حسن : خلاص.. اسألنا..

أسامة : (بلهجة غيرودية).. على العموم حضرتك مش بتاخذ القرار لوحدهك..
إحنا حنناقش المسألة.. والقرار حاكون بالأغلبية..

طارق : جرى إيه أسامة..؟.. انت عاوز توحى للأخوة الزملاء أنى بدأت اتحول
لديكتاتور ولا إيه...؟

أسامة : والله أنا مش باوحى بحاجة.. أنا باتكلم على اللي مفروض يحصل..

(أسامة ينهض وهو يقول جملته إلى الشرفة ويضع كفه فوق

عينيه يراقب شيئاً بعيداً).

ابراهيم : والله يا اخوان أنا من رأى نشترى.. دى فلوس طالعة من تحت

الأرض.. حد عارف ده رزق مين؟.. مش جاييز شركات السلاح دى
بتصرف على ناس غلابة فى أوروبا..

(أسامة يعود من عند الشرفة)

أسامة : المسيرة على وشك الوصول .. حانشوف خبير الأمن والا نأجله لبعده
المسيرة؟

طارق : نشوفه .. ونبحث الموضوعين مع بعض..

(يضغط زرا فيدخل المشرف ومعه السيد منتهى الأمان.. هو
نفسه عدنان البندقي بعد أن اضاف شارياً وغير الجاكتة..
يضع على عينيه نظارة سوداء كبيرة.. ويرتدى قبعة رخوة تنزل
حافتها على عينيه).

المشرف : السيد منتهى الأمان.. خبير الأمن المعروف.. وأخصائى حماية
الحكومات العسكرية.. دبلوم عالى فى الوشاية والنميمة.. ماجستير
فى مكافحة أجهزة التصنت والتصوير.. دكتوراه فى القمع.. درجة
الزمالة.. زميل كلية المخبرين الملكية فى لندن..

(المشرف يخرج.. منتهى يخلع النظارة والقبعة.. يهرق
السمع.. يجيل نظره فى انحاء المسرح وكأنه يراقب خطراً ما..
يرفع إصبعه إلى شفثيه طالباً منهم السكوت.. يفتح حقيبته
ويخرج منها لعبة صغيرة على هيئة كلب.. يقترب بها من
جدران المسرح وقطع الديكور.. الكلب يصدر صوتاً... يقترب
من قطعة معينة من الديكور ثم يخرج مفكاً صغيراً يلتقط به
قطعتين معدنيتين).

منتهى : دلوقت نقدر نتكلم..

طارق : ميكروفونات؟..

منتهى : (ببساطة ولا مبالاة).. لا.. دى كاميرات موديل ٧٤.. دى كاميرا واحد
مللى.. ودى نص مللى.. صوت وصورة.. مجهزة بمعمل طبع
وتحميض.. تصور وتحمض وتطبع فى نفس اللحظة برضه الفيلم

بيتيت باللاسلكى لقمر صناعى.. القمر يعكسه تانى.. فيلم ٢٥ مللى..
الكاميرا دى حاططها السوفيت.. لذلك نلاحظ أنها كبيرة نسبياً..
والفيلم أبيض واسود.. (مشيراً للكاميرا الأخرى).. ودى أمريكية بتشتغل
بفيلم ألوان اسكوب..

(يضع الكاميرات والكلب الصغير فى الحقيبة ثم يواجههم).
.. سادتى.. هذه التجربة البسيطة تثبت لكم أن الشركات التى أمثلها
تمتلك أحدث أجهزة التصوير والتصنت.. وأجهزة الكشف عنها.. ثم أجهزة كشف أجهزة
التشويش على الأجهزة التى تقوم بالشوشرة على الأجهزة التى تقوم
بالتشويش على الأجهزة.. وهكذا.. إلى ما لا نهاية.. أما آخر اختراع
عندنا فى مجال الأمن السياسى.. فهو ده (يخرج شيئاً من الحقيبة)
معتقل كاوتش.. مبنى على نظرية قارب النجاة المصنوع من المطاط..
المعتقل ده... يتنفخ.. يأخذ عشرين ألف معتقل.. وهو ده متوسط عدد
المعتقلين فى بلاد العالم الثالث.. وعندنا كمان..
(يعود للحقيبة ويخرج منها جهازاً دقيقاً أشبه بالساعة).

منتهى : إيه ده يا جماعة.. دى الأوضة ملفمة..
(يقترّب من الموجودين.. يمر عليهم بالجهاز.. يتوقف عند حسن.. يمر
بالجهاز على بدلته).

منتهى : لامؤاخذة يا فندم.. آخر مرة قلعت الجاكتة دى امتى؟
حسن : إمبارح.. البدة كلها راحت للمكوجى..

(منتهى يجذب زراراً فيخلعه من الجاكتة)

منتهى : وعند المكوجى.. اتشال الزرار الحقيقى واتركب ميكروفون اليكترونى
من النوع المتخلف موديل ٦٦... بيرسل لجهاز استقبال فى الغالب
محطوط فى عربية على بعد ثلاثة كيلو.. فيه قاعدة مهمة جداً فى
الأمن.. احترس من المكوجى..

(يعود للنظر فى الجهاز)

منتهى : فيه جهاز ريكوردر من أحدث الأنواع موجود هنا..

طارق : ريكوردر..؟

منتهى : أيوه.. ومن أخطر الأنواع.. من النوع اللى إحنا بنعمله.. ريكوردر كاست

ربع مللى.. فى حجم حبة السمسمه.. بس حالاقية.. حايروح منى فى؟

(بسرعة يخرج جهازاً آخر.. يمر به على الموجودين ثم يتوقف

عند الساعة.. يقترب بالجهاز من خده).

منتهى : حضرتك بتشتكى من درسك..؟

أسامة : مابشتكىش منه دلوقت.. حشيتة إمبارح..

منتهى : والدكتور اللى حشيت عنده درسك.. عيادته هنا؟ فى البلد؟

أسامة : لأ.. ده أخصائى أجنبى.. كان جاي زائر فى المستشفى العام.

منتهى : ويعد ما حشى لك درسك سافر..؟

أسامة : أيوه..

منتهى : طب لو سمحت افتح بـقك.. ماتخافش..

(يمد يده بملقاط صغير داخل فم أسامة.. يخرج شيئاً لا يرى

بالطبع.. يستعين على رؤيته بعدسة).

منتهى : ريكوردر بيشتغل بالبطارية.. مجهز بوحدة إرسال.. ممكن يرسل لمدة

سنتين.. طول ما انت فاتح بـقك بيسجل ولما بتقفل بـقك بيسجل من

مناخيرك..

(أسامة يشعر بالإهانة فيقف ثائراً فى سخط)

أسامة : أما راجل قليل الأدب صحيح.. أنت جاي تنصب علينا جاي تضيع وقتنا

يا راجل انت.. اتفضل بره.

منتهى : أنا ممكن أقبل أى اهانة فى الدنيا.. لكن لا أقبل أن أطعن فى شرف

مهنتى.. حالاً حاسمك عينة..

(يخرج جهازاً آخر يضع فيه الريكوردر المزعم بواسطة الملقاط

فنستمع من خلال سماعة المسرح الصغيرة إلى الحوار الذى

تم فى المشهد الثانى بين أسامة وزملائه.. قف من انت.. ده أنا

سعد ومعاليا خليل ومرسى.. إلخ.. نستمر فى سماع الحوار...

الموجودون صامتون).

(يصبح بانفعال).. مؤامرة..

أحمد : (اللحظات القادمة سريعة محمومة.. تتعالى فيها الصيحات

والصرخات موحية بجو العنف.. طارق يحتفظ بهيئته

محاولاً السيطرة على الموقف.. كل هذا يحدث وحوار المشهد

الثانى المسجل مستمر.. عند نهاية حوار المشهد، يأخذ منتهى

الجهاز ويخرج مسرعاً).

أسامة : (يخرج مسدسه).. ارفع إيدك لفوق انت وهو.. ولا كلمة.. أى حركة

حاضر فى المليان..

(خليل وسعد ومرسى يفتحون حقائبهم ويخرجون الرشاشات

يناولون أسامة واحداً).

مرسى : أقف جانب الحيطه انت وهو..

(أحمد وحسن وإبراهيم يقفون بجوار الحائط.. خليل وسعد

يجرون لهم عملية تفتيش سريعة).

أحمد : (يحاول الاحتجاج).. أسامة.. أعقل يا أسامة.

أسامة : اخرس.. ماحدش يفتح بقه بكلمة.. أقف ثابت.. حالاً حانشكل لكم

محكمة عسكرية.. أى حركة حانضرب فى المليان..

طارق : (بهدهء شديد).. بحيث لما تيجى المسيرة.. تخرج لهم أنت.. تديهم

الاشارة.. يهتفوا بسقوطى.. وبالليل يشوفونى فى التلفزيون

وأنا باعترف.. باعترف إنى ديكتاتور.. وجايز أعترف إنى

خاين..

أسامة : بالضبط.. ده اللى حاتمعله.. اتفضل اكتب استقالتك..

طارق : حاضر..

حسن : جيان..

أسامة : اخرس..

طارق : ليه يا حسن..؟ أسامة برضه أخونا وحبيبنا .. مش جايز يحكم أحسن منى..

أسامة : اكتب الاستقالة .. (ينادى) .. هيئة المحكمة..

(المدير والوكيل والمشرف يدخلون)

أسامة : ماحدش يدخل المبنى.. وماحدش يخرج منه.. اقطعوا كل الاتصالات بالعالم الخارجى..

المدير : حاضر يا قندم..

طارق : الله.. دى هيئة المكتب معاهم..

المدير : إحنا مع السلطة الشرعية..

طارق : أنا السلطة الشرعية..

المدير : (يشير لأسامة ومجموعته) .. السلطة الشرعية اللى هى معاه الرشايات.

(تخرج هيئة المكتب)

أسامة : انت متصور إنى حاسيب مصير شعبنا فى ايد واحد رومانسى مجنون زيك..

طارق : غلط طبعاً.. لازم اللى يحكم يكون واحد عاقل زيك..

أسامة : اكتب الاستقالة...

طارق : حاضر.. مانزعقش.. حارفعها لمين؟.. للشعب طبعاً.

(يمسك ورقة ويبدأ فى الكتابة).

طارق : عزيزى الشعب الذى يتحدث الجميع باسمه وبالنسبة عنه الصالحون والمفسدون.. الحالمون والواقعيون.. الأذكىء والبلهء.. أرفع إليك استقالتي هذه.. بمحض اختياري.. وبكامل ارادتي.. (يتوقف وينظر لسعد).. يا سلام.. يا سعد.. نفس المصير اللى ترسم لك من قبل ما تتولد.. إنك تتحول لجلاد.. يا خسارة.. إيه اللى يخلى الشاعر يتحول لجلاد.. أنا حاستقيل يا سعد.. وماعرفش حاتسجنونى ولا حاتنفونى.. والا حاتقتلونى.. لكى الشئ المؤكد.. إن الثورة حاتبتدى تاخذ اللون الأحمر..

أسامة : (يصرخ فيه).. ماتتكلمش مع حد.. أكتب الاستقالة..
طارق : (يركز نظراته في عيني سعد).. كنت متصور أن اليوم ده حايجي يا
سعد..؟ إنك ترفع الرشاش على اخواتك..
أسامة : ماحدش يسمع كلامه.. لسانه مليون سم..
طارق : لا أمل.. لازم أكتب الاستقالة..

(يعود للورقة)

سعد : ماتكتبش الاستقالة يا طارق (يترك مكانه).. أنا مع طارق.. اللي
حايقرب منه حافرغ فيه الرشاش ده..
طارق : اللي يقعد معايا يا سعد مايرفعش رشاش.. يرفع كلمة يرفع فأس..
ماترفعش الرشاش على اخواتك..

(ياخذ منه الرشاش ويضعه على المكتب)

طارق : أنا حامشى قبل ماتنزل نقطة دم من أى حد فينا.. إحنا ناس
ناضجين.. وينحب بعض.. مش كده يا خليل.. مش كده يا مرسى.. يا
خسارة.. كان نفسى نخرج كلنا للجماهير وإحنا يد واحدة.. رمز
للاتحاد والاخوة وانعدام الأنانية.. أصغر وأطهر مجموعة حكمت
دولة..

(يهنوء شديد خليل ومرسى يتركان مكانهما ويضعان

الرشاشين على المائدة ويقفان بجوار طارق).

أسامة : خونة.. حافرغ فيكم الرشاش كلكم..

(أسامة يرتجف من الانفعال.. من الواضح أنه واقع تحت

تأثير إجهاد عصبى يضعه على حافة الجنون).

طارق : وتخرج للجماهير تقول لهم إيه؟.. قتلت كل مجلس قيادة الثورة..

(يقترب من أسامة حتى يلتصق به.. فوهة الرشاش تلامس

قلب طارق).

طارق : ضغطة منك دلوقت تطلع عشرين طلقة فى قلبي.. بس ماتنساش
حاجة... اللي بتاخذ بالقة.. فيه واحد حايجي يحرمك منه بالقة..

(هامساً في رقة) نزل الرشاش يا أسامة.. ممكن أحقق لك كل اللي انت عاوزه.. من غير الرشاش..
(يده تتراخى، يسقط الرشاش على الأرض.. يرتدى على صدر طارق وهو يبكي بحرقة).

أحمد : (صائحة).. محكمة..

(الجزء الباقي وحتى نهاية الفصل الثانى لا يجب أن يستغرق تنفيذه بحال من الأحوال أكثر من دقيقة.. ثلاثة يشكون هيئة محكمة، اثنان ينقضان على أسامة فينترعانه من صدر طارق ويقفان عليه حرساً بالرشاشات.. أحمد يلعب دور القاضى.. حسن عضو اليمين.. إبراهيم عضو اليسار.. سعد يقوم بدور المحامى والادعاء).

القاضى : المتهم أسامة الزهار.. مذنب؟

أسامة : ماتفرقش..

القاضى : الادعاء..

ممثل الادعاء : وبناء على كل ما تقدم.. أطلب بإعدام المتهم..

القاضى : الدفاع..

(ممثل الادعاء ينتقل للناحية الأخرى ليقوم بدور ممثل

الدفاع).

الدفاع : طبعاً أنا موافق على إعدامه.. لكن.. عشان الشكليات.. أطلب الرأفة لموكلى..

(تتقارب رؤوس هيئة المحكمة فى عمليات تشاور سريعة).

عضو اليمين : محكمة..

القاضى : حكمت المحكمة حضورياً على المتهم أسامة الزهار بالإعدام رمياً بالرصاص.. (بعنف بالغ).. دور.

(بحركة عسكرية سريعة وخشنة الحارسان يقتادان أسامة ويقفان به فى مواجهة طارق).

القاضى : ويرفع الحكم للتصديق..

(احدهم يأخذ الحكم بسرعة ويقدمه لطارق الذى يؤشر

عليه).

طارق : يخفف حكم الإعدام.. ويكتفى بلفت نظره.. وينقل سفيراً لنا فى بلاد

الاسكيمو... مفيش حد حايموت.. ولا حد حايتأذى.. لسبب بسيط

(باسى شديد).. إن المسرحية كوميدى.. والناس لازم تضحك أكبر كمية

ممكنة (بمرارة).. ده الناس حاتضحك علينا ضحك..

(بنشاط يتجه إلى الشرفة، يفتحها فنستمع لصوت صياح

الجماهير (طارق.. طارق) يشير لزملائه أن يتقدموه إلى

الشرفة.. يرفع ذراعيه.. يزداد هدير الناس... بينما تنزل...).

الستار

• الفصل الثالث •

المشهد الأول

(يفتح الستار عن فصل دراسى شديد الأناقة، جهاز تليفون فوق كل تخته.. لوحة لجسم بشرى بالحجم الطبيعى، جسم بشرى متكامل العضلات وكأنه بطل إغريقى قديم.. جورج الفراش يقوم بتنظيف الفصل وتلميع المقاعد.. جورج هو نفسه خبير الأمن والسلاح الذى رايناه فى الفصل الثانى، يرتدى يونيفورم بسيط يجعله أشبه بعمال الفنادق يتأكد من عدم وجود أحد يراه فيقوم.. بخفة وسرعة.. بتركيب أشياء فى أجهزة التليفون.. وفى الأدرج.. طارق يدخل.. يتأمل المكان الذى يراه لأول مرة).

جورج : أهلاً بيك يا فندم.. أهلاً بيك فى أكاديمية حكم الشعوب.. سويسرا نورت..

طارق : منورة بأهلها..

جورج : محسوبك ريدى جورج.. الفراش..

طارق : ريدى جورج يعنى جورج الجاهز..

جورج : بالضبط يا فندم..

طارق : أهلاً يا جورج..

جورج : أهلاً بيك يا فندم.. النهارده صور حضرتك منورة كل الجرايد والمجلات.. حضرتك حليت مشكلة كبيرة جداً.. الأكاديمية مفتوحة

بقى لها شهر.. بمجرد ما حضرتك قدمت، كلهم قدموا.. ولذلك، أوروبا والعالم كله ينتظروا لك نظرة خاصة اذاعة لندن قالت أن حضرتك حاتدي للحكم العسكري وجهه المشرق.

طارق : متشكر..

جورج : رينا يقويك يا فندم.. (بلهجة خاصة).. أى حاجة من سويسرا... أى خدمات.. أنا تحت أمرك..

طارق : (يدور متجاهلاً ما يقصده).. خدمات زى إيه؟

جورج : زى أى حاجة.

طارق : زى إيه.

جورج : أى حاجة موجودة فى سويسرا .. ساعات مثلاً..

طارق : متشكر.. (يتفكر فى وجهه).. متهاياً لى شفتك قبل كده..

جورج : ما أعتقدش يا فندم.. هو أنا بس وشى من النوع المألوف.

طارق : أنا متأكد إنى شفتك قبل كده.. استنى.. انت بتاع السلاح..

جورج : عدنان البندقجى؟

طارق : أيوه..

جورج : ده ابن عمى.. نسخة منى.

طارق : يبقى..

جورج : منتهى الأمان.. خبير الأمان.

طارق : فعلاً...

جورج : ابن عم أبويا.. أصلنا مجموعة من أولاد العم كلنا صورة طبق الأصل

من بعض (بسرعة كما لو كان يريد أن يتهرب).. أهلاً بيك يا فندم.. عن إذنك.

طارق : (يستوقفه).. جورج.. استنى..

(ينتظر له طويلاً)

طارق : انت شغال مع مين.. (لحظات).. الروس ولا الأمريكان؟

جورج : انت ذكى جداً يا فندم.. وأنا أموت فى الأذكىاء.. خصوصاً الأذكىاء

بتوع العالم الثالث.. أى خدمات من سويسرا.. أنا تحت أمرك، لو
وقعت فى أى شارع وقلت أنا عاوز جورج.. ألف مين حايدلك.. (يستدير
لينصرف).. عن إذذك..

طارق : ما جاوبتش على سؤالى.

جورج : مفيش حاجة اسمها الروس وحاجة اسمها الأمريكان.. وده الخطأ اللى
بتقعوا فيه.. فيه حاجة اسمها القوى الأعظم.. الملوك.. ولما الملوك
تلعب مع بعض.. أو تهز مع بعض.. ماحدش منكم له دعوى.. لذلك
المثل السويسرى بيقول.. حاتروح فين يا زعلوك بين الملوك.. هاهـا..
عن إذذك يا فتندم..

طارق : برضه ماجاوبتش على سؤالى.. شغال مع مين؟

جورج : بصراحة؟

طارق : أيوم..

جورج : ماعرفش.. أنا باصحنى من النوم الأقى ظرف تحت المخدة.. فيه فلوس
وتعليمات.. أنفذها.. حتى لو رحت أنام عند واحد صاحبى.. الصبح
الأقى الظرف تحت المخدة.. لو رحت نمت فى لوكاندة.. الصبح الأقى
الظرف تحت دماغى.. حبيت أعمل تجربة.. سبت الشقق
واللوكاندات.. ورحت نمت فى خرابة وحطيت تحت دماغى قالب
طوب..

طارق : والصبح لقيت الظرف تحت قالب الطوب..

جورج : لا.. لقيت مخدة تحت قالب الطوب.. وتحتها الظرف.

طارق : يحصل إيه لو خدت الفلوس ومانفذتش التعليمات..؟

جورج : أموت.. وفى أى مكان فى العالم.. حادثة عربية فى باريس.. هيوط
مفاجئ فى القلب فى روما.. أقع من بلكونة فى لندن.. علماً أن لندن
مافيهاش بلكونات.. هاهـا.. أى خدمات من سويسرا..

طارق : متشكر..

(يخرج جورج عندما تدخل مجموعة من الحكام العسكريين،

مهمة مصمم الأزياء أن يوحى فى تصميمه للأبسهم وبشكل
غير مباشر بالبلاد التى ينتمون إليها كما أن مهمة المخرج أن
يختار عناصر توحى ملامحها بالانتماء لأجناس مختلفة..
تكشيرة غبية تعلو وجوههم.. يتجاهلون طارق تماماً.. طارق
ينظر لهم مبتسماً فى ترحيب).

طارق : أهلاً.. أهلاً.. أرجو أننا نقضى عام دراسى موفق.. ان شاء الله..
وأهى فرصة طيبة.. عشان نقدم لشعبنا..

(ينظرون لهم بتجهم وبلا ترحيب.. تموت ابتسامته).

طارق : (هامساً لنفسه).. أعوذ بالله.. ده إيه التكشيرة دى؟ ربنا يكون فى عون
الشعوب اللى بتحكموها..

(يدخل كاباكا وهو عملاق إفريقى يرتدى ملابس عسكرية
مزرکشة، يقف مقدماً نفسه بصوت قوى وشراسة).

كاباكا : رئيس جمهورية كاجانيا الديمقراطية.. كياكا.. كابانجو.. سنجر سنجر
سنجر، نوه.. بارنجى.. مارنجى..

طارق : يعنى.. ترجم.. يعنى إيه؟

كاباكا : يعنى.. التمساح العظيم، الملتهم، الشرس.. الذى يلتهم أعداءه واحداً
بعد الآخر فى سهولة ويسر.. بلا رحمة ولا شفقة.. المعادى
للديكتاتورية.. وحامى حى الديمقراطية فى الغابات الشاسعة..

طارق : أهلاً وسهلاً.. (لنفسه).. ونعم الزملاء.. دى حاتبقى سنة دراسية منيلة
بستين نيلة..

(كاباكا يجلس.. يرفع سماعة التليفون فى وقار.. كل المجموعة

ما عدا طارق تقوم بنفس الحركة)

كاباكا : خذ الأخبار دى عندك..

المجموعة : خذ الأخبار دى عندك..

(المجموعة تردد مقاطع من كلمات كاباكا)

كاباكا : نزلها فى التليفزيون والإذاعة.. والجرايد.. وأجهزة توجيه الرأى

العام.. علقوها على قمم الأشجار فى الغابات.. ارسموها على الرمل
فى الصحرا.. افتحوا عقول الناس وحطوها جواها..

المجموعة : وحطوها جواها..

كاباكا : هيئة التدريس فى الجامعات السويسرية تبدى دهشتها واعجابها من
المستوى الثقافى الرفيع لكاباكا.. كاباكا يحصل على الدرجات النهائية
فى كل مادة.. كاباكا يكتسح كل الرؤساء العسكريين فى مادة
الديموقراطية.. ترشيح كاباكا للعمل أستاذًا بالأكاديمية.. (لحظة)..
الأوغاد أعداء الشعب أخبارهم إيه؟.. اعدمهم.. يتحاكموا النهاردة
ويتعدمو بكرة.. بس المحاكمة تكون عادلة.. اوعوا تشنقوهم من غير
محاكمة.. ماتودوناش فى داهية.. (لحظة).. صنعوها محلى.. مفيش
مشانق فى سويسرا.. دخت إمبراح فى السوبر ماركت مالتقيتش..
الحبال اللى هنا كلها بلاستيك ماتتفعش..

طارق : (بجد ووقار شديد وكأنه يتحدث عن مشكلة تخصه ايضاً).. فعلاً..

الحبال البلاستيك ماتتفعش.. ممكن نتهم بأننا بنستخدم حبال
مستوردة.. الحبال اللى نشنق بيها لازم تكون تابعة من تقاليدنا
وتراثنا..

كاباكا : هيه.. اليمين المتطرف عمل إيه؟.. واليسار المتطرف عمل إيه؟..
واليسار المتطرف..؟.. والوسط المتطرف..؟.. كله تمام..؟.. كويس.. مع
السلامة..

(يضع السماعة.. المجموعة كلها تنهى المكالمات فى نفس

الوقت).

طارق : (لنفسه).. طبعاً الوسط المتطرف ده هو أخطرهم.. (يلتفت لكاباكا)..
إيه يا عم كاباكا.. كل صحافة العالم بتقول أن الدراسة لسه حاتبتدى
النهاردة.. إيه بقى يكتسح وحكاية المستوى الثقافى الرفيع.. الناس
تقول عليك إيه لما تقرا الجرايد..

كاباكا : معاندنيش حد بيقرا صحف أجنبية ولا محلية.. نسبة الأمية فى شعبى

٩٨٪ ومعمول حسابها إنها تبقى ١٠٠٪ فى الخطة الخمسية اللى جاية..

طارق : ربنا يقويك.. ومش خايف من الاتنين فى المائة اللى بيقروا؟

كاباكا : لا.. لأنهم بيشتغلوا معايا...

طارق : والاذاعات؟.. شعبك أطرش كمان؟

كاباكا : عامل شوشرة على كل المحطات.. اطمئن.. أنا عامل حساب كل حاجة.. محسوبك التماسح الشرس ماسك البلد بايد من حديد.. ضامن الحكم لأولادى وأولاد ولادى خمس آلاف سنة لقدام..

(كل اجراس التليفونات تدق فى وقت واحد.. يرفعون سماعات

التليفون ماعدا كاباكا الذى لا يدق تليفونه، يستمعون لحظة

ثم يضعون السماعات).

الجميع : كاباكا.. كل سنة وانت طيب..

كاباكا : وانتم بالصحة والسلامة.. خير؟.. عيد ميلادى النهاردة..

طارق : لأ.. انقلاب يا خسارة، صيفت بدرى يا تمساح يا شرس اتضح أنك مش ماسكها بايد من حديد ولا حاجة..

(يدخل بونجو الحاكم الجديد)

كاباكا : (ترتفع روحه المعنوية قليلاً عندما يشاهده).. ده بونجو.. سكرتيرى ومدير

مكتبى وأخويا وحبيبى.. تعالى يا بونجو.. طمنى.. مين اللى عمل

الانقلاب؟..

بونجو : (بشراسة).. أنا..

(يغمى على كاباكا.. يسقط على التختة بلا حراك)

بونجو : (مقدمًا نفسه).. بونجو باندا بانديو.. سارجى.. مارجى، سيكالولو

شنجر، سنجر، نو.. بارنجى.. مارنجى..

طارق : يعنى؟..

بونجو : يعنى التماسح الطيب الذى تمكن من التهام التماسح الشرير..

طارق : (يكمل له).. الذى يلتهم أعداءه واحداً بعد الآخر فى سهولة ويسر..

بلا رحمة ولا شفقة، المعادى للديكتاتورية.. وحامى حوى الديموقراطية
فى الغابات الشاسعة..

بونجو : بالضبط..

طارق : يا أهلاً بيك..

(يدخل جورج فى خفة وهذوء ومعه زجاجة صغيرة وحقيبة

سفر متوسطة الحجم، يقترب بالزجاجة من أنف كاباكا
فيفيق).

جورج : (يكلمه همساً مواسياً) .. أخ كاباكا .. الجماعة كلفونى أبلغك أسفهم
الشديد للى حصل.. الشنطة دى فيها بيجاما وشبشب وقميص
وينطلون وأدوات حلاقة.. وفيه كمان فى الشنطة عقد شراء بيت
صغير باسمك... البيت فى قرية اسمها منسر فيل.. وهى أقرب مكان
للبنك اللى انت حاطط فيه المبالغ اياها.. فيه احتمال الصدمة تتسيك
الرقم السرى اللى انت حاطط فيه الفلوس.. (يخرج من جيبه كارت
صغير) .. أهوه..

(يعطيه الكارت والحقيبة ويخرج بهذوء وهو يغمز لطارق

بعينه قبل ان يخرج ينحنى هامساً لأحد الطلبة).

جورج : مليون دولار وربع أجب لك كل امتحانات آخر السنة قابلتى فى الحوش..
(يخرج)

(كاباكا الذى كان على وشك الخروج يقف خطيباً فيهم

بكبرياء وهو متمالك لنفسه تماماً)

كاباكا : لن يسكت شعبى وإن بدا ساكتاً.. لن ينحنى شعبى وإن بدا متحنياً.. لن
ينحنى شعبى وإن بدا متحنياً.. لن يخضع شعبى وإن بدا خاضعاً..
وأنا.. أنا لن أنخ وإن بدوت ناخخاً.. وستردد الغابات أصداء أحلام
الشعب التى كنت أنوى تحقيقها.. وسترى وسترون.. حاتشوفوا..
(بسرعة خاطفة يخلع غطاء الراس ويفتح صدره وينهار مولولاً).. حاشوف
فيك يوم يا بونجو يابن باندا.. ربنا على الظالم.. ربنا على المفترى..

ربنا على الخاين.. يا خاين العيش والملح.. تخونك الأيام؟.. تخونك
للإلى الى سهرناها سوا نموت فى أعداء الديمقراطية.. روح يا
بونجو.. الى بيجى على مايكسيش.. مدام جيت على عمرك ما
حاتكسب..

(ينهار باكياً بحرقه)

طارق : الله.. الله.. مش كدا يا كاباكا.. مش كده يا شرس.. اهدا ياملتهم..
تماسك ياتمساح.. عاوز تشمت فىنا الحكومات المدنية..

(يخرج وهو يحاول التماسك)

طارق : (هامساً لنفسه).. تمساح قال.. ولا السردين يعمل كده..

(يدخل البروفيسير وهو اشيب الشعر وله لحية قصيرة، يمسك

بيده مؤشراً قصيراً)

البروفيسير : أيها السادة الرؤساء.. اسمحوا لى أن أقدم لكم نفسى.. البروفيسير
مايك وهو اسم مستعار، حيث أن النظام فى الأكاديمية يمنع ذكر اسم
الأستاذ لعدم الاتصال به أو التأثير عليه.. أيها السادة الرؤساء.. أن
العالم المتحضر كله.. والمتخلف أيضاً.. ينظر لهذه التجربة باهتمام
شديد متمنياً نجاحها.. ونحن نعتد على اخلاصكم الذى لا نشك فى
وجوده لتحقيق حياة ديموقراطية هائلة سعيدة لسكان كوكبنا الصغير..
من أجل غد تختفى فيه الديكتاتورية.. وتصبح نقطة سوداء منقرضة
كديناصور قديم.. وفى محاضرة اليوم سنتحدث عن القوة.. والشرعية
(يكتب الكلمتين على السبورة).. وأبدأ حديثى فأقول، القوة لا تنتج حقاً
شرعياً.. حد من حضراتكم.. يعرف مين اللى قال الجملة دى؟
(كل منهم ينظر للأخر فى قلق.. طارق يرفع يده)..

البروفيسير : اتفضل..

طارق : روسو.. فى العقد الاجتماعى..

البروفيسير : صح..

(الجميع ينظرون لطارق فى شراسة وحقد)

طارق : (يعتذر لهم هامساً) .. أنا آسف .. آخر مرة ..
البروفيسير : وحتى إذا استخدم المجتمع كله القوة لوضع شخص ما فى السجن، فإن
هذا يعطى لنفس الشخص الحق فى وضع المجتمع كله فى السجن إذا
توافرت له نفس القوة ..

(ينظر لطارق)

البروفيسير : حضرتك عندك فكرة مين قال الكلام ده ..؟
طارق : للأسف لأ .. المفروض إن اللي قال الكلام ده .. جون ستيوارت مل .. بس
أنا ماعرفش ..
البروفيسير : صح .. وبذلك ..

(مؤثر موسيقى قوى يظهر معه حاكم جديد .. يغمى على احد
الموجودين فى نفس اللحظة التى يدخل فيها جورج ومعه
الحقيبة والكارت، يقوم بإفافة الشخص المغمى عليه ويعطيه
الحقيبة والكارت، يخرج رافعاً رأسه للسماء، متمتماً ببعض
الأدعية غير المسموعة ..).

البروفيسير : يعنى القوة لا تنتج حقاً شرعياً .. مهما حاول الأقوياء الادعاء بغير
ذلك .. ولقد أثبت التاريخ ويثبت دائماً أن هؤلاء الذين أتوا على أسنة
الرماح .. يذهبون على أسنة الرماح .. كما أن هؤلاء الذين يأتون على
أسنة الأرهاب .. ويذهبون غالباً على أسنة المخبرين .. كان لابد من هذه
المقدمة قبل أن ندخل فى موضوعنا الرئيسى وهو جمهورية أفلاطون ..

(يشرح بالمؤشر الصغير على لوحة الجسم البشرى)

البروفيسير : يرى أفلاطون أن تركيب المجتمع يماثل ويطابق تركيب جسم الانسان ..
فى أعلى السلم الاجتماعى .. الحكماء أو محبى الحكمة .. الفلاسفة
يعنى .. وهم يمثلون الرأس فى جسم الانسان .. ثم (يشير إلى الصدر) ...
القوى الغضبية .. ومكانها الصدر .. ودى طبقة الحراس .. اللى هى
القوات المسلحة فى العصر الحديث .. ثم بقية طبقات المجتمع .. وقد
أطلق عليها اسم القوى الشهوية .. أن هذا التقسيم .. (مؤثر موسيقى أكثر

قوة.. يظهر كاباكا.. يغمى على بونجو.. يدخل جورج ومعه
الحقيبة وتبدأ اللعبة.. دخول شخص ثم إغماء الشخص
الأخر.. وجورج والحقيبة.. تستمر اللعبة.. لا يكاد الواحد
فيهم يستقر على مقعده لحظات).

البروفيسير :من فضلكم.. من فضلكم.. خفوا شوية.. اهدوا.. يا جماعة لا بد من
الشرعية.. اللي بتعملوه ده لا يستند للشرعية.. ده شغل عافية..
(مستمرين فى لعبتهم)

البروفيسير :أرجوكم.. كفاية انقلابات.. عاوزين نشغل.. السنة خلصت ولسه
ماتعلمتوش حاجة.. عيب كده.. اهدوا شوية.. يا أسيادنا.. يا
حضرات.. استقروا شوية على الكراسى.. أرجوكم.. العالم كله
بيرجوكم.. باقول إيه.. ماتضطرونش أجيب قوات طوارئ أحطها فى
الفصل..

(تنتهى لعبة احتلال الأماكن، يستقرون فى أماكنهم.. وعلى
الحركة والموسيقى والإضاءة فى هذا المشهد الإيحاء بالمرور
الزمنى).

البروفيسير :من فضلكم.. بعد كده مش عاوز انقلابات أثناء المحاضرة بتاعتى..
عندكم الفسحة وعندكم الخمس دقائق اللي بين المحاضرات.. وعندكم
السبت والأحد أجازة..

(فجأة، كل أجراس التليفونات تدق ما عدا تليفون طارق،
يرفعون سماعات التليفونات ثم يضعونها وهم ينظرون لطارق
فى شماعة).

طارق : (يواجههم مبتسمًا).. عارف.. كل سنة وأنا طيب.. وانتم بالصحة
والسلامة.. (للاستاذ).. فعلاً يا بروفيسير.. عندك حق.. القوة لا تتج
حقاً شرعياً..

(طارق مرتبك، ولكنه يحاول مداراة ارتباكها باصطناع قدر من
المرح.. لكنه لا يتجح فى مداراة إحساسه بالصدمة).

.. بس صدقتى.. أنا ما وصلتش للحكم عن طريق القوة.. ما كانش
عندى قوة من أى نوع.. (لهم) .. شمتانين طبعاً.. ماتفرحوش قوى.. أنا
ماجيتش هنا على أسنة الرماح.. أنا جيت على أسنة الاذاعة
والتلفزيون.. (ينادى) .. فينك يا جورج.. أول مرة ما يظهرش.. أول مرة
جورج الجاهز.. مايقاش جاهز..

(يفتح الدرج ويلم أوراقه)

.. طبعاً لا فيه جورج.. ولا فيه شنطة.. ولا بيت صغير ولا حساب
سرى.. مالحقتش أعمل أى حاجة.. ماكانش عندى وقت.. وحتى لو
كان فيه وقت.. ماكنتش حاطع مليم بره البلد.. وده الفرق بينى
وبينكم.. وأدى النتيجة.. (بلهجة خطابية يدارى بها إحساسه باليأس
الضديد).. أدى النتيجة.. ها أنذا أواجه العالم بمفردى.. وليس معى
دولاراً واحداً.. عارياً.. طرزاناً.. فلا نامت أعين الجبناء.. هه.. واللّه
ما حد بيعرف ينام كويس إلا الجبناء.. بس يا ترى مين اللى حايستم
منى؟ مين اللى عملها فى..؟

(عايدة تظهر واقفة بجوار الكالوس، بعد دخولها للحظات
جورج يظهر عند الكالوس الآخر.. ذراع عايدة مريوط
بالشاش.. إصابة أخرى فى رأسها.. طارق منهولاً.. ينقل
بصره بينها وبين جورج).

جورج : (يهز راسه نفياً) .. لا العالم الثالث لسه ماجريش الحكاية دى... هو الـ
هو الانقلاب حصل فعلاً.. والخبر اللى جابته وكالات الأنباء صحيح..
بس الانقلاب أحبط..

طارق : أحبط؟

جورج : أيوه.. واللى قاموا بيه كلهم فى السجن دلوقت.. معايا كشف
بأساميههم.. شوية عيال من بتوع سنة تانية..

(يغمز له بعينه ثم يرفع إصبعه علامة النصر والحظ
الطيب.. جرس المدرسة ينى.. جرس تقليدى قديم.. المجموعة

كلها تخرج ماعدا طارِق وعائِدة.. يقترب كل منهما من الآخر

ليقفَا لحظَات في دائرة الضوء... ثم).

اختفاء تدريجي

المشهد الثانى

(ظهور تدريجى للإضاءة على الفور.. جورج يمسك بمفرش يضعه على أحد التخت ثم يضع عليه فاة بها زهور.. يحرك حبل فى الخلفية فتتزل ستارة رسم عليها بخطوط سريعة فرقة موسيقية أو مجموعة عازفين.. موسيقى جاز خافتة.. ينحن جورج امامها وهو يكتب فى نوتة وهمية.. ينصرف..)

عايدة : لما حكيت لك أخبار البلد.. ماكتتش عاوزاك تكتب كده.. طارق : يعنى.. بس صدقيني.. وده مش كلام للاستهلاك المحلى.. أنا حاكون سعيد أكثر لما تكلمينى عن أخبارك. عايدة : أخبارى هى أخبار البلد... طارق، أنا كذبت عليك لما قلت لك حصل لى حادثة.. أنا ماحصلش حوادث.. كل ده (تشير إلى إصاباتنا) من آثار فسخ الخطوبة.. طارق : قصدك إيه.. اتعرضتى لتعذيب؟ عايدة : لأ.. ولا حد جه جانبى.. أنا اتعرضت لعملية تهذيب فى المدرسة.. بمجرد ما أشيع خبر فسخ خطوبتنا.. مدرسة الرياضة رجعت تانى.. طارق : وبدأت تضريك؟ عايدة : مش لوحدها.. بدأت أنضرب فى كل المواد، ومن كل المدرسين.. كان فيه مدرسين بيتنقلوا مدرستنا مخصوص عشان يضربونى.. كل

الأجزاء اللى اتحذفت من مقرر الرياضة رجعت تانى.. وفوقها رياضة
بحثة على رياضة ذرية.. على مش عارفه إيه كمان..

طارق: مش ممكن.. مش معقول..

عايدة: فعلاً.. مش ممكن ومش معقول.. بس حصل..

(يدخل جورج ممثلاً دور الجرسون.. يبدأ فى وضع أطباق

وهمية على المائدة ثم يخرج.. يبدان فى تناول الطعام).

عايدة: مدرسة الجغرافيا ست بنت حلال قوى.. هى كمان انضمت للمصف
وقعدت تضرينى.. تضرينى بالنهار وتجلى البيت بالليل لابسة ملاية
ومغطية وشها.

طارق: ليه؟

عايدة: عشان تعيط وتقول لى سامحنى يا بنتى.. متهى لها لو ماضريتيش..
حايتهروها من عناصر الثورة المضادة..

طارق: فظيع..

عايدة: بدأت تحصل لنا مضايقات غريبة.. الماية ماتطلعلناش.. فى الدور
الثانى.. وتطلع لكل الأدوار اللى فوقنا.. فاتورة التليفونات جت لنا
وفها مكالمات زيادة بثلاثة آلاف دينار.. حتى الكمبيوتر اللى بيعسب
المكالمات ركب موجة النفاق.. أبويا راح يجدد رخصة السيارة.. دفع
ألف دينار مخالفات زيادة.. كل ما يركن السيارة فى مكان بيعجى الونش
يشيلها... يسيب اللى قدامها واللى وراها وياخذها هى..

طارق: انتى بتجسمى الأمور قوى يا عايدة.. مش جايز تكون دى كلها صدف سيئة..

عايدة: احتمال.. على العموم أنا باحكى لك اللى حصل..

طارق: وبعدين..

عايدة: ما استحملتش.. سبت المدرسة.. قعدت فى البيت.. ثانى يوم طلع
قانون يمنع البنات من ترك الدراسة.. وجه وزير المعارف بنفسه رجعتى
المدرسة.. بالمدرعات..

طارق: بالمدرعات؟

عايدة :مش عارفه إذا كانت مدرعات ولا سيارات مصفحة .. أنا كنت عند خالتي.. راح محاصر المنطقة وفتشها بيت بيت.. لحد ما لاقاني..
صدفة سيئة دى كمان؟

(طارق لا يستطيع الإجابة)

عايدة :بعث لك جوابات كثير .. واسترحامات وشكاوى..
طارق :ماو....

عايدة : (مقاطعة) .. ماوصلتكش.. وأنا باكتبها .. عارفة أنها مش حاتوصلك..
ودلوقت أنا مش باطلب منك أنك تصدقنى.. أو ماتصدقنيش.. أنا
باطلب منك أنك تحمينى.. مش بصفتى كنت خطيبك.. فى يوم من
الأيام.. لأ.. بصفتى مواطنة فى نظام انت مسئول عنه.. ومن حقى
أعيش حياتى فى هدوء بدون مضايقات على الأقل لأنى مش من
عناصر الثورة المضادة.. ومش مشتغلة بالسياسة أصلا..
طارق :عايدة.. أنا آسف لكل اللى حصل.. وأؤكد لك أنه مش حايجصل
تانى..

عايدة :حاتصدر بيان رسمى؟

طارق :لأ.. بيان شرعى.. حاعمل الحاجة اللى كان يحب أعملها من سنة..
ياالله بينا..

عايدة :على فين؟

طارق :على السفارة بتاعتنا هنا فى جنيف.. حاتكتب كتابنا .. من صلاحيات
السفير أنه يكتب كتابنا..

(يدخل جورج)

جورج :من حسن حظكم يا فندم أن الماذون بتاع بلدكم موجود فى جنيف..
بيتعالج.. وعندى فكرة إنه معزوم على العشا فى السفارة (ينظر فى
ساعته)... يعنى ممكن تلحقوه..

(يغمز له بعينه ويرفع إصبعه علامة التأييد... يخرجان فى
سعادة).

المشهد الثالث

(الفصل فى الأكاديمية.. كاباكا يدخل بخطوات بطيئة.. يتعثر فى سيره.. يستند إلى الجدران.. يبدو عليه أنه فى حالة ضياع شديد وكأنه فقد أعز ما يملك فى لحظة.. أو كأنه تعرض لصدمة عصبية مروعة).

(بعد لحظات يدخل جورج مسرعاً).

جورج : كاباكا.. تأكد أن كل مشكلة فى الدنيا لها حل.. ولا يهملك.. ماتضايقش نفسك.. هى صحيح مصيبة.. ومصيبة كبيرة قوى.. أول مرة تحصل فى التاريخ.. بس ممكن نتصرف..

(كاباكا يبتسم فى فرحة ثم يتحول وجهه إلى مسرح لانفعالات شتى.. يكتب ثم يبتسم، يكلم اشخاصاً دون أن يصدر عنه صوت.. ضائع تماماً.. يدخل البروفيسير).

البروفيسير : جورج.. الامتحان بعد عشر دقائق.. الأمم المتحدة بعثت الأسئلة ؟..

جورج : أبوه.. بس فيه مشكلة خطيرة جداً..

البروفيسير : خير؟

(يشير لكاباكا)

البروفيسير : ماله؟

جورج : حصل له شىء مؤلم..

البروفيسير : إيه؟

جورج :حب يعمل حركة اعلامية دولية قبل الامتحان.. حب يثبت أنه استفاد من الدراسة وأنه بقى ديموقراطى..

البروفيسر :من حقه.. ويعدين؟

جورج :سمح للمواطنين بالخروج من البلد.. بدون تأشيرة خروج..

البروفيسر :برافو.. كويس قوى.. ويعدين؟

جورج :شعبه كله خرج.. القرار طلع ثمانية بالليل.. وسبعة الصبح ماكانش فيه مخلوق فى البلد..

(كاباكا ينظر له فى ابتسامة سعيدة ويلهأ)

البروفيسر :بعد الامتحان مباشرة فيه حفلة التخرج.. الخبر ده لو وصل للناس.. الفرح بتاع حفلة التخرج حايتحول لمأتم.. ويبقى أسوأ دعاية ضد الأكاديمية...

طارق :وهو ده خبر يستخبى؟.. كل الجرايد والمجلات النهاردة بتتكلم عن الحكاية دى... المقال الرئيسى فى التايمز تحت عنوان «خرج ولم يعد».. فى الجارديان المقال الرئيسى تحت عنوان «الرجل الذى فقد شعبه»...

البروفيسر :مش قصدى الخبر ده.. قصدى خبر انهياره.. لازم العالم كله يعرف أنه مش نادم على القرار ده.. وإنه سعيد بيه.. وأنه واثق أن شعبه حايرجع له تانى.. وإن الديموقراطية عنده أهم من الحكم.. وأهم من وجود شعبه..

طارق :فعلاً.. الشعوب زائلة.. بس الديموقراطية، هى اللى باقية..

جورج :حاحاول معاه..

البروفيسر :أرجوك يا أخ طارق.. ساعدنا فى المسألة دى.. مش لازم يحضر الامتحان.. أنا حاكنتفى بدرجاته فى أعمال السنة.. بس لازم يقول خطبة فى الاحتفال.. أنا حاحضر له كلمة قصيرة.. ومطلوب أنه يقولها بثبات وسعادة حقيقية..

طارق :نحاول معاه..

البروفيسير : (وهو خارج) .. بسرعة .. أرجوكم ..

(إثناء المشهد، كان كاباكا منهمكاً فى إجراء حوار مع اشخاص

وهميين بدون صوت، طارق وجورج لا يعرفان من أين يبدآن).

طارق : (يقترّب منه فى ود) .. ما انت كمان تلاقيك كنت مقفل عليه قوى يا

كاباكا .. خرج يشم شوية هوا .. وحاي رجع على طول .. حايروح فين

يعنى؟ ولا يهكم ..

(لا استجابة من كاباكا)

جورج : شوف يا كاباكا عزيزى .. أنا كنت عاملها لك مفاجأة .. لكن حاقول لك

ببقى .. شعبك كله موجود هنا فى سويسرا .. جه عشان يحضر

الاحتفالات بتخرجك .. من فرط حبه ليك .. وبعد ما تاخذ

البكالوريوس، حايروح معاك .. أنا أتعهد إنه حايروح معاك ..

طارق : طب بلاش جورج .. تثق فى أنا يا كاباكا .. أنا حاروجهولك بنفسى ..

حاصلهلوك لحد البلد ..

(كاباكا ذاهلاً عما حوله)

جورج : (هامساً لطارق) .. مانفعتها دى ..

طارق : طب اسمع يا كاباكا .. اتحلت .. حانكلم لك زمايلك .. لو كل واحد منهم

اتبرع لك بخمسين ستين ألف مواطن .. حايبقى عندك شعب كويس

قوى ..

جورج : الامتحان حايبتدى يا كاباكا .. أرجوك .. (يلجأ للغضب المفتعل) إيه يعنى

شعب يا أخى؟ فى ستين داهية .. صدقتى وجوده زى عدمه .. كان

بيعمل لك إيه يعنى؟ كان جايب لك الكلام والحديث .. كل ما تشنق

حد .. يقعدنوا يشتموك فى أوروبا .. ده أنا افكرتلك حاتفرح ..

طارق : زحمة على الفاضى .. دلوقت هناك هو .. أنا لو منك أروح أحكم فى

الرواقه .. صدقتى يا كاباكا شعبك هو اللي خسران فى الحكاية دى ..

جورج : فعلاً .. ولو لف الدنيا كلها ما حيالاقى حد زيك .. أنت راجل عملت اللي

عليك .. هو اللي مالوش فى الطيب نصيب ..

طارق : (يفتعل فرحة كبيرة وكأنه وجد الحل).. بس.. لقيتها .. سيب الحكاية دى
على الله وعلى..

جورج : (يجاربه فى الفرحة) .. حاتمعل إيه..؟

طارق : حاكمل له الشعب السويسرى يروح بداله .. انت عارف الناس هنا ظراف
جداً .. ويحبوا يخدموا الغريب.. ولا يمكن يتأخروا فى طلب زى ده...
وحاخليك تتقى بنفسك...

(يريت على كتفه، يكاد يحتضنه)

طارق : بس تعاملهم كويس يا كاباكا يا حبيبى.. هه.. ماتقفلش عليهم قوى..
شوف.. أنا ممكن أبعت لك شعبى.. بس رزل قوى.. وحايضايك..

(لا امل فى استعادة عقل كاباكا)

جورج : أروجوك .. اصرخ.. عيط.. زعق.. أطم.. اعمل أى حاجة .. أخرج من
الحالة اللى أنت فيها ماتستسلمش للجنون..

(لا امل .. جورج ينظر لطارق فى ياس)

طارق : لا امل.. نهاية حزينة لتمساح شرس أهبل.. يا أهبل.. يا أهبل.. فيه
تمساح ديموقراطى زيك يطلع قرار زى ده وينفذ.. القرار حايطلع فى
صحافة العالم كله.. وماتنفذوش.. تدى اشارة شمال، وتدخل يمين..
تقول حاتمشى لقدام، وترجع لورا .. يبقى ابنك على كتفك وتدور
عليه؟

جورج : ده انت فهمت المقرر كويس قوى..

طارق : طبعاً .. أنا فهمت حاجات كثير جداً..

(جورج يرفع سماعة التليفون ويطلب رقماً).

جورج : جهزوا لى الأوضة اللى بتطل على البحيرة.. شخص شديد الأهمية..
لا .. مش جنون خطر.. هى صدمة.. صدمة شعبية.. تؤ .. مش نزلة
شعبية.. صدمة شعبية..

(يضع سماعة التليفون)

جورج : قوم معايا يا كاباكا..

(كاباكا لا يستجيب.. يسحب جورج من يده كالطفل ويخرج به بهدوء).

طارق : جورج..

(جورج يستدير، طارق يشير بأصبعه لأسفل إشارة الهزيمة.. يخرج.. يدخل بقية الطلبة ويجلسون فى أماكنهم.. يدخل البروفيسير).

البروفيسير :أيها السادة.. بعد لحظات توزع عليكم أوراق الأسئلة.. وفى هذا المساء سوف تجتمع نخبة من أكبر أساتذة العلوم السياسية فى العالم كله لتصحيح أوراق الامتحانات.. وغدا فى الاساتذ الكبير يجرى الاحتفال بتخريج الدفعة الأولى من الحكام العسكريين الديمقراطيين.. وبذلك تبدأ صفحة جديدة فى التاريخ..

(جرس المدرسة، يدخل جورج ومعه أوراق الأسئلة، يضعها أمام كل منهم.. يقرأون الأسئلة، كلهم يصابون بصدمة، من الواضح ان الأسئلة صعبة، يبدؤون فى اعتصار أذهانهم بشكل مبالغ فيه، طارق يجيب فى هدوء وسرعة.. يبدؤون فى إخراج البرشام من تحت الكابات ومن داخل الجوارب.. ويبدؤون فى إخراج الكتب من داخل القمصان يتنبه طارق).

طارق :الله.. إيه اللى بيحصل؟

البروفيسير :فيه حاجة يا سيد طارق..؟

طارق : حضرتك مش شايف..؟

البروفيسير :الحاكم العظيم هو الذى لا يتدخل فى شئون الآخرين.. خليك فى نفسك..

طارق :أيوه... بس دى..

(احدهم يخرج مسنماً يضعه أمامه.. يتبعه الآخرون.. يضعون أمامهم المسندات والسكاكين والمطاوى.. والقنابل اليدوية.. وأصابع الجلجنايت).

طارق : (يتراجع).. دى حرية طبعاً.. كل واحد حر طبعاً.. يجاوب بالطريقة اللى عاوزها.. دى حرية شخصية.. أنا آسف..
(ينتهون من الإجابة.. يقومون واحداً بعد الآخر بتسليم الأوراق).

طارق : طبعاً أنا أغبى واحد فيهم.. لأنى لسه ماسلمتش الورقة.
(يتوقف عن الكتابة قليلاً)
طارق : بروفيسير.. فى الامتحان اللى من النوع ده.. من الأفضل للانسان..
أنه يثبت أنه مذاكر المقرر؟.. ولا يثبت إنه انسان شريف..؟
البروفيسير : على الانسان أن يكون شريف فى كل الأحوال..
طارق : عندك حق.. (يقرا).. ماهو تقييمك لمناهج الدراسة فى الأكاديمية..؟
(يجيب).. حق يراد به باطل.. خدعة مدهونة ديموقراطية من أجل
تثبيت الديكتاتورية فى أنحاء العالم الثالث.. كده.. يبقى ضمنت آخذ
صفر.. اتفضل..

(يقدم ورقة الإجابة للبروفيسير)
البروفيسير : بالعكس.. الاجابة دى بتثبت أنك إنسان شريف.. وحاكم ديموقراطى
فعالاً.. وتضمن لك امتياز مع مرتبة
(جرس المدرسة، اختفاء تدريجى، على الفور نستمع لموسيقى
مهرجانات واحتفالات عالية.. يغلب عليها طابع الآلات
النحاسية).

المشهد الأخير

(يبدأ زملاء طارق فى الدخول، أحمد، إبراهيم.. إلى آخر المجموعة، يرتدون ثياباً مدنية أنيقة ويحملون باقات ورد).

إبراهيم : كويس كده.. حانعمل إيه دلوقت.. حانحضر الاحتفال إزاي؟
أحمد : نتصل بالحكومة السويسرية تشوف لنا هليكوبتر يودينا..
أسامة : هو انت النهارده تعرف تتصل بحد.. البلد كلها مقلوبة..
خليل : العطلة دى كلها منك انت يا حسن.. لميت الناس وركبتها عربيات نقل..
وعلى آخر لحظة اكتشفت أن مالناش حدود مع سويسرا.. مش كنت
تسأل.

حسن : أسأل مين؟.. أسألك أنت؟.. ده أنت اللي لميت الناس فى الأول
وحطيتهم فى المراكب.. وفين وفين لما اكتشفت أن سويسرا ماعندهاش
بحر..

خليل : الله.. بلد مالهاش موانئ على البحر.. يبقى العيب فى أنا ولا فى سويسرا؟
أحمد : إحنا مش جايين نتخانق.. حانحضر الاحتفال إزاي؟
مرسى : مش لازم نحضره.. نتابعه فى أى تليفزيون..
سعد : خلاص.. روح أنت و خليل اصطادوا لنا تليفزيون.. بس بسرعة..
(مرسى و خليل يخرجان)

أحمد : إحنا بقى نوضب الفصل.. ونقعد نتفرج هنا.. (لزملائه).. باقول إيه..
الله الله على الجد، والجد الله عليه.. اسمعوا.. إحنا كلنا فى الهوا

سوا.. أى حد منكم يفلط بكلمة.. حافظش كل حاجة.. كله تمام.. فاهم
انت وهو.. اللى حايجيب سيرة الطيارات حايجيب له سيرة العمارات..
واللى حايجيب سيرة الأتوبيسات، حايجيب له سيرة المراكب.. واللى
حايجيب سيرة الحسابات اللى فى البنوك.. حايجيب له سيرة
الحسابات الجارية والنايمة والقاعدة..

ابراهيم : جرى إيه بابو حميد... وهى دى حاجة نتكلم فيها؟

أحمد : باقول يعنى... وتقهمو خلیل ومرسى..

سعد : هم فاهمين كل حاجة.

أحمد : طارق دلوقت حاكم شرعى معترف بيه من الدنيا كلها.. وحاصل على
بكالوريوس فى الديمقراطية بامتياز مع مرتبة الشرف الأولى.. يعنى
ممكن يسجننا كلنا ولا يهमे والدنيا كلها تقف وراءه..

(يدخل خليل ومرسى ومعهما تليفزيون كبير موضوع على

مائدة تتحرك على عجل، يضعان التليفزيون فى وضع يتيح

لهم جميعاً رؤيته.. ويحيث يصبح ظهره للمتفرجين، يضعان

توصيلة الكهرباء فيرتفع صوت المذيع).

المذيع : أيها السادة فى كل أنحاء الدنيا.. أحييكم من الامتداد الكبير فى
جنيف.. حيث امتلأت المدرجات بمئات الألوف من البشر الذين جاؤوا
من كل أنحاء المعمورة، يحتفلون بزوال وجه الديكتاتورية البغيض.. إنها
المررة الأولى فى التاريخ التى يجتمع فيها كل هذا العدد من الملوك
والرؤساء.. والمفكرين والفلاسفة والفنانين..

مرسى : صوفيا لورين دى؟

حسن : أيوه..

خليل : واللى جنبها ده عمر الشريف؟

أحمد : كارتري يا غبى..

المذيع : إنها الفرحة الكبرى.. أعضاء الحكومة الأمريكية وأعضاء الحكومة
السوفيتية يجلسونوا حكام العالم الثالث..

سعد :ده بيحضنوه قوى.. حايكسروا ضلوعهم.
المدنيح :الجو النهارده فى جنيف جميل جداً.. كما لو كان بيحتفل معنا..
والشعب السويسرى منامش طول الليل إيمارح.. فرحان بيرقص فى
الشوارع.. والنظام داخل الاستاد بديع جداً.. ومدير الأمن السويسرى
عمل اللى عليه.. ومن حقه علينا.. إننا نوجه له الشكر.. كما مانتساش
السيد رئيس الهيئة العامة لـ..... الشاب اللى ظاهر فى الصورة هو
طارق الرئيس.. اللى طلع الأول على الدفعة.. شايفين الورد اللى قدامه
قد إيه.. كثير قوى.. لو الكاميرا حبت تستعرضها.. حاتقعد شهر..
ورد من كل أنحاء العالم.. هو اللى حايطخط دلوقت.. حايقول كلمة
الدفعة.. والأقمار الصناعية حاتنقل كلمته لكل سكان العالم.. أهو...
الكاميرا جايباه وهو قايم رايح على المنصة الرئيسية قدام
الميكروفونات.. والكاميرات.. بيخوض فى أمواج من آلاف البشر.. لكن
رجال الأمن السويسرى.. عاملين حسابهم.. مضبوطين قوى.. وإحنا
بنشكرهم.. و.. (هجة).. سادتى.. سادتى..

(صياح شديد، يظلم المسرح، ثم يظهر طارق فى بقعة
ضوء بعيدة وأمامه المايكروفونات وخلفه علم الأمم
المتحدة).

طارق :يا سكان الأرض.. يا سكان الأرض..

(يهدأ الصياح)

يا سكان الأرض.. أحبيكم.. (لحظة).. بعضنا يصل للحكم بدافع من
الاحساس العميق بالوطنية.. وعدد كبير منا يصل إليه بدافع من
المغامرة وعشق الخطر.. وأعتقد أننى أنتمى للتنوع الأخير وكلنا نعتبر
أنفسنا ثواراً، وكلنا نتمنى لشعوبنا الصلاح والفلاح.. والذى ننجح فيه
غالباً هو العودة بشعوبنا للوراء.. ولذلك نبعت الحاجة لأكاديمية حكم
الشعوب، نتعلم فيها الديموقراطية ثم نعود لنعطيا لشعوبنا فتتحل
المشكلة وتنامون مرتاحى البال والضمير.. وفكرة إنشاء المعهد بحد

ذاتها نبيلة، وهى ككل الأفكار النبيلة تولد فى عقول الأنبياء ويسرقها
للصوص والفتوات..

منذ بهز المعر.. الله.. مش دى الخطبة اللى كتبناها له..

طارق :غير أننى والحق يقال، لم اكتشف ما اكتشفته إلا بعد التحاقى
بالأكاديمية لقد أتيت لى فرصة ذهبية للتعرف عن قرب بزملائى
الأعزاء الذين يحكمون قطعة كبيرة من الأرض حكماً عسكرياً.. رأيتهم
فى نفسى، ورأيت نفسى فيهم وبدأت أشعر بالخجل منهم ومن نفسى..
وبدأت أبعاد الخدعة كلها تنكشف.. الديموقراطية لا تدرس.. ولكنها
تمارس.. وليس هناك حاكم ديموقراطى وآخر غير ديموقراطى..
هناك حياة ديموقراطية وأخرى غير ديموقراطية..

والديموقراطية لا تصنعها المعاهد أو حسن النوايا.. ولكن تصنعها
الشعوب.. بأن تصر عليها وتموت من أجلها.. وأنتم يا من تنعمون
بالديموقراطية فى بلادكم، يا من تعتقدون أن التخلف والفقر
والديكتاتورية شئ جدير ولائق بنا فقط بدافع من الاحتقار.. وهو كما
تعلمون خطيئة - أقول لكم، لستم بعيدين عنا.. والعنف فى طرقات
مدنكم هو امتداد للعنف العقلى الذى تفرضونه علينا فى أوطاننا..
وذلك عندما تتجاهلون أن الناس سواسية كأسنان المشط وهذا شرط
أصيل فى الديموقراطية..

وهذا الذى تصنعونه الآن هو خدعة، تضاف للخدع التى تلعبونها على
بلادى.. العالم الثالث.. والذى أصبح بفضل ألعابكم الشيطانية عالماً
رابعاً وخامساً وسادساً وسابعاً... فأنتم تنتهزون الفرصة دائماً لدفعه
لآخر الصف، بعيداً عن الكبرياء والكرامة الإنسانية..
وأنا أعلن أمامكم رفضى لهذه الخدعة.. وأقدم استقالتي.. وأطلب من
زملائى العسكريين فى العالم كله.. أطالبهم بحق الشرف العسكرى..

صوت :اقطع الارسال..

(تختفى صورته ثم تظهر لوحة مكتوب عليها ناسف لقطع الإرسال).

المنذبح :أيها السادة .. فيه عاصفة رعديّة عطلت الارسال في كل الأعمار
الصناعيّة .. والظاهر كمان السيد طارق تعب فجأة أو جاله كرامب ..
لأنّ شايف رجال الأمن السويسرى شاييلينه ويبخطوه فى طيارة
هليكوبتر .. سليمة انشاء الله ..

(تختفى اللوحة .. تعود إضاءة المسرح لما كانت عليه).

ابراهيم :طارق اتجنن ..

أسامة :لأ .. ماتجننش .. هو مجنون من الأول، قلت لكم كده ماصدقونيش ..
أحمد :يا جماعة أنتم حاتحجروا على حريته؟ .. إحنا ناس ديموقراطيين .. من
حقه يستقيل ..

سعد :والحل إيه دلوقت؟ ..

أحمد :هو فيها حل .. نقبل الاستقالة ...

مرسى :ونختار مين؟

أحمد :نختار مين؟ .. نختارونى طبعاً ..

خليل :لأ .. مش حانقبل الاستقالة ..

ابراهيم :أنا معاك .. هو تلافيه قال كده فى لحظة نشوة .. بس لما يبجى ..
حانعقله ..

حسن :نشوة إيه؟ .. فيه واحد يحس بالنشوة يقوم يستقيل ..

ابراهيم :طبعاً .. أصل طارق ده فنان .. لما شاف الكاميرات والناس حب يعمل
حاجة عظيمة، راح مستقيل .. لو أنا مطرحه أعمل كده ..

(طارق يدخل، ويمتد لحظة دخوله يزداد إيقاع المشهد إلى

أقصى درجة).

طارق :سلام عليكم ..

الجميع :وعليكم السلام ورحمة الله وبركاته ..

(ينظر لهم ولا يجد ما يقوله، يستدير ليخرج)

طارق :سلام عليكم ..

سعد :الله .. طارق .. رايح فين؟

طارق : خلاص..

ابراهيم : كل حاجة خلاص.. ماشى..

اسامة : ماشى رايع فين؟.. هو لعب عيال؟

طارق : إسمعوا يا جماعة.. مفيش داعى نخدع نفسنا.. مش حانعرف نعمل

حاجة.. لازم نسيب الحكم للمدنيين.. مش عاوزينى أمشى.. خلاص..

كلنا نرجع الثانوية العسكرية.. ترجع مكاننا الطبيعي.. سنة أولى..

ابراهيم : (يهمس جانباً فى ذهنه).. يا نهار اسود.. نرجع تانى؟

احمد : واللى خدناه؟

سعد : مفيش حد يعرف يرجع الزمن لورا يا طارق.. أنت ممكن تعمل حاجات

كثير قوى.. حاجات كثير جداً..

طارق : زى؟

سعد : آلاف المصانع.. نزرع ملايين الفدادين.. نبني آلاف المدارس ونعلم كل

الناس..

طارق : وعشان أعمل كده وأرسيه وأرسخه فى الأرض، لازم أعيش خمسمائة

سنة.. وأنا مش حاعيش خمسمائة سنة.. لكن الشعوب بتعيش..

خمسمائة وألف.. وللأبد.. هى اللى تعمل الحاجات دى..

اسامة : أبوه يا طارق، بس انت عارف أن شغبنا..

طارق : (مقاطعاً).. آه.. قاصر؟.. مش حايعرف يعمل الديموقراطية؟.. يبقى

مايستحقهاش، ومايستاهلهاش.. وعليه أنه يموت ويندثر.. مش

حايبقى أول شعب اندثر فى التاريخ.. يا جماعة افهمونى.. الحكم مش

مكاننا.. ومش شغلتنا.. مهمتنا أنبل مهمة فى التاريخ.. حماية

الآخرين.. الموت من أجل حياة الآخرين.. فيه أعظم من كده فى

الدنيا..؟ انتم عاوزين تدخلونا بيت جحا وملاعيب شيعه؟.. ليه.. لازم

نحتل مكاننا الطبيعي.. خليك معايا.. (يشير بصورة الجسم البشرى)..

شوفوا الجسم اللى قدامكم ده.. شوفوا قد إيه جميل.. وقد إيه قوى،

لأن كل حاجة فى مكانها.. وكل حاجة بتقوم بوظيفتها.. إحنا هنا.. ده

مكاننا (يشير للصدر).. عاوزين تعرفوا لما بنحك جسم البلد بيبقى شكله
إيه؟ أهو..

(الصورة مرسومة على مريعات خشبية، ينزع مكان الصدر
ويضعه فى أعلى الجسم فيصبح الرأس فى المنتصف).

طارق :وبعد شوية، يبقى كده..

(الرأس الآن فى أسفل الجسم)

طارق : الدنيا كلها شايفانا كده دلوقت.. وبيتعاملوا معنا على هذا الأساس..

أسامة : انت جاي دلوقت تقول لنا الكلام ده..؟

طارق : أيوه.. عشان أنا..

(يدخل جورج فى أقصى حالات الغضب، يمسك بمخدة

صغيرة.. يلقيها على المسرح فى غيظ).

جورج : إيه يا سيدى؟.. إيه يا خويا؟.. انت عملت دربكة فى النظام العالمى

كله.. اضطرابات فى افريقيا توتر فى أمريكا الجنوبية.. سوق العملة

اتبهدل.. الدولار وقع.. الاسترلىنى اتنيل.. انت مقدر خطورة اللى

عملته؟

طارق : من فضلك أنا مش عاوز أوصياء على.. وماتكلمنيش باللهجة دى..

جورج : ما اكلمكش باللهجة دى؟.. بعد كل اللى عملناه عشانك؟

طارق : اخرس.. انت عاوز توحى لزمائلى انكم عملتونى..؟

جورج : لأ.. بعبريتك.. بذكائك.. بقدراتك الذاتية.. طالب فى سنة أولى

ثانوى عسكرى يمسك بلد.. تصدقها انت؟.. كل خطوة من اللى حصل

معمول حسابها بالكمبيوتر.. أنا عاوزك تفكر وتسترجع الأحداث

كويس.. الخدمة فى الليلة إياها كانت عليكم.. على سنة أولى (يشير

للشخصيات).. خليل واقف على السور الغربى.. مرسى، على السور

الشرقى.. حسن على السور البحرى.. حاشوفوا التلات عربيات

والتلات خواجهات.. لازم ييجوا يحكوا قدامك وقدام أحمد.. رابعة

وثالثة وثانية لابسين طوارئ والسلاحليك مفتوح.. الكمبيوتر عارف

درجة ذكائك بالضبط.. حاتستنتج إن فيه ثلاث انقلابات.. معروف
أحلام أحمد تميلب.. ومعروف أنه غير قادر على التخطيط والقيادة..
وأنه حايستثير غرورك وحيك للمغامرة.. بعد كده إحنا مهدنا لكم
الطريق لكل حاجة.. مؤامرة أسامة إحنا اللي كشفناها.. لك..
وأحبطنا لك خمستاشر انقلاب.. فوق.. أوعى تتصور يا أخ طارق أن
فيه حاجة اسمها الصدفة على الكرة الأرضية.. أى حاجة بتحصل يوم
الخميس متخطط لها من يوم السبت اللي قبله.. طارق.. اطلب أى
حاجة.. احنا ممكن نساعدك بأى حاجة..

طارق : (يصمت لحظات).. جورج.. أنا عاوزك تساعدنى بحاجة واحدة بس..
مانورينيش وشك تانى.. وأرجوك روح قول للكمبيوتر.. أن فيه واحد قال لأ..
(جورج ينهار على أحد الكراسي)

(تدخل عايده)

عايده : أنا جاهزة يا طارق.

طارق : وأنا جاهز يا حبيبتي..

عايده : حانروح فين؟

طارق : ماعرفش.. لكن أكيد حانلاقى مكان.. مكان لسه ماوصلوش الكمبيوتر..

طب بعد إذلك يا طارق.. حانتقاهم فى المسألة دى..

أحمد : اتفضلوا.. وأتمنى لكم حظ طيب..

طارق : (يخرجون بسرعة شديدة.. على الفور نستمع لطلقات رصاص

متفرقة).

عايده : إيه ده..؟

طارق : بيتقاهموا.. وهى دى طريقة التقاهم الوحيدة اللي بيعرفوها.. يالله بينا..

(يضع يده فى يدها فى طريقهما للخروج، قبل أن يخرج

يلتفت لجورج، يغمز له بعينه ويشير بإصبعه لأسفل علامة

الهزيمة.. تثبت الصورة.. ببطء شديد تنزل...).

الستار

الفهرس

• عفاريت مصر الجديدة..

٥	كوميديا ساخرة فى ثلاثة فصول
٧	الشخصيات
١١	الفصل الأول
٢٥	المشهد الثانى فى قسم البوليس
٤١	الفصل الثانى
٦٣	الفصل الثالث
٨٠	المشهد الأخير

• انت اللى قتلت الوحش

٨٧	الشخصيات
٩١	الفصل الأول
٩٣	الفصل الثانى
١١٥	المشهد الأول
١١٥	المشهد الثانى
١١٩	المشهد الثالث
١٢١	المشهد الرابع
١٢٤	المشهد الخامس
١٢٧	المشهد السادس
١٢٨	المشهد السابع

١٣٧ الفصل الثالث
١٣٧ المشهد الأول
١٤٦ المشهد الثاني
١٥٣ المشهد الثالث

١٥٧ • عملية نوح
١٥٩ الجزء الأول
١٥٩ المشهد الأول
١٨٠ المشهد الثاني
١٨٦ المشهد الثالث
١٩١ المشهد الرابع
٢٠٥ الجزء الثاني
٢٠٥ المشهد الأول
٢١٣ المشهد الثاني
٢٢٠ المشهد الثالث
٢٣٦ المشهد الأخير

٢٤١ • بكالوريوس في حكم الشعوب
٢٤٣ الفصل الأول
٢٤٣ المشهد الأول
٢٥١ المشهد الثاني
٢٧١ المشهد الثالث
٢٧٥ الفصل الثاني
٢٧٥ المشهد الأول
٢٨٨ المشهد الثاني
٢٩٠ المشهد الثالث

٣٠٩ الفصل الثالث
٣٠٩ المشهد الأول
٣٢١ المشهد الثاني
٣٢٤ المشهد الثالث
٣٣٠ المشهد الأخير

منافذ بيع

الهيئة المصرية العامة للكتاب

مكتبة ساقية

عبد المنعم الصاوى

الزمالك - نهاية ش ٢٦ يوليو

من ابو القدا - القاهرة

مكتبة المعرض الدائم

١١٩٤ كورنيش النيل - رملة بولاق

مبنى الهيئة المصرية العامة للكتاب

القاهرة - ت : ٢٥٧٧٥٣٦٧

مكتبة المبتديان

١٣ش المبتديان - السيدة زينب

امام دار الهلال - القاهرة

مكتبة مركز الكتاب النولى

٣٠ ش ٢٦ يوليو - القاهرة

ت : ٢٥٧٨٧٥٤٨

مكتبة ١٥ مايو

مدينة ١٥ مايو - حلوان خلف مبنى الجهاز

ت : ٢٥٥٠٦٨٨٨

مكتبة ٢٦ يوليو

١٩ ش ٢٦ يوليو - القاهرة

ت : ٢٥٧٨٨٤٣١

مكتبة الجزيرة

١ ش مراد - ميدان الجزيرة - الجزيرة

ت : ٣٥٧٢١٣١١

مكتبة شريف

٣٦ ش شريف - القاهرة

ت : ٢٣٩٣٩٦١٢

مكتبة جامعة القاهرة

بجوار كلية الإعلام - بالبحر الجامعى -

الجزيرة

مكتبة عرابى

٥ ميدان عرابى - التوفيقية - القاهرة

ت : ٢٥٧٤٠٠٧٥

مكتبة رادوييس

ش الهرم - محطة المساحة - الجزيرة

مبنى سينما رادوييس

مكتبة الحسين

مدخل ٢ الباب الأخضر - الحسين - القاهرة

ت : ٢٥٩١٣٤٤٧

مكتبة أكاديمية الفنون

ش جمال الدين الأفغانى من شارع

محطة المساحة - الهرم

مبنى أكاديمية الفنون - الجيزة

ت : ٣٥٨٥٠٢٩١

مكتبة الإسكندرية

٤٩ ش سعد زغلول - الإسكندرية

ت : ٠٣/٤٨٦٢٩٢٥

مكتبة الإسماعيلية

التعليك - المرحلة الخامسة - عمارة ٦

مدخل (١) - الإسماعيلية

ت : ٠٦٤/٣٢١٤٠٧٨

مكتبة جامعة قناة السويس

مبنى الملحق الإدارى - بكلية الزراعة -

الجامعة الجديدة - الإسماعيلية

ت : ٠٦٤/٣٣٨٢٠٧٨

مكتبة بورفؤاد

بجوار مدخل الجامعة

ناصرية ش ١١ ، ١٤ - بورسعيد

مكتبة أسوان

السوق السياحى - أسوان

ت : ٠٩٧/٢٣٠٢٩٣٠

مكتبة أسيوط

٦٠ ش الجمهورية - أسيوط

ت : ٠٨٨/٢٣٢٢٠٣٢

مكتبة المنيا

١٦ ش بن خصيب - المنيا

ت : ٠٨٦/٢٣٦٤٤٥٤

مكتبة المنيا (فرع الجامعة)

مبنى كلية الآداب - جامعة المنيا - المنيا

مكتبة طنطا

ميدان الساعة - عمارة سينما أمير - طنطا

ت : ٠٤٠/٣٣٣٥٩٤

مكتبة المحلة الكبرى

ميدان محطة السكة الحديد

عمارة الضرائب سابقاً

مكتبة دمنهور

ش عبدالسلام الشاذلى - دمنهور

مكتبة المنصورة

٥ ش الثورة - المنصورة

ت : ٠٥٠/٢٢٤٦٧١٩

مكتبة منوف

مبنى كلية الهندسة الإلكترونية

جامعة منوف

بمصر توجد مضحكات كثيرة، ولكنه كما يقول المتنبي ضحك كالبكا. هذا هو بالضبط ما يميز مسرح على سالم، كل ما هو مضحك فيها يخفى مصدرا أكيدا للألم. ستجد ذلك واضحا في أوديب "انت اللى قتلت الوحش" التى عرضت منذ حوالى أربعين عاما تقريبا والتى كان يحذر فيها من حكم الفرد المتسلط، ومدى ما يمكن أن يحدثه من خراب فى أرواح البشر، كما ستجده أشد وضوحا فى بقية مسرحيات هذا الكتاب، إنها مسرحيات قديمة غير أنها طازجة وكان أحداثها ما زالت تحدث بالفعل، حتى الآن مازلنا نحارب عفاريت مصر الجديدة الذين يخفون الناس فى أماكن لا نعرف عنها شيئا، وما زلنا حتى الآن نبحث عن طريقة فى الحكم تنقذ مصر من الغرق وتضمن أن تتولى أفضل عناصرها قيادتها وهو ما كان يحلم به بطل مسرحية عملية نوح. كما أننا ما زلنا نبحث عن حكام مؤهلين حاصلين على بكالوريوس فى حكم الشعوب وليس عن حكام هواة أوصلتهم الصدفة إلى الحكم.

والمسرح عند على سالم زواياها الثلاثة هى، البهجة والهم والاهتمام، وإذا كان من السهل على الكتاب أن يهتموا وأن يركبهم الهم من أجل قرائهم، غير أن كتاب المسرح مطالبون بما هو أكثر، وهو البهجة.. هذه مسرحيات ضاحكة وحزينة غير أنها بالتأكيد مبهجة.

Bibliotheca Alexandrina



1032798



١٥ ج

الهيئة المصرية

ISBN# 9789774214200



6 221149 020795